

# Ekwo

## Ebvu-oma

---

### Ebvu-oma 1

- 1 Ehu-utso be a goru nu onye  
ono,  
yee ndu ejo-iphe ta achidu  
idzu lanu;  
ophu ooshiswetajedu uzo  
ndu iphe-eji;  
ophu o nodujedu l'eka ndu  
epfubyishi ke Chileke no;
- 2 mbu onye buepho iphe,  
aduje iya ree bu ekemu  
Chipfu;  
o buru ekemu Chipfu ono  
be onoduje ari l'oriri eswe  
l'enyashi.
- 3 Onye ono du g'oshi,  
e yeru l'aguga nggele;  
o nodu ami mebyi  
l'orwuberu iya;  
ophu ekwo iya  
anwulwashihujedu  
anwulwashihu.  
Iphe, bukpo iphemiphe,  
oome abujeeru iya pho  
upete.
- 4 Obenu lo to budu egube  
ono be odujeru ndu  
ejo-iphe.  
Ephebedua du geswa ereshi,

pherephere anoduje  
ezikashi ezikashi.

- 5 Oo ya bu le ndu ejo-iphe be  
ikpe Chileke a-nma;  
ophu oodobedu ndu iphe-eji  
leka ndu pfuberekoto no.
- 6 Noo kele Chipfu aboru ndu  
pfuberekoto uzo;  
obenu l'uzo ke ndu  
ejo-iphe e-me;  
ephe aburu mkpurupyata.

## Ebvu-oma 2

- 1 ?Bu gunu kparu iphe,  
ohamoha gude  
ehu-eghu aba hanyihanyi?  
?O nwuru inwu-agma be  
ndiphe achi ejo idzu,  
enwedu ishi?
- 2 Ndu eze, bu ishi ndiphe  
akwakobe k'ogu;  
ndu-ishi dzukobe;  
g'ephe tsoo Chipfu ugu;  
tsokwapho onye ono,  
o hotaru g'o buru eze  
ono ugu.
- 3 Ephe suru: "Unu g'anyi  
nyakashia mkporo ono,  
ephe gude tugbabe anyi ono!  
Unu g'anyi gbabushia  
egbirigba ono,  
ephe gude kee anyi  
egbu ono."
- 4 Olobuele-a ochi be onye ono,  
sugaru l'aba-eze iya  
l'imigwe ono achije phe;  
mbu l'oo ochi be onoduje  
ezi Nnajiuphu.
- 5 O -nonyaepho l'o gbanwube  
iphu pfuaru phe opfu  
ehu-eghu;

- l'o gude oke ẹhu-eghu iya  
mee gẹ ndzụ rwuta phẹ.
- 6 Ọo-sụ phẹ: “Mu gudewaa  
ẹka mu mee onye mu  
họtaru;  
g'ọ bụru eze l'úbvú Zayọnu;  
mbụ úbvú ono,  
mu doberu nsọ ono.”
- 7 Onye ọbu, ọ họtaru ọbu sụ:  
“Mu e-wotaẹpho  
ekemu Chipfu tụa jala.  
Noo kele Chipfu sụwaru mu;  
Ọo ngu bụ Nwa mu.  
E -shi ntanụ-a bẹ mu  
bụakwaa Nna,  
nwuru ngu nụ.
- 8 Mu e-woerupho ọha l'ophu  
nụ ngu g'ọ bụru  
okiphe ngu.  
Mu e-woru mgboko l'ophu  
nụ ngu g'ọ bụru alị-ihe ngu;  
m'ọ bụru l'ị rwo ru mu iya.
- 9 Ọ bụru mgborígwe bẹ ii-gude  
bụru ishi phẹ;  
gude iya kua phẹ pyaapya  
g'ite urwa.”
- 10 Ọo ya bụ; unubẹ ndu  
bụkwanu eze;  
unu kwakwaa ẹnya!  
Unubẹ ndu-ikpe ke  
mgboko-a; unu ngabekwa  
nchị l'okwa ono,  
aanmaru unu ono!
- 11 Unu gudekwa ndzụ-agugu  
wata ejeru Chipfu ozi!  
Unu egude ẹhu-anmanma  
tee ẹswa!
- 12 Unu phozeta tsutsua Nwa iya  
ọbu ọnu l'okpa.  
A nonyaa ẹhu wata iya eghu  
eghu;  
o mee g'unu bụru

mkpurupyata lẹ gbororo;  
 keḽe ọ kwa nwiphe,  
 ha nwanshii bẹ akpatsuje  
 iya ẹhu-eghu.  
 Ẹhu-utso bẹ a ọru nū ndu  
 gbapfuru iya nū;  
 je anọdu iya l'ẹka  
 zee ndzụ.

### Ebvu-oma 3

**Ebvu-oma, Dévidi deru teke ọogbalaru nwa iya Abusalomu**

- 1 Oowaa Chipfu; ndu achi  
 mu lẹ njo paakwaru igwerigwe!  
 Ndu wulihuru etso mu opfu  
 bukwa aguta aguta.
- 2 Ndu epfuru mu nū sū lẹ  
 Chileke ta adzotadu  
 mu pakwapho  
 igwerigwe.
- 3 Ọlobu Chipfu; ọ kwa ngu bu  
 onye egbobutaje mu nū.  
 Ọo ngu bu onye emeje;  
 laakwabẹ mu ùbvù;  
 bya aburu ngu anọduje  
 ekutse mu.
- 4 Mu woliru olu mu raku  
 Chipfu.  
 Ọ gbẹ l'úbvú ono,  
 o doberu nsọ ono  
 zaa mu ẹnu.
- 5 Mu zẹ-zeta kuru  
 mgbenya; kua ya  
 teta;  
 keḽe ọo Chipfu  
 gude ndzụ mu.
- 6 Ụnubuku nemadzụ  
 ugbo iri ono,  
 kwakachaaru  
 nọ-pee mu  
 mgburugburu ono

- bẹ mu ta atsukwa  
ebvu.
- 7 Kwolihuro Chipfu;  
Chileke mu;  
jiko dzoo mu ro!  
Chinaa ndu ohogu  
mu eka le nchi;  
chitsushia phe;  
l'i chishia ndu  
ejo-iphe eze l'onu.
- 8 Oo gube Chipfu  
adzoje nemadzu.  
Gonuru onu-oma ngu nu ndu  
nke ngu.

## Ebvu-oma 4

Ebvu-oma, Dévidi deru  
nu onye-ishi ebvu; g'a  
kpuru une ye iya

- 1 Zaa mu enu me mu raku ngu;  
jiko Chileke mu; onye  
pfuberekoto.  
I gbaru mu mkpu teke mu shi  
eje iphe-ehuka.  
Jiko phuru mu obu-imemini;  
numaro epfufu,  
mu epfu anu ngu!
- 2 ?Bu teke ole be unube  
unwu-eliphe a-ha egude ubvu,  
a kwaberu mu eme iberezi?  
?Bu teke ole be unu e-yeberu  
obu l'iphe, enwedu ishi;  
mbu woru onwunu haaru  
iphe, abudu okpobe iphe?
- 3 Ole ophu unu a-maru bu le  
Chipfu hotawaru ndu  
yeru iya obu doberu  
onwiya.  
Mu -chiku Chipfu be oozaje  
mu enu.

- 4 Èhu -ghuahaa unu eghu;  
 unu te ekwekwa  
 g'èhu-eghu òbu kpatarù  
 unu eme iphe-èji.  
 Unu zèkpoepfo nwapyakò  
 l'iphe, unu azeje aze;  
 tò nwehu rìa ya arìri;  
 nò-kirishia.
- 5 Gè ngweja, unu a-nòdu egwe  
 anù Chileke bukwaru  
 ngweja, dù iya ree.  
 Unu adakobeje Chipfu.
- 6 Ikpoto nemadzù asùje:  
 “?Jiko Chipfu; mebanaaru  
 anyi iphe oma.  
 Menaa g'iphe dùru anyi lè  
 ree!”
- 7 Obenu l'èhu-ùtso òphu i meru;  
 ò nòdu atso mbedua  
 bè kakwa òphu atsoje  
 phè nù;  
 mè iphe, èphe meberu  
 l'òpfu phè mehu shingushingu.
- 8 Mu a-tòkpoepfo nwehu  
 zè-zeta kuru mgbènya  
 l'èhu-guu;  
 kèlè òò gùbe Chipfu kpoloko  
 emeje gè mu maru l'ò tò  
 dùdu iphe, sùru mu emebata.

## Ebvú-oma 5

Ebvú-oma, Dévidi deru nù onye-ishi ebvu; g'a phuru ototo ye iya

- 1 Jiko Chipfu; ngabènu nchì  
 nùma olu mu;  
 Jiko gè ude, mu atsu rwua  
 ngu rò l'èhu!
- 2 Gùbe Chileke mu, bù onye  
 Eze mu;  
 ngabènu nchì nùma mkpu,  
 mu echi echiku ngu!

- Noo keḗ ọo ngu bẹ mu epfu  
anụ.
- 3 Gḗbe Chipfu; ụtsu g'ụtsu bẹ  
ịinumaje olu mu.  
Mu ewojeru mkpa mu  
dooru ngu giriri; daa  
ngaberu ngu ụtsu g'ụtsu.
- 4 Chileke; ị tị bụdu onye  
ẹjo-iphe aduje ree.  
Ọphu iikwejedu gẹ ndu eme  
ẹjo-ememe nọ-kube  
ngu.
- 5 Ndu eku onwophe ta adudu  
ike apfuru l'iphu ngu.  
Iphe, bụkpoo ndu eme iphe,  
adudu ree bẹ dḗkota  
ngu ashị.
- 6 Iphe, bụkpoo ndu anọduje  
adzụ ụka bẹ iimeje  
g'ephe bụru mkpurupyata.  
Ndu egbu ọchi; yee ndu ụgho  
bẹ gḗbe Chipfu anọduje  
akpofu akpofu.
- 7 Obenu ẹ mbeḗdua a-byaje  
l'ulo ngu;  
eshinu i yeru mu obu.  
Ọ bụru ntsumebvu bẹ mu  
e-gudeje gha iphu  
leze-ulo ngu, dḗ nsọ  
baarụ ngu ẹja.
- 8 Kpọ-ziaru mu ụzo jiko Chipfu  
eshinu ị bụ onye  
pfuberekoto.  
Kpọ-zinaaru mu ụzo;  
m'obvu ndu achị mu  
le njọ.  
Mena g'ụzo, ịicho gẹ mu  
shia doo mu ẹnya.
- 9 Ọ tọ dudu opfu, shi phe l'onu  
mẹ nanụ, e gude ẹka.  
Obu phe bụ iwashị tukuroru  
iya sweta.

Ire phẹ bẹ ẹphe egudeje aja  
 nwibe phẹ ajaja;  
 obenu l'iphe, nọ phẹ l'ime  
 obu anọduje eshi  
 ishi g'ilu, gheru onu.

10 Jiko Chileke; menaa g'iphe-ẹji,  
 ẹphe eme tukoru phẹ l'ishi!  
 G'idzu, ẹphe chiru nmakwaa  
 phẹ g'onyà.  
 Chishichaa phẹ Chileke;  
 noo kele ẹphe  
 kwefunukawaru ngu  
 ike;  
 teme ẹphe nọdu anọduje  
 atupya ngu tekenteke.

11 Obenu-a; g'ẹhu-utso bukwaru  
 ke ndu agbabaje l'ime  
 ngu je anodu  
 zeeru ndzu.  
 G'ẹphe guje ebvu ẹhu-utso  
 jasụ le tuutuutuu le  
 m̩imiimii.

Gbochitenu phẹ Chileke!  
 G'iphe, bukpo ndu yeru  
 ẹpha ngu obu etee ẹswa.

12 Noo kele ọo gube Chipfu  
 agojeru onu-oma n̩  
 ndu pfuberekoto.  
 Iigudeje l'ọo l'ẹphe d̩ ngu  
 l'obu gbobuta phẹ.

## Ebvú-oma 6

**Ebvú-oma, Dévidi deru  
 n̩ onye-ishi ebvu; g'e  
 gude olu-edede gua ya;  
 g'a kp̩ru une ye iya**

1 Gube Chipfu; te egudekwa  
 ẹhu-eghu baar̩ mu  
 mba!  
 Te egudekwa ẹnya,



- ata ngu kpítikpiti hùà  
mu àhùhù!
- 2 Phọaru mu obu-imemini  
jiko Chipfu;  
kele mu eyifuwa eyifu.  
Mee g'ẹhu dụ mu ike;  
kele ẹhu mu l'ophu  
tùko aphukota mu  
kparìkpari.
- 3 Tẹme meji nọdu atọfukwa  
mu phọ atọfu.  
Sù-a; gùbe Chipfu; ?bùkpoo a  
-nọo jasù teke ole  
b'ìi-gbaru mu mkpu?
- 4 Lwaphutanù azù Chipfu;  
bya agbafuta mu gẹ mu  
dzuru ndzù. Phùnaaru mu  
obu-imemini; dzọ mu rọ!
- 5 Kẹle; onye nwùhuru nù  
ta anyataẹkwaru ngu.  
?Bù onye a-gbẹ l'alì-maa  
ekele ngu ekele?
- 6 Mu tsùakwaru ude jasù ike  
bvù mu.  
Ènyashi mbọku-mbọku bẹ mu  
azeje l'iphe-azẹe mu  
kwakọta ẹkwa  
mkpùrumkpuru.  
Ọphu ọ dọdu mbọku,  
a nọghajeru g'ẹnya-mini  
ta agba utso l'iphe,  
mu azeje azẹe.
- 7 Aphù, tsọru mu nù mewaru;  
mu raa ẹkwa aphù  
ragaraga.  
O mewaru; ọphu mu  
aphù-rweẹdu aphù-rwe;  
ọ bọru iphe, ndu achì mu  
lẹ nọ kparù.
- 8 Unu tọko parù mu haa;  
unubẹ ndu ono, eme iphe,  
adọdu ree ono;

kẹ́le Chipfu nùmawaru  
olu ẹ́kwa mu.

9 Chipfu nùmawaru arworwo,  
mu rwo ru iya.

Epfufu, mu epfu anu iya  
rwuwaru iya nchi.

10 G'e kpukwaa ndu ohogu mu  
iphu le nu;

ge meji tofukwa phe.

G'ephe tsekwa iphu egwegwa  
gude iphere laphu azu.

## Ebvú-oma 7

**Ebvú-aphu, Dévidi guru nu  
Chipfu le k'iphe, Kushi, bu  
oshilokpa Benjiaminu pfuru**

1 Gube Chipfu, bu Chileke mu;  
o kwa l'ime ngu be  
mu gbabarú je ezeeru  
ndzu mu.

Dzónaa mu dzota l'eka iphe,  
bu ndu achí mu nu;  
jiko nafuta mu ro!

2 Odumeka be ephe e-gudekwa  
mu labushia nanu nanu;  
g'onye agu dzugburu;  
ebe adu onye ozo, mu nweru,  
a-gbaru mu mkpu.

3 Gube Chipfu, bu Chileke mu;  
a -gufukwa le-a:  
l'o nweru iphe, apfuduru-oto,  
mu mejeru;

4 mbu m'o -buru l'o nweru  
onye opfu aduduru mu l'iya,  
mu mejeru ejo-iphe;  
ozoo le mu natajeru ndu  
achí mu le njo iphe k'ehuka;  
le be adu iphe, kparu iya nu;

5 oo ya bu ge ndu ohogu mu  
ono chia mu gude;

- zowa mu rọ ̀tolitoli;  
 wowaruro ùbvù ono,  
 aakwabeje mu ono rwua lẹ ntụ.
- 6 Gùbe Chipfu; kwolihunù  
 l'ehu-eghu!  
 Jiko gbeshinu; nõchia ndu ono,  
 l'achi mu lẹ njọ ono ọzo;  
 mbụ ndu ono,  
 atụ kpereree abyapfuta  
 mu ono.
- Kwolihuro Chipfu; kele ọ  
 kwa gùbedua turu  
 ekemu sù gẹ ndiphe  
 kpeje ikpe, pfuru ọto.
- 7 Jiko chikobenu ọha l'ophu  
 ono, dzukoberu nù ono;  
 g'ephe gbaa ngu  
 mgburugburu.  
 Lì nõ-zeta l'aba-eze ngu  
 l'ephekerephe.
- 8 Ọo gùbe Chipfu bụ onye  
 e-kpe ndu ono ikpe.  
 Jiko Chipfu hanarụ mu enge;  
 kele mu bụ onye  
 pfuberekoto;  
 ophu ọ dudu ẹka uta dũ  
 mu l'ehu.
- 9 Gùbe Chileke, bụ onye  
 pfuberekoto;  
 gùbe onye enyochajẹ ime  
 obu waa egomunggo;  
 jiko menaa g'ẹjo-ememe,  
 ndu ẹjo-iphe anọduje  
 eme bũru bugemu!  
 Mee gẹ ndu pfuberekoto  
 nguru anguru!
- 10 Chileke bụ onye egbobutaje  
 mu nù.  
 Ọo yẹbedua adzoje ndu obu  
 phẹ guru ìphóró.
- 11 Chileke bụ onye ekpeje ikpe,  
 pfuru ọto;

bya aburu onye egoshije  
oke ehu-eghu iya  
mboku-mboku.

- 12 O -lenyaa enya l'izimanu  
a-lwa onye ejo-iphe azu;  
ophu o dudu;  
be oo-wokwaru ogu-echi  
iya baa ababa.

Uta iya be o setaanaru-a ke  
kikiki kwaberu ndu  
obu.

- 13 Ejo ngwogu iya ono be o  
meakwaru dobe;  
bya edoziwaa apfu iya,  
o meru o nodu ekegbaa  
pfupfupfu.

- 14 Lewar o le ndu ejo-iphe  
tsutagbaaru ime iphe-eji.  
Epho bewaru phe lezeda ejo  
eregede.

O buru ntuphu-ire be  
ephe e-mechaa nwua.

- 15 Ephe buru iduma;  
bya ebvumia ya ebvumi;  
ole o ephebedua  
e-mechaa dalahu  
l'iduma obu.

- 16 Eregede, ephe agba  
le-mechakwapho  
daphutaru phe azu;  
bya adakoru phe l'ishi.  
Teme iphe-kpanganga,  
ephe meru ndu ozo be  
a-lwaphutakotaru phe azu.

- 17 Mbdua a-noduepho ekele  
Chipfu ekele lo bu  
onye pfuberekoto.

Mu agua ebvu gude tua  
onye ono, bu  
Okalibe-kakota-shii  
onoya epha.

## Ebvü-oma 8

Ebvü-oma, Dévidi deru nü  
onye-ishi ebvü; g'e gudeje  
ngwa ebvü, jíta gúa ya

- 1 Gùbe Chipfu, bú Nnajiuphu  
anyí;  
èpha ngu nyíberu anyíbe le  
mgboko l'ophu.  
Gùbe onye woru ódu-biribiri  
ngu dobe doghaa igwe.
- 2 I mewaru ùnwegirima;  
waa ndu angù era;  
èphe wata ngu aja ajaja;  
m'òbvü ndu òhogu ngu;  
shí nno mee g'ònu  
bùru ndu òhogu ngu ono;  
waa ndu eme g'èphe  
gwata ngu ùgwò  
iphe kpùrukudukuu.
- 3 Teke mu leri enya l'igwe  
l'ophu, bú iphe, i gude  
mkpùshi-èka ngu mee;  
mbùkpoo ónwa mè  
kpokpode, bùchaa iphe,  
i meru ememe dobe;
- 4 bè mu asuje: “?Bù gùnu  
bè nemadzù bù; kè  
g'ìiri-vuje iya?  
?Bù gùnu bè ùnwu-eliphe,  
bù kè g'ìiletajè phè enya?”
- 5 I meru iya; òphu iphe,  
ùnwu imigwe gude  
sengoo ya  
ahakpòdanu g'ènya-nvò.  
I kpuberu iya  
o-gbu-nwìinwii  
g'òkpu-eze; bya akwabè  
iya ùbvù, parù èka.
- 6 I nùru iya ike g'o letakòta  
iphemiphe, i meru  
ememe enya;

- bya emee g'iphemiphe  
 nɔdukota iya l'eka;
- 7 mbu g'aturu; yee eghu;  
 waa eswi;  
 waa anu-egbudu g'ephe  
 hakota;
- 8 me enu, ephe l'eli;  
 waa ema, bu le mini;  
 mewaro iphemiphe,  
 bu le mini g'ephe ha  
 nɔdukota iya l'eka.
- 9 Gube Chipfu,  
 bu Nnajiuphu anyi;  
 epha ngu nyiberu anyibe  
 le mgboko l'ophu.

## Ebvu-oma 9

Ebvu-oma, Dévidi deru nu  
 onye-ishi ebvu; g'e gude olu  
 ebvu, “Ekwá Nwa” gwa ya

- 1 Gube Chipfu; mu e-gude obu  
 mu l'ophu ekele ngu  
 ekele.  
 Mu a-nodu epfukashi  
 iphe, du biribiri,  
 iimeshigbaa.
- 2 Ehu a-nodu atso mu utso;  
 mu egude ngu ete eswa.  
 Mu agu ebvu etu ngu epha;  
 gube  
 Okalibe-kangokotaru-nu!
- 3 Ndu ohogu mu tsuphuwaru  
 azu!  
 Ephe vukotawaru iphe daa;  
 buru mkpurupyata  
 l'atatiptu ngu!
- 4 Noo kele i kpewaru ikpe,  
 pfuru oto bya ahaaru  
 mu enge.  
 I no l'aba-eze ngu kpee ikpe,

- pfuru nhamunha.
- 5 I bawaru ohamoha mba;  
bya emee ndu ejo-iphe;  
ephe buru mkpurupyata.  
I mewaru g'epha phe  
chihu achihu jasụ  
le tuutuutuu le  
mijimiimii.
- 6 Ndu ohogu mu phe be  
nkephe bvwaru.  
Ibe phe a-buerupho ochobu  
jasuru asuru.  
Mkpukpu phe be i vwaru  
l'ogbarabvu;  
ophu o duedu onye  
nyataru iya nu.
- 7 Chipfu a-buru eze jasụ  
le tuutuutuu le  
mijimiimii.  
O mewaru aba-eze iya ono  
g'o nguru anguru;  
k'ophu oo-nodu iya kpee  
ikpe.
- 8 Oo-kpe ndu mgboko ikpe,  
pfuru oto.  
Ikpe, ookpeje apfujeru  
nhamunha.
- 9 Ndu eemekpa ehu agbabaje  
Chipfu l'eka je ezeeru  
ndzu.  
Ndu iphe-ehuka byaru  
agbabajekwa iya  
pho l'eka je edomia  
onwophe.
- 10 Iphe, bukpuo ndu maru ngu  
nu bu ngu be ephe  
dakoberu;  
kele gube Chipfu teke  
agbadoswee ndu achọ  
ngu amaru.
- 11 Unu gụa ebvu gude tua  
Chipfu ono, bu eze le

- Zayonu ono epha.  
 Unu tɔ̄aru ɔ̄hamoha ɔ̄nu iphe,  
 o meru.
- 12 Noo kele yebedua, akpaje  
 ishi ɔ̄chi onye e gburu  
 egbugbu;  
 be nyatakwaru phe nu.  
 Ndu iphe-ehuka byaru -chia  
 mkpu be o to  
 gbajekwa phe nkuchi.
- 13 Gube Chipfu; phuru mu  
 obu-imemini!  
 Lewaro ge ndu achi mu le njo  
 akpabe mu ehul!
- Lofutanu mu l'onu-oguzo maal!
- 14 Oo ya bu ge mu anodu  
 l'onu-abata Nwada Zayonu  
 ono jaa ngu ajaja;  
 bya etekwaapho eswa li  
 dzotaru mu.
- 15 Ohamoha dalahuwaru liduma,  
 ephe buru nweka phe.  
 Ephe jewaru ekoda l'ugbu,  
 ephe geru lonwophe.
- 16 Iphe, e gude maru Chipfu bu  
 g'oogudeje ekpe ikpe.  
 Ndu ejo-iphe egudeje  
 ejo-ememe, ephe eme  
 gbaberu onwophe  
 onya dalahu.
- 17 Ndu ejo-iphe be aa-chiru ye  
 l'ali-maa;  
 mbu l'iphe, bukpo oha,  
 zoharu Chileke be  
 a-lakota l'ali-maa.
- 18 Obenu le ndu adudu g'o  
 du phe be o to  
 zohajekwa jasuru;  
 ophu iphe, ndu ukpa  
 ele enya le Chipfu  
 e-meru phe  
 abyadu ala ke mmanu.



- 19 Gbalihukpòdapho gùbe Chipfu;  
 g'ò tò bù nemadzu  
 l'agbè ka ngu ike!  
 G'e kpee òhamoha ikpe l'iphu  
 ngu!
- 20 Chipfu; menaa gè  
 ndzu-agugu rwuta phè;  
 k'òphu òhamoha ono  
 a-maru l'òo nemadzu  
 mmanu bè ephe bù.

### Ebvü-oma 10

- 1 ?Dènu g'o gude i je apfuru  
 ụzenya Chipfu?  
 ?Dènu g'ò nwuru i domiru  
 onwongu nta-a,  
 iphe-ehuka byaru-a?
- 2 Ndu ẹjo-iphe egudeje eku  
 onwophe achị nta ndu  
 ukpa.  
 Gè ndu ẹjo-iphe ono  
 nmalahukwa l'idzù,  
 ephe chiru dobe!
- 3 Iphe, ndu ẹjo-iphe egudeje  
 aba abaa bù iphe,  
 ephe riru dobe l'obu phè.  
 Chileke bè ephe anọduje  
 epfutooshi;  
 ọ buchiaru ndu iphe  
 taa asujeduru asuru  
 bè ephe  
 anọduje ekutse.
- 4 Ndu ẹjo-iphe egudeje eku  
 onwophe jịka achọ  
 Chileke;  
 ọphu ephe arivujedu  
 Chileke ililekpoo.
- 5 Ọle iphemiphe, ephe eme  
 anọdujeele-a ejehuru phè.  
 Ndu achị phè lẹ njo bè ephe  
 akakputeje l'enyà;

- ọphu ẹphe  
 ahumajedu ikpe ono,  
 Chipfu e-mechaa  
 kpee phe ono.
- 6 Iphe, ẹphe arije l'obu phe  
 bu l'ẹphe buwaa  
 enwubata enwubata;  
 l'ẹphe ta abyadu eje  
 iphe ehuka.
- 7 Iphe, ejije phe onu ebushihu  
 ebushihu bu ephu  
 iphu;  
 waa agho ugho waa  
 emekpa nwibe phe ehụ.
- Iphe, ẹphe akpujeru  
 l'onu buerupho  
 ẹregede yee iphe,  
 adudu ree.
- 8 Ẹphe ewohaje onwophe  
 l'aguga mkpukpu.  
 O buru eka ono,  
 ẹphe domiru onwophe;  
 kwaberu ndu a-nmada  
 phe l'eka ono  
 be ẹphe anoduje  
 gbushia ndu enwedu iphe,  
 ẹphe meru.
- 9 Oo g'oduma edomije onwiya  
 l'egbudu kwaberu  
 unwu-anu-a bu g'ẹphe  
 edomije onwophe  
 kwaberu ndu ukpa.  
 Teke ẹphe nmataeru phe  
 pho; ẹphe akpuru  
 phe lashia.
- 10 Ndu nmadaru phe l'eka be  
 ẹphe egweje arakabya;  
 jasụ ẹphe eworu enya  
 kurwua.  
 Ẹphe egudeje okpehu phe  
 kua ndu ukpa ono  
 pyaapyyaa.

- 11 Ephe arije ɓ Chileke  
 zɔhakotawaru iphe,  
 ephe meru;  
 mbu ɓ Chileke ghawaru  
 okotazu;  
 ɔphu ɔ byaedu aghaba  
 enya l'azu huma iphe ono,  
 ephe meshiru ono.
- 12 Gube Chipfu;  
 gbalihukɔdapho  
 agbalihu!  
 Gube Chileke; palikɔdapho  
 aka ngu apali!  
 Ta azɔhashinu ndu ono,  
 aakpa ehuno!
- 13 ?Denu g'o nwuru ndu  
 ejo-iphe anɔduje epfutohi  
 Chileke?  
 ?Bu gunu meru iphe,  
 ephe anɔduje ari ɓ Chileke  
 ta adudu iphe,  
 oome phe?
- 14 Obenu l'itukoje iphemiphe  
 humakota.  
 Iihumaje ndu eje iphe-ehuka;  
 waa ndu agu aphu.  
 Ophu ichijeduru aka ye  
 l'iphu utapfu.  
 Ndu ukpa bu gubedua be  
 ephe woru ndzu phe  
 ye l'eka.  
 Ndu nna phe anɔedu buru  
 gubedua agbajeru phe  
 mkpu.
- 15 Nyakwona ndu ejo-iphe aka;  
 me ndu eme ejo-ememe.  
 Vokwaa ejo-iphe, ephe eme  
 g'oha. Ba ahakwa me nanu.
- 16 Oo Chipfu bu Eze jasɔ ɓ  
 tuutuutuu ɓ mijimiimii.  
 Ndu ohozo a-chihu l'ali  
 ke Chipfu.

- 17 Gùbe Chipfu; iphe,  
 ndu dù àgù rwoṛu ngu  
 bẹ ì nùmawaru.  
 Oo gùbedua emeje g'obu  
 nmapfuru pẹ;  
 tẹme ì nọdu anùmajẹ olu pẹ.
- 18 Haarù ndu nna pẹ anọedu enge;  
 waa ndu eemekpa ẹhu.  
 G'unwu-eliphe haa pẹ  
 akpaya ishi.

## Ebvú-oma 11

Ebvú, Dévidi deru nù  
 onye-ishi ebvú

- 1 Mu woru onwomu ye Chipfu  
 l'ẹka.  
 ?Dẹnu g'ọ nwùru unu sùru  
 gẹ mu phee ephephe  
 g'ẹnu je edomia onwomu  
 l'ẹka úbvú dù?
- 2 No kẹle ndu ejo-iphe woharu  
 onwophe seta apfù pẹ  
 kẹ kíkiki g'ẹphe gbaa  
 ndu obu pẹ  
 gùru ìphóró.
- 3 Eshi ọphu e mebyishiwaru  
 itso, gude mkpukpu;  
 ?buhunu gùnu b'a sùru  
 g'onye-pfùberekoto  
 mebaa ọzo?
- 4 Chipfu nọkwa l'eze-ulo iya,  
 dù nsọ.  
 Ẹka aba-eze Chipfu nọ  
 bukwa l'imigwe.  
 Ọ buru l'ẹka ono bẹ ọonoduje  
 ele ẹnya lẹ mgboko.  
 Ẹnya iya atuko unwu-eliphe  
 l'ophu humagbua.
- 5 Chipfu enyochajekwa ndu  
 pfùberekoto;

- mẹ ndu ẹjo-iphe enyocho.  
 Obenu lẹ ndu bụ iphe,  
 aduje phẹ ree bụ  
 eme ndu ọzo iphe  
 kpanganga aduje iya ashi.  
 6 Ndu ẹjo-iphe ono bẹ  
 oo-mechaa dzeeru  
 icheku-ọku yẹ  
 ọku-nshiegbe g'igwe  
 edzeje mini-a.  
 Ọ bụru ẹjo phẹrephere,  
 ekpo ọku a-buru  
 okiphe phẹ.  
 7 Chipfu bụ onye p̄b̄b̄erekoto.  
 Ndu eme iphe, p̄f̄uru  
 nhamunha aduje  
 iya ree.  
 Ndu obu phẹ guru ìphóró  
 e-mechaa h̄uma  
 iphu iya.

## Ebvü-oma 12

**Ebvü-oma, Dévidi deru  
 n̄u onye-ishi ebvü; g'e  
 gude olu-edede ḡua ya**

- 1 Ḡube Chipfu; bya agbaa  
 mkpu lẹ ndibe ngu  
 bv̄akwaru!  
 Ọ t̄o d̄uekwa ẹka  
 aah̄umakwadu onye  
 ire-lan̄u.  
 2 Onyemonye an̄oduje adzuru  
 nwibe iya ụka;  
 gude op̄fu-enwunwu  
 eduphushi nwibe phẹ.  
 3 Ḡube Chipfu; menaa g'ẹphe  
 ch̄ihu;  
 mb̄u ndu ono, enwuru  
 nwibe phẹ  
 op̄fu-enwunwu ono;

- waa ndu ono, anọduje etu  
onwophe oke epha ono.
- 4 Mbụ ndu ono, asuje l'ephe  
a-nọdu epfu g'ọ dụ phe;  
l'ọ tọ dudu onye sụru  
akpọ-buru opfu ye phe l'ọnu.  
?Bụkwanu onye aturu phe  
iphe, ephe e-pfu?
- 5 Obenu lẹ Chipfu byakwanu  
eyeru phe ọnu bya asụ phe:  
“O rwuakwaru teke ya  
a-byapfuta unu;  
kele ndu ukpa be unu  
kpatashiwaru ehu;  
teme ndu adudu g'ọ dụ phe  
gunukawa aphụ unu.  
Nta-a be o rwuwaru teke  
ya a-gbaru phe mkpu ono,  
ephe ele enya iya ono.”
- 6 Iphe, Chipfu pfuru  
bụ okpobe opfu.  
Opfu iya ono dụ g'okpobe  
mkpola-ochaa,  
a huru l'oku-uzu mgbo esaa  
g'o gbuchafu egbuchafu.
- 7-8 Ndu ejo-iphe dzuakwaru  
ekameka; teme iphe,  
unwu-eliphe gharu iphu  
buwaru ejo-ememe.  
Obenu l'ọo gube Chipfu  
anọduje eche anyi.  
Ọo ngu eletaje anyi enya  
mkpurumkpuru  
g'eka ndu ejo-iphe te erwu anyi l'ehu.

## Ebvú-oma 13

### Ebvú, Dévidi deru nù onye-ishi ebvu

- 1 Gube Chipfu; ?bụ jasụ teke  
ole be ii-zoha-beru mu

- g'i zoharu mu owa-a?  
 ?Bu jasü l'ojojöje to?  
 ?Bu jasü teke ole  
 be iighaberu mu azü?
- 2 ?Mu a-takpoo nshi jasü teke ole?  
 ?Bu je eberu iberu-agma be  
 aphü e-ji mu obu eswe  
 l'enyashi egube owa-a?  
 ?Bu teke ole be ndu ohogu  
 mu a-tü-beru okoo  
 kpua mu?
- 3 Lenea mu enya gube Chipfu,  
 bu Chileke mu;  
 yenaaru mu onu!  
 Menea ge mu huma üzo;  
 a nonyaa mu nwuhu!
- 4 K'ophu ndu ohogu mu  
 ata asujedu l'ephe  
 mekpewaru mu.  
 Noo kele ndu achi mu le njo  
 be e-tekwa eswa me  
 mu daa.
- 5 Obenu l'oo n-yemobu ngu be  
 mu dakoberu.  
 Mu ete eswa; kele mu maru  
 l'ii-dzota mu.
- 6 Mu a-nodu agu ebvu anu  
 Chipfu;  
 kele o nwubenukaru  
 mu enya.

## Ebvü-oma 14

### Ebvü, Dévidi deru nu onye-ishi ebvu

- 1 Ndu eswe anoduje ari l'ime  
 obu phe le Chileke  
 ta adudu.  
 Ephe mebyishiwaru  
 onwophe;  
 bya emewaa iphe,

Chileke kpọru ashi;  
 ọphu ọ dudu m'onye lanu  
 eme iphe, du ree.

- 2 Chipfu gbẹ l'imigwe lee ẹnya  
 lẹ mgboko-a; mbu l'ẹhu  
 unwu-eliphe;  
 gẹ ya maru ?o nweru onye  
 kwaru ẹnya?

Mbu g'ọ maru ?o nweru onye  
 achọ yẹbe Chileke?

- 3 Ọle g'ẹphe ha tukurawu haa  
 uto jephuhu.

Ephe tukurawu g'ẹphe ha  
 mebyishihukota.

Ọ to dudu g'ọ ka mma l'ọo  
 onye lanu eme iphe,  
 du ree.

- 4 Ọ dukwa gẹ ndu ono,  
 eme ẹjo-ememe ono te  
 nwedu egomunggo;  
 mbu ndu ono, anọduje  
 eri ndibe mu g'onye eri nri;  
 ọphu ẹphe epfujedu  
 anu Chipfu.

- 5 Ephe bu ndu ndzu-agugu  
 rwutaru;  
 obenu lẹ Chileke no-kube  
 ogbo ndu pfuberekoto.

- 6 Ọobujeru; ndu ukpa -chichaa  
 idzu; unube ndu  
 ẹjo-iphe akposhia ya.

Ọle onye ẹphe gbabarụ l'ime  
 iya je anọdu ezeru ndzu  
 phe bukwa Chipfu.

- 7 Ọ du mu g'e shi lẹ Zayonu  
 bya adzoo ndu Izurelu.

Jiékopu e-te ẹswa; ẹhu atsọo  
 Izurelu utso me Chipfu  
 dophuepho ndibe iya  
 azu l'onodu phe.



## Ebvu-oma 15

### Ebvu-oma, Dévidi deru

- 1 Gube Chipfu; ?bu onye  
e-buru l'ibe ngu?  
?Bu onye du idu-agma e-buru l'ubvu  
ngu, du nso?
- 2 Oo onye enweddu aka uta du  
iya l'ehu;  
bya abuerupho iphe, pfuru  
oto be onoduje eme;  
mbu onye epfuje ire-lanu,  
shi iya l'obu;
- 3 mbu onye ete evujedu  
nwibe iya nvu-azu;  
ophu o mejedu nwibe iya eji;  
teme ophu opfubyishijedu  
nwibe iya epfubyishi.
- 4 Onye akpoje ndu du Chileke  
eji ashì.  
Obenu le ndu atsù Chileke  
ebvu be ookwabeje ubvu.  
Onye abujeru; o -ribua nte le  
ya e-me iphe;  
l'o mee iphe obu; m'obeta  
o jee ebuta iya.
- 5 Onye bu; o -jie nemadzù  
ugwo; o too ledu enya  
ntukwase;  
ophu oorijedu uphalazu  
l'ishi ndu iswi du mma.  
Onye eme nno be a ta  
byakpoda enwubata  
enwubata jasuru asuru.

## Ebvu-oma 16

### Ebvu-oma, Dévidi deru

- 1 Gbochite mu gube Chileke;  
kele oo ngu be mu gbabarù  
l'eka je ezeeru ndzu.

- 2 Mu s̄uru Chipfu; “Oo ngu bu  
Nnajiuphu nkemu.  
Iphe, bu iphe, du ree, mu  
nweru bu ngu be o shi  
l'eka.”
- 3 A bya le ndu duru Chileke  
nso, bu l'eliphe-a;  
oo ephe bu ndu du akpabiri;  
buru phe kachaa mu  
adu l'obu.
- 4 Ndu anoduje akpo ephuhuru  
agwa be mgburwashị-ehu  
phe anoduepho  
aka shii eje.  
Mee anu, shi mu l'eka ta  
abyadu ebe agwa phe  
ono l'onu;  
ophu mu abyadu egude  
onu mu owa-a kpo-ku phe.
- 5 Oo Chipfu bu okiphe,  
mu ketaru;  
bya aburu iya buwaa mu  
mkpakọ le nswiko;  
mbu l'oo gube Chipfu be iphe,  
mu a-buru no l'eka.
- 6 Iphe, e ketaru mu du ree  
dugharu iya eka;  
mbu l'okiphe nkemu dukpoo ree.
- 7 Mu a-noduje etu Chipfu epha;  
mbu onye akpo-ziru  
mu uto.  
Obujeru; o -be l'enyashi;  
obu mu eziahaa  
mu iphe.
- 8 Mu anodujeepho arị ke  
Chipfu tekenteke.  
Tekenteke be o no  
mu l'ekutara;  
k'ophu a ta abyadu enwubata  
mu enwubata.
- 9 Noo g'o gude ehu nodu  
atsọ mu utso.

- Mu nõdu ete ęswa l'ime obu  
 mu;  
 kele ọ tọ dudu iphe,  
 byaru emebata mu nọ.  
 10 Noo kele mu maru l'i tii hadu  
 mu l'ali-maa.  
 I tii hadu onye nkengu,  
 du nsọ g'o rehu  
 erehu.  
 11 Obenu l'i goshichiaru mu ọzo  
 ndzu.  
 Anono, mu anọduje l'iphu  
 ngu tekenteke emeje  
 g'ęhu-utso ji mu obu.  
 Mbụ l'anono, mu anọduje  
 l'ękutara ngu e-me  
 g'ęhu tsoo mu utso  
 jasụ l'ojeje.

## Ebvu-oma 17

**Epfupfu, Dévidi  
 pfuru nọ Chileke**

- 1 Gụbe Chipfu; ngabę nchị!  
 Numa arwọrwo, mụbe onye  
 pfuberekoto arwo  
 ngu!  
 Togbo nchị numa mkpu,  
 mu echi echiku ngu;  
 l'i gbobe nchị numa epfupfu,  
 mu epfu anụ ngu;  
 kele ọ tọ bụdu ụgho be  
 mu aghọ.  
 2 Jiko byanụ ahaaru mu enge!  
 Byanụ elee ya ęnya;  
 maru onye iswi dọ mma!  
 3 I nyochawarụ ime obu mu;  
 tẹme i hụwa mu ama  
 l'ęnyashi;  
 bya elerwewa mu ęnya  
 ọkpobe elerwe.

Obenu l'ọ tọ dudu iphe-eji,  
 i humaru mu l'ehu.

Ọnu mu bẹ mu  
 kwaberu ẹnya  
 g'ọ tọ dudu ejo opfu,  
 e-shi iya nu.

4 A -bya l'iphe, nemadzu  
 emegbabe; bẹ mu  
 mekwarupho iphe, i pfuru;  
 buru ubara yeru ndu iwashi.

5 Ọ bu okpa, i toru bẹ mu  
 anoduje etso;  
 ophu o dudu teke okpa  
 chiswafujeru mu.

6 Iphe, mu gude epfu anu ngu  
 Chileke bukwa l'ingajeru  
 mu nchi.

Gbobenu nchi; numa olu mu!

7 Jiko menaa ge mu huma  
 n-yemobu ngu ono,  
 du biribiri ono;  
 gube onye abujeru;  
 ndu -gbabaru ngu l'eka  
 je ezeeru ndu  
 l'i gude ekutara ngu dzota  
 phe l'eka ndu ohogu phe.

8 Jifujeru mu ejo-iphe;  
 egube ono, aajifuje  
 iphe-onuka g'ọ tọ rwupya  
 akpuru ẹnya ono.

Woru mu domia le mkpula  
 nkù ngu;

9 ge ndu ejo-iphe ta akpa  
 mu eh;u;  
 mbu ndu ohogu mu ono,  
 no-pheru mu mgburugburu  
 eme g'ephe  
 gbu mu ono.

10 Imemini nemadzu ta  
 adujedu phe;  
 teme ephe nodu egudeje  
 onu eku onwophe.

- 11 Nta-a abujeru; ekameka,  
 mu shiru; ephe etsophe mu;  
 no-pee mu mgburugburu;  
 eme g'ephe kwatsua mu.
- 12 Ephe adzugabejehaa  
 g'agu, egu agú;  
 o nodu achọ anu,  
 o-dzu-gbu;  
 mbu l'ephe aduje g'ejo agu,  
 nmakpuru anmakpuru  
 kwaberu iphe  
 e-shita iya iphu.
- 13 Gbalihunu gube Chipfu;  
 furu phe!  
 Mena g'ephe gbushi  
 ikpere huaru ngu onu l'ali!  
 Gudenu ogu-echi ngu  
 dzoo mu l'eka ndu  
 ejo-iphe!
- 14 Gudenu ike nkengu nafuta  
 mu l'eka phe;  
 mbu l'eka ndu okiphe  
 nkephe kpajiru l'iphe  
 ke mgboko-a;  
 mbu ndu i meru;  
 ephe nweru eku;  
 nweru iya k'etsutsu iya;  
 k'ophu unwu phe me  
 unwu nwanwa phe  
 e-nweru iphe nweru  
 k'anyinyi.
- 15 Obenu le mbedua be e-gude  
 apfubekoto huma  
 iphu ngu.  
 Mu -tehuepho  
 be ehutu  
 e-ji mu obu;  
 noo kele mu a-huma  
 ugbugba ngu.

**Ebvu-oma 18**

Ebvu, Dévidi, bụ  
onye-ozì Chipfu deru n̄onye-ishi ebvu

Ebvu-a bẹ ọ guru gude kele  
Chipfu lẹ mbọku, Chipfu nafutakotaru iya l'ẹka ndu ọhogu iya l'ophu;  
kelekele kẹ  
Sọlu  
(2Sám 22)

- 1 Mu yeru ngu obu Chipfu.  
Ọo ngu bụ ike mu.
- 2 Ọo Chipfu bụ  
agbara-mkpuma nkemu;  
bya aburu  
ulo-ezeru-ndzụ mu;  
buru onye  
agbafutaje mu n̄.  
Ọo Chileke mu bụ  
agbara-mkpuma,  
mu agbabaje je edomia  
onwomu.
- Ọo ya egbobutaje mu g'ọ  
tọ dū iphe, e-me mu n̄.  
Ọ buru iya bụ onye egudeje  
okpehu iya dzọo mu.  
Ọo l'ime iya bẹ mu agbabaje  
je anọdu zeeru ndzụ.
- 3 Ọo Chipfu ono, bụ onye  
gbaru g'a jaje iya  
ajaja ono bẹ mu arakuje;  
l'ọ dzọo mu l'ẹka ndu  
ohogu mu.
- 4 Anwuhu shiwaa chie mu  
egbirigba l'olu.  
Ọla-l'iswi nọdu asọ  
gborogboro gẹ mini  
asọ-pfuta mu.
- 5 Ẹkpa-oyi alị-maa nwua mu  
kpalaa.  
Anwuhu shiwaa woru ọnyà  
gbabẹru mu.

- 6 Ọle teke mu eje iphe-ẹhuka ẹ  
 mu rakuru Chipfu.  
 Mu rakuru Chileke mu;  
 sù g'ọ dzọo mu.  
 Ọ gbẹ l'eze-ulo iya nùma olu  
 mu.  
 Mkpu, mu chiru chiku iya  
 rwua ya lẹ nchi.
- 7 Noo ya bụ; eliphe l'ophu  
 tehu kparikpari;  
 nmakọta jijijiji.  
 Ọkpa úbvú l'ophu  
 nmaghukọta anmaghu;  
 kele Chileke ẹ ẹhu eghu eghu.
- 8 Ẹnwuru ọku shi iya l'imi  
 akpu ke tũtuutuu.  
 Ọku, shi iya l'onu afushi  
 tũkoepho iphemiphe  
 ekepyashi.  
 Icheku-ọku iphe,  
 o kepyashiru tũko  
 ẹkameka ata pfupfufu.
- 9 Ọ dojaha akpaminigwe  
 ke tararara; ọ buru  
 iya alufuta.  
 Ọchii, gbahuru ke tsukiribaa  
 nodu iya lẹ mkpula  
 ọkpa.
- 10 Ọ nodu l'eli chierobu phezeta.  
 Ọ buru lẹ ñkù pherephere  
 ẹ o degeru ezi  
 phuphuphu.
- 11 O woru ọchii kpuchia onwiya;  
 mbu l'urwukpu, mini jiru  
 ejiji ẹ ọ-pheru iya  
 mgburugburu.
- 12 Urwukpu; waa  
 akamini-mkpuma; waa  
 icheku-ọku, ata pfupfufu  
 shi l'ogbunwijnwii ya  
 agushihugba.
- 13 No iya; Chipfu gbẹ

- l'akpaminigwe t̄a  
egbigwe.  
A n̄uma olu onye ono,  
b̄u Ọkalibe-kak̄ota-shii  
ono;  
bya ah̄uma akamini-mkpuma;  
waa icheku-ọku,  
ata pf̄upf̄upfu.
- 14 Ọ gbaa ap̄f̄u iya gude ch̄ikaa  
ndu ọhogu iya.  
Ebemu-igwe b̄e ọ k̄uru k̄e  
phoo.  
Ēphe z̄ekota l'oso gbalachaa.
- 15 Ḡb̄e Chipfu ziru unme fuu  
gb̄ooru ndu ọhogu  
ngu ọja.  
Eze Ēnyimu s̄okahu ēbo;  
k'ọphu a h̄umachaa  
ọhu-ēnyimu l'enyia;  
kpuhachaa ēka a t̄uru  
ọkpa-al̄i mgboko; a h̄uma.
- 16 Chipfu gb̄e l'imigwe t̄ufu ēka;  
z̄u mu gburumu;  
ḡufuta mu l'ogbu-mini.
- 17 Ọ naf̄utakwaru mu ph̄o l'eka  
ējo ọhogu mu;  
m̄e l'eka iphe, b̄ukpoo ndu  
mu d̄u ash̄i;  
noo k̄ele ēphe kariru mu ēka.
- 18 Mb̄oku ono, mu eje iphe-ēhuka  
ono b̄e ēphe tsoru mu ọgu;  
obenu l'oo Chipfu gbatar̄u  
mu ike.
- 19 Ọo ȳebedua kutaru mu dobe  
l'eka mu n̄o t̄usaru ēhu.  
O yeru mu ēka naf̄uta mu l'ogu;  
k̄ele mu d̄u iya l'obu.
- 20 Chipfu buru mu nggo;  
k̄ele mu b̄u onye  
pf̄uberekoto;  
mb̄u k̄ele mu b̄u onye iswi  
d̄u mma.



- 21 Noo keḗ ọ bụepho ụzo,  
 Chipfu ọturu bẹ mu  
 anọduje etso.  
 Ọphu mu egudejedu eme  
 ẹjo-iphe gbakwataru  
 Chileke azu.
- 22 Ekemu Chipfu bẹ mu  
 nwubekotaru ẹnya g'ọ ha.  
 Teme ọphu mu aghajeduru  
 iphe, ọ suru g'e meje  
 okotazu.
- 23 Ọ tọ dukpoda ẹka uta du  
 mu l'ehu l'ataphu iya.  
 Mu sedekpọerupho onwomu;  
 ọphu ọ dudu ẹjo-iphe,  
 mu yejeru ẹka.
- 24 Chipfu buru mu nggo;  
 keḗ mu bụ onye pfulerekoto;  
 mbu l'o buru mu nggo;  
 keḗ mu bụ onye iswi  
 du mma l'iphu iya.
- 25 Ndu yeru ngu obu bẹ  
 iigoshije l'i yeru pẹ obu.  
 Ndu dube ree bẹ iiduebejeru  
 ree.
- 26 Ndu obu pẹ guru iphoro  
 bẹ iidobejeru obu iphoro.  
 I nodu emejeru ndu doberu  
 ụzo pẹ nggodogo  
 nggodogo g'umere  
 pẹ gbaru.
- 27 Ndu wozeru onwopẹ  
 alị bẹ iizotaje;  
 obenu lẹ ndu eku  
 onwopẹ bẹ iiwozeje  
 alị lonwongu.
- 28 Ọo gube Chipfu eyejeru mu  
 oku l'oroku mu.  
 Ọo gube Chileke mu emeje  
 g'iphoro duru mu  
 l'eka ochii agba.
- 29 Eshinu iyeru mu ẹka bẹ mu

- e-tso ikpoto ndu oḡoḡu oḡu.  
 Igbulo mkpukpu phe be mu  
 e-nyi; eshinu mu le  
 Chileke swi.
- 30 Uzo Chileke be ntucha  
 adudu m'ilile.  
 Opfu Chileke bukota okpobe  
 opfu.  
 Oogbobutaje ndu gbabarū  
 l'ime iya je anodu zee ndzu.
- 31 ?Bu onye buba Okalibe,  
 du nu, abudu  
 Chipfu kpoloko?  
 ?Bu onye buba  
 agbara-mkpuma,  
 abudu Chileke anyi?
- 32 Oo Chileke emeje g'ike du  
 mu.  
 O buru iya meru uzo mu;  
 ophu ntucha adudu iya.
- 33 Oomeje ge mu pfu shooshoo  
 ge mgbada;  
 mbu l'oomeje ge mu  
 pfuru pfushia ike  
 l'eli ubvu.
- 34 O zuru mu; mu maru  
 g'aalwuje oḡu;  
 k'ophu bu l'o to dudu  
 m'obeta o buru apfu,  
 e kweru l'igwe;  
 mu aduele-a ike gbaa ya.
- 35 Oo gube Chipfu egbobutaje  
 mu; shi egube ono  
 dzoo mu.  
 O buru ekutara ngu be  
 iigudeje gudeshia mu.  
 Eka iyeru mu ekutseje mu.
- 36 I mesataru uzo mu oḡa;  
 g'okpa te echiswafu mu.
- 37 Mu gude oso chia ndu  
 ohogu mu gude;  
 ophu mu anmaduru nggu;

- jasụ mu mee phe;  
 ẹphe buru mkpurupyata.  
 38 Mu chiru phe pyakapyaka;  
 k'ophu ẹphe ta adụedu  
 ike gbelibaa ishi ọzo.  
 Ẹphe zẹgbaepfo ke manyo  
 le mgboru okpa mu.  
 39 Oo ike nkengu be mu gude  
 eje ọgu.  
 Ndu etso mu opfu be i meru;  
 ẹphe gbushiru mu ikpere.  
 40 Ndu ohogu mu be i meru;  
 ẹphe ye okpa l'oso.  
 I mee; mu tuko ndu mu du  
 ashị gbushikota.  
 41 Ẹphe chiru mkpu;  
 ophu o dudu onye gbaru  
 phe mkpu.  
 Ẹphe raku Chipfu;  
 ophu o yeduru phe onu.  
 42 Mu gweru phe uji mee phe;  
 ẹphe du g'urwuku,  
 pherephere zikashiru.  
 Mu wushia phe g'epuchi le  
 gbororo.  
 43 I nafutaru mu l'eka ndu etso  
 mu opfu; bya emee;  
 mu mu buru ishi ohamoha;  
 k'ophu ndu mu eshidu  
 maru byaru alwakota  
 mu l'eka.  
 44 Ẹphe -numa l'owa-a iphe,  
 mu suru g'e mee baa;  
 ẹphe emee ya ẹgwegwa.  
 Ndu ohozo nodu  
 ephozekotaru mu.  
 45 Meji tufukota iphe,  
 bu ndu ohozo ono;  
 teme ẹphe nodu eshijgbaa  
 l'eka ẹphe shi wohaa  
 onwophe phuru  
 yeyeye byapfuta mu.

- 46 Chipfu nõkwa ndzụ;  
 unu tua  
 agbara-mkpuma  
 nkemu ono epha!  
 Unu kutsee Chileke;  
 l'oo ya bụ onye adzoje  
 mu nù!
- 47 Oo Chileke ejeje agwata  
 ugwo iphe, ndu ohogu  
 mu meru mu.  
 O meru; unwu-eliphe  
 nõdu mu lẹ mkpula.
- 48 Onafutaje mu  
 l'eka ndu ohogu mu.  
 Oowolije mu eli woru  
 mu doghaa ndu  
 etso mu opfu.  
 Oogbafutaje mu l'eka  
 ndu emeje nemadzụ  
 iphe-kpangangaa.
- 49 Noo g'o gude mu je  
 a-pfuru l'iphu ohamoha  
 kele gube Chipfu ekele.  
 Mu a-gụ ebvu gude tua  
 ngu epha.
- 50 Onye eze, o hotaru be  
 oomeje g'o mekpee  
 l'ogu.  
 N-yemobu iya be  
 oonoduje egoshi onye  
 o wuru manụ l'ishi,  
 bụ Dévidi yee oshilokpa  
 iya jasụ lẹ tuutuutuu  
 lẹ mijiimii.

## Ebvu-oma 19

Ebvu-oma, Dévidi deru  
 nù onye-ishi ebvu

- <sup>1</sup> Igwe l'ophu atụ onu ge  
 Chileke dụ-be biribiri.

- Akpaminigwe nọdu egoshi  
g'oomebe ọna.
- 2 Eswe mbọku-mbọku atụ ọnu  
iya; tẹme ẹnyasi nọdu  
emeje g'a kabaa ya  
amaru.
- 3 A taa nọdu olu pẹ;  
ọphu ọ dudu iphe,  
ẹphe epfu, aanụ ẹ nchi;
- 4 Obenu l'olu pẹ tukurọ eliphe  
l'ophu ngakọta.  
Ozi, ẹphe ezi jerwuchaa ẹka  
mgboko беру.  
Ọo Chileke kpuru ọlo doberu  
ẹnyanwu l'imigwe.
- 5 Ẹnyanwu nọdu eshije l'ulo  
iya ọbu kpufuta ẹ nwoke,  
luru nwanyi k'ọphúú.  
Ẹhu nọdu atso iya ẹ  
mkparawa, ike du,  
l'ẹje atụ ego oso.
- 6 Ọowaje l'akpaminigwe l'ishi  
lanu; o shi l'ishi iya  
ono jee jasụ l'ishi  
iya ọphuu.  
Ọphu ọ dudu iphe, a-sụ  
ẹ ya nọ l'ẹka  
okpomoku iya te  
erwudu iya l'ẹhu.
- 7 Ekemu Chipfu dọbe ree.  
Oomeje g'obu gụ-zeta  
nemadzụ.  
Omelali, Chipfu doberu ta  
angadu anganga.  
Oomeje g'onye amazidu iphe  
kabaa amaru iphe.
- 8 Iphe, Chipfu turu ọkpa iya  
pfukwaru nhamunha.  
Oomeje g'ẹhu tsoo nemadzụ  
utso.  
Iphe, Chipfu sụru g'e meje  
doru rịsaa.

Oomeje nemadzú g'ò  
huma-rweta ọ́zo ree.

<sup>9</sup> Ntsumebvu Chipfu dú ree.

Ọ́o-ńọ́ jasú l'ọ́jejoje.

Iphe, Chipfu túru l'ekemu  
bú eviya.

Ọ́ pfúkótaru nhamúnha.

<sup>10</sup> Ọ́ ka mkpọ́la-ododo agú ẹ́gu;

gẹ́ mkpọ́la-ododo ono

adúhabe ree.

Tẹ́me ọ́ tsọ́haa manú-ẹ́nwu

l'útso; m'ò rwuhaa

ọ́ búru ẹ́bakala-ẹ́nwu.

<sup>11</sup> Ọ́onoduje alọ́ múbe onye-ozi

ngu ẹ́ka lẹ́ nchí.

Obunggo dúru iya onye

anọ́duje eme iphe,

o pfuru.

<sup>12</sup> Ọ́le ọ́ bú; ?bú onye amajeru

teke ya eme iphe-ẹ́ji?

Jiko sachafúkwa mu iphe-ẹ́ji,

mu meru

ọ́phu mu amadú.

<sup>13</sup> Yetarú múbe onye-ozi ngu

ẹ́ka jiko gẹ́ mu te

elekebeje ẹ́nya mee

iphe-ẹ́ji.

Te kwekwa g'iphe-ẹ́ji kapyabeje

mu ẹ́nya.

Ọ́o ya bú gẹ́ mu a-dúebe ree;

tẹ́me l'a haarú mu enge

lẹ́ mu ta túpyajeduru

gúbe Chipfu.

<sup>14</sup> Jiko Chipfu; g'opfu,

shi mu l'ọ́nu; mẹ́ iphe,

mu arí l'ime obu mu dúje

ngu rọ́ ree;

kẹ́le ọ́o ngu bú

agbara-mkpuma mu;

bya abúru onye agbafútaje

mu nù.

## Ebvu-oma 20

Ebvu-oma, Dévidi deru  
nụ onye-ishi ebvu

- 1 Gẹ Chipfu nūmaro olu ngu  
nta-a, iphe-ẹhuka byaru  
ngu-a!  
Gẹ Chileke kẹ Jiékọpu jiko  
gbobutakwa ngu!
- 2 G'o shikwa l'ulo iya,  
dụ nsọ bya agbaaru  
ngu mkpu!  
G'o shinu ẹ Zayonu bya  
agbaaru ngu ọdzori!
- 3 G'ọ nyatakwa iphemiphe,  
ị mịru ẹn्या nụ iya!  
G'ọ natakwa  
ngweja-akpo-ọku,  
i gweru nụ iya!
- 4 G'ọ nụkwa ngu iphe,  
dụ ngu l'obu!  
G'o mekwaa g'iphe,  
ị tūberu jee g'ị tūberu iya!
- 5 Ọo ya bukwanu g'anyi  
atua okoo m'anyi nūmaepho  
l'eka nkengu kangoru.  
Anyi achi-liaru Chileke  
anyi ẹkwa-ọhubama.  
Gẹ Chipfu mekwaru ngu  
iphemiphe, ị rwokotaru  
iya!
- 6 Nta-a bẹ mu mawaru ẹ  
Chipfu dzotawaru onye nkiya,  
a wuru manu l'ishi.  
Ọogbeje l'imigwe,  
dụ nsọ ono za iya ẹnu.  
Ọ nodu egudeje ọkphehu iya  
mee g'eka onye eze  
kangoo.
- 7 O nweru ndu achijeru upfu  
kwee l'ugbo-inya.  
O nwekwarupho ndu ọphu

- akpojeru obu ye  
l'inya-ogu phẹ.  
Obenu l'anyibedua bu  
ẹpha Chipfu, bu Chileke  
anyi be anyi dakoberu.  
8 Ẹphebedua vukotawaru abali  
dagbua ọchii;  
obenu l'anyibedua gbẹshiru  
pfuru pfushia ike.  
9 Jiko Chipfu; menaa g'ẹka  
onye eze anyi kangoo!  
Nụmaro olu anyi nta-a,  
anyi araku ngu-a!

## Ebvú-oma 21

### Ebvú-oma, Dévidi deru nụ onye-ishi ebvu

- 1 Gube Chipfu; ẹhu atso eze uto  
l'okpehu ngu paru ẹka.  
Lewaro egube eswa,  
oote l'i meru; ẹka iya kangoo!  
2 I mekpọeru iya pho iphe,  
du iya l'obu;  
ofhu o dudu iphe,  
o saru onu su g'i meeru iya,  
i ti meduru iya.  
3 I gude iphe-oma, nyiberu  
anyibe gba iya ndzuta;  
bya eworu okpu-eze,  
e meru l'okpobe  
mkpola-ododo kpube  
iya l'ishi.  
4 O rworu ngu ndzu;  
i nukwa iya ya pho;  
mbu mee g'eswe ndzu iya  
buru ojejeje.  
5 Emekpe ono, i meru;  
o mekpee ono meru;  
a nodu akwabẹ iya ubvu,  
paru ẹka apaa.



- I meru; ọ dū akpabiri;  
 egbu nw̄iinwii.
- 6 Mbū-a; l'ị gowaru iya  
 ọnu-oma ojejeje;  
 bya emee g'ẹhu tsoje iya ụtso;  
 noo kele ị nọ swiru iya.
- 7 Eshinu eze dakoberu Chipfu;  
 tẹme Okalibe-kakota-shii  
 yee ya obu bẹ a ta  
 abyakwa enwubata iya  
 enwubata.
- 8 Ẹka ngu a-kpachaaaru ndu  
 ohogu ngu g'ẹphe hakota.  
 Ndu ị dū ashị bẹ ii-gude  
 ẹkutara ngu zū pf̄uurii.
- 9 Teke ii-me g'a hūma ngu  
 bẹ ii-hū phẹ l'oku,  
 enwu phoophoophoo;  
 mbū lẹ Chipfu  
 a-tukoshi phẹ oke  
 ẹhu-eghu iya;  
 gude oku tsupyashia phẹ.
- 10 Ii-mebyishi awa phẹ lẹ  
 mgboko-a l'ophu;  
 mekwaapho g'unwu phẹ  
 chihu lẹ mgboko-a.
- 11 Ẹphe a-nodu achikpooru  
 ngu ejo idzu;  
 gbachaaaru ngu kẹ njo;  
 ọle ọ tọ dudu  
 ophu e-nweru ishi.
- 12 Kele ii-me g'ẹphe ye okpa l'oso;  
 m'ị setaephō  
 apf̄u ngu kẹ  
 k̄ikiki g'ị gbaa phẹ.
- 13 Gube Chipfu; g'e kutsee ngu  
 l'okpehu parū ngu ẹka.  
 Anyibedua a-nodu agū ebvu  
 etu ngu ẹpha l'ike  
 dūnukaru ngu.

## Ebvü-oma 22

Ebvü-oma, Dévidi deru nu  
 onye-ishi ebvü; g'e gude olu,  
 "Ele Nchi-aböhu" gua ya

- 1 Chileke mu! Chileke mu!  
 ?Bü gunu bë o gude i haa mu  
 nkinyi mu?  
 ?Bü gunu meru g'o gude i haa  
 mu adzöta je anödu mu  
 üzenya?  
 ?I je anödu g'i ti numa ude,  
 mu atsü?
- 2 Gube Chileke mu;  
 eswe l'enyashi bë mu  
 arakuje ngu;  
 i tii zadu mu enu; obenu  
 le mu ta anökirishijedu.
- 3 Öle i dünaa nsö g'i dü;  
 mbü gube onye eze ndu  
 Ízurelu anöduje etu epha.
- 4 Öo ngu bë nna anyi phe  
 dakoberu.  
 Epe dakoberu ngu;  
 i nafuta phe.
- 5 Epe rakuru ngu; i dzoo phe.  
 Epe dakobe ngu;  
 öphu i kpuduru phe  
 iphu le ntü.
- 6 Obenu le mbedua bü  
 mgbashiride;  
 mu ta abüdu nemadzü.  
 Mu bü onye unwu-eliphe  
 emeje iphe-iphere;  
 bya aburu onye adüdu iphe,  
 ndiphe guberu iya.
- 7 Iphe, bukpuo ndu ele mu  
 enya achü mu öchi;  
 aphuru mu egbonu;  
 bya ekweru mu une; sü:
- 8 "Ö kwa l'ö süru l'öo Chipfu  
 bë ya boru mkpa iya.

- Ngwa; gẹ Chipfu obu  
nafutanu iya!  
G'ọ gbafutanu iya;  
eshinu ọ sūru lẹ ya dū  
Chipfu l'obu.”
- 9 Ọlẹ ọ kwa ngu-a kufutaru  
mu l'ẹpho ne mu.  
Ọ buri ngu meru; mu  
dakobe ngu; e -shiro  
teke mu angukwadu ẹra.
- 10 A nwuru mu bya ekuru  
mu ye ngu l'ẹka.  
E -shi teke mu nọ l'ẹpho ne  
mu bẹ ị buhawaa Chileke mu.
- 11 Ba nọdukwa mu ụzenya;  
kele iphe-ẹhuka nọkwa mu  
phakuu;  
ọphu mu enwekwa onye  
gbaru mu mkpu.
- 12 Oke-eswi, dū igwerigwe  
nọ-pheru mu anọ-peech;  
mbụ lẹ obobena ndu  
Beshanu gbaru mu  
mgburugburu.
- 13 Ẹphe sagbaaru ọnu galaba  
eje abyapfuta mu g'oduma,  
l'agbọ ọja, ejepfu anụ,  
oo-gbu; taa.
- 14 A wushiru mu gẹ mini.  
Iphe, bụ ọkpu, nọ mu  
l'ẹhu gbughashihu.  
Nta-a bẹ obu mu dūwaa  
g'ụnwù.  
Ọ nọwa mu l'ime zashihu  
azashihu.
- 15 Ike bvūwaru mu;  
ọphu ụvohu aduhedu  
mu m'ilile.  
Ire nyakūwaru mu l'akpo.  
I woru mu gwophua  
l'urwuku gẹ mu nọdu  
nwūhu.

- 16 Nkuta nọ-phewaru mu  
mgburugburu.  
Ikpotu ndu eme ejo-ememe  
gbaphewaa mu  
mgburugburu;  
kpọ-fushia mu ẹka yẹ  
ọkpa.
- 17 Nta-a bẹ ẹgara agụwa  
mu ọgu.  
Ndiphe tukurawa chiru ẹnya  
dzee mu ele mu ke  
phoripho.
- 18 Ẹphe kee uwe mu l'ehu l'ehu;  
o be l'ophu mu eyeje l'ime ẹhu;  
ẹphe tuta ido g'ẹphe maru  
onye a-chita iya nu.
- 19 Jiko gube Chipfu;  
ba nodukwa mu ụzenya!  
Gube mkpakọ ike mu;  
bya ẹgwewa bya  
agbaaru mu mkpu!
- 20 Gbafuta ndzu mu g'e te  
gude ogu-echi phua mu!  
Gbafutaro mkpakọ iphe ono,  
mu nweru ono, bu ndzu mu;  
ge nkuta ta takashi iya!
- 21 Jiko dzotanu mu l'onu  
oduma;  
waa le mgbaka mpu atsu.  
Eshinu i zawaruu mu ẹnu;
- 22 bẹ mu a-ra ẹpha ngu arara  
g'unwunna mu phe  
numa-dzuru.  
Mu anodu l'edzudzu-oha jaa  
ngu ajaja.
- 23 Unube ndu atsu Chipfu ebvu;  
unu jaa ya ajaja!  
Iphe, bukpuo g'unu ha buru  
oshilokpa Jiekpu;  
unu kwabeje iya ubvu!  
Unube oshilokpa Izurelu  
l'ophu; unu bageru iya aja!

- 24 Kele onye iphe-ehuka byaru  
 b'e o too lejedu  
 olegbulenya;  
 mbu l'o too gbadojedu  
 onye eje iphe-ehuka;  
 ophu o ghajeduru  
 iya azu.  
 Oonumaje-chia olu, o gude  
 chiku iya le mkpu.
- 25 Mu a-nodu l'edzudzu-oha jaa  
 ngu ajaja iphe, i meru mu.  
 O buru l'iphu ndu atsụ ngu  
 ebvu be mu a-nodu  
 mekota iphe, mu riburu  
 angu ememe.
- 26 Ndu ukpa be epho e-ji.  
 Ndu achọ Chipfu ajaa  
 ya ajaja.  
 "Ge ndzu unu buru ojejoje."
- 27 Unwu-eliphe l'ophu  
 e-mechaa nyata iphe,  
 nwuru nu.  
 Ephe adakobe lwapfuta  
 Chipfu.  
 Mbu-a; iphe, bukota ipfu,  
 nokota l'ohamoha  
 be e-mechaa bya  
 abakotaru iya aja.
- 28 Kele iphe, bukotakpoo  
 ali-eze ndiphe l'ophu  
 bukota ke Chipfu;  
 teme o buru iya achikota  
 ohamoha.
- 29 Iphe, bukpoo ndu nweru iphe  
 l'eliphe-a be e-mechaa booru  
 iya obo-iphe; bakwaarụ  
 iya pho aja;  
 teme iphe, bukotakpoo  
 ndu e-mechaa buru aja be  
 e-mechakwapho gbua  
 ikpere l'ataphu iya;  
 mbu ndu ta adudu ike edobe

onwophe ndzu.

<sup>30</sup> Oḡbo, nọ l'iphu e-jeru iya ozi.

Oḡbo, a-bya nū bẹ aa-kọru  
ke Nnajiuphu.

<sup>31</sup> Aa-raru iya ndu e teke

anwukpodanu anwunwu

le Nnajiuphu bu onye

pfuberekoto;

mbu l'oo yebedua meru iya.

## Ebvu-oma 23

### Ebvu-oma, Dévidi deru

<sup>1</sup> Chipfu eche mu g'onye eche  
aturu;

ophu o dukpodaa iphe,  
uko iya bya aduru mu.

<sup>2</sup> Oomeje ge mu zee tuta unme  
leka irwu eswa du.

O nodu eduje mu eje l'aguga  
mini, doru nyimunyimu.

<sup>3</sup> Oomeje g'obu gu-zeta mu.

O buru uzo, pfuru oto be  
oodujeru mu shia g'ee-shi  
g'epha iya apfuru.

<sup>4</sup> Obetakpoo o buru uzo,

du le nsuda, gbahuru  
tsukiribaa be mu eshi

o to dudu ejo-iphe,  
mu atsū ebvu iya;

kele i no swiru mu eswiru.

Mgboro me oshi-mpaleka

ngu anoduje adu mu obu.

<sup>5</sup> Iigweshijeru mu nri ge

mu ria l'iphu ndu achi

mu le njo.

I nodu eteje mu manu,

eshi mkpo l'ishi g'eemeje

onye a kwaru ebyaa.

Okoro mu be iimeje;

lo ji pyimu pyimu

- ebushihu ebushihu.  
 6 O buẹpho k'oma waa  
 n-yemobu Chipfu a-nọdu  
 etso mu jasukpoo ge mu  
 a-nọ-beru.  
 Mu ebuerupho l'ulo Chipfu  
 jaswaruroya.

## Ebvú-oma 24

### Ebvú-oma, Dévidi deru

- 1 Mgboko; yee iphemiphe,  
 nọ iya nọ bukota ke Chipfu;  
 mbu eliphe-a l'ophu;  
 mekpoo ndu bu iya nọ;  
 2 kele o l'eli eze-enyimu  
 be o turu okpa iya;  
 bya emee ya;  
 o nguru anguru l'eli enyimu  
 ime-ali.  
 3 ?Bu onye a-du ike nyihu  
 ubvu Chipfu?  
 ?Bu onye a-du ike pfuru  
 l'eka o doberu nsọ?  
 4 Oo onye obochi-eka iya labo  
 adudu iphe-eji, du iya nọ;  
 teme obu iya gua iphoro;  
 onye te ewoduru obu iya  
 ziberu iphe, bu ugho;  
 teme ophu ookpapyabejedu  
 iphe, o meru gua enwa.  
 5 Onye ono be Chipfu a-goru  
 onu-oma nọ;  
 teme Chileke ono, bu onye  
 adzoje iya nọ ono ahaaru  
 iya enge.  
 6 Noo g'ogbo, achọ ngu nọ  
 aduje bu onoya;  
 mbu ndu achọ g'ephe huma  
 iphu gube Chileke ke Jiékopu.  
 7 Unu guhashia onu-abata

- ono g'o gheru onu!  
 Unu gúhashia mgbo ndiche  
 ono;  
 k'ophu eze akpabiri a-bata.
- 8 ?Bú onye búkpoo eze  
 akpabiri obu?  
 Oo Chipfu, bu onye nwe  
 ike yee okpehu;  
 mbú Chipfu onye ejeje ogu  
 lwú-kpee.
- 9 Unu gúhashia onu-abata  
 ono g'o gheru onu!  
 Unu gúhashia mgbo ndiche ono;  
 k'ophu eze akpabiri a-bata.
- 10 ?Bú onye búkpoo eze akpabiri  
 ono?  
 Oo Chipfu, bú Okalibe-Kakota-Ike  
 bú eze akpabiri obu.

## Ebvú-oma 25

### Ebvú, Dévidi deru

- 1 Oo gúbe Chipfu be mu gude  
 obu mu g'ò ha eflu anu.
- 2 O búru gúbe Chileke mu be  
 mu dakoberu.  
 Te kwekwa g'e kpua mu iphu  
 le nu;  
 ophu i kwekwa ge ndu ohogu  
 mu turu okoo kpua mu.
- 3 O to dukpoodaa onye enya du  
 l'eka i no, e kpujeru  
 iphu le nu.  
 Obenu le ndu eme umere,  
 agbaduru phe nu;  
 ebe adu iphe, kparu iya nu  
 be ee-kpu iphu le nu.
- 4 Jiko Chipfu; goshinu mu  
 gbororo ngu;  
 menaa g'uzo ngu doo mu  
 enya ree!



- 5 Goshi mu ọzo, mu e-shije  
 eme ọkpobe opfu ngu;  
 l'i zia mu iphe l'onwongu;  
 kele ọ ngu bu Chileke,  
 l'adzoje mu nu.  
 Ọ buru l'eka i no be enya mu  
 aduje mboku-mboku.
- 6 Gube Chipfu; jiko nyatakwa  
 obu-imemini;  
 yee n-yemobu ngu;  
 kele ephe shi l'ojeje.
- 7 Ta nyatakwa iphe-eji,  
 mu meshiru l'okorobyia;  
 ọphu i nyatakwa le mu  
 shi kwefuru ngu ike.  
 Gude kele i yeru mu obu  
 nyata mu ro;  
 kele i du ree Chipfu.
- 8 Chipfu du ree bya aburu  
 onye obu iya guru iphoro.  
 Ọ buru iphe ono meru go  
 gude ọ nodu ezije  
 ndu iphe-eji ọzo iya ono.
- 9 Ndu wozeru onwophe ali  
 l'iphu iya be onoduje  
 edu gephe mee iphe,  
 pfuru nhamunha.  
 Ọ nodu anoduje ezi phe ọzo  
 iya.
- 10 Ndu eme iphe, du  
 l'ogbandzu Chipfu;  
 bya eme iphe, ọ suru g'e  
 meje  
 be Chipfu egoshije le ya  
 yeru obu; bya aburu  
 o-me-g'o-pfuru;  
 mbu ndu edobeje iphe,  
 ogbandzu ephe l'iya pfuru.
- 11 A makwaru-a l'ejo-iphe,  
 mu meshiru ngu paru aka.  
 Ọlobu Chipfu; jiko garu  
 mu ro nvu gepha

- ngu apfuru.
- 12 ?Bú onye búkpoo onye atsu  
Chipfu ebvu?  
Onye ono bẹ ọo-kpọ-ziru ọzo,  
gbaru iya l'eshishi.
- 13 Onye ono bẹ iphe a-nọdu  
aduru lẹ ree  
mkpurumkpuru.  
Ọ buru oshilọkpa iya  
e-nweru alị ono.
- 14 Ndu Chipfu kpọru obu yeru  
bụ ndu atsu iya ebvu.  
Ọ buru ndu ono bẹ oomeje  
g'ephe maru oğbandzu  
ephe l'iya.
- 15 Enya mu buepho lẹ Chipfu  
bẹ ọduje;  
kele ọ bue ya phọ kpoloko  
bụ onye a-dụ ike zọfu  
mu l'ọnyà.
- 16 Ghanaaru mu iphu;  
phunaaru mu obu-imemini;  
kele mu nọ nkinyi mu;  
aphu tsokwaru mu phọ.
- 17 Iphe, egburwashị mu ehu  
paakwaru igwerigwe.  
Byanu ekufuta mu l'iphe-ehuka  
mu ono!
- 18 Lenaa enya l'aphu ono, byaru  
mu nu ono; yee ejo onodu,  
mu nọ.  
Gukotanuru mu nvu l'iphe-eji,  
mu meru g'ọ ha!
- 19 Lewarọ ge ndu ohogu mu  
habe igwe!  
Lewarọ enya huma ge mu  
du-be phe ashị kparu!
- 20 Chenu ndzu mu nche;  
jiko nafuta mu ro;  
g'e te kpu mu iphu lẹ ntụ;  
kele ọo l'ime ngu bẹ mu nọ;  
ezeru ndzu.

- 21 G'iphe, a-nọdu adzo mu nọ  
 buru kele mu bu onye uto  
 adudu l'ehu;  
 bya aburu onye obu guru  
 iphoro;  
 eshinu o bu l'eka i no  
 be enya mu du.
- 22 Jiko Chileke; gbafutano  
 ndu izurelu l'iphe-ehuka,  
 ephe ejekota g'o ha!

## Ebvu-oma 26

### Ebvu, Dévidi deru

- 1 Haarụ mu enge gube Chipfu;  
 kele o to dudu eka uto du  
 le ndzu mu.  
 Oo ngu be mu dakoberu  
 Chipfu;  
 ophu o dudu teke mu  
 ngajeru anganga.
- 2 Huna mu ama Chipfu!  
 Nyochana mu enyocha!  
 Lerwena enya elerwe  
 l'ime obu mu waa  
 legomunggo mu.
- 3 Kele oo obu, i yeru mu  
 anoduje akpo-ziru mu  
 uzo tekenteke;  
 teme mu nodu emeje iphe,  
 i pfuru.
- 4 Mu le ndu eregede ta  
 anobajekwa;  
 ophu mu le ndu bu  
 tuko-l'ehu-atuko-l'obu  
 aswidu oswi.
- 5 Ndzuko ndu anoduje eme  
 ejo-ememe be mu  
 akpo-yiru ukuvu;  
 ophu mu le ndu ejo-iphe  
 anobajedu.

- 6 Mu akwoje ẹka gude goshi  
l'iswi dū mu mma.  
Mu abya ejephe ọru-ngweja  
gūbe Chipfu mgburugburu;
- 7 akwa ẹvu; etu ngu ẹpha;  
epfukashi k'iphe, dū biribiri,  
iinoduje eme.
- 8 Ụlo gūbe Chipfu bẹ mu yeru  
obu;  
mbū ẹka o-gbu-nwiiinwii  
ngu dū.
- 9 Ba sakobekwa mu lẹ  
ndu iphe-ẹji ọ-sa-mpfū;  
ọphu i dobekwa mu lẹ ndu  
egbu ọchi l'oshi lanū;
- 10 mbū ndu buepho iphe-ẹji  
bẹ ẹphe maru ememe;  
bya aburu eri ọphalazu bụ  
iphe, doru pẹ ẹnya.
- 11 Obenu lẹ ndzū nkemu bẹ  
uta ta adudu m'ilile.  
Ọo ya bụ; phunaaru mu  
obu-imemini; gbafuta  
mu ọ!
- 12 Mu pfuru l'ẹka ọkpa rwuru  
mu alị.  
Mu je l'anodu ledzudzu-ọha  
tua Chipfu ẹpha.

## Ebvu-oma 27

### Ebvu, Dévidi deru

- 1 Ọo Chipfu bụ ìphóró, dūru  
mu nū bya aburu onye  
adzoje mu nū.  
?Bū onye bẹ mu atsukwanu  
ebvu ọzo?  
Ọo Chipfu bụ  
ulo-ezeru-ndzū mu.  
?Bū onye bẹ ndzū iya a-nodu  
agubaa mu ọzo?

- 2 Teke ndu eme ẹjo-ememe;  
 mbu ndu achi mu le njo;  
 waa ndu ohogu mu turu  
 kpereree byapfuta mu  
 g'ephe vya anu mu avvu;  
 ephe evukota abali dagbua  
 ochii.
- 3 Obetakpo ndu ojogu  
 no-pee mu mgburugburu;  
 be obu te etedu mu etete.  
 Mbu; o betakpo nu ndu  
 ohogu mu wulihu tsoo  
 mu ogu;  
 mu adakobe-ele-a Chipfu.
- 4 Oo iphe lanu be mu arwo Chipfu;  
 o buru iphe ono be mu acho.  
 Iphe obu bu ge mu nodu  
 l'ulo Chipfu jasu le ge mu  
 a-noberu le mgboko-a;  
 ge mu nodukoepho  
 egbu igo l'o-du-ubvu Chipfu;  
 teme mu anodukwapho  
 l'eze-ulo Chipfu kpataje  
 iya ishi iphe.
- 5 Kele mboku, ẹjo-iphe  
 byaru mu be oo-dobe mu  
 l'eka o no;  
 l'o domia mu l'ime mkpù-ekwa  
 iya; bya eworu mu pfube  
 ephekerephe l'eli mkpuma.
- 6 Oo ya bu; mu esengoo ndu  
 ohogu mu, no-pheru mu  
 mgburugburu.  
 Mu anodu l'ulo-ekwa  
 Chileke tua oko gude  
 gwaa Chipfu; ga ebvu;  
 kya nkwa gude tua ya epha.
- 7 Jiko Chipfu; numanu olu  
 mu me mu raku ngu!  
 Phunaaru mu obu-imemini;  
 zanu mu enu!
- 8 Iphe, obu mu pfuru mu

- bụ gẹ mu chọ iphu ngu.  
 Ọ buru iphu gube Chipfu  
 ono bẹ mu achora.
- 9 Ta aghakwaru mu azu;  
 ọphu i gudekwa ẹhu-eghu  
 ngu nwufu mube  
 onye-ozu ngu;  
 kele ọ buekwa ngu pho  
 bụ onye shi eshinu  
 yetaru mu ẹka.
- Ta ajikakwa mu;  
 ọphu i gwobekwa mu;  
 gube Chileke, bụ onye  
 adzoje mu nu!
- 10 Nna mu yee ne mu  
 -gbadokpo mu nu;  
 bẹ Chipfu e-letale mu-a ẹnya.
- 11 Zia mu ọzo ngu; jiko Chipfu!  
 Dunaa mu shia ọzo, pfulu  
 nhamunha m'obvu ndu  
 akpa mu ẹhu.
- 12 Ta ahakwa mu gẹ ndu  
 achu mu le njo mee mu g'ọ  
 du phe; kele ndu agba  
 mu ẹjo-ekebe wulihuru  
 ebo mu ibo; anmaru  
 mu onwu ẹhuka ẹhuka.
- 13 Obenu l'iphe, mu chiru  
 upfu kwee bụ le mu  
 a-ndu ndzu huma iphe,  
 du ree, shi Chipfu l'ẹka.
- 14 Nodu kwaberu Chipfu!  
 Shihukpoeppo ike;  
 gude ẹka l'obu;  
 kwaberu Chipfu.

## Ebvu-oma 28

### Ebvu, Dévidi deru

- 1 Ọo ngu bẹ mu araku Chipfu,  
 bụ oke mkpuma nkemu.

- Ba gbakwa mu nkuchi;  
 kele i -nokirishia be mu le  
 ndu eja taru a-bukwaru  
 iphe lanu.
- 2 Nūmaro mkpu, mu echiku  
 ngu g'i yeru mu eka;  
 ge mu chiliru eka mabe  
 l'uzo eka-kakota-adu-nso  
 ngu ono.
- 3 Ba tukokwa mu le ndu  
 ejo-iphe kputa kpufo;  
 mbu ndu anoduje eme iphe,  
 adudu ree;  
 ndu anoduje epfuru  
 nemadzu ibe phe opfu  
 emereme l'eli onu;  
 obenu l'iphe, du phe l'obu  
 bu mgbashi.
- 4 Pfu phe ugwo iphe, epe  
 meru;  
 me ugwo ejo-ememe,  
 epe megbaberu.  
 Pfu phe ugwo iphe,  
 epe gude eka phe meta;  
 l'i wota iphe, gbaru phe  
 nu wophutaru phe azu.
- 5 Eshinu o dudu iphe,  
 epe guberu ozi, Chipfu  
 jeru; mbu iphe, Chipfu  
 gude eka iya mee l'onwiya;  
 be oo-gude eka iya  
 dojashia phe adojashi;  
 ophu o byadu  
 agbakwabaa phe agbakwa.
- 6 Unu tua Chipfu epha;  
 kele o nūmaru mkpu,  
 mu chikuru iya su g'o  
 phuru mu  
 obu-imemini.
- 7 Oo Chipfu bu ike mu;  
 bya aburu onye egbobutaje  
 mu nu.

- Ọ bụru iya bẹ mu dakoberu;  
 ọ nọdu eyeru mu ẹka.  
 Mu anọduje ete ẹswa  
 l'ime obu mu.  
 Mu a-gụ ebvu gude kele  
 iya ekele.
- 8 Ọo Chipfu bụ ike ndu nkiya;  
 bya aburu ọlo-ezeru-ndzu  
 onye o teru manụ l'ishi.
- 9 Dzọtanu ndibe ngu;  
 gónuru ọnu-oma  
 nụ ndu bụ  
 okiphe ngu!  
 Chejenu phẹ nche g'onye  
 eche aturu;  
 l'i heru phẹ eheru jasụ  
 l'ojejeje!

## Ebvu-oma 29

### Ebvu-oma, Dévidi deru

- 1 Unubẹ unwu imigwe;  
 unu kwabẹ  
 Chipfu ùbvù!  
 Unu pfua g'ọkpehu iya  
 habe shii!
- 2 Unu kwabẹ Chipfu ùbvù,  
 gbaru ẹpha iya!  
 Unu baarụ Chipfu ẹja;  
 mbụ onye dụ nsọ bya  
 adụ akpabiri.
- 3 Olu Chipfu tukuru  
 eze-enyimu ngakọta.  
 Ọ bụru Chileke ono,  
 dụ akpabiri ono atụ  
 egbigwe;  
 mbụ lẹ Chipfu atụ egbigwe  
 l'eli eze-enyimu.
- 4 Olu Chipfu dukwa ọkpehu;  
 mbụ l'olu  
 Chipfu anọduje



- ada kpaá kpaá.
- 5 Olu Chipfu agbawashije  
oshi sida; mbụ ị Chipfu  
agbajashije oshi sida,  
pfụgbaaru l'úbvú úbvú  
Lébanonu.
- 6 Oomeje g'úbvú úbvú  
Lébanonu nmahụ  
jiiijiii gẹ nweswi, apfụ  
kẹ shooshoo.
- Ọ nọdu emeje  
úbvú Siriyonu;  
g'ọ nma pfụla pfụla  
gẹ nwa atsu, apfụ ntụ.
- 7 Olu Chipfu akuje  
g'ebemu-igwe.
- 8 Olu Chipfu anmajẹ echiegu  
jiiijiii;  
mbụ ị Chipfu anmajẹ  
echiegu Kadeshi jiiijiii.
- 9 Olu Chipfu anmajẹ  
achị yigayiga.  
Ọjishije ekwo l'oswa;  
mee ya;  
l'o gheru karaphongu.  
Onyemonye, nọ l'ime  
eze-ulo iya a-nọdu epfu;  
sụ: “Chileke dukwa  
biribiri!”
- 10 Chipfu sụgaru l'aba-eze  
iya; utso nọdu iya ị  
mkpula;  
tẹme o je a-buru eze  
jasụ l'ojejoje.
- 11 Chipfu emeje g'ike  
dụ ndibe  
iya.  
Chipfu agojeru onu-oma  
nchị-adu-doo nụ ndibe  
iya.

## Ebvu-oma 30

Ebvu-oma, Dévidi deru

A gūru iya gude woru  
eze-ulo Chileke ye Chileke  
l'eka

- 1 Mu a-ṅodu ekutse gūbe  
Chipfu;  
kele i nalitaru mu loḡuta  
mu l'ime nsu;  
oḡhu i kwedu ge ndu oḡogu  
mu teru eṣwa kpua mu.
- 2 Gūbe Chipfu, bu Chileke mu;  
mu rakuru ngu g'i  
yeru mu eka.  
I bya emee; eḡhu du mu ike.
- 3 Su-a; gūbe Chipfu;  
oo ngu lo-litaru mu  
loḡuta mu l'ime ali-maa.  
I mee ge mu ta abu onye  
eja taru.
- 4 Unu guḡa ebvu gude tua  
Chipfu epha;  
unube ndu duru iya  
nsu!  
Unu kele iya ekele;  
l'epha iya du nsu!
- 5 Kele eḡhu te eghujedu iya  
eghu noo odu.  
Obenu l'obu-omaa ya anoduje  
jasu teke onye onoya  
l'a-no-beru.  
Enya-mini bu-a l'enyashi be  
aakwashije iya;  
o -be l'utsu; ebvu eḡhu-utso  
adaha.
- 6 Teke eḡhu du mu guu be mu  
suru lo to dukpoda iphe,  
byaru enwubata mu nu.
- 7 Gūbe Chipfu; teke i shi  
emeru mu obu-oma

- bẹ i meru; mu nguru  
anguru g'úbvú.  
Obenu lẹ teke ị gharu mu azu  
bẹ meji tofuru mu.
- 8 Oo gube Chipfu bẹ mu rakuru.  
O buru gube Nnajiuphu bẹ  
mu rworu g'i phuru  
mu obu-imemini.
- 9 Mu suru: “?Bụ urwu gunu  
bẹ anwuhu mu a-baru ngu?  
Mbụ-a? denu urwu, ii-rita iya  
mẹ a tua mu eja?  
?Bụ urwuku, du l'ali a-wata  
ngu ajaja?  
?Bụ iya a-ra iya arara l'i bu  
onye apfushije ike  
l'iphe, i pfuru?”
- 10 Jiko Chipfu; nũmaro olu  
mu; phũnaaru mu  
obu-imemini!  
Jiko Chipfu; yeru mu ro eka!”
- 11 Ekwá, mu rarụ bẹ ị  
gbanweru mee;  
mu teahaa ebvu.  
Ị bya eyefu mu uwe-aphu,  
mu yeru; woru ehu-utso  
yee mu g'uwe.
- 12 Iphe ono bukpoerupho  
g'ee-shi g'obu mu aguaha  
ebvu gude etu ngu epha;  
g'o to nọhe nggujinguji.  
Gube Chipfu, bu Chileke mu;  
oo ngu bẹ mu a-noduje  
ekele jasụ l'ojeje.

## Ebvú-oma 31

Ebvú-oma, Dévidi deru  
nụ onye-ishi ebvu

- 1 Oo gube Chipfu bẹ mu no  
l'eka ezeru ndzu.

B'ekwekwa g'e kpua mu iphu  
 lẹ ntụ jasu l'ojejoje.

Eshinu ì bụ onye  
 pfuberekoto; nafutanu  
 mu.

2 Gbobenuru mu nchi.  
 Bya egwegwa bya agbafuta  
 mu.

Bunuru mu agbara-mkpuma,  
 mu a-gbabaje je ezeeru ndzu;  
 mbu ulo-ezeru-ndzu,  
 a-dzota mu nu.

3 Eshinu ì buru mu  
 agbara-mkpuma; bya  
 aburu mu ulo-ezeru-ndzu;  
 dunaa mu lonwongu;  
 kpo-ziaru mu uzo g'epha  
 ngu apfuru.

4 Nafuta mu l'onya ono,  
 a gbaberu mu onoya;  
 kele o l'ime ngu be mu  
 gbabarụ je akwachia  
 ndzu mu.

5 Mu yeru ngu unme mu l'eka.  
 Gbafutanu mu; jiko Chipfu,  
 bu Chileke, apfushije ike  
 l'iphe, i pfuru.

6 Ndu akpojeru obu yeru  
 ola-l'iswi ono, bu agwa  
 adujekwa mu ashi.  
 Onye mbedua dakoberu  
 bukwa Chipfu.

7 Mu ete eswa; ehu nodu atso  
 mu utso l'i yeru mu obu;  
 kele i humaru iphe-ehuka,  
 mu jeru;  
 bya amaru le pfupfupfu shi  
 egbu mu egbugbu;

8 ophu i woduru mu ye l'eka  
 ndu ohogu mu.

O chia l'i kufutaru mu je edobe  
 l'eka mu no tusaru ehu.

- 9 Jiko Chipfu; phunuaaru mu  
 obu-imemini;  
 kele mu nokwa l'oke  
 mkpamehu.  
 Mu rawaru ekwa-aphu jasu mu  
 nodu aphu ragaraga;  
 teme o mekwaapho;  
 ike bvushikotawa mu.
- 10 Mu gu-gbuakwaru onwomu  
 l'aphu.  
 Mu tsuwa ude; kahu l'okpehu.  
 Ike bvukotaakwaru mu;  
 kele mu menukawaru  
 ejo-iphe.  
 Okpu, no mu l'ehu nodu  
 akaepho nyegenyege  
 eje.
- 11 Ikpoto ndu achi mu le njo  
 mewaru; mu buru onye  
 ndu obutobu mu akpo  
 ebo l'afu.  
 Ndu mu l'ephe eshi onya be  
 atsuchawa mu ebvu.  
 Iphe, bu ndu humaru mu  
 le gbororo anoduje  
 agbaru mu oso.
- 12 Ephe tuko zohaa mu  
 g'aazohaje onye  
 nwuhuru anwuhu-a;  
 mbu le mu duwaa g'ite,  
 tukposhihuru  
 atukposhihu.
- 13 Kele mu numawaru nvu  
 azu, ikpoto nemadzu  
 anoduje evu mu.  
 Nta-a ta adudu eka mu no ge  
 ndzu ta anodu agu mu.  
 Ephe anoduje achiru mu  
 ejo idzu.  
 Iphe, ephe tuberu bu g'ephe  
 wofu ndzu mu.
- 14 Obenu l'oo ngu be mu

- dakoberu gube Chipfu.  
 Mu epfu l'oo ngu bu Chileke  
 mu!
- 15 Ge mu a-no-beru l'eliphe-a  
 bu ngu be o du l'eka.  
 Nafutanu mu l'eka ndu ohogu  
 mu; me l'eka ndu achi  
 mu nu.
- 16 Lenaa mube onye-ozu ngu  
 enya-oma!  
 Guderu n-yemobu ngu dzoo  
 mu!
- 17 Jiko Chipfu; b'ekwekwa g'e  
 kpua mu iphu le nu;  
 kele mu chikuwaru ngu le  
 mkpu.  
 Oo ndu ejo-iphe ono be  
 ee-kpuchia iphu le nu;  
 g'onu je a-buru phe  
 kpurukudukuu  
 l'ali-maa.
- 18 G'onu ono, epe gude adzu  
 orotophomu ono buru  
 phe kpurukudukuu;  
 kele epe egudeje eku  
 onwophe; waa akpo  
 nemadzu ebo l'afu;  
 epfubyishi ndu  
 pfuberekoto.
- 19 Lewaru g'adu ree ngu habe  
 shii;  
 mbu ree ono, i doberu  
 ndu atsu ngu ebvu ono.  
 O buru l'iphu unwu-eliphe  
 be ii-pfuru;  
 meeru ndu gbabaru l'ime  
 ngu; ezeru ndzu ree ono.
- 20 Iwojeru phe domia le  
 mgboru eka i no; g'ejo  
 idzu, unwu-eliphe chiru  
 ta vu l'ehu phe.  
 O buru l'ibe ngu be

- iidobeje phe; gẹ njo  
opfu te erwu phe l'ehu.
- 21 G'e tua Chipfu epha;  
kele o goshiru mu n-yemobu  
iya, du biribiri  
teke mu no le mkpukpu,  
ohogu no-pheru  
mgburugburu.
- 22 Mu chia mkpu su: "Ephuhu  
mu l'iphu ngu-o!"  
I numaele-a mkpu, mu  
chikuru ngu; bya agbaaru  
mu mkpu.
- 23 Unu yee Chipfu obu;  
unube ndu duru iya nsọ  
g'unu haa;  
le ndu Chipfu eleta enya  
bukwa ndu apfushije  
ike l'iphe, epe pfuru.  
Obenu le ndu eku onwophe  
be opfufe ugwo iphe,  
epe eme pfurwua phe  
iya l'ishi.
- 24 Unu shihukpopho  
ike gude eka l'obu;  
unube ndu daru ngaberu  
Chipfu!

## Ebvu-oma 32

Évù, Dévidi kwaru

- 1 Ehu-utso be a goru nu onye  
Chileke guru nvu l'emeswe,  
o mesweru iya;  
mbu onye Chipfu safuru  
iphe-eji iya.
- 2 Ehu-utso be a goru nu onye  
Chipfu ta agukoeduru  
ejo-iphe, o meru;  
mbu onye te nwedu eregede,  
du iya l'ehu.

- 3 Teke mu shi nõdu  
 nggujungguji bẹ ọkpú,  
 nõ mu l'ẹhu shiepho tsua  
 gworigwori.  
 Ọ buru iphe, kparu iya nu bu  
 ude, mu shi anọduje  
 atsụ mbọku-mbọku.
- 4 Kele eswe l'enyashi bẹ  
 iinoduje ada mu ẹka  
 l'ẹhu.  
 I shi ẹgube ono miçatachaa  
 nwike, du mu nu g'onye  
 uguru guderu.
- 5 Tọbudu iya bu; mu bya emee  
 g'i maru iphe-ẹji, mu meru;  
 ọphu ọ dudu ẹjo-iphe,  
 mu meru, duru ọphu mu  
 domiru ngu edomi.  
 Mu su le mu e-woerupho  
 atupya, mu tųpyaru  
 Chileke koshiaru iya.  
 E mechaa; i bya aguru mu  
 nvu l'ẹjo-iphe, mu meshiru.
- 6 Ọo ya bu; g'iphe, bukpuo ndu  
 eme iphe, du gube  
 Chileke ree pfujeru nu ngu  
 teke ẹphe nõ le mkpa;  
 g'ọo-buru teke Eze  
 Enyimu iphe-ẹhuka ono  
 byaerupho g'utso;  
 o too rwudu phe l'ẹhu.
- 7 Ọo ngu bu ẹka mu agbajeru  
 je edomia onwomu.  
 Ọ buru ngu a-nodu eleta mu  
 enya g'iphe-ẹhuka ta  
 adapfuta mu;  
 gude ebvu, e gude atụ  
 okoo gbaa mu  
 mgburugburu.
- 8 Ọo mu a-nodu atụ-ziru ngu  
 ẹka; ezikwa ngu pho ọzo,  
 ii-nodu eshi.



- Mu a-nòduru ngu lẹ mgbazi;  
 eletakwa ngu phọ ọnya.
- 9 Ba adukwa g'inya;  
 ọzoo g'inya-mulu;  
 kele ẹphe ta amadu  
 onwophe ẹkicha.  
 Iphe, eegudeje agọ phe bu  
 agadagba waa odogoro.  
 I -meduru iya nno;  
 i tii gọtadu phe.
- 10 Ndu ejo-iphe anọduje  
 eje iphe-ẹhuka, du igwerigwe!  
 Obenu l'onye dakoberu  
 Chipfu be n-yemobu  
 iya anọ-pheje  
 mgburugburu.
- 11 G'iphe, Chipfu anọduje eme  
 mee g'ehu tsoo unu  
 utso;  
 teme unu etekwapho  
 ẹswa;  
 unube ndu pfuberekoto!  
 Unu gụa ebvu ẹhu-utso;  
 unube ndu obu  
 guru iphóró!

### Ebvu-oma 33

- 1 Unu gụa ebvu ẹhu-utso nu  
 Chipfu; unube ndu  
 pfuberekoto!  
 O gbaru ge ndu obu phe guru  
 iphóró jaje iya ajaja.
- 2 Unu kpoo une gude kele  
 Chipfu ekele!  
 Unu gude ogumogu gụa ebvu  
 gude tua ya ẹpha!
- 3 Unu gụa ebvu ọphúú nu iya!  
 Unu kụa ya k'erengete;  
 unu agbọoru iya oḡboo!
- 4 Kele Opfu Chipfu pfuru  
 nhamunha.

- Ọ bụru o-me-g'o-pfuru  
 l'iphemiphe, oome ememe.
- 5 Iphe, aduje Chipfu ree  
 bụ ikpe, pfuru nhamunha;  
 mę iphe, pfuru ọto.  
 N-yemobu Chipfu jiru  
 mgboko bushihu.
- 6 Ọo opfu-ọnu bę Chipfu gude  
 mee igwe.  
 Ọ bụru unme, ọ tųru atųtu  
 bę o gude mee iphemiphe,  
 nọkota iya nų.
- 7 Ọ bya azakọbe mini,  
 nọ l'enyimu l'eka lanų;  
 ọ dọru nyimunyimu.  
 Eze-enyimu bę ọ kpacharu  
 oke ẹka oo-jeberu.
- 8 G'eliphe l'ophu tsuje Chipfu  
 ebvu.  
 G'iphe, bukpo ndu nọ lę  
 mgboko mgburugburu  
 yejeru iya nsọ;
- 9 kęle o pfuru opfu;  
 mgboko l'ophu dų.  
 Ọ tųru ekemu; iphemiphe  
 dųkota.
- 10 Chipfu emeje g'idzų,  
 ohamoha chiru  
 bųru iphe-mmanų.  
 Iphe, ndiphe tųberu k'ememe  
 bę ọokposhije.
- 11 Obenu l'idzų ophu Chipfu  
 chiru l'aduje g'ọ chiru iya;  
 jasų l'ojejoje.  
 Iphe, ọ tųberu k'ememe bę  
 oomeje; l'o shi l'ogbo  
 sweru ogbo.
- 12 Ehu-utso bę a gọru nų oha ono,  
 bų Chipfu bų Chileke phe;  
 mbų ndu ọ họtaru;  
 ephe bųru okiphe nkiya.
- 13 Chipfu anọduje l'imigwe lee

- ẹnya l'eliphe-a humakota  
 unwu-eliphe l'ophu.
- 14 Ọonoduje l'ẹka o bu l'imigwe  
 humakota ndu bu ẹ  
 mgboko g'ẹphe ha.
- 15 Ọo yẹbedua meru ọriri nẹ phe;  
 tẹme iphemiphe,  
 ẹphe emekota nọdu edoje  
 iya ẹnya.
- 16 Eze ta alwujedu ọgu lwuta;  
 opfu l'ọo l'ọ chi  
 igwerigwe ndu ojogu.  
 Ọphu onye ike dẹ abudu  
 ọkpẹhu iya bẹ  
 oogudeje nahu.
- 17 Inya-ọgu bẹ iphe-mmanu;  
 ọ tọo dzọtadu nemadzu  
 l'egu ọgu.  
 G'ike aduhabekwa iya;  
 ọ tọo dzodu ndzu.
- 18 Obenu ẹ-a; ẹnya Chipfu  
 dukwa l'ẹhu ndu atsẹ  
 iya ebvu; mbẹ ndu ono,  
 daru ngabẹru n-yemobu  
 iya;
- 19 k'ọphu ọo-nafuta phe l'onu  
 onwu;  
 dobe phe ndzu mẹ egu  
 nọdu eme.
- 20 Anyi adajẹ ngabẹru Chipfu;  
 kele ọo ya bẹ onye eyejeru  
 anyi ẹka; bya aburu onye  
 egbobutajẹ anyi.
- 21 Oomeje g'obu tsoo anyi utso;  
 kele ọo ẹpha iya, dẹ nsọ bẹ  
 anyi dakoberu.
- 22 Gube Chipfu;  
 jiko goshinu l'i  
 yeru anyi obu;  
 eshinu ọ bẹ ngu bẹ anyi  
 daru ngabẹru.

## Ebvu-oma 34

Ebvu, Dévidi deru teke  
o meaharu g'onye obvu  
eme l'iphu Abimeleku;  
Abimeleku chifu iya

- 1 Mu anọduje etu Chipfu epha tekenteke.  
O tọ dudu teke mu byaru ajabuhu iya ajaja.
- 2 Oo Chipfu be mu gude eku onwomu.  
Ndu aakpa ehu -nūmae ya pho; ehu atsọ phe utso.
- 3 Bya ge mu le ngu tuko tya onu Chipfu l'o paru eka.  
G'anyi tuko kutsee epha iya.
- 4 Mu rakuru Chipfu; o za mu enu; bya emee; ndzu gu-buhu mu.
- 5 Ndu ele enya iya be aa-nwuja onu-ochi; ophu o dudu teke iphere bya eme phe.
- 6 Mube onye adudu g'o du mu chiru mkpu;  
Chipfu zaa mu enu;  
bya adzotakota mu l'iphe-ehuka,  
mu eje g'o ha.
- 7 Ojozi-imigwe ke Chipfu anọ-pheje ndu atsụ Chipfu ebvu mgburugburu.  
Onoduje adzo phe tekenteke.
- 8 Unu byanu g'unu le Chipfu megbabe iphe g'unu ahuma l'o du ree.  
Ehu-utso be a goru nu ndu gbabarụ iya l'eka je ezeeru ndzu.
- 9 Unu tsuje Chipfu ebvu;  
unube ndu duru iya nsọ;  
le ndu atsụ iya ebvu  
ta adukwa iphe, uko iya

- adujeru phe.
- 10 Unwu oduma nwechaaru  
mkpa; teme egu nodu  
agujechaa phe;  
obenu le ndu achọ Chipfu  
be uko iphe-oma ta  
abyadu aduru.
- 11 Unu byaedu unube  
unwegirima; bya angaberu  
mu nchi;  
ge mu zia unu g'aatsuje  
Chipfu ebvu.
- 12 ?Bu onye be o du g'asu le  
ndzu iya e-tse ogologo;  
teme o dukwa iya pho  
g'asu le mboku-mboku  
a-bujeru iya k'oma?
- 13 G'onye ono hakwa epfu  
njo-opfu;  
hkwapho agho ugho.
- 14 Gbakutaru eme ejo-ememe  
azu; watachia eme iphe,  
du ree.  
Kukebeje ehu choo iphe,  
e-me ge nchi du doo.  
I -choa iya; ta tu-wokwa  
iya eka ememe.
- 15 Chipfu anoduje eleta ndu  
pfuberekoto enya.  
O nodu egbobeje nchi  
numa olu phe m'ephe  
raku iya.
- 16 Obenu le ndu eme  
ejo-ememe be  
oogbanwubejeru iphu;  
bya emee; ephe anwuhu  
chihu le mgboko.
- 17 Ndu pfuberekoto abujeru;  
ephe -raku Chipfu;  
lo za phe enu;  
bya anafuta phe l'iphe-ehuka,  
ephe eje go ha.

- 18 Chipfu anọ-kubeje ndu mee  
ala l'opfuru.  
Ndu eswe bu enyashi be  
odzofutaje.
- 19 Onye pfuberekoto ejeje  
iphe-ehuka, du igwerigwe;  
obenu le Chipfu  
anafutakotaje iya l'iphe-ehuka  
ono go hakota.
- 20 Okpu, no iya l'ehu  
be oo-nwubejeru enya;  
go to du me nanu, aa-ku-ji  
aku-ji.
- 21 Obenu l'onye ejo-iphe,  
bu ejo-ememe iya ono  
e-gbu iya.  
Ndu kporu ndu pfuberekoto  
ashi be aa-nmaa ikpe.
- 22 Chipfu agbafutaje ndu ejeru  
iya ozi;  
ophu o dudu onye gbabaru  
l'ime iya je anodu zee  
ndzu,  
a bya anma  
ikpe m'onye lanu.

## Ebvu-oma 35

### Ebvu, Dévidi deru

- 1 Gube Chipfu; ndu etso mu  
opfu bukwa ngu  
e-tsolata phe!  
Ndu ophu etso mu ugu  
bukwapho gubedua  
e-je etsolata phe!
- 2 Gbalihu; chita ngwogu;  
waa  
iphe-mgbobuta-ogu  
ngu;  
bya egude gbaaru mu  
mkpu!

- 3 Palia arwa ngu;  
 gude kwachia ndu achị mu  
 ịe njo ụzo!  
 Sụnu mu l'ii-dzo mu-a!
- 4 Gẹ ndu achọ ụzo, ẹphe e-shi  
 gbua mu buru ndu e  
 meru iphe-iphere.  
 G'a chiphukwa ndu achiru  
 mu ẹjo idzu azu.  
 G'a tu phe ẹberebete!
- 5 G'ẹphe du g'ẹswa ereshi,  
 pherephere zikashiru teke  
 ojozi-imigwe Chipfu  
 a-nodu achị phe ọso.
- 6 G'uzo phe gbakotakwa  
 ochii;  
 chikwapho ke  
 burukutuku  
 teke Ojozi-imigwe Chipfu  
 a-nodu achị phe  
 ikpabaka.
- 7 Eshinu o dudu iphe, mu meru  
 phe; ẹphe je agbaberu  
 mu onya;  
 bya eworu nsu bua ge mu  
 nwulahu;
- 8 g'ola-l'iswi tukwaa phe  
 l'upfu.  
 G'onya, ẹphe gbaberu  
 lonwophe nmatakwa  
 phe.  
 G'ẹphe nwudakpoe ya pho ke  
 wurukutukumu.
- 9 Oo ya bu ge mu etee ẹswa  
 l'ime Chipfu.  
 Ehu atsoahaa mu lo dzotaru  
 mu.
- 10 Mu e-gudekpoo obu mu go  
 ha su:  
 “?Bu onye aturu gube Chipfu?  
 Oo ngu adzotaje ndu ukpa  
 l'eka ndu ka phe

okpehu.

Mbụ l'inafutaje ndu ukpa;  
waa ndu adudu g'ọ du  
phe l'eka ndu ana phe  
nfu.”

11 Ndu ejo-ekebe wulihuru ebo  
mu ibo.

Ephe chikoo iphe, mu amadu  
kuba su l'oo mu be o  
shi l'eka.

12 Ephe gude ejo-ememe pfua  
mu ugwo iphe-oma.

Oo ya bu le mu duwaa g'onye  
a toboru nwa maa.

13 Obenu le teke iphe-ememe shi  
zuu phe be mu wotaru  
uwe-aphu yee;  
bya ewoze onwomu ali aswi  
egu epfu anu Chipfu;  
ole Chipfu ta anumaduru  
olu mu.

14 Mu nodu aghaphe egbu  
onwomu egbu  
l'ekwa g'ọ bu onya mu;  
ozoo nwune mu be  
iphe-ememe zupyaiberu.  
Mu nodukpoo dee eka l'agba  
g'onye akwa ekwa ne iya,  
nwuhuru nu.

15 Obenu l'opfu duru mbedua;  
ephe gude ehu-utso  
dzukobe.

Ephe swiphee mu  
mgburugburu tsua  
mu iphe teke mu  
akwabeduru enya;  
bya egude njo-opfu  
alabushi anu mu nanu  
nanu.

16 Ndu gudewaa echi ndu ozo  
eswe merwushia  
onwophe l'iphu Chipfu;



- nọdu atagbaru mu ikireze  
 ke nyikinyiki.
- 17 Gube Chipfu; ?bụ teke ole be  
 ii-jipyaberu onwongu  
 elekpọepho anyi ọnya?  
 Dzonaa mu; a -nọnya ephe  
 mee mu; mu bụru  
 ọla-l'iswi!  
 Dzotaro mkpakọ iphe ono,  
 mu nweru ono, bụ ndzụ  
 mu g'oduma ta  
 adzụgbu iya!
- 18 Ọ bụru l'eka ọha l'ophu  
 dzukọberu be mu  
 a-nọdu kele ngu ekele;  
 mbụ le mu a-nọdu l'iphu  
 ikpoto nemadzụ jaa  
 ngu ajaja.
- 19 B'ekwekwa ge ndu ọhogu mu  
 teru ọswa kpua mu;  
 mbụ ndu kpọru mu ashị;  
 ẹbe adu iphe, mu  
 meru phe.  
 Ọphu i kwekwa ge ndu ono,  
 mu du ashị ono bvua mu  
 ọnya ria.
- 20 Kele ephe te epfujedu opfu  
 nchị-adu-doo;  
 obenu l'iphe, abujeru ozi,  
 duru phe nụ bụ achị idzu  
 g'ephe e-shi ghooru ndu du  
 agù le mkpukpu ugho.
- 21 Ephe saru onu galaba wata  
 mu ebo ibo su:  
 "Ee! Anyi gudekpọo ọnya  
 anyi huma iphe,  
 i meru!"
- 22 Ọle gube Chipfu humanuru-a  
 iphemiphe ono.  
 Jiko ba agbakwa mu nkuchi  
 ọphu i nọdukwa  
 mu ọzenya!

- 23 Tehu etehu; kwolihuro bya  
 ahaaru mu enge!  
 Gbaaru mu ɔdzori;  
 jiko Nnajiuphu mu,  
 bu Chileke mu!
- 24 Gude apfubekoto nkengu  
 haaru mu ro enge; jiko  
 Chipfu, bu Chileke mu!  
 Te kwekwa g'ephe teru eswa  
 kpua mu!
- 25 Te kwekwa g'ephe ria l'obu  
 phe su:  
 "Nta be anyi cho-vuwaru iphe,  
 anyi acho!"  
 Ozoo g'ephe su: "Nta-a be  
 anyi patawaru  
 iya lwee!"
- 26 G'iphe, bukpuo ndu ete eswa  
 ekpu ejo-iphe, byaru  
 mu nu bukwaru ndu ee-meru  
 iphere kpua bya atu  
 phe eberebete.  
 G'e gudekwa iphere dejia phe  
 ephe; mbu ndu ono,  
 etu onwophe  
 ophushugbu eje abyafuta  
 mu ono!
- 27 Ge ndu ele enya g'a haaru  
 mu enge gua ebvu ehutu-  
 tee eswa!  
 G'iphe, ephe a-kpujeru lonu  
 bukwarupho: "G'a tu  
 onu Chipfu lo paru eka;  
 mbu onye oduje ree me  
 onye-ozu iya  
 nodu buru  
 l'ehu-guu."
- 28 Oo ya bu; mu egude onu  
 mu pua  
 k'apfubekoto nkengu.  
 O bukwarupho ge mu  
 a-nodu etu ngu epha

mbọku-mbọku  
bụ onoya.

## Ebvu-oma 36

Ebvu, Dévidi, bụ onye  
ejeru Chipfu ozi deru  
nụ onye-ishi ebvu

- 1 Ọo umere ndu ẹjo-iphe eme  
emeje gẹ mu pfua l'ime  
obu mu sụ l'ẹphe  
ta atsụkpodaa  
Chileke ebvu atsutsu  
ophu.
- 2 Kele ọonoduje aja onwiya  
ajaja; mbụ jataberu  
onwiya  
k'ọphu bụ l'ọ tọo hụmajedu  
ẹjo-iphe, oome;  
k'ọphu ọo-kpọ iya ashị.
- 3 Opfu, eshije iya l'onu  
bụkotaepfo ẹjo opfu;  
waa agho ụgho;  
ọphu oomejeedu  
g'onye kwaru ẹnaya;  
ọphu oomekwapho iphe,  
dụ ree.
- 4 Ọ zẹwaa l'iphe-azẹe ya  
rịkobe iphe-ẹji, oo-me.  
Ọo ẹpho l'uzo, apfuduru-oto  
bẹ ọopfujeru;  
ọphu ọ dudu iphe, dụ ẹji,  
ọojikaje ememe.
- 5 Gụbe Chipfu; n-yemobu  
nkengu tụtokwaru  
igwe l'ophu vọo  
pfurupfuru.  
O-me-g'o pfuru, ị bụ  
rwucharu akpaminigwe.
- 6 Apfubekoto nkengu ọdu  
etse rịgorigo g'úbvú,

- paru ẹka apaa.  
 Ikpe nkengu du wukirima  
 g'eze ẹnyimu-ime-ali.  
 Gube Chipfu; oo ngu tukoru  
 anu, bu l'egbudu yele  
 nemadzu dobe ndzu.
- 7 Lewaro ge n-yemobu ngu  
 bu-be iphe, vu oke-aswa!  
 Oo iphe ono meru g'o gude  
 unwu-eliphe gbaba le  
 mkpula oke nkù ngu  
 je anodu ezeru ndzu.
- 8 Ephe anoduje l'ulo ngu eri  
 gwogwo le nri,  
 kuru iya nu;  
 teme i nodu emeje g'ephe  
 ngua mini l'enyimu  
 ehutu nkengu.
- 9 Kele oo l'eka i no be ndzu  
 futaru.  
 O buru l'eka iphoro nkengu  
 no be anyi a-nodu  
 huma iphoro.
- 10 Jiko yekpoekwapho ndu  
 maru ngu nu obu g'i  
 yeru phe iya;  
 Li pfubekpoekwapho ẹka  
 ngu oto g'i pfuberu  
 iya l'ehu ndu obu phe  
 guru iphoro.
- 11 Bekwekwa ge ndu eku  
 onwophe zo-sweta mu okpa;  
 ophu i kwekwa ge ndu  
 ejo-iphe gude ẹka phe  
 nwufu mu.
- 12 Humawaro g'a wushiru  
 ndu anoduje eme iphe,  
 adudu ree;  
 ephe dabyigbaaru;  
 ophu ephe abyadu  
 agbeshibaa agbeshi.

**Ebvu-oma 37****Ebvu, Dévidi deru**

- 1 G'ɔnodu ndu eme ejo-ememe  
te eghujekwa ngu eghu;  
ɔpɔhu i kojekwaru ndu  
apfɔbeduru ɛka ɔto  
okophoo.
- 2 Kele ɔ tɔ dukwa  
g'aa-nɔ-beru; ephe  
anwɔlwashihu g'ɛswa;  
teme ɔpɔhu ɔ dukwapho  
g'aa-nɔ-beru;  
ephe akpɔshihu nkɔ  
g'irwu oshi.
- 3 Dakobe Chipfu; meje iphe,  
du ree!  
Buru l'ali ono buru  
o-me-g'o-pfuru!
- 4 Nɔdukwa Chipfu l'ɛka tee  
ɛswa;  
g'ɔo-nɔkwanu ngu iphe,  
bu iphe, agu ngu nu.
- 5 Woru iphemiphe, iime  
ememe ye Chipfu l'ɛka.  
Dakobe iya; l'oo-meru ngu  
iya.
- 6 Oo-me g'apfɔbekoto nkengu  
nwua ke phoo g'iphɔrɔ;  
mbu le Chipfu a-haru  
ngu enge;  
mee g'iswi-ɔdu-mma  
nkengu gbua ke nwɔinwii  
g'ɛnyanwu.
- 7 Zekpoeɔpho kɔɔɔya l'ɛka  
Chipfu; taa nshi kwaberu  
iya.  
G'ɛhu te eghukwa ngu  
eghu teke iphemiphe,  
ndu ejo-iphe eme  
ejehuru phe;  
mbu teke ejo-idzu, ephe achi

- anọduje eje g'ephe chiru iya.  
 8 G'ehu te eghujekwa ngu egbu;  
 ophu i vojekwaru oku  
 wua ehū.  
 G'ehu te eghujekwa ngu egbu;  
 anonya i mee ejo-iphe.  
 9 Kele ndu anọduje eme  
 ejo-ememe be ee-me  
 g'ephe chihu; obenu  
 l'oo ndu daru ngaberu  
 Chipfu be e-nweru  
 mgboko.  
 10 O to dudu g'oo-no-beru  
 le mee ge ndu ejo-iphe  
 ta aduhe.  
 li-le enya phe; ole i tii  
 humaedu phe.  
 11 Oo ndu du agū be mgboko-a  
 a-buru nkephe;  
 teme ephe enweru ehū-guu;  
 nweru iya k'etsutsu iya.  
 12 Ndu ejo-iphe achī ejo  
 idzu edoberu ndu  
 pfuberekoto;  
 ataru phe ikireze ke  
 nyikinyiki.  
 13 Olobuele-a ochi be Chipfu  
 achī phe;  
 kele o maru le teke  
 ee-mebyishi phe l'abya-a.  
 14 Ndu ejo-iphe mītaru ogu-echi  
 phe; g'ephe gbushia  
 ndu uto phe pfuru  
 nhamunha;  
 bya eseta apfu phe ke kikiki  
 g'ephe gbatsushia ndu  
 ukpa waa ndu adudu  
 g'o du phe.  
 15 Obenu l'ogu-echi phe  
 ono e-mechaa nmabaa  
 phe epho;  
 l'a nata phe apfu phe

- ono nyakwoshia.
- 16 Nwiphe, abadu ishi,  
 ndu pfuberekoto nweru  
 be kakwa ree eme l'eku,  
 ndu ejo-iphe du igwerigwe  
 kpa kuba.
- 17 Kele ndu ejo-iphe be aa-nafu  
 iphe, ephe gude eme ike;  
 obenu le ndu pfuberekoto  
 be Chipfu bu agbarike phe.
- 18 Chipfu maru ge ndu uta  
 adudu l'ehu a-no-beru.  
 Okiphe phe a-no jasu le  
 tuutuutuu le mimiimii.
- 19 Teke eeje iphe-ehuka;  
 be a ta abyadu ekpu phe  
 iphu le ntu;  
 teme okpa nri -byaepho;  
 nri aduele phe-a  
 shingushingu.
- 20 Obenu le ndu ejo-iphe  
 a-buru mkpurupyata.  
 Ndu ohogu Chipfu  
 e-phekashihu nanu nanu  
 g'okoko, no l'egu.  
 Ephe e-phukashihu  
 g'enwuru-oku.
- 21 Ndu ejo-iphe abujeru;  
 ephe -jita ugwo ephe  
 eria ya.  
 Obenu le ndu pfuberekoto  
 be anoduje emeru  
 ndiphe iphe-oma.
- 22 Oo ndu Chipfu goru  
 onu-oma nu e-nweru mgboko-a;  
 obenu le ndu o tukwanuru  
 onu be a-chihu nu.
- 23 Oo Chipfu anoduje akpo-ziru  
 nemadzū uzo g'oo-gudeje  
 aha okpa; mee onye ono  
 g'o nguru anguru;  
 mbu onye eme iphe,

dụ Chipfu ree.

- 24 Ụpfu -dụkpoo ya nụ;  
 ọ tọo darwudu alị;  
 kele ọo Chipfu gude ẹka  
 iya agbata iya ike.
- 25 Mu shikwa teke mu bụ nwata  
 nọwaa jasụ mu bụru  
 ọgerenya nta-a;  
 ọle mu teke ahuma-swee  
 ẹka Chipfu gbadoru  
 onye pfuberekoto;  
 ọzoo ẹka ụnwu iya  
 arwọ nri.
- 26 Onye pfuberekoto anọduje eme  
 iphe-oma tekenteke; ọ nọdu  
 ejieje nemadzụ ụgwo.  
 Ee-shi l'ehu ụnwu iya kebe  
 ndu ọzo l'oma.
- 27 Gbakwataru eme ẹjo-ememe azụ;  
 watachia eme iphe, dụ ree;  
 g'iiburu l'alị-a jasụ l'ojejoje.
- 28 Chipfu bẹ ọ dụ ree  
 g'ụnwu-eliphe kpeje ikpe,  
 pfuru nhamunha;  
 ọphu ọ hajedu ndu yeru iya  
 obu ẹka.  
 Ọokwa-chije pẹ akwachi  
 jasụ l'ojejoje;  
 obenu l'awa ndu ẹjo-iphe  
 bẹ oo-me g'ephe chihu.
- 29 Ndu pfuberekoto e-mechaa  
 nweru alị-a;  
 buru iya jasụ lẹ tuutuutuu  
 lẹ mịimiimii.
- 30 Opfu, eshije onye pfuberekoto  
 l'onu futa bụ mmamiphe.  
 Ire iya bụru iphe, aduje iya  
 nụ bụ epfu iphe,  
 pfuru ọto.
- 31 Iphe, aduje iya l'obu  
 tekenteke bụ ekemu  
 Chileke;



- ọphu ọ haswejedu ọkpa  
 l'ememe iya.
- 32 Ndu ẹjo-iphe ejeje ewoha  
 onwophe kwaberu ndu  
 pfuberekoto;  
 g'ee-shi g'ọ buru ẹphe  
 -ghatashia;  
 ẹphe egbua phe.
- 33 Obenu ẹ Chipfu te ekwejedu  
 g'ẹphe daba phe l'eka;  
 ọphu a byadu anma ndu  
 pfuberekoto ikpe;  
 me a kpuru phe bya  
 l'ulo-ikpe.
- 34 Nodukoepho kwaberu  
 Chipfu; tsoje ọzo iya!  
 Ọo ya e-kutse ngu mee  
 ngu l'i nworu alı-a.  
 Ii-gude ẹnya ngu huma  
 teke ee-me ge ndu  
 ẹjo-iphe chihu.
- 35 Mu humajewaru onye bu  
 onye ẹjo-iphe.  
 Ọ dukpoepho g'oshi,  
 ẹhu du guu, jaru du  
 ke kpuchi.
- 36 Obenu l'ọ to dudu g'a  
 no-beru ọphu ọ duedu.  
 Mu choo ya nta choo imo;  
 ọphu mu  
 ahumaeduru iya;
- 37 Lenaa ndu uta adudu  
 l'ehu ẹnya;  
 mbu-a; gbunaa ndu obu  
 phe guru iphoro igo;  
 huma ẹ ndu eme ge nchi  
 du doo be anoduje  
 eje l'iphu l'iphu.
- 38 Obenu ẹ ndu emeswe  
 Chipfu be aa-tukoepho  
 mebyishia.  
 Iphe, bukpo oshilokpa

- ndu ejo-iphe be  
ee-me g'ephe chīhu.
- 39 Oo Chipfu adzotaje ndu  
pfuberekoto.  
Oo ya abujeru agbarike phe  
m'ephe nodu eje  
iphe-ehuka.
- 40 Mb̄u le Chipfu eyejeru phe  
eka nafuta phe.  
Onafutaje phe l'eka  
ndu ejo-iphe;  
shi nno dzoo phe;  
kele ephe gbabar̄u l'ime  
iya je ezeru ndzu.

## Ebvu-oma 38

Ebvu-oma, Dévidi guru  
gude nyatar̄u Chipfu iphe

- 1 Gube Chipfu; te egudekwa  
ehu-eghu ngu baar̄u  
mu mba!  
Ophu i gudekwa oke eh̄u-eghu  
ngu h̄ua mu ah̄uh̄u!
- 2 Kele apf̄u nkengu gūekwaru  
mu pho eguru l'eh̄u;  
teme eka ngu nodu  
apyipyashi mu apyipyashi.
- 3 Ehu-eghu ngu meru;  
ophu eh̄u mu l'ophu  
enwedu eka te emedu  
mu ehuka.  
Iphe-eji, mu meru ngu  
woerupho okpu mu  
gbaghash̄a.
- 4 Kele ejo-iphe, mu meshiru  
ripyabewaru mu.  
O nodu anyitaberu erwa  
k'ophu mu ad̄uedu ike  
evuvu iya.
- 5 Onwo, aba mu nu

- eshiwaa tukuruba.  
 O buru iphe, kparu iya nu  
 bu eswe, mu meru.
- 6 Mu nowa kpoyoo dee aka  
 l'agba gukota aphu  
 mkpurumkpuru.
- 7 Okpurukpu kwatakpo  
 emeshi mu ehuka ike;  
 mbu lo to dudu aka eh te  
 emedu mu ehuka me nanu.
- 8 Ehu mu l'ophu dahuwaru  
 adzulakpa;  
 teme obu mu tsukotawa  
 gworigwori.  
 Obu te ebvuduru mu  
 ebvuru k'ophu bu le  
 mu atsushi ude ike.
- 9 Gube Chipfu; iphe bukpo  
 iphe, agu mu nu be i  
 makotaru.  
 Ude, mu atsui be e te  
 emeduru ngu le mpya.
- 10 Obu etsu mu gbudugbudu;  
 ophu ike adukpoedu  
 mu ililekpo.
- Mu nodu aphuwaa ragaraga.
- 11 Ndu yeru mu obu;  
 yee ndu mu l'ephe eshi  
 onya bufuwaru  
 mu iche.  
 O buru iphe-ehuka, dapfutaru  
 mu nu kparu iya.  
 Ndu mu l'ephe bu abubu je  
 apfuchaaru uzanya.
- 12 Ndu achu uzo, ephe e-shi  
 gbua mu woru onya  
 gbakarui mu.  
 Ndu tuberu gephe meka mu  
 iphe nodu anmaru  
 mu onwu.  
 Oo ephe idzu gephe  
 e-shi ghoru mu ugho

bẹ ephe anọduje achi  
eswe l'enyashi.

13 Mbẹdua dukwa g'onye ada  
nkuchi;  
k'ophu bu l'ọ tọ dudu iphe,  
mu anumaje.

Mu dukwapho g'onye  
ete epfudu opfu;  
woerupho onu mu  
dobe doo.

14 Mu dūwaa g'onye eepfu opfu  
eyeru; ophu o yedu onu;  
kele o tọ dudu iphe, eepfu,  
mu numaru.

15 Obenu l'obu mu daru  
ngaberu gube Chipfu.  
O buru gube Nnajiuphu,  
bu Chileke mu bẹ a-za  
mu oku, mu eku ngu.

16 Mu suru-a: "B'ekwekwa  
g'ephe teru eswa  
kpua mu!  
Nta-a, okpa chiswafuru mu-a  
bẹ ephe tukowaru etu  
onwophe ophushugbu."

17 Kele mu anga anganga;  
teme aphu nodu ejije mu  
pho obu tekenteke.

18 Mu e-pfushi ejo-iphe,  
mu meshiru ngu.  
Iphe-eji, mu meru erwukwa  
mu pho l'ehu.

19 Obenu le ndu ohogu mu  
du igwerigwe ebu jajaja;  
teme ndu mu du ashị  
l'ebe adu iphe,  
mu meru phe pakwaapho  
igwerigwe.

20 Ndu egudeje iphe, du eji pfua  
ugwo iphe-oma, e meru phe  
bẹ etso mu opfu;  
kele mu anọduje achọ iphe,

dụ ree.

21 Ta agwọbekwa mu gụbe Chipfu!

Gụbe Chileke nkemu;

ba nọdukwa mu ụzenya!

22 Bya egwegwa bya eyeru

mu ẹka; gụbe Chipfu,

bụ onye ndzọta mu!

## Ebvu-oma 39

Ebvu-oma, Dévidi deru nụ  
onye-ishi ebvu, bụ Jiedutunu

1 Mu sụru lẹ mu a-kwaberu

ụzo mu ẹnaya;

gẹ mu te egude ọnu mu

pfuta ẹjo-iphe.

Ọnu mu bẹ mu akuje ngga;

mẹ ndu ẹjo-iphe

nọ-kube mu.

2 Mu woru ẹka hua l'ọnu

nọ-kirishia;

gẹ mu te epfukponu g'ọ ka

mma l'ọ iphe, dụ ree.

Ọle mgburwashị-ẹhu mu

akaẹle-a shii eje.

3 A nọnyaa; obu wahụahaa mu

awahụ;

mbụ mu nọdu rịnyae ya

phọ;

ọ gbanwuhu mu

l'ẹhu g'ọku.

Mu sanaa ọnu wata epfu opfu sụ:

4 Gụbe Chipfu; menaa mu

gẹ mu maru gẹ

mu a-nọ-beru;

gẹ mbọku e-beru mu

anwụhu!

Menaa gẹ mu maru gẹ ndzụ

mu dụ-be mkpirikpu.

5 I meru ndzụ mu; ọ dụ tsokere.

Gẹ ndzụ mu a-nọ-beru ta

- adudu iphe,  
 o bu l'iphu ngu.  
 Nemadzū l'ophu tūkoerupho  
 buru udzu onu.
- 6 Nemadzū g'ogha-phe nno  
 buepho pherephere  
 mmanu be o bu.  
 Kpanga kpanga kpanga,  
 onoduje eme buepho  
 g'o buru.
- Qokpaje eku kuberu onwiya;  
 ole o to makwanu onye  
 e-mechaa ria ya nu.
- 7 Nta-a Chipfu; ?bukpoo gunu  
 be mu ele enya iya?  
 O kwa ngu be mu daru  
 ngaberu.
- 8 Nafuta mu l'emeswe ono,  
 mu mesweru ngu ono!  
 Be mekwa mu ge mu buru  
 onye ndu eswe  
 e-kweru une!
- 9 Mu shi woru eka hua  
 l'onu no-kirishia;  
 noo kele oo gubedua be  
 iphe ono, anwukotaru  
 mu nu ono shi l'eka.
- 10 Hanaa mu echi echachi-a,  
 iichi mu-a;  
 kele eka iichi mu gbaa  
 gbaa be ike abvukwa  
 mu ree.
- 11 I -baarū nemadzū mba gude  
 goshi iya ejo-iphe,  
 oome  
 be buepho ge nsu,  
 asukashije iphe-a bu  
 g'ii-noduje asukashi iphe,  
 du ree, onye ono  
 nweru.
- Nemadzū g'ephe ha  
 bukota udzu onu be ephe bu.

- 12 “Nụmanu epfupfu,  
 mu epfu anụ ngu  
 gụbe Chipfu!  
 Ngabenu nchị lẹ mkpu,  
 mu echiku ngu!  
 Ba gbakwa nkuchi g'ị tị  
 nụma ẹkwa, mu ara  
 ekpu ngu!  
 Kele mu bụ onye lwaru  
 alwalwa, lwapfutaru  
 ngu nụ;  
 ẹgube ono, ndiche  
 anyi pẹ shikwapho  
 buru ono.
- 13 Jiko hafua mu ro; k'ophu  
 ẹhu a-kabe tso mu  
 utso ozo;  
 teme mu alashiwaro maa.”

## Ebvú-oma 40

Ebvú-oma, Dévidi deru  
 nụ onye-ishi ebvu

- 1 Mu takpoerupho nshi  
 kwaberu Chipfu;  
 jasụ o ngaberu mu nchị  
 bya anuma olu mu.
- 2 O bya ekufuta mu lẹ nsu,  
 anyi ishi edzu;  
 mbu kufuta mu l'epuchi,  
 echi eturu, mu no ono;  
 bya eworu mu pfube  
 l'eli mkpuma, kporu gbengu;  
 mee mu; mu nguru anguru.
- 3 O bya eworu ebvu ophuu  
 ye mu l'onu.  
 Mu gude ebvu ono wata aja  
 Chileke anyi ajaja.  
 Ikpoto nemadzu a-huma  
 iphe, nwuru nu; ndzu  
 erwuta pẹ.

Ephe alwaphuta azu bya  
adakobe Chipfu.

4 Ehu-utso be a goru nu onye bu  
Chipfu be o dakoberu;  
ophu o ghaduru ndu eku  
onwophe iphu; ophu  
o buro ke ndu shisweru  
uzo; chiru upfu kwee  
l'iphe, adudu iphe, o bu.

5 Gube Chipfu, bu Chileke  
mu; iphe, du biribiri,  
i meshiru; waa iphe,  
du ree, i doberu k'emeru  
anyi pakwaru igwerigwe.

O to dudu onye suru ngu  
iya agushigburu.

Mu -jeshia ya agushi  
nanu nanu be o bu aguta  
aguta.

6 Iphe, agu ngu nu ta abukwa  
g'a gwaje ngu agwagwa;  
ozoo g'e wotaru ngu ngweja;  
obenu le mbedua be i  
hawaru okpu nchi.

Ngweja-akpo-oku; waa  
ngweja-iphe-eji ta adudu  
ophu jiru ngu epho.

7 Noo ya bu; mu su: "Waa mu  
Chileke!

Mu byawaru ge mu mee  
g'e deru ke nkemu le  
Ekwo Ekemu.

8 Gube Chileke mu; iphe,  
aduje mu ree bu ge  
mu mee iphe, du ngu  
l'uche.

Ekemu ngu adujee mu pho  
l'obu tekenteke."

9 Mu gudewaa onu mu raa  
k'apfubekoto ngu  
arara l'eka oha l'ophu  
dzukoberu.



- Gube Chipfu; i mawaru le mu  
te edobedu onu doo.
- 10 Mu ta sumiduru apfubekoto  
ngu l'ime obu mu.  
Mu epfukashije l'i bu  
o-me-g'o-pfuru;  
bya aburu onye ndzota;  
ophu mu ahaduru  
epfuru oha l'ophu g'i  
yeberu nemadzū obu;  
teme waa l'i bu onye  
ire-lanu.
- 11 Gube Chipfu; jiko ba  
ahakwa mu aphuru  
obu-imemini.  
Ge n-yemobu waa ire-lanu  
ngu ono chekwaa mu  
mkpurumkpuru!
- 12 Iphe-ehuka, bu aguta l'ogu  
no-phewaru mu  
mgburugburu.  
Ejo-ememe, mu meshiru  
ripyabewaru mu;  
k'ophu bu le mu ta  
aphuedu uzo.  
O ka egbushi, du mu l'ishi  
igwerigwe.  
Nta-a be mu amaedu ge mu  
e-me iya.
- 13 Gube Chipfu; jiko dzonaa mu!  
Byanu egwegwa bya eyeru  
mu ro eka; jiko Chipfu!
- 14 G'iphe, bu ndu achu uzo,  
ephe e-shi gbu mu  
bukwaru ndu ee-meru  
iphere kpua;  
g'a tukwa phe eberebete.  
Chiphunu ndu agbaru mu  
ejo egomunggo azu.  
G'iphere ji phe iphu!
- 15 G'e meru ujikputeru nu  
ndu ekweru mu hee.

16 G'iphe, bukpo ndu achọ ngu  
 nū būru ndu ẹhu a-tso.  
 Ephe anọdu ngu l'ẹka tee ẹswa.  
 Gẹ ndu ọ dū g'a sū l'ì dzọru  
 ndzū bukwaru iphe,  
 ẹphe a-kpuru l'ọnu  
 epfu bu:

“Unu tūa ọnu Chipfu l'ọ  
 parū ẹka!”

17 Obenu ẹ mbẹdua bu onye  
 ukpa bya aburu onye  
 adudu g'ọ dū mu;  
 ọle Nnajiuphu arile-a ọriri  
 ẹhu mu;  
 mbū l'ọo gube Chileke bu  
 onye eyejeru mu ẹka;  
 bya aburu onye adzoje  
 mu nū.

Jiko Chileke nkemu;  
 b'akpokwa upfu!

## Ebvu-oma 41

Ebvu-oma, Dévidi deru  
 nū onye-ishi ebvu

- 1 Ẹhu-utso bẹ a ọru nū onye  
 anọduje eyeru ndu  
 ukpa ẹka;  
 kele Chipfu a-dzota iya mẹ  
 ọ -nọdu eje iphe-ẹhuka.
- 2 Chipfu l'a-kwachi iya;  
 bya edobe iya ndzū.  
 L'ọ būru onye a ọru ẹhu-utso  
 nū l'eliphe;  
 ọphu Chipfu enwuduru  
 iya eye l'iphe,  
 agū ndu ọhogu iya.
- 3 Chipfu a-gbaru iya mkpu  
 mẹ ọ zẹe l'ẹhu.  
 Oo-me iya l'ọ ka mma  
 l'iphe-ememe,

- byapfutaru iya nū.
- 4 Mu sūru Chipfu: Phūnaaru  
mu obu-imemini.  
Mu mewaru ngu iphe-ēji  
gūbe Chipfu;  
jiko menaa gē mu  
wekōrohu.
- 5 Ndu ọhogu mu anọduje  
epfuru mu ejo opfu  
sū l'ọ dū phē g'a sū lē  
mu nwūhuru;  
g'a zōhaa mu l'eliphe-a.
- 6 Teke nemadzū byaru mu ajiji;  
oopfuru mu opfu,  
te erwuduru iya ọhu-ẹpho.  
Obenu l'iphe, ọochiko edo  
l'obu iya bū ikpoki  
ntūmatu.  
Ọ -lufuepho l'o jeshia ya  
edokashi.
- 7 Iphe, bukpo ndu kpōru mu  
ashi anọduje  
adzū-phe taba taba gude  
epfutooshi mu.  
Ọ buerupho iphe, bū iya  
kachaa ēji bē ọduje phē  
g'o mee mu.
- 8 Ẹphe asū: “Tūswekwa! Ọ kwa  
ejo iphe-ememe eme iya.  
Ọ turweakwaru iya k'ọphu ọ  
tọo gbēshibaedu.”
- 9 Mbū je akpachaa l'onye  
mu l'iya eshi ọkpobe eshishi;  
bya abūru onye mu dakoberu;  
mbū l'onye mu l'iya erigbajē  
nri gbēchaakwa eme iphe,  
a-tsūru mu nū.
- 10 Ọlobu gūbe Chipfu;  
phūnaaru mu obu-imemini!  
Meerō gē mu wekōrohu;  
k'ọphu mu a-pfū phē  
ugwo iphe-a, ẹphe eme mu-a.

- 11 Mu maru lẹ mu dụ ngu l'obu;  
 ọkele i ti kwedu ọe ndu  
 ọhogu mu tọru okoo  
 kpua mu.
- 12 Eshinu ọta adọdu mu l'ẹhu be  
 i tọru mu gburumu  
 kuru mu dobe l'atatiphu  
 ngu ọe mu nọdu jasọ  
 l'ojejeje.
- 13 G'e tua Chipfu ẹpha;  
 mbọ Chileke ke ndu Ízurelu;  
 e -shi lẹ gbururu jeye  
 lẹ gbururu.  
 Nokwa g'ọ dụ;  
 bya aburu g'ọ dụ.

## Ebvu-oma 42

Évù, a kwaru nu onye-ishi  
 ebvu g'unwu Kora gwa

- 1 Ọo ọe ne ele anọduje atọ  
 heehee  
 achọ nggele, asọ  
 gborogboro g'ọ ngwa mini;  
 bukwapọ g'obu mu atọ  
 heehee achọ gube  
 Chileke.
- 2 Ẹkpiri Chileke; mbọ Chileke,  
 dzu ndzu akpo mu  
 jegiri-jegiri.  
 ?Bu teke ole be mu a-bya  
 apfuru l'iphu Chileke?
- 3 Ẹnya-mini mu buwaa nri  
 eswe l'enyashi mu;  
 kele o to dudu teke ẹphe  
 ta ajidu mu su:  
 “?Denu ẹka Chileke ngu nọ?”
- 4 Nta-a, mu tọkoru iphe,  
 nọ mu l'obu epfushi-a  
 be mu nyataru ọe mu shi  
 edujeru igwe oha;

- anyi atúko awú eje ala  
l'úlo Chileke.
- Tẹme anyi agú ebvú ẹhu-útso;  
bya ekele Chileke  
ekele l'echilabọ igwe ọha,  
byaru ọbo-iphe ono.
- 5 Gúbe obu mu;  
?denu g'o gude ị nọdu  
kpọyoo?  
?Denu g'o gude ị nọdu  
etsu mu ophe?  
G'anya ngu dụ l'ẹka Chileke  
nọ;  
kele mu e-mechaa kele iya  
ekele;  
mbú onye bú iya bú onye  
adzoje mu nù;
- 6 bya aburu Chileke mu.  
Obu mu nọ kpọyoo.  
Noo g'o gude mu nọdu ẹ  
mgboru Jíọdanu nyata  
ngu;  
mbú l'alị Hamonu l'eli  
úbvú Miza.
- 7 Ogbumini akpọru ogbumini  
okwe.  
Akparamini ngu me  
gborogboro,  
ooso sọ-kputewaru mu.
- 8 Ọle ọobujeru; o -be l'eswe  
be Chipfu egoshije mu  
n-yemobu iya.  
O -be l'enyashi l'ọ buerupho  
iphe, mu a-kpuru l'onu  
bú agú ebvú nkiya.  
Mu epfukwaphọ anụ Chileke  
ono,  
bú iya gude ndzú mu ono.
- 9 Mu sọru Chileke, bú  
agbara-mkpuma nkemu:  
“?Denu g'o gude ị zọhaa mu?  
?Bú gunu kparú iphe,

- ndu ọhogu mu akpa mu ẹhu;  
mu ọdu agu ọphụ ejephe?”
- 10 Ndu achị mu ị njo anọduje  
ekweru mu une mbọku-mbọku;  
sụ mu: “?Denu ẹka Chileke  
ngu nọ?”
- Iphe ono, ẹphe anọduje  
epfuru mu ono  
tụkowa ọkpụ mu l'ophu  
gwee arakabya.
- 11 Gbube obu mu; ?denu g'o gude  
ị ọdu kpoyoo?  
?Denu g'o gude ị ọdu etsu  
mu ophe?  
G'anya ngu dụ l'ẹka Chileke  
nọ;  
kele mu e-mechaa kele  
iya ekele;  
mbụ onye bụ iya bụ onye  
adzoje mu nụ;  
bya aburu Chileke mu.

### Ebvu-oma 43

- 1 Hanaaru mu enge; Chileke;  
jiko gbanaaru mu  
ọdzori;  
nafutanu mu l'ẹka ndu ono,  
te eyeduru ngu obu ono!  
Gbafuta mu l'ẹka ndu ọgho;  
waa ndu apfubeduru-ẹka-oto.
- 2 Eshinu ọ bụ gbubedua,  
bụ Chileke bụ agbarike mu;  
?denu g'ọ nwuru ị gbadoru  
mu?  
?Bụ gunu kparụ iphe,  
ndu ọhogu mu akpa  
mu ẹhu;  
mu ọdu eje ogbee-ogbee?
- 3 Menaa g'ọ bụru ìphóró  
nkengu; yẹ ire-lanụ ngu  
l'a-ọdu edu mu.

- G'ẹ̀phe dua mu durwua úbú  
 nkengu ono, dù nsọ ono;  
 mbụ g'ẹ̀phe durwua mu  
 ẹ̀ka i bu gẹ̀degede.
- 4 Noo teke mu a-byarwuta  
 ọ̀ru-ngweja gùbe Chileke;  
 mbụ byapfutakpọ Chileke  
 ono, bụ ẹ̀hu-utso mu;  
 bya aburu onye mu ete  
 ẹ̀swa iya ono.
- Mu a-kpọ une gude kele  
 ngu ekele gùbe Chileke,  
 bụ Chileke mu.
- 5 Gùbe obu mu; ?dẹnu g'o gude  
 ị nọdu kpoyoo?  
 ?Dẹnu g'o gude ị nọdu etsu  
 mu ophe?
- G'ẹ̀nya ngu dù l'ẹ̀ka Chileke  
 nọ;  
 kele mu e-mechaa kele  
 iya ekele;  
 mbụ onye bụ iya bụ onye  
 adzoje mu nụ;  
 bya aburu Chileke mu.

## Ebvú-oma 44

Évù, a kwarụ nụ onye-ishi  
 ebvú g'unwu Kora gụa

- 1 Gùbe Chileke; anyi gudekwa  
 nchị anyi numa;  
 tẹme nna anyi oche phẹ  
 kọkwaaru iya phọ anyi;  
 mbụ iphemiphe ono,  
 i mekotaru phẹ teke  
 ndiche ono.
- 2 L'ọo gùbedua l'onwongu  
 chishiru ndu ọhozo l'alị phẹ;  
 bya eworu ẹphēbedua  
 dzabẹ l'alị ono.
- Lẹ ndu dù igwerigwe bẹ i

mebyishiru;  
 obenu lẹ nna anyi oche  
 phẹ bẹ i meru g'ẹphe  
 jaa àjàjà.

3 Ọ tọ bụdu ogu-echi phẹ bẹ  
 ẹphe gude lwuta alị ono;  
 tẹme ophu ọ bụdu  
 ọkpehu phẹ bẹ ẹphe gude  
 lwu-kpee.

Obenu l'ọo ẹkutara ngu;  
 yẹe ọkpehu nkengu;  
 waa anọ-kube ono,  
 i nọ-kube phẹ ono bẹ meru;  
 ẹphe lwu-kpee;  
 noo kele ẹphe tūbaru ngu  
 l'anya.

4 Ọo gụbedua bụ Chileke mu;  
 bya aburu onye  
 eze nkemu;  
 mbụ onye emeje g'oshilokpa  
 Jiékọpu lwu-kpee l'ogu.

5 Ọo l'ẹka ngu bẹ anyi anọduje  
 nwuta ndu achị anyi lẹ  
 njọ nwuphu azụ.  
 Ọ bụru ẹpha ngu bẹ anyi  
 egudeje zọo ndu  
 wulihuru etso anyi  
 opfu pyakapyaka.

6 Mu ta chiduru upfu kwẹ  
 l'apfụ, mu chị;  
 tẹme mu maru l'ogu-echi  
 mu ta adzọdu mu.

7 Obenu l'ọo ike nkengu bẹ  
 anyi gude lwu-kpee  
 ndu achị anyi lẹ njọ.  
 Ndu anyi dū ashị bẹ i  
 meru iphere kpua.

8 Ọ kwa Chileke bẹ anyi  
 egudeje eku onwanyi  
 mbọku-mbọku.

Ọ bụru gube Chileke bẹ anyi  
 e-keleje ekele jasụ lẹ



- tuutuutuu ɽ m̩imiimii.
- 9 Ɔle ɿ j̩karu anyi;  
bya ekpua anyi iphu ɽ nt̩;  
ɔphu iitsojeɛduru ndu  
ojoɔgu anyi eje ɔgu.
- 10 ɿ haru ndu ɔhogu anyi;  
ɛphe chiphu anyi azu;  
ndu anyi du ash̩ bya at̩ko  
ɛku anyi kwaa ɔkwata.
- 11 ɿ gbadoru anyi g'at̩ru,  
e doberu k'egbushi.  
ɿ chia anyi; anyi daa ɿghagha  
l'ohamoha ɔzo.
- 12 ɿ wowaru ndibe ngu reshia  
ɔ-du-l'urwu;  
k'ɔphu bu l'ɔ to du du urwu,  
i ritaru l'ishi phe.
- 13 ɿ meru; ndu obutobu anyi  
no du ekweru anyi une.  
Ndu no-pheru anyi  
mgburugburu no du  
ano du je epfubyishi anyi;  
bya ach̩ anyi ɔchi.
- 14 ɿ meru; anyi buru iphe,  
ndu ɔhozo gude anmaku  
l'ejo ɛtu;  
buru ndu bu: a -nyata  
phe l'e phuphee ishi.
- 15 Mboku-mboku be aanodu je  
eme mu iphe-iphere  
mmekwase.  
Iphere no du ejije mu iphu  
pyimu;
- 16 noo ke le ndu ɔhogu mu;  
waa ndu eme g'ephe  
gwata mu ugwo-iphe  
ano du je ekweru mu une;  
epfutoshi mu.
- 17 ɿphemiphe-a mekotaru  
l'ehu anyi; ɔle anyi ta  
zohaduru ngu;  
ɔphu anyi emebyiduru

- ogbandzu anyi lẹ ngu.  
 18 Ophu obu anyi alufuduru  
 l'eka i no;  
 ophu anyi ahataduru okpa  
 zobe k'eshiswe uto ngu.  
 19 Obenu l'i gweru anyi  
 arakabya l'egu nkuta-oswa;  
 bya eworu dadishi-nwamaa  
 phukpute anyi.  
 20 Ome anyi zoharu Chileke anyi;  
 bya achi-liaru agwa ndu  
 ohozo eka;  
 21 ?Chileke tege avodu iya  
 vofuta to;  
 eshinu o makotaru iphe,  
 e domiru edomi,  
 du nemadzụ l'obu.  
 22 Ole o bu; oo l'iswi ehu ngu  
 be o to dudu teke onwu  
 ta anodujedu eme g'o  
 gbuwa anyi;  
 teme l'eeme anyi g'aturu,  
 a chitaru eje egbushi.  
 23 Gube Nnajiuphu; tehu etehu!  
 ?Denu g'o gude i je anodu  
 eku mgbenya?  
 Tehu etehu; ba ajikashi anyi  
 ojejeje!  
 24 ?Denu g'o gude ophu i  
 yeheduru anyi onu?  
 ?Denu g'o gude i zohaa  
 iphe-ehuka, anyi eje;  
 bya azohaa laakpa anyi ehu?  
 25 E mewaru anyi; anyi daa;  
 nmaa epho l'ali;  
 k'ophu bu l'ishi  
 tsutawaru  
 anyi eja.  
 26 Gbalihu yeru anyi eka!  
 Guderu n-yemobu ngu  
 gbafuta anyi!

## Ebvü-oma 45

Évù, a kwarü nü onye-ishi  
 ebvü g'unwu Kora gwa;  
 g'e gude olu ebvü, "Ojimbvü" gwa ya;  
 ebvü ekele-nwanyị

- 1 Obu mu bẹ opfu oma jiru ke  
 pyimu pyimu.  
 Onye mu epfu eyeru bukwa  
 eze anyi.  
 Ire mu dūwaa gẹ  
 mkpara-ekwo onye maru  
 ede ekwo egwegwa.
- 2 Ị kakota nemadzu,  
 a nwukpooru anwunwu  
 ama mma.  
 Eze-ipe-oma jiru ngu onu ejiji;  
 kele Chileke goru onu-oma  
 ojejeje nu ngu.
- 3 Gube O-gbua-o-turu-ugo;  
 wota ogu-echi ngu kee  
 l'upfu!  
 Gbaphua onwongu akpabiri  
 yee o-gbu-nwiiinwii!
- 4 Dunu akpabiri akpabiri  
 nyikoru l'ugbo-inya ngu  
 gbaru kwaakwaakwa  
 je alwua lwu-kpee!  
 See iswi ire-lanu;  
 yee ewoze onwonye ali;  
 yee apfubekoto.  
 G'eka-utara ngu mekwaa iphe,  
 du ebvü.
- 5 G'apfu ngu, atsü nkọ  
 mejeepho tsurumu l'obu  
 ndu ohogu gube eze.  
 G'ohamoha dajekwa  
 kpurumu l'iphu ngu.
- 6 Gube Chileke; oo g'i bu eze  
 nta-a bu g'ii-buru iya jasü  
 le tuutuutuu le miiimii.  
 Ikpe, pfuru oto be i gude

- buru eze; l'eka i bu eze.  
 7 Iphe, pfuru oto du ngu ree;  
 ejo-iphe dukwanu ngu  
 ashị.  
 Noo g'o gude Chileke,  
 bu Chileke ngu hota ngu  
 l'echilabọ ndu unu l'ephe  
 bu ogbo; bya awua ngu  
 manu ehu-utso l'ishi.  
 8 Uwe ngu g'o ha be mkpo  
 meru; waa alowe;  
 yee kashia tuko voo  
 pfurupfuru.  
 Une, a -gbẹ l'iphe, bukpo  
 unuphu ibe gube eze  
 akpogbaa nodu emeje  
 g'ehu tsoo ngu utso;  
 mbu unuphu ophu e  
 gudegbaa eze-enyi  
 mematagbaa.  
 9 Unwada eze hachakwaaru  
 yiru l'unwanyi aakwabẹ  
 ubvu l'ibe ngu.  
 Oo l'ekutara ngu be  
 eze-nwanyi pfuru.  
 Iphe, o yeru l'ehu buru iphe,  
 e meru le mkpola-ododo  
 Ofi.  
 10 Ngabẹ nchi gube ada-eze!  
 Jiko rikwaa iphe-a,  
 mu abya epfupfu-a ariri!  
 Zohakota ndibe unu;  
 waa ndu nna ngu phe!  
 11 Le mma, iima meakwaru;  
 i nodu agu eze egu.  
 Eshinu o bu iya bu nnajiuphu  
 ngu; phozejekwaru iya!  
 12 Ndu Taya a-nukwa ngu iphe  
 ke mmanu;  
 teme ndu nweru iphe  
 emeahaaru ngu ree;  
 g'eeshi g'ephe tuba ngu

- l'anya.  
 13 Ada eze bẹ nọ  
     l'o-gbu-nwīnwīi iya;  
     e duba iya l'ulo.  
     Uwe iya bẹ e gude oghu  
     mkpọla-ododo kwee.  
 14 E yeru iya uwe, e meru  
     eregete duru ejepfu eze.  
     Ụnwumgboko ibe iya nọdu  
     etsọ iya l'azụ.  
     Ephebedua bẹ eedukwapọ  
     edujeru eze.  
 15 Ehu atso pẹ uto;  
     ephe nọdu ete eswa;  
     e duru pẹ abahụ l'ibe eze.  
 16 Gube eze; ọọ unwu ngu  
     bẹ a-nọchi ẹnya  
     ochochoroche ngu pẹ  
     buru eze.  
     Ọ buru pẹ bẹ ii-me g'ephe  
     buru ishi lẹ mgboko  
     mgburugburu.  
 17 Mu e-me g'a nyatajẹ ngu;  
     e -shi l'ogbo sweru ogbo.  
     Ọọ ya bụ g'ọhamoha  
     ekeleje ngu ekele jasụ lẹ  
     tuutuutuu lẹ mīimiimii.

## Ebvü-oma 46

**Ebvü, e deru nọ onye-ishi  
 ebvü g'unwu Kora gude  
 olu unwumgboko gụa**

- 1 Ọọ Chileke bẹ bụ onye anyi nọ  
     l'ẹka ezeru ndzụ;  
     bya aburu iya bụ ike anyi.  
     Ọokwagebeje akwagebe  
     eyeru anyi ẹka m'anyi  
     nọdu eje iphe-ẹhuka.  
 2 Ọọ ya bụ l'anyi ta abyakwa  
     l'atsụ ebvü;

- m'obeta mgboko gha  
 igharaphu;  
 mbụ m'obeta a pata úbvú  
 l'ophu parụ je echiee  
 l'echi ogbu-enyimu;
- 3 mini, nọ iya nụ phua oke  
 ẹphu; byaa gbulagbula  
 byaa mebyikpoo  
 gbukuu-gbukuu;  
 k'ophu úbvú angagbaa  
 anganga.
- 4 O nweru enyimu ophu dụ nụ.  
 Mini, shi iya nụ emeje g'ẹhu  
 tsọo mkpukpu kẹ Chileke ọtso;  
 mbụ ẹka dụ nsọ,  
 Okalibe-kakota-shii bu.
- 5 Chileke nọkwa lẹ mkpukpu  
 iya;  
 k'ophu bụ l'ọ tọ dudu iphe,  
 byaru eme iya nụ.  
 Nchi -bya abọhu l'ọobyawaa  
 bya agbaarụ iya mkpu.
- 6 Ndu ọhozo gude ẹhu-eghu  
 aba hanyihanyi.  
 O mee; alị-eze phẹ nọdu  
 angakota anganga;  
 ọle Chileke wolierupho  
 olu gbọoru phẹ ụja;  
 Eliphe l'ophu rwushihu.
- 7 Chipfu, bụ Okalibe-Kakota-Ike  
 bẹ nọkwa swiru anyi.  
 Ọ kwa Chileke kẹ Jiékpọ  
 bụ onye anyi nọ l'ẹka  
 ezeru ndzụ.
- 8 Byanụ ahuma iphe, Chipfu  
 meru!  
 Bya ahuma g'o meru;  
 mgboko buru mkpurupyata!
- 9 Oogboje ọgu l'eliphe l'ophu.  
 Ọogba-jishije apfụ bya  
 emebyishia arwa;  
 bya eworu ụgbo-inya

- 10 Ọ sọru: “Unu nọdu doo;  
 g'unu amaru l'ọo yẹbedua  
 bụ Chileke.  
 Ndu ọhozo a-tụ ọnu lẹ yẹbe  
 Chileke parụ ẹka;  
 mbụ l'aa-tụ ọnu iya l'eliphe  
 mgburugburu lẹ ya parụ ẹka.”
- 11 Chipfu, bụ  
 Ọkalibe-Kakọta-Ike bẹ  
 nọkwa swiru anyi.  
 Ọ kwa Chileke kẹ Jiékpọpu  
 bụ onye anyi nọ l'ẹka  
 ezeru ndzụ.

## Ebvü-oma 47

**Ebvü, e deru nù onye-ishi**  
**ebvü g'unwu Kora gụa**

- 1 Unu kua ẹka unubẹ  
 unwu-eliphe l'ophu!  
 Unu gude ebvü ẹhu-utso  
 gbọoru Chileke ọgboo!
- 2 Noo kẹle Chipfu,  
 bụ Ọkalibe-kakọta-shii  
 gbaru g'a tsuje iya ebvü.  
 Kẹle ọo yẹbedua bụ Ọkalibe  
 eze, achikota ndiphe  
 l'ophu.
- 3 Oomeje g'anyi kapyabẹ  
 ndiphe; bya emee gẹ ndu  
 ọhozo nọdu anyi lẹ mkpula.
- 4 Ọo yẹbedua họtaru anyi alị,  
 anyi bu;  
 mbụ alị ono, Jiékpọpu,  
 onye Chileke yeru obu  
 egudeje eku onwiya.
- 5 Chileke kwolihuwaru jeshia  
 l'aba-eze iya.  
 Ndiphe tushia ọzu agbọ  
 ọgboo; egburu iya opu.

- 6 Unu gụa ebvú gude tua Chileke  
     ẹpha! Unu tua ya ẹpha!  
 Unu gụa ebvú gude tua eze  
     anyi ẹpha! Unu tua ya ẹpha!
- 7 Kẹle ọọ Chileke bụ eze ndu  
     mgboko mgburugburu.  
 Unu kwaa ẹvù gude jaa ya  
     ajaja!
- 8 Ọ kwa Chileke bụ eze ọhamoha.  
 Ọ nọkwa l'aba-eze iya, dụ nsọ.
- 9 Ndu nweru ọnya l'eliphe  
     dzukọbeakwaru gẹ ndibe  
     Chileke kẹ Ẹbirhamu;  
     kẹle ndu eze, egbobutaje  
     unwu-eliphe,  
     bụkwa Chileke nwe pẹ.  
 Ọ kwa Chileke bẹ  
     kangokọtaru nụ.

## Ebvú-oma 48

### Ebvú-oma, Unwu Kora gụru

- 1 Chipfu parụ ẹka.  
 G'a jakwaa ya phọ ajaja,  
     rwuberu iya nụ  
     lẹ mkpụkpu kẹ Chileke anyi;  
     mbụ l'úbvú ono, dụ nsọ ono.
- 2 Úbvú Zayọnu ono ama  
     ntumatu bya adu akpabiri;  
     bya aburu ẹhu-utso  
     unwu-eliphe l'ophu.  
 Ọ nọ l'uzo isheli mkpụkpu  
     Jierúsalem, bụ mkpụkpu  
     onye eze, parụ ẹka.
- 3 Chileke nọakwa l'ulo ndu  
     mkpụkpu ono anọduje  
     ezeru ndzụ.  
 O mewaru g'a maru l'ọo  
     yẹbedua bụ a  
     -gbabe-ezeeru-ndzụ.
- 4 Ndu eze chikoberu ndu ojogu



- phe;  
 bya awuru bya g'ephe tsoo  
 mkpukpu ono oḡu.
- 5 Ephe byarwutaepho bya ebu  
 iya ishi.  
 O tufu phe ehu; ndzu guhu phe;  
 ephe gbalachaa.
- 6 Ndzu-agugu, guderu phe  
 l'eka ono  
 tsuru phe l'ehu ge nwanyi,  
 ime eme.
- 7 I mebyishiru phe ge pherephere,  
 shi l'uzo enyanwu-awawa  
 emebyishije ugbo-mini  
 Tashishi.
- 8 Oo iphe, anyi numaru be  
 anyi humakwarupho  
 le mkpukpu ke Chipfu,  
 bu Okalibe-Kakota-Ike,  
 bu iya bu mkpukpu  
 Chileke anyi;  
 mbu l'oo Chileke emeje  
 g'o nguru anguru  
 jasu l'ojejeje.
- 9 Anyi anoduje l'ime eze-ulo  
 gube Chileke  
 aru k'obu ono, i yeru  
 anyi ono.
- 10 Gube Chileke; oo g'epha ngu  
 ngadzuru ekameka;  
 bukwapo g'aanoduje aja  
 ngu ajaja le mgboko  
 l'ophu.  
 O buru ikpe, pfuru oto be i  
 gude buru eze.
- 11 Ehu atso ubvu Zayonu utso;  
 mkpukpu Jiuda nodu ete  
 eswa.  
 O buru iphe, kparu iya nu bu  
 g'iigudeje ekpe ikpe.
- 12 Unu jegbabeada oma Zayonu.  
 Unu jephee ya mgburugburu;

- gụa ụlo-ephekerephe,  
o nweru oḡu.
- 13 Unu gbuchakwaa igo l'igbulo,  
e gude kpụ-pee  
ya mgburugburu!  
Unu elerwekwaapho ɛnya  
l'ulo-ezeru-ndzu,  
noḡbaa ya nụ.
- Oo ya bu g'unu akọoru iya  
oḡbo ophu no l'iphu.
- 14 Noo kele Chileke-a a-buru  
Chileke anyi jasụ le tuutuutuu  
le mijimiimii.
- O buru iya a-noḡu edu anyi  
jasụ g'anyi a-no-beru.

## Ebvu-oma 49

Ebvu-oma, e deru nụ  
onye-ishi ebvu g'unwu  
Kora gụa

- 1 Unube ndiphe; unu numakwa  
iphe-a!  
Unu ngabekwa nchi;  
unube ndu bu le mgboko  
l'ophu!
- 2 Ge ndu ha shii ngabe nchi;  
ndu ha nwanshi angabe.  
Ge ndu nweru iphe yee  
ndu ukpa tukokwa  
ngabe nchi.
- 3 Opfu, shi mu lonu a-buru  
opfu onye maru iphe.  
Iphe, mu ritaru l'obu emeje  
g'iphe doo ɛnya.
- 4 Ge mu bya eworu nchi  
gboberu etu.  
Mu akpoo une gude mee g'ilu,  
mu turu doo ɛnya.
- 5 Ndzụ ta abyadu agu mu me  
mboku oke iphe-ehuka

- rwuepho.  
 O tọ dudu m'obeta ndu achi  
 mu lẹ njo no-pee  
 mu mgburugburu;  
 mu ta atsukpoda phẹ ebvu;  
 6 mbu ndu ono, achijeru  
 upfu kwẹ l'eku,  
 ephe kpataru;  
 gude akanya, ephe setaru  
 eku onwophe.  
 7 O lẹ o tọ dukwa onye a-du ike  
 a-gbafuta nwibe iya;  
 ophu o dudu onye ophu a-du  
 ike apfu Chileke aswa ishi  
 nemadzu ibiya.  
 8 Kele aswa pakwaru eka l'iphe,  
 e gude agbata ndzu.  
 O tọ dukwa iphe, nemadzu  
 a-pfu g'o suru iya;  
 9 mbu ugwo, oo-pfu  
 nodu ndzu ojejoje;  
 g'o t'o rehu erehu.  
 10 Onyemonye eleana lẹ  
 ndu mmamiphe  
 anwushihujehaa.  
 Ndu eswe me ndu eme  
 beebabee nodu  
 abahujehaa l'ilu.  
 G'ephe ha atukoje woru eku  
 phe haaru ndu ozo.  
 11 Iphe, ephe anoduje ari  
 bu l'ephe a-no jasú l'ojejoje;  
 l'unuphu phe a-buru  
 oje-le-nwanwa;  
 ephe ewochaaru epha phe  
 gushia ali-ihe phe.  
 12 Obenu l'eku nemadzu  
 ta akposhidu iya anwuhu.  
 O bu-a g'anu-egbudu  
 anwuhuje-a bu g'oo-mecha  
 nwuhu.  
 13 Humawaro g'onwujeru ndu

amadụ iphe;  
 waa g'oodapfutaje ndu  
 awụ etso phẹ nụ;  
 mbụ ndu iphe, ephe anọduje  
 epfu aduje ree.

- 14 Iphe, e-mechaa mee phẹ  
 nụ bụ l'ephe a-nwụhu  
 g'aturu.  
 Ọ buru onwu a-bya erwuta  
 phẹ;  
 ndu pfuberekoto atụa okoo  
 kpua phẹ;  
 mę o -bee l'utsu.  
 Ogwehu phẹ ono erekashihu  
 mę e -shiepho l'eguru  
 ụlo phẹ ono;  
 parụ phẹ je adee l'ilu.
- 15 Obenu lę mbedua bę Chileke  
 a-gbafuta gę mu ta abahụ  
 l'alị-maa;  
 kele oo-mecha kuta mu  
 dokube onwiya.
- 16 Ọ -buru lę nemadzụ  
 nonyaaru bya enweru  
 iphe shii;  
 k'ophu ndiphe watarụ iya  
 akwabe ụbvù;  
 gę ndzụ ta agụkwa ngu.
- 17 Noo kele ọ tọ dudu ophu  
 oo-gude ala m'ọ lashịa.  
 Ophu ụbvù iya obu etsokwa  
 iya phọ ala l'ilu.
- 18 Ọ bụ eviya lę teke ọ nọ ndzụ  
 bę o shi gụkobe onwiya lę  
 ndu a gọru onu-oma nụ;  
 teme ndiphe shikwaphọ  
 anọduje aja iya ajaja l'ọ  
 bụ onye ẹka-atutu.
- 19 Ọle oo-mechaele-a lapfu  
 ndiche iya phẹ l'alị-maa;  
 ẹka a ta abyadụ ahuma  
 ìphóró.

- 20 Onye nweru iphe;  
 ophu o madu iphe bu-a  
 g'anu-egbudu anwuhuje-a  
 bu g'oo-mecha nwuhu.

## Ebvu-oma 50

### Ebvu-oma, Asafu deru

- 1 O kwa Okalibe, bu Chileke;  
 bya aburu Chipfu epfu  
 opfu-a.  
 Ooku mgboko l'ophu oku;  
 eshikpoo l'uzo  
 enyanwu-awawa jasu  
 l'uzo enyanwu-ariba.
- 2 Chileke no le Zayonu egbu  
 nwijnwii; mbu Zayonu  
 ono ama ntumatu ono.
- 3 Chileke anyi abyaakwaa;  
 ole o to nodu nggujungguji  
 abya.  
 Oku, ata ririri no iya l'uzo  
 iphu.  
 Oke pherephere no-pee ya  
 mgburugburu.
- 4 Ooku igwe; eku ali;  
 g'ephe bya aburu ekebe iya;  
 g'ephe bya anodu huma  
 ge ya gude ekpe ndu nkiya  
 iya ikpe.
- 5 "Unu chikoberu mu ndu bu  
 nkemu g'ephe ha;  
 mbu ndu mu l'ephe gude  
 ngweja gbaa ndu."
- 6 Imigwe l'ophu anoduje atu  
 onu ge Chileke bu-be  
 onye pfuberekoto;  
 kele Chileke lonwiya bu  
 Onye-ikpe.
- 7 "Ndu mu; unu ngabe nchi;  
 ge mu pfua opfu yeru unu.

- Gẹ mu gbaa unubẹ ndu  
 Ízurelu ekebe.  
 Ọ kwa mụbe Chileke bụ  
 Chileke unu.
- 8 Ọ tọ bụkwa kẹ ngweja,  
 unu egweje anụ mu;  
 ọzoo kẹ ngweja-akpọ-ọku,  
 unu egwejeru mu bẹ mu  
 abarụ unu mba iya;  
 kele ndu k'ono bẹ unu  
 anọduje emekọta l'o  
 rwuberu iya.
- 9 Ọ tọ dukwa eswi, shi l'ọka  
 unu, mu a-nata;  
 ọphu ọ dukwa g'ọ ka mma  
 l'ọo mkpi, shi l'ikpoto ẹku  
 unu, mu a-nata;
- 10 kele iphe, bụkpoo anụ,  
 nọkota l'oswa bụkota nkemu;  
 mękpoo eswi,  
 dọru l'unubuku úbvú.
- 11 Ẹnu, ephe l'eli bẹ mu  
 makọtaru g'ẹphe ha;  
 anụ-egbudu l'ophu  
 bụkotaru iphe mu.
- 12 Ọme l'ọo ẹgu agụ mu;  
 mę mu tege  
 abyapfutakwa unu;  
 kele ọo mbeđua nwekọta  
 mgboko-a l'ophu;  
 yẹe iphe, nọ iya nụ.
- 13 ?Unu riru lẹ mu atajẹ anụ  
 eswi?  
 ?Tọo unu dobesu lẹ mu  
 anguje mee eghu?
- 14 Ngweja, unu e-gwejeru nụ  
 mụbe Chileke bụ g'unu  
 keleje mu ekele.  
 Unu emekọtaje iphe,  
 unu riburu angụ l'unu  
 e-meru mụbe  
 Ọkalibe-kakọta-shii.

- 15 Unu -kua mu oku mę  
 iphe-ęhuka byaru unu;  
 mu adzota unu;  
 ọọ ya bụ g'unu akwabeje  
 mu ùbvù.”
- 16 Obenu l'onye ẹjo-iphe bę  
 Chileke suru:  
 “?Denu g'o gude ị nọdu  
 anọduje agụ ekemu mu  
 g'onye agụ ebvu?  
 ?Denu g'o gude ị nọdu  
 egudeje ọnu ngu  
 pfukuta ọgbandzu mu?
- 17 Lẹka ị jikaru sụ gę mu ta  
 aloshi ngu ẹka lę nchi;  
 woru opfu mu l'ophu  
 nwuru ye l'azu.
- 18 Ị -huma onye-oshi; l'i je  
 eshita iya ọnyà;  
 tẹme unu lę ndu eri ogori  
 nọdu aswị ọswi.
- 19 Ọnu ngu buepho njo-opfu bę  
 iigudeje iya epfu;  
 ịinodu egudeje ire ngu  
 agba ẹregede.
- 20 Ị -nọdu; l'i pfutoshi nwune  
 ngu.  
 Ọ buru nwune ngu nwoke,  
 unu l'iya shi l'epho  
 lanu bę ịinoduje evu  
 nvu-azu.
- 21 Iphemiphe ono bę  
 i mekotaru; mu nọduale-a  
 nggujungguji.  
 Ị gbę dobesuwanu lę mu lę  
 ngu bụ iphe lanu.  
 Ọle mu a-bakwanuru  
 ngu mba iya;  
 tụa ngu ẹjo-iphe ono,  
 l'iime ono jalaa l'iphu.”
- 22 “Unu ngabę nchi l'iphe-a,  
 mu abya epfupfu-a;

unube ndu zoharu  
 mube Chileke!  
 Odumeka mu alajashia unu  
 iphiriba iphiriba;  
 l'ebe abu l'o duru onye  
 suru unu anafuta.  
 23 Iphe, bukpo onye woru  
 ekele mee ngweja iya  
 be bu onye akwabe  
 mu ubvu.  
 O buru iphe, bu onye eme  
 iphe l'uzo, pfuru oto  
 be mu e-goshi le mube  
 Chileke  
 adzotaje nemadzu.”

## Ebvu-oma 51

Ebvu-oma, Dévidi deru nu  
 onye-ishi ebvu

Teke o deru iya bu g'onye  
 mpfuchiru Chileke, bu Nétanu  
 byachaaru ibe iya bya epfuaru iya  
 l'o meru eji l'o jepfuru Batusheba

- 1 Phunaaru mu obu-imemini;  
 jiko Chileke;  
 eshinu n-yemobu ngu te  
 nwedu echihu.  
 Huchafunu atupya ono,  
 mu tupyaru ngu ono;  
 eshinu iphuje obu-imemini;  
 phu k'etsutsu iya.
- 2 Sanaa mu rengurengu;  
 safukota mu ejo-iphe,  
 mu megbaberu;  
 l'i huchafu mu iphe-eji,  
 mu meshiru ngu!
- 3 Kele mu maru ge mu  
 tupyaberu ngu;  
 ophu mu azohajedu iphe-eji



- mu azọha.  
 4 Oo gụbedua gèdegede bẹ  
 mu mesweru;  
 mbụ l'ọo gụbedua bẹ  
 mu meru iphe-ẹji.  
 Iswi dụ ngu mma l'ikpe,  
 i kperu mu;  
 ọphu ụta adudu ngu iya l'ikpe,  
 ị nmaru mu.
- 5 Mbụ-a; mu shikwa teke a  
 nwuru mu buru onye  
 ẹjo-iphe.  
 Mbụ lẹ mu shirọ teke ne mu  
 tsutaru ime mu butaru  
 onye eme iphe-ẹji.
- 6 Iphe, iile ẹnya iya lẹ ndzụ  
 amadu bu ire-lanu.  
 Zinaa mu mmamiphe nkengu.
- 7 Gude isopu saa mu asasa  
 gẹ mu dubebe ree!  
 Saa mu gẹ mu chaa pemu  
 pemu g'aka-mini-sunoo!
- 8 Mee g'ẹhu tsoo mu utso;  
 gẹ mu tee ẹswa;  
 k'ọphu ọkpu mu ono,  
 ị nyajishiru ono  
 a-gbakerehu.
- 9 Gbakutaru iphe-ẹji,  
 mu meshiru azu!  
 Li hufukota ẹjo-iphe,  
 mu mekotaru g'ọ ha!
- 10 Jiko Chileke; menaa g'obu  
 mu gụa mu iphoro;  
 li nu mu unme ọphuu,  
 a-ọdu anuru ngu opfu.
- 11 Ta chifukwa mu l'atatiphu  
 ngu!  
 Ọphu ị nafukwa mu  
 Unme-dụ-Nso nkengu!
- 12 Nu-phunu mu ẹhu-utso  
 ono azu;  
 mbụ ẹhu-utso ono, shi l'adzota,

- ì dzọtaru mu ono.  
 Mee g'eme uche ngu heje mu  
 ihee; k'ophu ọo-gbata  
 mu ike.
- 13 Ọo ya bụ gẹ mu ezia ndu  
 anọduje atupya ngu nụ  
 uto ngu.  
 Ndu iphe-eji adakọbe  
 lwapfuta ngu.
- 14 Dzonaa mu l'ikpe ọchi,  
 mu gburu; jiko Chileke!  
 L'ọo ngu bụ Chileke,  
 adzoje mu nụ.  
 Ọo ya bụ gẹ mu egude ire mu  
 gua ebvu ẹhu-utso sụ  
 l'ì pfulerekoto.
- 15 Gube Nnajiuphu; kùhaa  
 mu ọnu;  
 k'ophu mu a-ja ngu ajaja.
- 16 Ọme ọo ngweja bẹ iile  
 ẹnya iya; mẹ mu  
 egwekwaru iya  
 nụ ngu.  
 Obenu lẹ ngweja m'obeta ọ  
 buru ngweja-akpo-ọku  
 te emekwa  
 g'ẹhu tsoo  
 ngu utso.
- 17 Kele ngweja ọphu Chileke  
 anatajẹ bụ aphụ-eji-obu.  
 Onye aphụ jiru obu l'iphe  
 o meru; izimanu lwa iya  
 azu bẹ gube Chileke ta  
 anmajekwa phulaphula.
- 18 Menaa Zayonu g'ọ jaa àjàjà;  
 eshinu ọ dū ngu l'obu.  
 Kpūnaa igbulọ  
 Jierúsalemu!
- 19 Ọo ya bụ g'eegweaharu  
 ngu ngweja, pfuru ọto;  
 ngweja-akpo-ọku  
 atsoahaa ngu utso;

l'a wataru ngu egburu  
oke-eswi l'oru-ngweja  
ngu.

## Ebvu-oma 52

Évù, Dévidi kwaru  
nu onye-ishi ebvu

Teke o kwaru iya bu teke  
Doweḡu, onye Edomu byaru  
bya agbaarū Sōlu ama sū iya  
lẹ Dévidi nọ l'ibe Ahimeleku

- 1 ?Denu g'o gude i nodu eku  
onwongu l'eme ejo-iphe;  
oke, du ike?  
?Ti madu le n-yemobu  
Chileke a-nọ jeye l'ojejoje?
- 2 Iphe, iigudeje ire ngu epfu  
l'ii-me buepho ejo-iphe;  
mbu l'ire ngu atsū  
nko g'akwo,  
a baru ababa.  
Iphemiphe, iimekpoo ememe  
bukotaru ughoshi.
- 3 I ka eye ejo-iphe obu  
eme l'iphe, du ree.  
Adzu uka ka ngu ree eme  
l'epfu iphe, pfuru nhamunha.
- 4 Iphe, i yeru obu bu  
epfubyishi nemadzu;  
gube onye ono, adzu-gbu  
onwongu l'uka ono!
- 5 Su-a; Chileke e-mebyishikwa  
ngu; mee ngu li buru  
mkpurupyata  
jasuru asuru.  
Oo-wofu ngu; mee ngu g'i ti  
buhẹ l'ibe ngu;  
l'o phefu ngu ephefu l'ali  
ndu nọ ndzu.

- 6 Ndu pfuberekoto -huma iya;  
 ephe atsuhu ebvu;  
 ephe achia ya ochi su:
- 7 “Unu lewaro; onye owa-a bu  
 onye jikaru le ya te  
 ewoduru Chileke eme  
 agbaru-ike iya.  
 O kporu obu yeru eku,  
 o nweru nwegharu iya eka;  
 bya egude ejo-iphe,  
 onoduje emeshi eko  
 dzudzudzu.”
- 8 Obenu le mbedua du g'oshi  
 olivu, jaru ajaja nodu  
 kpukala l'ime eze-ulo  
 Chileke.  
 Mu a-chiru upfu kwee le  
 n-yemobu Chileke  
 jeye l'ojejoje.
- 9 Mu a-nodu ekele  
 ngu ekele  
 jeye l'ojejoje;  
 kele oo gubedua  
 l'onwongu  
 meru iya.  
 Mu anodukpoepho nwadoo  
 ele ngu enya l'eka;  
 kele epha ngu du ree.  
 Teme mu anodukwapho  
 l'iphu ndu duru ngu  
 nsọ tua ngu epha.

## Ebvu-oma 53

Évù, Dévidi kwaru nu  
 onye-ishi ebvu; g'e gude  
 olu aphu kwaa ya

- 1 Ndu eswe anoduje ari l'ime  
 obu phe le Chileke  
 ta adudu.  
 Ephe mebyishiaru onwophe;

- iphe, ephe eme buru  
akpamara;  
ophu o dudu m'onye  
lanu eme iphe, du ree.
- 2 Chileke gbẹ l'imigwe lee enya  
le mgboko-a; mbu l'ehu  
unwu-eliphe;  
ge ya maru ?o nweru onye  
kwaru enya?  
Mbu g'o maru ?o nweru onye  
achọ yebe Chileke?
- 3 O le g'ephe ha tukowaru haa  
uzo jephuhu.  
Epe tukowaru g'ephe ha  
mebyishihukota.  
O to dudu g'o ka mma l'oo  
onye lanu eme iphe, du ree.
- 4 O dukwa ge ndu ono,  
eme ejo-ememe ono te  
nwedu egomunggo;  
mbu ndu anoduje eri ndibe  
mu g'onye eri nri;  
ophu ephe epfujedu anu  
Chipfu.
- 5 Epe bu ndu ndzu-agugu  
rwutaru;  
leka adudu iphe  
ndzu-agugu,  
du iya nu;  
teke Chileke e-woru okpu  
ndu tsoru ndibe iya ugu  
tukashia nanu nanu;  
meru iphe-iphere kpua phe;  
kele o jikawaru phe.
- 6 O du mu g'e shi le Zayonu bya  
adzota ndu Izurelu.  
Jiekopu e-te eswa;  
ehu atsọ Izurelu utso  
me Chileke dophuepho  
ndibe iya azu  
l'onodu phe.

**Ebvu-oma 54**

Ēvù, Dévidi kwaru  
 nù onye-ishi ebvu; g'a  
 kpòru une ye iya

Teke o kwaru iya bu ge  
 ndu Zifu byaru bya asu  
 Sòlu le Dévidi wohakwaru  
 onwiya l'echilabò phe

- 1 Gudenu epha ngu dzoo mu;  
 gube Chileke!  
 Gudenu okpehu ngu haaru  
 mu enge!
- 2 Numanu epfupfu, mu epfu  
 anu ngu; jiko Chileke.  
 Ngabenu nchi; numa iphe,  
 shi mu l'onu.
- 3 Kele ndu shi eshishi wuru  
 bya mu etso opfu;  
 Ndu ewebushi akurepho nodu  
 achò mu egbugbu;  
 mbu ndu ata akpadu  
 Chileke ishi m'ilile.
- 4 Obenu l'oo Chileke bu onye  
 eyejeru mu eka.  
 Oo Nnajiuphu bu onye gude  
 ndzu mu.
- 5 Ge Chileke mekwaa  
 g'ejo-iphe, ndu achi mu  
 le njo meru mu  
 laphuru phe azu!  
 Ge Chileke mebyishikwaa  
 phe gude nno goshi  
 l'oopfushije ike l'iphe,  
 o pfuru.
- 6 Mu a-tu obu mu onyo  
 gwetarù ngu ngweja.  
 Mu abya ekele ngu ekele  
 gube Chipfu;  
 kele epha ngu du ree.
- 7 Teme o buru ngu

dzotakotaru mu l'iphe,  
 bukpo iphe-ehuka,  
 byapfutaru mu nu.  
 Mu byakwapho ahuma l'e  
 mekperu ndu ohogu  
 mu phe.

## Ebvu-oma 55

Évù, Dévidi kwaru  
 nu onye-ishi ebvu; g'a  
 kporu une ye iya

- 1 Nūmaro epfupfu, mu epfu  
 anu ngu gube Chileke!  
 Ba agbakwa mu nkuchi;  
 ke gi ba anuma arworwo,  
 mu arwo ngu.
- 2 Ngaberu mu nchi zaa mu  
 enu l'oku, mu eku ngu!  
 Oriri mu anoduje egburwashu  
 mu ehū;  
 k'ophu o meru; mu nodu  
 anoduje atsū oke ude.
- 3 Iphe, kparu iya nu buru olu  
 ndu ohogu mu, mu anu;  
 waa mkpawere,  
 ndu ejo-iphe eme mu;  
 kele ephe anoduje achiru  
 mu ejo idzu;  
 bya egude ehū-eghu  
 epfubyishi mu.
- 4 Aphu jiru mu obu;  
 anwuhu nodu eye mu  
 ebvu eyeshikpo mu  
 iya ike.
- 5 Ndzū agu mu agushikpoo mu  
 ike;  
 ehū nodu aphukota  
 mu kpaakpaakpaa.  
 Ishi nodu anyi mu edzu.
- 6 Mu su l'o du mu g'a su le mu

- furu ñkù gẹ ndo;  
 mẹ mu ephefuepho je achọo  
 ẹka mu a-nọdu tuta unme;
- 7 mẹ mu epheepho  
 phemihu je eburu l'echiegu;
- 8 mẹ mu emeepho egwegwa  
 lashia l'ulo-mgbobuta mu;  
 mbu ẹka oke pherephere  
 adudu.
- 9 Mebyishinaa idzu ndu  
 ejo-iphe jiko Nnajiuphu!  
 L'ighashia phe olu-opfu!  
 Kele mu humaru le ndu  
 mkpukpu ono eme  
 nwibe phe mkpawere;  
 teme ephe nodu  
 ese opfu.
- 10 Ephe anoduje awu-phe  
 l'igbulo mkpukpu ono:  
 eswe l'enyashi.  
 Iphe-eji yee iphe-ehuka nodu  
 azogba g'o du phe  
 l'ime mkpukpu ono.
- 11 Ejo-iphe pfukwarupho  
 l'echilabo iya;  
 teme ophu mkpamehu  
 yee ughoshi alufujedu alufu  
 l'edupfu phe.
- 12 Ome o bu l'oo ndu ohogu mu  
 anma mu phulaphula;  
 me mu -atamikwaa ya  
 le nshi.  
 Ozoo ome l'oo onye mu du  
 ashị be etu onwiya  
 ophushugbu l'eka mu no;  
 me mu -edomikwaaru  
 iya onwomu.
- 13 Obenu l'oo gubedua,  
 bu onye ebo mu;  
 bya aburu onye mu l'iya  
 aswi oswi;  
 bya eshikwapho onya



- bẹ ọ gbẹ buru.
- 14 Mbụ onye mu l'iya  
kwatakpoọ eshi uto;  
bya aburu onye mu  
l'iya atukoje swiru eje  
leze-ulo Chileke.
- 15 G'onwu byakwa egbukwota  
ndu ohogu mu egbukwota!  
G'ephe bukwaru ndu ee-li  
le ndu!  
Kele ejo-iphe kwawaru  
ikwato l'ime obu phe.
- 16 Obenu le mbedua bu Chileke  
be mu araku;  
kele mu maru le Chipfu  
e-mechaa bya adzo mu.
- 17 Mu egudeje olu aphu echiku  
iya le mkpu l'uzenyashi;  
me l'utsu; waa l'eswe.  
Mu maru-a l'oo-mecha  
numa olu mu.
- 18 Oo-nafuta mu l'eka ndu  
etso mu ogu.  
Epe -dukpokwaa igwerigwe  
g'ephe aduhabe be  
oo-nafutaele mu-a.  
O to dudu iphe, epe eme mu.
- 19 Chileke, bu onye shi l'ichee  
noduta l'aba-eze iya  
be a-numa olu mu;  
bya anua phe chipfu.  
Kele epe jikaru agbanwe;  
teme ophu epe atsudu  
Chileke ebvu.
- 20 Onye mu l'iya shi aswi oswi  
tsoru onya iya ogu;  
shi nno mebyia ogbandzu,  
epe l'iya gbaru.
- 21 Opfu, shi iya l'onu nodu echi  
buruburu g'ukpa;  
ole iphe, jiru iya obu  
bu ndumashi.

Mbụ l'opfu iya atụ atụtu gę  
manụ ụrwazi;  
ọle ọotsu nkọ g'ogu-echi,  
a bataru nkọ.

22 Woru iphe ono, e boru ngu g'i  
vuru ono haarụ Chipfu.

Ọo-dụ-a ike gudeshia ngu;  
kele ọ tọ byadu aha  
ndu pfuberekoto  
g'ephe daa.

23 Obenu l'ọo gụbedua,  
bụ Chileke l'e-duru ndu  
ejo-iphe duba l'ime ilu;  
ẹka ephe a-nọdu rekashihu.

Ndu egbu ọchi waa ndu  
ntuphu-ire bę i tii kwedu  
g'ephe kpọo ụpfu  
l'eliphe-a.

Obenu lę mbędua bụ ngu bę  
mu dakoberu.

## Ebvu-oma 56

Ebvu-oma, Dévidi deru  
nụ onye-ishi ebvu;  
g'e gude olu ebvu, “Ndo beru  
l'achị, nọ ụzenya” gụa ya

Teke o deru iya bụ  
gę ndu Filisitayinu  
guderu iya lę Gatu

1 Gụbe Chileke; phụnaaru mu  
obu-imemini;  
a -nonyaa; ndiphe woru  
mu lwee elwelwe;  
lę ndu ọhogu mu anọduje  
akpa mu ẹhu  
mkpụrumkpuru.

2 Mkpụrumkpuru bę ndu achị  
mu lę nọ anọduje achị mu  
kpabękpabe;

- mbụ l'a dū igwerigwe gude  
 eku-onwonye etso  
 mu ọgu.
- 3 Ndzụ -nọdu agụ mu; bụe ngu  
 phọ bẹ mu adakobeje.
- 4 Ọo Chileke ono, mu anọduje  
 aja opfu iya ajaja ono bẹ  
 mu dakoberu.
- Ọphu ndzụ agụdu mu;  
 ?bụ gụnu bẹ nemadzu  
 mmanụ sụru mu ememe?
- 5 Tekenteke bẹ ẹphe ewojeru  
 opfu mu gha igharaphu.  
 Iphe, bụkpoo iphe, ẹphe  
 arịkpo ariri bụepho  
 g'ẹphe eshi mee mu ẹjo-iphe.
- 6 Ẹphe dzukoberu bya  
 edomishia onwophẹ.  
 Mbụ l'ẹphe anọduje edo ọkpa  
 mu achọkpoepho ụzo,  
 ẹphe e-shi gbua mu.
- 7 ?Ẹphe e-gude eme ẹjo-ememe  
 ono nahụ tọo?  
 Jiko Chileke; gudenụ oke  
 ẹhu-eghu ngu chitsushia  
 ndu ono l'ophu.
- 8 Ị mawaru g'ọotsube mu l'ẹhu.  
 Ị mawaru gẹ mu kwashiberu  
 ẹnya-mini.  
 ?Tị tūkoduru iphemiphe ono  
 dekọta l'ẹkwo ngu?
- 9 Mu -rakuẹ ngu phọ bẹ ndu  
 ọhogu mu adakọbe  
 gbaphu azụ.  
 Ọphu doru mu ẹnya bụ lẹ Chileke  
 nọ l'ẹka iya nkemu.
- 10 Ọo Chileke ono, mu anọduje  
 aja opfu iya ajaja ono;  
 mbụ Chipfu ono,  
 mu anọduje aja opfu iya  
 ajaja ono;
- 11 Ọo Chileke ono bẹ mu dakoberu;

ophu ndzú agúdu mu;  
 ?bú gúnu bẹ nemadzú sùru  
 mu ememe?

12 Gùbe Chileke; iphe, mu rifuru  
 angú lẹ mu e-meru ngu  
 búkwa mu bẹ ọ  
 tukoru l'ishi.

Mu a-bya egweru

ngweja-ekele nù ngu;  
 13 noo kẹle ì nafutaru ndzú  
 mu l'ẹka ọnwu;  
 bya emekwaphọ gẹ mu  
 te vukota iphe daa iko.

Ọo ya bú gẹ mu azọo ije  
 l'iphu Chileke l'ẹka  
 ìphóró dùru ndu  
 nọ ndzú.

## Ebvú-oma 57

Ebvú-oma, Dévidi deru nù  
 onye-ishi ebvú; ishi ebvú iya  
 bú “Be mekwa gẹ mu laa l'iyi”

Teke o deru iya bú  
 teke ọ nahuru Sọlu gbala;  
 je anọdu l'ime ọgba

1 Gùbe Chileke; meeru mu  
 eze-iphe-oma!  
 Jiko meeru mu rọ eze-iphe-oma!  
 Kẹle ọo l'ẹka ngu bẹ mu nọ  
 ezeru ndzú.

Mu a-nọdu lẹ mkpula oke  
 òkù ngu ezeru ndzú;  
 jasú teke ẹjo-iphe-ẹhuka,  
 byaru mu nù-a  
 a-bvẹbe.

2 Mu araku Chileke;  
 mbú Ọkalibe-kakọta-shii;  
 mbú Chileke, atụkoje  
 iphemiphe mekọtaru

- mu.
- 3 Oo-gbẹ l'imigwe zia g'a bya  
 adzoo mu;  
 bya emeru iphere tu  
 ndu ono, achi mu  
 kpabekpabe ono.  
 Chileke e-goshi mu l'o yeru  
 mu obu; bya aburu  
 onye apfushije ike l'iphe,  
 o pfuru.
- 4 Mu no l'echilabo oduma;  
 mbu-a; mu zekwa  
 l'echilabo anu-egbudu,  
 ataje anu nemadzu.  
 Ndu ezé phe du g'arwa;  
 du g'apfu;  
 teme ire phe nodu atsü  
 nko g'ogu-echi.
- 5 Goshinu ndiphe gi paberu  
 eka; mbu li noghataru  
 akpaminigwe anoghata;  
 ge ndiphe l'ophu ahuma  
 gi du-be biribiri.
- 6 Epe geru ugbu kwaberu mu  
 l'uzo, mu eshi.  
 Oo ya bu; ehuru wushihue  
 mu pho arwushihu.  
 Epe gbeshi je ebua nsu dobe  
 mu l'ataphu.  
 Ope epe mecharu daba le  
 nsu obu l'onwophe.
- 7 Obu shihukwaru mu ike  
 Chileke;  
 k'ophu bu le mu e-gude  
 obu mu go ha agu ebvu  
 etu ngu epha.
- 8 Obu mu; tehu nwuru enya.  
 Unu tehu nwuru enya;  
 unube ogelenda yee une;  
 kele mbedua e-gudekwa  
 ebvu kutee geregere  
 nchi-abohu le mgbenya.

- 9 Mu a-nòdu l'echilabọ ndiphe  
kele ngu ekele  
gụbe Nnajiuphu.  
Mu anọdukwapọ l'echilabọ  
ọha l'ophu gụa ebvu  
gude tua ngu ẹpha.
- 10 Noo kele n-yemobu ngu  
parụ ẹka.  
Ọ tukuru imigwe l'ophu vọ  
pfurupfuru.  
Tẹme ire-lanụ nkengu dzuru  
akpaminigwe.
- 11 Goshinu ndiphe g'ị paberu ẹka;  
mbụ l'ị nọghataru  
akpaminigwe anọghata;  
gẹ ndiphe l'ophu ahụma g'ị  
dụ-be biribiri.

## Ebvú-oma 58

Ebvú-oma, Dévidi deru nù  
onye-ishi ebvu; ishi ebvu iya  
bụ “Be mekwa gẹ mu laa l'iyi”

- 1 Unubẹ ọgbo-ikpe;  
?ọ dụkporu-a teke opfu,  
pfuru ọto eshije unu  
l'onu futa?  
?Unu pfubejekporu-a ẹka  
oto kpee  
unwu-eliphe ikpe?
- 2 Waawakwa! Iphe, unu arije  
l'ime obu unu bụepho  
g'unu e-shi mee iphe,  
apfuduru-oto.  
Ọ bụru mkpawere bẹ unu  
anọduje eme unwu-eliphe.
- 3 Ndu ẹjo-iphe eshije lẹ teke  
ẹphe nọ l'ẹpho ne pẹ  
shiswee ụzo.  
Epe akpaphujuje lẹ teke a  
dụkwaduro ime pẹ.

- Adzụ ụka eshi phẹ ị dẹdede.  
 4 Ẹru, ẹphe atajẹ egbu egbugbu  
 g'ẹru ẹjo agwọ.  
 Ẹphe swọ-chishiru nchi ada  
 nkuchi g'oghu;  
 5 mbụ ogbu, ata anụedu opu,  
 onye rwaru iya ẹka l'iphu egbu;  
 gude epfuru iya opfu;  
 m'o betakpọ o gbua ya  
 k'ẹrengete igbu-agma.  
 6 Kpa a phẹ eze, nọ phẹ l'ọnu  
 jiko Chileke!  
 Jiko Chipfu; swoshinaa  
 oduma ono ẹpyii ono,  
 nọgbaa phẹ l'ọnu ono!  
 7 G'ẹphe tashihukwa g'ẹka  
 mini sọru sọghata.  
 Ẹphe -setaephọ uta phẹ kẹ  
 kikiiki g'ẹphe gbaa;  
 mekwaa g'apfụ phẹ buru  
 inyiribachi!  
 8 G'ẹphe dụ g'ẹji, rwubashihuru  
 erwubashihu.  
 G'ẹphe te egudekwa ẹnya  
 phẹ hụma ẹnyanwu gẹ nwata,  
 ne iya kworu ekwokwo.  
 9 K'ọphu bụ; ẹswa, a tsuberu  
 l'ite -bya eme g'ọku  
 ngaa ẹnishi ite ono;  
 Chileke egudewaa oke  
 ẹhu-eghu iya zikọta ite  
 ono g'oke pherephere;  
 m'o beta iphe, e shiberu l'ite  
 ono dukwadu oyi;  
 ọzoo l'ọobyawaa eghehu.  
 10 Ndu pfuberekoto bẹ ẹhu  
 a-tso uto;  
 m'ẹphe hụmaephọ ị  
 Chileke apfụwa ndu  
 ẹjo-iphe ugwo iphe-ẹji,  
 ẹphe meru;  
 mbụ m'ẹphe wataephọ azọ

ndu ejo-iphe pyaapya.

11 Oo ya bu; ndiphe epfuahaa su:

“Ndu pfuberekoto be obunggo  
dukwaru eviya;  
mbu lo kwa ire-lanu lo  
nweru Chileke, ekpeje  
eliphe-a ikpe!”

## Ebvu-oma 59

Ebvu-oma, Dévidi deru nu  
onye-ishi ebvu; ishi ebvu iya  
bu “Be mekwa ge mu laa l'iyi”

Teke o guru iya bu teke  
Solu yeru ndu nche, eje  
anodu eche ulo, o no  
nche g'e gbua ya

- 1 Nafuta mu l'eka ohogu mu;  
jiko Chileke mu!  
Gbaaru mu odzori l'iphu ndu  
wulihuru vupyaabe mu!
- 2 Nafuta mu l'eka ndu eme  
ejo-ememe!  
Dzoo mu l'eka ndu  
mgbugbumadzu!
- 3 Kele-a; gube Chipfu;  
lewaro l'ephe domishiru  
onwophe kwabe g'ephe  
gbua mu.  
Ndu nweru okpehu wulihuru  
etso mu opfu;  
ebe abu lo duru ekemu,  
ephe turu, mu mebyijeru;  
teme ophu o dudu g'ephe  
ha, mu tupaajeru.
- 4 Ephe gbaru je edozia onwophe  
g'ephe tsoo mu ogo;  
l'ebe adu iphe, mu meru phe.  
Jiko gbalihu; bya eyeru mu  
eka!



- Lēnaa ējo ɔnodu, mu nɔ!  
 5 Jiko Chipfu; mbu Chileke,  
     bu Ọkalibe-Kakota-Ike;  
     bya aburu Chileke ke  
     ndu Ịzurelu;  
     tehu etehu; je anua ohamoha,  
     bu le mgboko aphu!  
 Ba adukwa ndu ejo-iphe ono,  
     elekebeje enya eme iphe,  
     a-tsuru nwibe phe ono,  
     ji-phuru obu-imemini!
- 6 Ọobujeru; ephe -lwa  
     l'uzenyashi;  
     ephe aba hanyihanyi  
     ge nkuta; tsoru mkpukpu  
     ejephe.
- 7 Lewaro enya; ephe -saa onu  
     phe tua nko ge nkuta;  
     Ogu-echi eshi phe l'ire  
     ngushihu.  
     Ephe edobesuro lo to dudu  
     onye numaru iphe,  
     ephe epfu.
- 8 Ọlobuele-a ochi be gube  
     Chipfu achije phe.  
     Oo ochi be ohamoha ono  
     anoduje ezi ngu.
- 9 Oo gube Chileke bu agbarike  
     mu.  
     Mu chiru enya mu dzee l'eka  
     i no.  
     O buru l'ime ngu be mu  
     gbabarū je ezeeru ndzu.
- 10 Chileke, bu onye yeru mu  
     obu be a-gba mu ndzuta.  
     Chileke e-kwe ge mu gude  
     enya mu huma le  
     mekperu ndu ohogu  
     mu.
- 11 Be gbukwa phe egbugbu  
     gube Chipfu,  
     bu onye mgbobuta anyi!

Ọdumeka bẹ ndibe anyi  
a-zohakwa iya.

Gudechia ike nkengu  
chikashia phe!

Mee phe; mekpee phe!

12 Iphe, bukotakpoo opfu,  
eshije phe l'onu  
abujeerupho  
mkpokoro opfu.

Mbu l'opfu, eshije phe  
l'ogbogboromonu futa  
abukotajeerupho iphe-aji.

Teme ephe nodu egudeje onu  
phe adzu uka;  
bya egude iya atu nwibe  
phe onu.

Ọo ya bu; g'ekuku ono,  
ephe anoduje eku  
onwophe ono nmakwaa phe  
g'onya.

13 Gudenu oke ehu-eghu ngu  
mebyishia phe!

Mbu g'iimebyishia phe  
gbiriri jasụ teke ephe  
a-bvubebe!

Ọo ya bu g'unwu-eliphe  
l'ophu amaru l'oo Chileke bu  
Eze ndu Izurelu;  
teme l'ọ bu eze  
unwu-eliphe mgburugburu.

14 Ọobujeru; ephe -lwa  
l'uzenyashi;  
ephe aba hanyihanyi ge  
nkuta; tsoru  
mkpukpu ejephe.

15 Ephe anoduje awuphe acho  
eka ephe e-ri nri.

Ọ -buru l'ephe te erijiduru  
epho; ephe agboahaa  
ire ge nkuta.

16 Obenu le mbedua a-gu ebvu  
gude tua onu g'okpehu

ngu habe shii.  
 Ụtsu mbọku-mbọku bẹ mu agụje  
 ebvu ẹhu-ụtsò gude goshi  
 g'eye obu ngu habe.  
 Noo kele ọọ l'ime ngu bẹ mu  
 agbabajẹ je edomia  
 onwomu.  
 Tẹme ọ bụru ngu bẹ mu  
 agbabajẹ l'ime je ezeeru ndzụ;  
 mẹ mu nọdu eje iphe-ẹhuka.  
 17 Gụbe ike, dụ mu nụ;  
 mu a-gụ ebvu tua ngu ẹpha.  
 Noo kele ọọ l'ime gụbe  
 Chileke bụ onye yeru mu  
 obu bẹ mu gbabarụ je  
 edomia onwomu.

## Ebvú-oma 60

Ebvú-oma, Dévidi deru nụ  
 onye-ishi ebvú;  
 g'e gude olu ebvú,  
 “Ojimbvú Ogbandzú” gụa ya.

Teke o deru iya bụ teke ẹphe  
 lẹ ndu Arámu-Naharayimu  
 waa ndu Arámu-Zoba  
 Iwụru ọgu; mbụ teke ono,  
 Jiowabu Iwarụ bya etsoo  
 ndu Edọmu ọgu bya  
 Iwụ-kpee phez;  
 gbua ụnu ojọgu ụkporo l'iri  
 lẹ Nsụda Únú.

1 Gụbe Chileke; ị jikawaru  
 anyi woru anyi tũkaa  
 nanụ nanụ.  
 I shi avuru anyi ọvuma.  
 Ọle nta-a bẹ anyi arwọ ngu  
 sụ  
 g'i ghanaaru anyi iphu ọzo jiko.  
 2 Ọọ ngu meru eliphe;

- ọ nmaa jiiijiii;  
 bya emee ya;  
 ọ gbawashihu.  
 Nta-a bu g'i menaa g'eka  
 i mekaru iya iphe  
 kpochite;  
 kele ọongakwa anganga.
- 3 I hawaru ndibe ngu;  
 ephe jee iphe-ehuka;  
 bya echee anyi mee;  
 anyi nua akpo kulakula.
- 4 Obenu le ndu atsu ngu  
 ebvu be i nuru  
 ekwa-ohubama;  
 g'ephe chilia gude lwa  
 ugu k'okpobe opfu ono.
- 5 Gudenu okpehu ngu dzota  
 anyi; zanu anyi enu;  
 k'ophu ee-shi nno dzo  
 ndu i yeru obu.
- 6 Chileke nowaa l'ulo iya,  
 du no pfua opfu su:  
 "Mu e-gude agbo ogo  
 kewashia ali ndu Shekemu.  
 Temu mu eworu nsuda  
 Sukotu bushia.
- 7 Giladu bu nkemu;  
 Manase bukwarupho  
 nkemu.  
 Ifuremu bu okpu, mu  
 kpu l'ishi.  
 Jiuda bukwanuru  
 mgboro-eze, mu apaje  
 l'eka.
- 8 Mowabu bu ochi, mu akwoje  
 okpa.  
 O bukwanuru le Edomu be  
 mu eyeshije akpokpa  
 mu dobe.  
 Ndu Filisitayinu be mu  
 gbowaru ogo kpua."
- 9 ?Bu onye e-du mu chiriri

- werere duba lẹ mkpụkpu ono,  
 a kpuru kpụshia ike ono?  
 Mbụ-a; ?bụ onye e-duru mu  
 duba lẹ Edọmu?  
 10 Ọ kwa gụbedua Chileke bụ  
 onye ọbu.  
 Obenu l'ì gbẹ jìka anyi;  
 ọphu i tii tsojeeduru ndu  
 ojọgu anyi eje ọgu.  
 11 Yeru anyi ẹka jiko g'anyi  
 mekpee ndu ọhogu  
 anyi;  
 kele eye ẹka k'unwu-eliphe,  
 bụ iphe-mmanụ.  
 12 Obenu l'anyi -nọduwaa  
 Chileke l'ẹka bẹ anyi  
 e-mekpe phe gẹ mkparawa.  
 Ọ buru iya e-hu ndu ọhogu  
 anyi agbagba-nchị  
 l'alị.

## Ebvú-oma 61

**Ebvú, Dévidi deru nù  
 onye-ishi ebvú; g'a  
 kpọru unu ye iya**

- 1 Numanu mkpu, mu echi jiko  
 Chileke!  
 Ngabẹ nchị l'epfupfu, mu  
 epfu anụ ngu!  
 2 Mu nọ l'ẹka igwe beru  
 alị beru echiku ngu lẹ  
 mkpu.  
 Noo kele meji atọfu mu atọfu.  
 Dunuru mu je edobe l'oke  
 mkpuma, ka mu l'eli!  
 3 Kele ọo ngu bẹ mu gbabarụ  
 l'ime ngu je edomia  
 onwomu;  
 bya abụkwaru ngu phọ  
 bụ ọlo-mgbobuta,

- mu bahuru shi nno  
nahú ndu ohogu mu.
- 4 Oogukwa mu egu ge mu buru  
l'ibe ngu jasú l'ojejoje;  
mbú ge mu ndujewaro le  
mkpula eze nkú ngu  
ezeru ndzú.
- 5 Kele gube Chileke numawaru  
iphe, mu rifuru angú  
le mu e-meru ngu.  
I mewaru ge mu tsoru ndu  
akwabe epha ngu úbvù;  
keta iphe-oma, iimejeru  
phe.
- 6 Menaa g'eze ndu ndzú  
ogologo!  
G'apha, oo-no l'eliphe-a shinu  
l'ogbo sweru ogbo!
- 7 G'aba-eze iya ndunu l'atatiphu  
Chileke jasú l'ojejoje!  
Jiko g'iphe, ii-gude eche  
iya nche bukwaru  
n-yemobu ngu;  
yee apfushi ike,  
iipfushije l'iphe,  
i pfuru.
- 8 Oo ya bu ge mu agua ebvu  
gude tua ngu epha  
jasú l'ojejoje;  
bya emeebekota iphemiphe,  
mu rifuru angú  
ememe mboku-mboku.

## Ebvú-oma 62

Ebvú-oma, Dévidi deru nu  
onye-ishi ebvu, bu Jiedutunu

- 1 Oo epho Chileke kpoloko be  
mu daru ngaberu.  
Kele oo ya bu onye a-dzota  
mu nu.

- 2 Oo yẹbedua nwẹkiya bẹ bu  
 agbara-mkpuma nkemu;  
 bya aburu iya bu Chileke,  
 adzoje mu nu;  
 bya aburu onye mu  
 agbabajẹ l'ime iya  
 l'oodomia mu.
- Oo ya bu l'ọ tọ dudu onye  
 byaru l'enwubata mu  
 enwubata.
- 3 ?Bụ teke ole bẹ unu  
 e-tsuberu nwoke  
 ọwa-a otsukputu?  
 G'unu hakọta bẹ e-mechaa  
 tuko buru mkpurupyata;  
 g'ẹka igbulọ;  
 ọzoo mgbabu zeru  
 tu-gbushia ndu nọ  
 phẹ l'ime.
- 4 Iphe, unu shiberu ite iya bu  
 g'unu nwufu iya l'aba-eze  
 iya ono.  
 Adzụ ụka nọdu atso unu  
 ntumatu.  
 Unu nọdu egudeje  
 ogbogboromonu unu  
 agoru nwibe unu  
 onu-oma.  
 Obenu l'ime obu unu bẹ unu  
 anọduje atụ phẹ ẹjo onu.
- 5 Gube obu mu; nọdukwa  
 kwaberu Chileke  
 nwẹkiya.  
 Kele ọo ya bu onye mu ele  
 ẹnya l'ẹka kpoloko.
- 6 Oo yẹbedua nwẹkiya bẹ  
 bu agbara-mkpuma  
 nkemu;  
 bya aburu iya bu Chileke,  
 adzoje mu nu;  
 bya aburu onye mu agbabajẹ  
 l'ime iya l'o domia mu.

Ọo ya bụ l'ọ tọ dudu onye  
byaru l'enwubata mu  
enwubata.

7 L'aa-dzota mu bụ l'eka  
Chileke bẹ ọ nọ.

L'aa-kwabẹ mu ùbvù  
bụkwaru iya phọ bẹ ọ  
nọ l'eka.

Ọo Chileke bụ eze  
agbara-mkpuma mu;  
tẹme ọ bụkwaru iya phọ  
bẹ mu nọ l'eka ezeru ndzụ.

8 Unu dakobe iya tekenteke  
kpoo unubẹ unwu-eliphe!  
Unu woru obu unu gheberu  
iya onu.

L'ọ kwa Chileke bụ onye anyi  
nọ l'ime iya ezeru ndzụ.

9 Amadu bụ udzu-onu.  
Ohu buru iphe, adudu iphe,  
ọ bụ.

Ọ -buru g'atua erva phe  
l'iphe, e gudeje tua  
erva nemadzụ bẹ ephe  
tuko buru iphe-iphoro.

10 Unu ta akpokwaru obu ye  
l'eme ndu ozo ewere!  
Ophe unu egudekwa ana nfu  
eku onwunu!

O betakponu eku nodu  
abyaru unu  
nyimunyimu;  
unu ta akpokwaru obu  
ye iya!

11 Chileke pfuakwaru iphe-a  
mgbo lanu.

Mbedua numawa iya  
ugbo labo;  
mbu l'ikemike bu Chileke  
nwekota iya.

12 Teme l'ọo gube Nnajiuphu bẹ  
n-yemobu kuru ishi l'eka.



Noo kele iipfufe onyemonye  
 ugwo g'iphe,  
 o meru gbaru.

## Ebvu-oma 63

Ebvu-oma, Dévidi deru  
 teke o nọ l'echiegu Jiuda

- 1 Gube Chileke; oọ ngu bu  
 Chileke mu!  
 Oo ngu bu onye mu anọduje  
 ele enya iya eswe  
 l'enyashi.  
 Ekpiri gube Chileke  
 anọduje akpo  
 obu mu jegirijegiri.  
 Oghoroko ngu aduje  
 mu l'echiegu;  
 mbu l'alị okponku,  
 mini adudu.
- 2 Mu humawaru g'ike du-be  
 ngu; yee g'i du-be  
 akpabiri;  
 ge mu shi ahumaje iya l'ulo  
 ngu, du nsọ.
- 3 Mu e-gude onu mu jaa ngu  
 ajaja;  
 noo kele n-yemobu ngu ka  
 ndzu ree.
- 4 Mu a-nọduje ekele ngu ekele  
 jasụ ge mu a-nọ-beru.  
 Teme o buru epha ngu be mu  
 e-gudeje chilia eka  
 imeli pfuru nu ngu.
- 5 Obu mu be epho e-ji g'onye  
 riru nri, e gude eba-anu;  
 waa umi okpu iya shia.  
 Onu mu e-gudekwanu  
 ebvu ehu-utso,  
 du mu l'ogbogboromonu  
 tua ngu epha.

- 6 Ọobujeru; mu -zẹe l'iphe-azẹe  
mu; mu anyata ngu.  
Enyashi l'ophu bẹ mu  
arịkotaje kẹ nkengu.
- 7 Mu nọ lẹ mkpula oke ñkù  
ngu agụ ebvu ẹhu-utso.  
Noo kẹle ọo ngu bụ onye  
eyejeru mu ẹka.
- 8 Mu anọduje ngu ntse  
tekenteke.  
Ọ bụru ẹkutara ngu bẹ  
gudeshi mu nụ.
- 9 Ndu achọ ọzo, ẹphe e-shi  
gbua mu mebyishia  
ndzụ mu  
bẹ aa-chịru ye l'alị-maa.
- 10 Ee-gude ogu-echi gbua phẹ  
pyaapyaa.  
Ephe aburu nri, a kpataru  
doberu nkuta-ọswa.
- 11 Obenu lẹ Chileke e-me g'ẹhu  
tsọo eze utso.  
Iphe, bukpuo ndu egudeje  
ẹpha Chileke eri angu  
bẹ e-tu iya ẹpha.  
Ọnu ndu ntuphu-ire aburu  
phẹ kpurukudukuu.

## Ebvu-oma 64

Ebvu-oma, Dévidi deru  
nụ onye-ishi ebvu

- 1 Jiko Chileke; numanu mkpu,  
mu echi ẹka mu epfu anụ ngu!  
Gbochite mu gẹ mu ta  
nọduhe atsụ ndu ọhogu  
mu ebvu.
- 2 Domia mu g'ẹjo-idzu,  
ndu ẹjo-iphe achịru mu te erwu  
mu l'ẹhu; mbụ hanyịhanyi,  
ẹphe aba ekpu mu;

- mbụ ndu eme ẹjo-ememe.  
 3 Ndu abajẹ ire phẹ g'onye abama.  
 Mbụ ndu anọduje agba njo  
 opfu phẹ g'onye agba apfu.  
 4 Ẹphe edomije onwophe  
 kwaberu onye dube ree.  
 Onye ono -bya amaru;  
 apfu abụwaru iya nū  
 l'ehu kẹ pfuu.  
 O to nwedu iphe, ndzụ iya  
 agụ phẹ mẹ nanu.  
 5 Ẹphe anọduje eyeru nwibe  
 phẹ ọkpu-ikike g'ẹphe  
 kebe ẹhu l'eme iphe-ẹji.  
 Ẹphe epfujẹ sụ l'ẹphe e-je  
 agbakacha ọnyà phẹ  
 lẹ mpya.  
 Ẹphe pfuchaa nno; ẹphe asụ:  
 “?Bụkwanu onye abya  
 phẹ ahuma?”  
 6 Ọo ya bụ; ẹphe -chichaa  
 ẹjo-idzu; ẹphe asụ:  
 “Idzu, anyi chiru nta-a  
 dukpoo ree dụ-ghee  
 ya adu-ghe!”  
 Uche amadu yee obu iya be  
 eregede pakwaru ẹka.  
 7 Obenu lẹ Chileke e-seta apfu;  
 ẹphe -bya amaru be ọ-gbakata  
 phẹ tua l'alị.  
 8 Chileke e-me g'ẹphe vukota  
 abalị dagbua ọchii.  
 Ọ buru iphe, opfu onu  
 phẹ kpataru.  
 Iphe, bukpuo ndu humaru  
 iya nū be e-kwe l'ishi  
 gude kweru phẹ une.  
 9 Ndzụ e-rwuta amadu l'ophu.  
 Ẹphe e-pfukashia iphe ono,  
 Chileke meru ono;  
 bya ebvuru shii rịa ya ọriri.

10 G'ehu tsoo ndu pfuberekoto  
 utso l'ime Chipfu!  
 G'ephe gbabakwa l'ime iya je  
 domia onwophe!  
 G'iphe, bukpoobu ndu obu phe  
 guru iphoro tukwaa  
 ya epha!

## Ebvu-oma 65

Ebvu-oma, Dévidi deru  
 nu onye-ishi ebvu

- 1 Gube Chileke; o du ree g'anyi  
 nodu le Zayonu tua  
 ngu epha!  
 Anyi e-medzukotaru ngu iphe,  
 anyi riburu ngu  
 l'anyi e-meru ngu.
- 2 Oo gube onye ono, azaje oku  
 m'e pfuru nu ngu be  
 onyemonye a-wu-pfuta.
- 3 Teke iphe-eji shi kapyabe anyi  
 be i shiele-a anoduje  
 aguru anyi nu l'ejo-iphe  
 anyi.
- 4 Ehu-utso be a goru nu onye  
 ono, i hotaru dokube  
 onwongu  
 Ge gu l'iya nodu l'ibe ngu.  
 Iphe, du ree, no l'ibe ngu  
 ejije anyi epho;  
 mbu iphe, du ree,  
 no leze-ulo ngu, du nsu.
- 5 Gube Chileke, bu onye  
 ndzota anyi;  
 iphe, iigudeje zaa anyi enu  
 bu iphe, du ebvu,  
 egoshi apfubekoto nkengu.  
 Ndu bu l'eka igwe beru ali  
 beru;  
 waa ndu bu le mgboru enyimu,

- kachakpọ anọdu ẹnya bu  
 ngu bẹ ẹphe tuko chiru  
 upfu kwẹe;
- 6 mbu gube onye bu okpehu  
 ngu bẹ i gude mee úbvú;  
 ẹphe nguchaaru anguru  
 l'eka ẹphe nọgbaa.
- I keru onwongu okpehu  
 g'onye keru akpo l'upfu.
- 7 Ẹnyimu, aso gborogboro  
 bẹ iimeje l'oderu yekete;  
 mbu l'ootu-buhu akpara.
- Ọhamoha -nọdu aba hanyihanyi  
 bẹ iimeje;  
 ẹphe adaa ke  
 nyonyoronyo.
- 8 Ndu bu ụzenya bẹ anọduje  
 anma pyaapyaapya  
 M'ẹphe numa k'iphe,  
 du biribiri, imegbabe.
- Ndu shi l'uzo ẹnyanwu-awawa;  
 waa ndu uzu ẹnyanwu-ariba  
 bẹ iimeje g'ẹphe tua uzu-ẹhu-utso.
- 9 I gbaru mini l'eliphe teke i  
 byaru iya agbaphe;  
 shi nno mee ya;  
 o buru ali oma.
- Ẹnyimu nkengu bẹ i meru ge  
 mini ji ejiji.
- Ndiphe l'ophu bẹ i meru g'iphe,  
 ẹphe koberu l'ali nọdu emehuru;  
 kele o o egube ono bẹ i  
 meru iya g'o du.
- 10 Mini bẹ i dzeru;  
 o doru adoru l'enyoru.
- I bya alwaa yegeyege  
 mini gude mee igbo;  
 o du nwuhanwuha;  
 shi nno goru onu-oma nu iya  
 mee iphe, a koberu iya  
 wata efushi.
- 11 I bya eworu aka-atutu

nkengu kpube apha  
g'okpu-eze.

Teme iphe, bukpooy uto,  
i shiru be i dzeru iphe,  
du ree ge mini.

12 Eswa bya erwushia  
nodugbaa ke nyimunyimu  
lechiegu.

Teme ehuyutso derupho ke  
nyimunyimu l'ubvu.

13 Eka eecheje iphe-edobe  
be aturu kuru ata nri.  
Nsuda bu iphe, jiru iya nu  
bu iphe-akuku,  
a kuru iya.

Iphemiphe ono tukoru akwa  
evu; agu ebvu ehuyutso.

## Ebvu-oma 66

### Ebvu-oma, e deru nu onye-ishi ebvu

1 Unu tua uzu ehuyutso gude jaa  
Chileke;

unube unwu-eliphe l'ophu!

2 Unu gua ebvu gude kutsee  
epha iya!

Unu etua ya epha; jaa ya  
ajaja!

3 Unu su Chileke: "Ha!  
Iphemiphe, inoduje  
eme dukwa ebvu!

Ike ngu paru eka k'ophu bu le  
ndu ohogu ngu adaje  
kpurumu l'iphu ngu;  
eka ndzu agu phe.

4 Ndiphe mgburugburu adaje  
kpurumu l'iphu ngu baaru  
ngu eja; gua ebvu nu ngu;  
mbu l'ephe aguje ebvu  
gude kutsee epha ngu."

- 5 Unu byanũ ahũma ozi,  
Chileke jeru!  
Chileke dukwa ebvu l'iphe,  
oomeru unwu-eliphe.
- 6 Onye meru enyimu;  
o buru ali, kpohuru nku.  
Epe gude okpa ghaa enyimu  
ono.  
Ehu-utso ozi, o jeru tsoru  
anyi teke anyi no l'eka ono.
- 7 O gude ike okpu nkiya buru  
eze ojeje.  
Enya iya nodu ahumakotaje  
ohamoha!  
Oo ya bu go to dukwa ndu  
ejo okpoma ono l'e-je  
iya atupya!
- 8 Unu tua Chileke anyi epha;  
unube unwu-eliphe!  
G'a numanu ajaja, unu a-ja iya!
- 9 Loo ya doberu anyi ndzu;  
bya emee g'okpa nguru  
anyi anguru g'o to chifu.
- 10 Noo kele gube Chileke  
huwaru anyi ama;  
bya emee anyi; anyi du ree  
ge mkpola-ochaa, a huru l'oku.
- 11 I dutaru anyi duru ye  
l'onyà;  
bya eworu oke ivu tukobe  
anyi l'okpurukpu.
- 12 I meru g'unwu-eliphe wee  
anyi ishi kperekpere.  
Anyi jeru iphe, anwu chiru anyi;  
mini nmaa anyi.  
Ole i mechaaru duta anyi bya  
edobe l'eka anyi tusaru ehu.
- 13 Mu e-gude  
ngweja-akpo-oku je  
l'ulo ngu.  
Mu emedzukotaru ngu iphe,  
mu rifuru angu le mu

- e-meru ngu.
- 14 Mbụ iphe, mu gude  
ogbogboromonu mu kweta;  
bya egude onu mu pfua  
le mu e-meru ngu;  
teke mu eje iphe-ehuka.
- 15 Mu a-kputa ebili, tsuru eba  
je egude gweeru ngu  
ngweja-akpo-oku.  
Mu egbuaru ngu oke-eswi;  
gbushiaru ngu eghu.
- 16 Unu byakpodapho bya  
angabe nchi; iphe,  
bukpoo unube ndu atsu  
Chileke ebvu;  
ge mu kooru unu iphe, o  
meru le ndzu mu.
- 17 Mu gude onu mu owa-a  
raku iya.  
Mu gude ire mu tua ya epha.
- 18 Ome mu meru iphe-eji kwachia  
l'obu mu;  
me Nnajiuphu tege  
angabekwa nchi anuma  
olu mu.
- 19 Obenu le Chileke ngaberu nchi;  
numa olu mu okpobe anuma  
teke mu epfu anu iya.
- 20 Ge tukwaa Chileke epha;  
mbu onye ajikaduru  
angabe nchi numa epfufu,  
mu epfu anu iya;  
teme ophu o haduru egoshi  
le ya yeru mu obu.

## Ebvu-oma 67

Ebvu-oma, e deru onye-ishi  
ebvu; g'a kporu une ye iya

- 1 Ge Chileke meeru anyi  
eze-iphe-oma;



- goru onu-oma nu anyi;  
mekwapho g'iphu tushu  
iya l'ehu anyi.
- 2 K'ophu unwu-eliphe a-maru  
uzo ngu;  
teme ohamoha  
amakwarupho  
l'idzotaje nemadzu.
- 3 G'unwu-eliphe kelenu gube  
Chileke ekele!  
G'iphe, bukpo nemadzu  
mgburugburu kele ngu ekele!
- 4 G'ehu tsonaa ohamoha utso;  
g'ephe tunaa uzu  
ehu-utso!  
Kele ndiphe l'ophu be iikpeje  
ikpe, pfuru oto;  
teme o buru ngu anoduje  
akpo-ziru ohamoha,  
no l'eliphe uzu.
- 5 G'unwu-eliphe kelekwa gube  
Chileke ekele!  
G'iphe, bukpo nemadzu  
mgburugburu kele ngu ekele!
- 6 Oo ya bu; g'iphe, a koberu l'ali  
emehukwanu emehu.  
Teme Nnajiuphu, bu Chileke  
anyi ono agoru onu-oma nu anyi.
- 7 Chileke a-goru onu-oma nkiya  
ono nu anyi.  
Oo ya bu ge ndiphe l'ophu  
jasu l'eka igwe beru  
ali beru awatakwanu  
iya atsu ebvu!

## Ebvu-oma 68

Ebvu-oma, Dévidi deru  
nu onye-ishi ebvu

- 1 Ge Chileke zilihu;  
ge ndu ohogu iya agbaa

- nanu nanu!  
 Ge ndu o du ashị shikwa iya  
 pho l'iphu gbalachaa!
- 2 Zikashinaa phe nanu nanu;  
 ge pherephere ezikashije  
 enwuru-oku-a.  
 Oo g'unwu adazehuje le  
 mgboru oku-a  
 bu ge ndu ejo-iphe a-la liyi  
 l'iphu Chileke.
- 3 Obenu le ndu pfuberekoto be  
 ehu a-tso utso.  
 Epe a-nodu ete eswa l'iphu  
 Chileke.  
 Epe egude ehu-utso tee eswa  
 teshia ya ike.
- 4 Unu gu ebvu nu Chileke;  
 gu ebvu gude tua ya  
 epha!  
 Unu kutsee onye ono,  
 anoduje l'ugbo-inya  
 iya agba l'urwukpu  
 onoya.  
 Epha iya bu Chipfu;  
 unu nodukwa iya l'iphu  
 tee eswa.
- 5 Chileke no l'ibe iya,  
 du nso buru Nna ndu  
 enwedu nna;  
 bya aburu onye agbajeru  
 unwanyi,  
 ji phe anodedu odzori.
- 6 Chileke ewojeru ndu bu  
 nkinyi doo l'ipfu l'ipfu;  
 teme o nodu edufutaje  
 ndu a turu mkporo  
 l'ulo-mkporo.  
 Obenu le ndu kwefuru iya  
 ike bu l'ali,  
 ejo anwu echi be epe  
 bu.
- 7 Gube Chileke;

- teke ì gbeshiru duta ndu  
nkengu;  
duru phẹ ghaa ali,  
dabyiru mgbegere;
- 8 bẹ ali nmaru jiiijiii.  
Igwe bya edzee mini l'iphu  
gube Chileke, bu onye  
ke Sayinayi;  
mbu gube Chileke ke  
Ízurelu.
- 9 Gube Chileke;  
o ngu dzeru ogbodogo  
mini;  
gude gbaa ali-ihe ngu  
unme teke ike bvuru  
iya.
- 10 Ndibe ngu bya alaa l'ime iya  
je eburu;  
teme i shi l'ikpoto iphe,  
i nweru nu ndu ukpa iphe,  
mkpa iya duru phẹ.
- 11 O bu-a epfufu,  
Chipfu pfuru opfu obu;  
a du igwerigwe mee g'a  
madzuru iphe,  
o pfuru.
- 12 O suru: "Ndu eze me ndu ojogu  
unu mee egwegwa  
gude oso gbafu!"  
Unwanyi, kuru l'unuphu;  
wufuta bya ekee iphe,  
a kwataru l'okwata.
- 13 Ndu ono shi zeshia l'odu  
aturu du ge ndo,  
a wukotaru nkù iya  
mkpola-ochaa;  
bya egude mkpola-ododo  
mekota eba iya;  
o nodu egbu nwiiinwii.
- 14 Teke  
Okalibe-kangokotaru-nu  
chikashiru ndu eze

l'ali ono  
 be o dūepho  
 g'aka-mini-sunoo,  
 dashiru l'eli úbvú  
 Zalūmonu.

15 Úbvú úbvú, nōgbaa le  
 Beshanu buḡbaa oke úbvú,  
 paru eka;  
 mbu l'úbvú Beshanu bu  
 úbvú, nwegbaarū mpfukashi.

16 Unube eze úbvú,  
 nwegbaarū mpfukashi;  
 ?Denu g'o nwuru unu  
 ejiru úbvú Chileke  
 ijiyena?  
 Mbu úbvú ono, Chipfu,  
 bu Chileke hotaru  
 je eburu buru eze ndibe  
 iya jasū l'ojejeje ono.

17 Uḡbo-inya ke Chileke bukwa  
 unu-kuru-unu.  
 Nnajiuphu shi le Sayinayi  
 bya ibe iya;  
 eka o doberu nsō,  
 bu úbvú Zayonu.

18 Teke ono, i gbeshiru lashia  
 l'ephekerephe ono be i  
 dutaru igwerigwe ndu  
 i kpuru le ndzu lashia.  
 Ndiphe gweru iphe nu ngu ke  
 mmanu;  
 mbu je akpachaa le ndu  
 shi anoduje ekwefuru  
 ngu ike;  
 k'ophu gube Chipfu,  
 bu Chileke a-nodu  
 l'echilabo phe.

19 G'ajaja buru ke Nnajiuphu;  
 mbu Chileke ophu bu onye  
 ndzota anyi;  
 bya aburu onye evutaje  
 ivu ehu anyi vuru

- mboku-mboku.  
 20 Chileke anyi bu Chileke,  
 adzoje ndzu.  
 O buru l'eka Chipfu,  
 bu Nnajiuphu ono be  
 eeshije nahu anwuhu.
- 21 Chileke e-chikposhi ndu  
 ohogu iya ishi;  
 mbu okpokoro ishi ndu  
 emekwadu ejo-ememe.
- 22 Nnajiuphu sɔru: "Mu e-shi  
 le Beshanu duta unu  
 duphuta azu.  
 Mu e-je l'ohu eze-enyimu je  
 aguta unu gude lwa;
- 23 k'ophu unu a-bya azoo  
 ndu ohogu unu  
 pyakapyaka.  
 Nkuta unu eketakwapho oke  
 ophu rwuberu phe nu."
- 24 Gube Chileke;  
 onyemonye gbewaa nta-a  
 huma ge ndibe ngu dzeberu  
 awu alwa;  
 mbu le ndibe Chileke,  
 bu eze mu dzebewaru  
 awu ala l'ulo iya,  
 du nsɔ.
- 25 Ndu no l'iphu bu ndu aguru  
 phe ebvu.  
 Ndu etso ndu k'ono buru ndu  
 akpo une eye iya.  
 Akatikpo unwumboko,  
 nodu akukwapho nkwa  
 etso phe.
- 26 Janaa Chileke ajaja  
 ledzudzu-oha!  
 Jaa Chipfu ajaja lechi  
 eka ndu izurelu  
 dzukoberu!
- 27 Su-a; ndu edu phe nu bu  
 okpa-ipfu Benjaminu,

bú ọkpa-ipfu kẹ nwata.  
 Ndu-ishi ọkpa-ipfu Jiuda;  
 waa kẹ Zebulunú;  
 waa kẹ Nafutali ọdu  
 eze gbiigbiigbi  
 etso pẹ.

28 Gube Chileke;  
 ruktanu ike ngu!  
 Goshinu anyi ọkpehu  
 ngu Chileke;  
 mbú ike ono, i shi  
 gudehawaa ree ire l'opfu  
 ẹhu anyi ono.

29 Ndu eze e-gude k'eze-ulo ngu,  
 ọ lẹ Jierusalemú bya  
 emeeru ngu iphe-oma.

30 Baarú ẹjo-oke-agiyi ono,  
 ọ l'ẹ̀jì ono mba;  
 mbú ọha ono,  
 achì ndiphe kpabẹkpabe  
 g'oke-eswi,  
 eme ẹna achì nweswi  
 ọso ono;  
 jasú teke onyemonye  
 ewoze onwiya alì;  
 gude mkpọla-ọchaa  
 bya l'iphu ngu.

Chikashia ndu ono,  
 alwú ọgu anọduje  
 agú g'ẹgu-nri ono!

31 Ndu-ishi Ijiputu;  
 waa ndu Kushi bẹ a-bya  
 achì-liaru Chileke ẹka.

32 Unu gụa ebvú nù Chileke;  
 unubẹ alì-eze  
 unwu-eliphe l'ophu!  
 Unu gụa ebvú gude tua  
 Nnajiuphu ẹpha!

33 Unu gụa ya nù onye ono,  
 anọduje l'ugbo-inya  
 iya agba l'ephekerephe  
 urwukpu ichée ono;

- mbü onye egudeje  
 oke olu tũa egbigwe.
- 34 Unu tũa onu g'ike Chileke  
 habe shii;  
 mbü onye akpabiri iya  
 tũkoru Ízurelu sweta;  
 onye bũ akpaminigwe  
 egoshi g'ike iya habe shii.
- 35 Gũbe Chileke;  
 ì dũ ebvü l'ũlo ngu,  
 dũ nsọ.  
 Oo gũbe Chileke ndu Ízurelu  
 emeje g'ike dũ ndibe ngu;  
 ọkphehu adũ phẹ.  
 G'ajaja bũru kẹ Chileke!

## Ebvü-oma 69

Ebvü, Dévidi deru nũ  
 onye-ishi ebvü; g'e gude olu  
 ebvü, "Ojimbvü" gũa ya

- 1 Dzọo mu jiko Chileke;  
 kele mini wọwaru mu  
 l'ẹkpiri.
- 2 Mu emiwa emimi emiba  
 l'ẹpuchi;  
 ẹka adũdu iphe, kọbe nvọ,  
 dũ iya nũ.  
 Mu darwuwaru ọhu-mini;  
 utso woru mu ria.
- 3 Mu chiwaru mkpu chita ike  
 mu.  
 Ẹkpiri gowaa mu agogo.  
 Teme mu nọdu aphuwaa  
 ragaraga;  
 ẹka mu nọ ele ẹnya  
 Chileke mu.
- 4 Ndu mu dũ ashị l'ẹbe adũ  
 iphe,  
 mu meru phẹ kakwa  
 ẹgbushi,

- nọ mu l'ishi igwerigwe.  
 Mbụ ịe ndu ọhogu mu  
 pakpọoru igwerigwe;  
 mbụ ndu anọduje achọ ụzo,  
 ẹphe e-shi mebyishia mu;  
 l'ẹbe ọ dūkpoo iphe,  
 mu meru phe.  
 Ẹphe ekebutaję mu;  
 mu apfua ụgwọ iphe,  
 mu ezitaduru.
- 5 Gụbe Chileke;  
 i mawaru gę mu shi  
 emeberu eswe;  
 ọphu ọ dudu iphe-ẹji mu  
 ọphu eemeru ngu ịe mpya.
- 6 Gụbe Nnajiuphu, bụ Chipfu;  
 bya aburu Ọkalibe-Kakọta-Ike;  
 te ekwekwa g'e gude iswi  
 ẹhu mu mee ndu ele ẹnya  
 ngu iphe-iphere!  
 Ọphu i kwekwa g'e gude  
 iswi ẹhu mu meru iphere  
 kpua ndu achọ ngu nụ;  
 jiko Chileke kę Ịzurelu!
- 7 Kęle ọọ l'iswi ẹhu ngu bę e  
 gude ekweru mu une;  
 bya eme iphe-iphere  
 ekpu mu.
- 8 Ndibe anyi bę mu dụwaa gę mu  
 bụ onye byaru abyabya;  
 mbụ unwune mu gędegede  
 gụbe mu onye ọhozo.
- 9 Kęle obu, mu yeru ọlo ngu  
 rimiwaru mu ishi.  
 Iphe, bụkpoo une,  
 e kweru ngu bụru mbędua  
 vutaru ọnwu iya.
- 10 Mu rarụ ẹkwa swia ẹgu  
 l'iphu Chileke.  
 Iphe ono tükochaa bụru iphe,  
 ẹphe gude kweru  
 mu une.



- 11 Mu yee uwe-aphu;  
 ẹphe gude iya gūharu  
 mu ebvu.
- 12 Ndu ɔru l'onu-abata  
 nɔdu eɸfuru mu.  
 Mu buru onye ndu angu  
 mee gude agu ebvu-mee.
- 13 Oe ɔo gube Chipfu be  
 mu anɔduje eɸfu anu.  
 Gube Chileke;  
 gude n-yemobu ngu  
 ono zakpoe mu pho enu  
 teke du ngu ree;  
 bya adzo mu  
 okpobe adzozo.
- 14 Lofuta mu l'epuchi;  
 bekwekwa g'o ria mu!  
 Nafutanu mu l'eka ndu mu  
 du ashu!  
 Bya agufuta mu l'echi  
 ogbumini ono!
- 15 Bekwekwa g'utso ria mu!  
 Bekwekwa ge mu darwua  
 ohu-mini!  
 Ophu iikwekwa g'e lia mu  
 le ndu!
- 16 Zanu mu enu gube Chipfu;  
 kele n-yemobu ngu  
 du ree.  
 Ghanaaru mu iphu Chileke;  
 kele i phunukaru  
 obu-imemini.
- 17 Be domikwaru mube onye  
 ejeru ngu ozi iphu!  
 Zanu mu enu egwegwa;  
 kele mu eje iphe-ehuka.
- 18 Kpiritanuru ntse bya  
 adzo mu!  
 Gbafuta mu ro m'obvu ndu  
 mu l'ephe du l'opfu!
- 19 I mawaru g'ephe kweberu  
 mu une;

- bya amakwarupho g'ephe  
meberu mu iphe-iphere  
kparu.  
Ndu bu ohogu mu be  
i makotanuru-a.
- 20 E kwekwaru mu une jasu  
okpoma wahuahaa  
mu awahu.  
Nta-a be o mewaru mu;  
ophu ike aduedu mu.  
Mu leru enya onye a-phuru  
mu obu-imemini;  
ophu o dudu.  
Mu bya elee enya onye a-du  
mu obu;  
ophu o dudu onye  
mu humaru.
- 21 Ephe wotaru mu iphe,  
egbu egbugbu ge mu ria  
g'o buru mu nri;  
bya edoberu mu mee-veniga  
ge mu nguru ye iya.
- 22 Mekwaa ge nri,  
ephe doberu l'iphu phe  
buru igbudu tupyabe phe.  
G'anu, ephe gburu gude  
gwaa Chileke bukwaru  
onyà nmata phe.
- 23 G'enya gbahukwa phe ochii  
g'ephe phu-buhu uzo.  
G'okwebe nyajikwaa phe ebo;  
g'ephe nyaa mgbaku  
jasu l'ojejoje.
- 24 Tukoshinu phe ehu-eghu ngu!  
Gudenu oke ehu-eghu ngu  
kpegbushia phe!
- 25 G'ibe phe bukwaru ochobu.  
G'o to dukwa onye e-buru  
l'eka ephe  
kwaru unuphu.
- 26 Kele ndu ephe anoduje akpa  
ehu bu ndu i chiru echachi.

- Teme o buru ndu i mekaru  
 iphe be epe  
 anodujekwapho  
 epfubyishi.
- 27 Haa phe g'ephe mebaa  
 ejo-iphe yekobe l'ophu  
 epe mewaru;  
 ophu i kwekwa g'ephe keta  
 oke l'apfubekoto nkengu.
- 28 G'e hufukwa epha phe l'ekwo,  
 e deru epha ndu no ndzu.  
 Ophu e dekwa epha phe  
 l'eka e deru epha  
 ndu pfuberekoto.
- 29 Mu daru ukpa;  
 teme aphu tsube mu onu.  
 Gube Chileke;  
 ge ndzota nkengu  
 dobenu mu l'eka ta adudu  
 iphe,  
 e-me mu nu.
- 30 Oo ya bu ge mu agua ebvu  
 gude tua Chileke epha.  
 Teme mu egude ebvu-ekele  
 kutsee ya  
 okpobe ekutsee.
- 31 Ono be a-ka Chileke atso  
 utso eme l'a turu iya eswi;  
 ozoo l'a turu iya oke-eswi,  
 mpu iya hagbaa ke  
 phengara phengara;  
 teme upyi okpa  
 pheshihuchaa  
 ya epheshihu.
- 32 Ndu wozeru onwophe ali  
 humae ya pho;  
 ehu atso phe utso.  
 G'obu unube ndu acho  
 Chileke nodukwa ndzu!
- 33 Chipfu anumaje olu ndu  
 adudu g'o du phe.  
 Teme ndibe iya,

- a tūru mkpōro bẹ ọ  
tōo gbakūtajedu azū.
- 34 Gẹ ndu bu l'imigwe  
yẹe unwu-eliphe tua  
ya epha!  
G'enyimu yẹe iphe bu l'ime  
iya tūkokwapho tua  
ya epha!
- 35 Kẹle Chileke a-dzọ Zayonu;  
bya akpūkwa a mkpūkpu,  
nọ lẹ Jiuda.  
Ndiphe alaa ya je eburu mee  
ya l'oo-buru iphe pẹ.
- 36 Unwu ndu ejeru iya ozi emee  
ya l'oo-buru okiphe pẹ.  
Iphe, bukpo o ndu yeru epha  
iya obu bẹ e-buru  
l'alì ono.

## Ebvu-oma 70

Ebvu, Dévidi deru nū  
onye-ishi ebvu gude  
nyataru Chipfu iphe

- 1 Gūbe Chileke;  
jiko menaa egwegwa  
bya adzoo mu!  
Byanu egwegwa bya eyeru  
mu eka; jiko Chipfu!
- 2 G'iphe, bukota ndu achọ ọzo,  
ephe e-shi gbua mu  
bukwaru ndu ee-meru  
iphere kpua;  
g'a tūkwa pẹ eberebete.  
Chiphunu ndu agbaru mu ejo  
egomunggo azū.  
G'iphere ji pẹ iphu!
- 3 G'e meeru ujikputeru nū ndu  
ekweru mu hẹ.
- 4 G'iphe, bukpo o ndu achọ ngu  
nū buru ndu ehu a-tsọ.

Ephe anọdu ngu l'ẹka  
 tee ẹswa.  
 Gẹ ndu ọ dọ g'a sọ l'ì dzọtaru  
 phẹ bọru iphe,  
 ẹphe akpọru l'ọnu epfu bọ:  
 “Unu tọa ọnu Chileke l'ọ  
 parọ ẹka!”  
 5 Obenu ẹ mbeḁua bọ onye  
 ọkpa bya abọru onye  
 adudu g'ọ dọ iya;  
 mbọ l'ọo gube Chileke bọ  
 onye eyejeru mu ẹka;  
 bya abọru onye adzoje  
 mu nu.  
 Jiko Chipfu; b'akpọkwa ọpfu!

### Ebvü-oma 71

1 Ọo gube Chipfu be mu nọ  
 l'ẹka ezeru ndzọ.  
 B'ekwekwa g'e kpua mu iphu  
 ẹ ntọ jasọ l'ojeje.  
 2 Eshinu ị bọ onye  
 pfuberekoto;  
 nafutanu mu!  
 Yeru mu ẹka gẹ mu nahọ!  
 Gbobenuru mu nchi;  
 dzọo mu!  
 3 Bọnuru mu agbara-mkpuma,  
 mu a-gbabaje je  
 ezeeru ndzọ!  
 Tọnaa ekemu sọ g'a dzọo mu!  
 Kele ọo ngu bọ oke mkpuma  
 nkemu;  
 bya abọru  
 ọlo-mgbobuta mu.  
 4 Jiko Chileke mu;  
 gbafuta mu l'ẹka ndu  
 ejo-iphe;  
 mbọ l'ẹka ndu apfubeduru  
 ẹka phẹ ọto;  
 waa ndu iwashị.

- 5 Kẹle ọo ngu bụ onye mu  
 ele ọnya iya;  
 gụbe Nnajiuphu,  
 bụ Chileke.  
 Teme ọ buru ngu be mu  
 dakoberu e -shi  
 teke mu bụ nwata.
- 6 Eshinu a nwuru mu bue ngu  
 pho bụ agbarike mu.  
 Mu a-noduepho etu ngu  
 epha jasụ l'ojeje;  
 noo kẹle ọo ngu kufutaru  
 mu l'epho ne mu.
- 7 Ndzụ mu bwaru ndu dụ  
 igwerigwe iphe-etu;  
 obenu l'ọo l'ime ngu be mu  
 anoduje ezeru ndzụ.
- 8 Eswe l'enyashi be mu  
 anoduje etu ngu epha;  
 bya atụ onu g'akpabiri ngu  
 habe shii.
- 9 Jiko ba jikakwa mu nta-a,  
 mu buwaa ogerenya-a!  
 Ba gbakutakwa mu azụ nta-a,  
 ike bwaru mu-a!
- 10 Kẹle ndu ohogu mu  
 epfukwaru mu ejo opfu.  
 Teme ndu domishiru  
 onwophe kwabe g'ephe  
 gbuu mu nodu  
 anokobeje achị idzu mu.
- 11 Ephe asuje: "Chileke  
 jikaakwaru iya.  
 Unu chĩa ya gude;  
 kẹle ọ tọ dẹkwa onye abya  
 iya agbaru mkpu."
- 12 Ba nodukwa mu ụzenya  
 jiko Chileke!  
 Bya egwegwa gube Chileke  
 nkemu;  
 bya eyeru mu eka!
- 13 G'iphe, bukpo ndu ebo

- mu ibo bukwaru ndu  
 iphere e-me g'ephe chīhu.  
 Gẹ ndu ono, eme g'ephe  
 meka mu iphe ono bukwaru  
 ndu ee-kweru une bya  
 ajaa ewenu.
- 14 Obenu ẹ mbēdua būepho  
 l'eka ị nọ bē ẹn̄ya  
 mu a-du.  
 Mu a-nọduepho aka ngu etu  
 ẹpha eje.
- 15 Mu e-gude ọnu mu pfua  
 ya mkp̄urumkpuru  
 pfushia ya ike sụ  
 l'ị pf̄uberekoto;  
 tẹme ị nọdu adzoje nemadz̄u.  
 Apf̄ubekoto ngu ono waa  
 ndz̄ota nkengu ono  
 habe shii  
 k'ophu bū ẹ mu ta aḡutadu  
 iya l'ogu.
- 16 Mu e-gude ike ḡube Nnajiuphu,  
 bū Chileke  
 je epfua l'oo ngu kpoloko  
 bū onye pf̄uberekoto.
- 17 Ḡube Chileke;  
 i shiwaa teke mu bū nwata  
 zita mu iphe!  
 Iphe, dū biribiri,  
 iimeje bē mu shiēpho teke  
 ono t̄uta ọnu iya  
 jas̄u nta-a.
- 18 Nta-a, mu būwaa ọgerenya,  
 ẹwó jiru ishi-a;  
 jiko Chileke;  
 ba gbak̄utakwa mu az̄u;  
 gbiriri jas̄u mu  
 ak̄ōberu ọgbo ọphu  
 abya n̄u g'ike ngu  
 habe shii;  
 mb̄u k̄ōru iphe,  
 buk̄poo ndu ee-mechaa

- nwüa l'òkpehu ngu  
parü ẹka.
- 19 Apfubekoto ngu rwuru  
akpaminigwe; gube Chileke;  
mbü gube onye ono,  
meru iphe, parü ẹka;  
?Bü onye aturu ngu;  
gube Chileke?
- 20 A makwarü-a l'i mewaru  
mu;  
mu jee ikpoto iphe-ẹhuka,  
parü ẹka bya adü ẹjo ẹji;  
ọle mu maru-a l'ii-mechaa  
mezia ndzü mu;  
mbü l'ii-kufuta mu  
l'ime ilu.
- 21 Ii-me; aa-ka mu akwabẹ  
ùbvù;  
tẹme l'ị dukwa mu phọ  
obu ọzo.
- 22 Gube Chileke mu;  
mu a-kpọ une gude tua ngu  
ẹpha l'ị bü onye apfushije  
ike l'iphe, i pfuru.  
Mu e-gude ogelenda gụa  
ebvu tua ngu ẹpha;  
gube Onye dụ Nso  
kẹ ịzurelu.
- 23 Ogbogboromonu mu  
ẹphenebo a-tü ọzu ẹhu-ọtso  
nụ ngu;  
mẹ mu nọdu agụ ebvu  
gude etu ngu ẹpha;  
mbü mube onye ị gbafutaru.
- 24 Eswe l'enyashi bẹ ire mu  
a-nọduepho epfu iphe,  
i meshiru gude goshi  
l'ị pfuberekoto;  
kẹle ndu shi achị mu lẹ njo  
bẹ a jaru ewenu;  
tẹme e mee; iphere ji  
phẹ iphu.



## Ebvu-oma 72

Ebvu, Sólomõnu deru

- 1 Jiko Chileke;  
     menaa g'eze kpeje ikpe  
     g'iikpeje!  
     Mena gẹ nwatibe eze  
     pfube-eka-oto g'i pfuberu!
- 2 Oo ya bu g'o kpeje ndibe  
     ngu ikpe, pfuru oto;  
     mbu hajeru ndu aakpa ehu  
     enge nhamunha.
- 3 Iphe, e-shigba l'oke ubvu  
     abyaru unwu-eliphe  
     a-buru ehu-guu.  
     O bukwarupho ehu-guu ono  
     e-shigba l'unwu ubvu.  
     O buru iphe, a-kpa iya nu bu  
     apfubekoto onoya.
- 4 Ndu eeme ewere,  
     bu l'echilabo oha  
     be oo-haru enge;  
     lo dzota unwegirima ibe ndu  
     adudu g'o du phe;  
     zopyashia ndu eme phe  
     ewere ishi.
- 5 Ephe a-nodu atsụ ngu ebvu  
     jasu g'enyawu;  
     waa onwa a-noberu;  
     mbu e -shi l'ogbo sweru  
     ogbo.
- 6 Oo-du g'eka mini edze l'eli  
     osu, a suru asusu;  
     mbu g'eka igwe ayoru  
     mgboko eyo mini.
- 7 Teke oo-buru eze ono be ndu  
     pfuberekoto a-ja ajaja.  
     Ehu-guu a-tuko ekameka  
     sweta;  
     mbu noo gbiriri jasu teke  
     onwa a-fubuhu l'eliphe.
- 8 Oo-buru eze ndu shi

l'eze-enyimu owa-a bua  
 jasụ l'eze-enyimu ophuu;  
 mbụ ndu shi l'enyimu  
 Yufurétisu bua jasụ l'eka  
 igwe beru alị beru.

9 Ndu bu l'echięgu a-bya  
 ephozeru iya;  
 tẹme ndu ohogu iya etsua  
 onu l'ẹja.

10 Ndu eze ndu Tashishi mẹ ndu  
 bukube eze-enyimu anodu  
 atụ akirikọ anụ iya.  
 Ndu eze ndu Sheba yẹ  
 kẹ ndu Seba  
 a-ndukwapho egudeje  
 iphe-oma abya ibe iya.

11 Ndu bukotakpoo eze  
 mgburugburu  
 l'e-phozeru iya.  
 Ohamoha l'ophu e-jekotaru  
 iya ozi.

12 Kele ndu adudu g'ọ dụ phẹ  
 -raku iya bẹ ọo-dzọta phẹ;  
 mbụ ndu iphe-ehuka byaru;  
 ophu ephe enwedu onye  
 gbaru phẹ mkpu.

13 Ndu ike adudu;  
 mẹ ndu adudu g'ọ dụ phẹ  
 bẹ ọo-phuru obu-imemini;  
 bya adzọta phẹ mee  
 g'onwu te egbu phẹ.

14 Oo-gbafuta phẹ l'eka ndu  
 emekpa phẹ ehụ;  
 waa l'eka ndu eme  
 phẹ mkpawere;  
 noo kele mee phẹ bẹ ọ  
 guberu iphe.

15 Gẹ ndzụ ogologo  
 bukwaru nkiya!  
 G'e gwekwaru mkpola-ododo  
 ndu Sheba nụ iya g'ọ  
 bukotaru nkiya!

- Gẹ ndiphe pfujekwaru opfu  
 ẹhu iya nù Chileke!  
 Tẹme ẹphe agojekwarupho  
 onu-oma nù iya  
 mbọku-mbọku!
- 16 G'iphe, a kuru l'opfu sọkwaa  
 kpukakpuka l'ali-a!  
 Gẹ phẹrephere zikwa mee ẹkwo  
 iphe,  
 a kọberu akọbe l'eli úbvú  
 g'ọ tẹ ọzọ; g'ẹkwo oshi,  
 pfugbaru l'úbvú  
 úbvú Lébanonu!
- Gẹ nemadzọ zushikwa buru  
 ẹswa l'igu lẹ  
 mkpukpu ono!
- 17 G'ẹpha iya nọdukwa jasú  
 l'ojejoje.  
 G'údù iya jedzukwaru  
 ẹkameka g'ẹnyanwu.  
 Ọhamoha bẹ aa-gbẹ iya l'ẹka  
 gọru onu-oma nù;  
 tẹme ọha l'ophu ekua ya  
 onye a gọru ẹhu-utso nù.
- 18 G'ajaja buru kẹ Chipfu,  
 bú Chileke;  
 mbú Chileke kẹ ndu Ízurelu;  
 onye búe ya phọ  
 kpoloko emeje iphe,  
 dú biribiri.
- 19 G'ajaja búkwarupho k'ẹpha iya  
 ono, dú biribiri ono  
 jasú lẹ tuutuutuu  
 lẹ mịimiimii!  
 G'ogbunwịinwii ya tọkọkwa  
 mgboko l'ophu sweta!  
 Nokwa g'ọ dú; bya aburu g'ọ dú!
- 20 Nokwa mkpochi-ishi epfupfu,  
 Dévidi nwa Jiesi pfuru  
 nù Chileke.

## Ebvu-oma 73

## Ebvu-oma, Asafu deru

- 1 Gẹ mu gbua ya tororo;  
 Chileke dukwaru ndu  
 Ízurelu ree;  
 mbu ndu ono,  
 obu phe guru iphóró.
- 2 Obenu le mbedua be o  
 phoduru nwanshii  
 me okpa echifu mu;  
 mbu lo phoduru nwanshii  
 me mu ta aduhe ike  
 pfuru l'iphe, mu pfuru;
- 3 eka mu wataru ejiru ndu  
 etu onwophe epha ijiyenya;  
 kele mu humaru le ndu  
 ejo-iphe be ehu du guu.
- 4 O to dudu iphe,  
 atsụ phe l'ehu.  
 Ehu du phe ree;  
 teme ephe shihu ike.
- 5 Ophu o dudu iphe,  
 atsụ ndu ozo l'ehu atsuje  
 phe l'ehu; ophu ehu,  
 emeje ndiphe emedu phe.
- 6 O buru iphe ono meru go  
 gude eku-onwonye buru  
 oleka, ephe woru tukpoo  
 onwophe l'olu.  
 Eme nemadzu mkpawere  
 buru uwe, ephe eye l'ehu.
- 7 Ephe daa okporokpo jasụ  
 enya ribachaa phe ariba.  
 Teme ejo-idzu ji phe okpoma  
 ebushihu ebushihu.
- 8 Ephe egudeje ejo opfu aja  
 nemadzu ewenu.  
 Ephe anoduje etu onwophe  
 ophushugbu;  
 teme uja, ephe anoduje  
 abo buerupho g'ephe

- e-me mee ndu  
oꝞo ewere.
- 9 Ephe anọduje epfuru Chileke,  
bu l'imigwe ejo opfu.  
Ire phe nọdu eje  
phururugbadaa  
l'eliphe.
- 10 Noo iphe, meru g'o gude  
ndibe mu ghakọbe  
tsoru phe;  
bya atuko iphemiphe,  
shi phe l'eka nguru  
ye l'epho wutukumu.
- 11 Ephe nọdu asuje: “?Denu  
ge Chileke e-shi maru?  
Okalibe-kakota-shii;  
?o duru ophu o maru?”
- 12 Waa ge ndu ejo-iphe du baa:  
O to dudu iphe, erwuje  
phe l'ehu;  
teme eku nọdu  
anọduje abyaru  
phe gbukugbuku.
- 13 Su-a; mbedua, suru le mu  
e-me obu mu g'o gua  
iphoro bukwa  
onye-eswe be mu bu.  
Mbú l'eka mu kworu  
l'iswi-odumma  
tukochaa buru iphe-mmanu.
- 14 Kele o to dudu mboku-mboku  
a taa nudu mu aphu;  
teme ophu o dudu mboku,  
mu noghajeru  
g'iphe-ehuka ta  
adapfuta mu.
- 15 O me mu -jeru epfugbua g'o  
du mu;  
me o -bukwaru mgbamu  
be mu agba ogbo owa-a,  
bu unwu Chileke-a.
- 16 Oobujeru; mu -jee eme g'iphe

- ono kabəkpoo doo mu  
 ɛnya ilile;  
 ọ gbẹ kabaa mu nù  
 egburwashì ẹhu;  
 17 gbiriri jasù mu bya abahù  
 l'ulo Chileke, dù nsọ.  
 Ọ buru ẹka ono bẹ mu nọ;  
 o doo mu ɛnya;  
 mbù iphe, e-mechaa  
 nwàru phẹ nù.  
 18 Sù-a; iiwojeru phẹ dobe  
 l'ẹka echi ẹturu;  
 gbahaa phẹ ẹka;  
 ẹphe abya adaa  
 l'alì mebyishihu.  
 19 Ọ tọ dùdu g'ọo-nọ-bejeru;  
 ẹphe abùru okorobo  
 iphe.  
 Le yee phẹ ebvu jasù l'a zata  
 phẹ wùshia.  
 20 Ẹphe adùje gẹ nrwọ, a rwọru;  
 o -be l'utsu a zọhaa ya.  
 Nokwaphọ g'ẹphe achìhuje  
 l'iphu gùbe Chipfu  
 m'ì gbalihu.  
 21 Teke ono, mu shi agù aphù ono;  
 mbù teke ono, aphù shi  
 tsọru ime obu mu ono;  
 22 bẹ mu shi buru onye-eswe,  
 amadù onwiya ẹkicha.  
 Tẹme mu shi dù  
 g'anù-ẹgbudu l'atatiphu ngu.  
 23 Obenu l'ìinoduje mu phọ  
 ntse tekenteke.  
 I setaẹru mu phọ l'ẹkutara  
 gudeshia.  
 24 Ọo ẹpho g'ì chìru idzu  
 l'ìi-nọdu edu mu bù  
 g'ìinoduje edu mu;  
 k'ọphu bù e -mechaa;  
 g'ì duru mu laa  
 l'o-gbu-nwìinwii nkengu.

- 25 ?Bü onye bẹ mu nwebaru  
 l'imigwe,  
 abüdu gübedua?  
 Eshinu mu lẹ ngu nọ ta  
 adüekwa iphe, nọ l'eliphe;  
 agükwadu mu ẹgu.
- 26 Ike abvüje mu l'ogwẹhu  
 bvü mu l'obu;  
 obenu l'ọo Chileke bü onye  
 agbatajẹ mu ike l'ime obu.  
 Ọ bürü iya bü okiphe mu jasü  
 l'ojejoje.
- 27 Ndu nọ ngu ẹnya a-bürü  
 mkpurupyata;  
 l'i mebyishia ndu i gudedu  
 ire phẹ ẹka.
- 28 Obenu lẹ mbẹdua bẹ ẹhu  
 anọduje atso utso lẹ mu  
 nọ-kube Chileke;  
 mbü lẹ mbẹdua wowaru  
 Nnajiuphu, bü Chipfu;  
 mee ẹka mu a-nọduje  
 ezeru ndzü.  
 Ọo ya bü lẹ mu e-gude ọnu  
 mu kọkota iphe,  
 dü ree, iime l'ẹhu mu.

## Ebvü-oma 74

### Évù, Asafu kwarü

- 1 Gübe Chileke; ?denu g'o gude  
 i jika anyi jasü l'ojejoje?  
 ?Denu g'o gude oke  
 ẹhu-eghu ngu nọdu akpü  
 tütütütü l'iphu igwe atüru,  
 iiche echeche?
- 2 Nyatakwa igwe ọha ono,  
 i züruro teke dü ẹnya  
 ẹnya ono;  
 mbü ọkpa-ipfu ono,  
 i gbatarü l'itumo mee phẹ;

- ephe buru okiphe ngu ono.  
 Nyatakwapfo úbvú Zayonu  
 ono, i bu ebubu ono.
- 3 Shikpodapho ọzo ono huma  
 g'e mebyishibeberu iya;  
 mbu ejo-iphe, ndu ohogu  
 ngu meru o nwuru  
 ọlo ngu ono, du nsọ ono.
- 4 Ndu achi ngu le njo  
 wubatakwaru  
 l'ulo-ndzukọ ngu;  
 bya agboru oḡboo kpua ya.  
 Ephe woru echíi kpobe  
 iya gude goshi l'o  
 kaleru phe.
- 5 Ephe ndu eme g'onye pa  
 ogbunku tsoru egbudu  
 egbudu; egbutsushi iphe,  
 bukpooshi, o humaru.
- 6 Iphe, bukpooshi iphemiphe,  
 a pyiru apyipyi  
 b'ephe gude ogbunku gude  
 ongu kukposhichaa  
 akukposhi.
- 7 Ọlo ngu, du nsọ b'ephe  
 nwuru oku yee o tsua  
 tsurwua ali.  
 Ephe woru eka ono, i hotaru  
 g'o buru eka ii-buru  
 eburu ono pharwushia.
- 8 Ephe ndu epfuje l'ime  
 okpoma phe su:  
 "Anyi e-mebyishichaa  
 ya g'o hakotakpoo!"  
 Ephe tuko ekameka,  
 e shi anoduje abaru  
 Chileke eja tukota  
 oku o tsua ya tsufu.
- 9 Ophu o dudu iphe-ohubama,  
 du biribiri,  
 eemejekwaduru anyi;  
 teme ophu o duedu



- ndu mpfuchiru phoduru nu;  
 ophu o dudu g'o ka  
 mma l'oo onye lanu  
 l'echilabo anyi,  
 maru g'egube iphe  
 owa-a l'a-no-beru.
- 10 ?Ndu ohogu ngu a-nmakpoo  
 ngu phulaphula jasu  
 teke ole gube Chileke?  
 ?Ndu i du ashi egudewaro  
 epfubyishi epha ngu  
 jasu l'ojejoje to?
- 11 ?Bu gunu kparu iphe,  
 iisela aka ngu azu;  
 mbu ekutara ngu?  
 Chifuta aka l'iphu utapfu  
 gude mebyishia phe.
- 12 Obenu l'oo gube Chileke  
 bu eze nkemu,  
 e -shi l'edenwede.  
 Oo ngu byaru adzoo  
 unwu-eliphe.
- 13 Oo gubedua gude ike  
 ngu chiwaha  
 eze-enyimu ebo.  
 Ejo-anu, bu le mini b'i  
 chikposhicharu  
 ishi echikposhi.
- 14 Oo gubedua zopyashiru  
 ejo-oke-agiyi ishi;  
 woru iya nu anu,  
 bu l'echiegu g'o buru  
 nri iya.
- 15 Oo gubedua gbafushiru  
 ogba yee nggele;  
 mini shi iya soshihu.  
 I bya amichata mini le  
 enyimu,  
 aso gborogboro.
- 16 Eswe bu nkengu;  
 enyashi buru nkengu.  
 O buru ngu meru enyanwu

- yẹ ọnwa dobe;  
 ẹphe keru jimujiimu.
- 17 Ọo gubedua tubuhawaru  
 ẹka oke alì a-kpagbaa  
 lẹ mgboko-a mgburugburu;  
 bya edobe ọnanwu  
 dobe udzumini.
- 18 Nyatakwa gẹ ndu ọhogu  
 ngu chiberu ngu  
 ọchi Chipfu;  
 mbụ gẹ ndu-eswe  
 pfubyishiberu  
 ẹpha ngu.
- 19 B'e wokwaru ndzu  
 nwa-ndo-nwenu  
 ngu woru ye l'ẹka  
 ẹjo anụ-ẹgbudu!  
 Ba zọhakwa ndibe ngu,  
 bụ ndu eje iphe-ẹhuka.  
 Ba hakwa pẹ g'ẹphe ọdu  
 iya nno ojejeje!
- 20 Nyatakwa ọgbandzu anyi  
 lẹ ngu;  
 noo kele mkpawere  
 dukwa l'iphe,  
 bukpoọ ẹka agba  
 ọchii l'alì-a.
- 21 B'ekwekwa gẹ ndu eemekpa  
 ẹhu gude iphere  
 tsuphu azụ.  
 Gẹ ndu ukpa mẹ ndu adudu  
 g'ọ dọ pẹ janaa ẹpha  
 ngu ajaja!
- 22 Gbalihunụ gube Chileke  
 pfua l'ọnu onwongu!  
 Nyatakwa gẹ ndu eswe  
 eshije l'utsu chĩa ngu  
 ọchi jasụ nchi ejihu.
- 23 Ba zọhakwa hanyihanyi,  
 ndu achi ngu lẹ njọ aba;  
 mbụ wọwoowoo,  
 ndu wulihuru etso ngu

opfu atü mkpürumkpuru  
sekpu ngu.

## Ebvü-oma 75

Ebvü-oma, Asafu deru nü  
onye-ishi ebvü; ishi ebvü iya  
bü “B'ekwekwa gę mu laa l'iyi”

- 1 Anyi ekele ngu ekele gube  
Chileke;  
anyi ekele ngu ekele.  
Ndu eku ępha ngu atü onu  
iphe, dü biribiri,  
iimeje.
- 2 Oo gubedua, bü Chileke suru:  
“Mu dobewaru teke mu e-kpe ikpe;  
kpee ya nhamunha.
- 3 Teke eliphe l'ophu; mę iphe,  
bü ndu nü iya nü  
anma jijijiji;  
bü yębedua bę egudeje itso  
iya gudeshia ya ike.
- 4 Ndu eku onwophe bę ya  
asuje: Unu hanaa  
eku onwunu!  
Ya asu ndu ęjo-iphe: Unu ta  
malihę mpu unu imeli!
- 5 Unu ta amalishiru  
igwe mpu!  
Unu te ewoshinuru olu  
pfube kanganaa  
asa kpaakpaa!”
- 6 Ekutse amadu te eshidu  
l'uzo ęnyanwu-awawa;  
ophu o shidu l'uzo  
ęnyanwu-adada;  
ophu o shikwapho  
l'uzo echięgu.
- 7 Oo Chileke bü onye  
ekpeje ikpe.  
Oo ya ekudaje onye owa-a;

- l'ò kutsee onye ọ̀zo.  
 8 Chipfu pa okoro l'ẹ̀ka.  
 Iphe, jiru iya nù b̀uru m̀ee,  
 ata kp̀itikpiti, ad̀udu iphe,  
 e yed̀uru iya gude mee  
 ya o shihu ike.  
 Ọ̀ ǹodu ab̀ujeru;  
 a -ǹonyaa l'ọ̀ ẁushia ya.  
 Iphe, b̀u ndu ẹ̀jo-iphe,  
 k̀uru l'eliphe ang̀ua ya  
 jas̀u l'ọ̀ bv̀u.  
 9 Obenu lẹ̀ m̀b̀dua a-ǹodu  
 ete ẹ̀swa jas̀u  
 l'ojejeje.  
 Mu a-ǹoduepho agu  
 ebvu etu Chileke kẹ̀  
 Jiékọ̀pu ẹ̀pha.  
 10 Mu a-swoshicha ndu  
 ẹ̀jo-iphe mpu,  
 ẹ̀phe gude eme ike;  
 wolía mpu kẹ̀ ndu  
 pf̀uberekoto g'ọ̀  
 pf̀uru kanganaa.

## Ebvú-oma 76

Ebvú-oma, Asafu deru  
 nù onye-ishi ebvu; g'a  
 kp̀oru une ye iya

- 1 Chileke bẹ̀ a maru amaru  
 lẹ̀ Jiuda.  
 Ẹ̀pha iya t̀ukowaru alì  
 Ízurèlu ngak̀ota.  
 2 Ẹ̀ka ọ̀lo iya nọ̀ b̀u lẹ̀ Salemu.  
 Ẹ̀ka o bu ebubu b̀uru l'úbv̀ú  
 Zayonu.  
 3 Ọ̀o l'ẹ̀ka ono bẹ̀ ọ̀ nọ̀  
 gbakwoshia apf̀u,  
 enwu ọ̀ku, ndu ọ̀hogu iya  
 shi agba.  
 Ọ̀ bya anyakwoshikwapho

- ogu-echi phe; waa iphe,  
 ephe shi egbobeje  
 gude zeeru onwophe;  
 mekpoo iphemiphe,  
 ephe shi egudeje alwu ogu.
- 4 Onye akpabiri be i bu.  
 I du biribiri dughata  
 ubvu ubvu, bu iphe,  
 jiru iya nu bu anu-egbudu.
- 5 Ndu gbaru mkparawa be a  
 kwawaru iphe phe okwata.  
 Ephe kua mgbenya ikpazu phe;  
 ophu o dudu ndu okpehu  
 du m'onye lanu,  
 duru ike mee aka ukporo.
- 6 Gube Chileke ke Jieko;u;  
 o bu-a mba be i baru phe;  
 inya phe;  
 waa ugbo-inya phe  
 l'ophu keshiru l'eka lanu.
- 7 Oo ngu nwekinyi ngu be o  
 gbaru g'a tsuje ebvu.  
 ?Bu onye a-du ike pfuru pfushia  
 ike l'iphu ngu m'ehu wata  
 ngu eghe eghe?
- 8-9 Gube Chileke;  
 teke i gbalihuru g'i  
 kpee ikpe;  
 shi nno dzota ndu aakpa  
 ehú l'eliphe;  
 be i no l'imigwe  
 bua ikpe.  
 Ali tsuhu ngu ebvu  
 daa nyonyoronyo.
- 10 Oo ya bu loobujeru;  
 i -tukoshi ndiphe  
 oke ehú-eghe ngu be  
 aagbejenu tuahaa  
 ngu epha.  
 Nwa ndu ophu ehú-eghe  
 ngu obu haphodoru  
 aburu ndu akpo

- egomunggo okpolohu.  
 11 O -buru l'unu rifuru Chipfu,  
 bu Chileke unu angu  
 su l'owa-a iphe,  
 unu e-meru iya;  
 unu wotakwa iphe obu  
 bya emeëbekota iphe,  
 unu kweru ukwe iya.  
 G'iphe, bukpoò ndu  
 bupheru phe  
 mgburugburu wota iphe-oma;  
 bya emeeru onye lanu ono,  
 gbaru g'a tsuje iya  
 ebvu ono.  
 12 Oogwerishije okpoma  
 ndu-ishi egwerishi.  
 Ndu eze unwu-eliphe  
 nodu atsù iya ebvu.

## Ebvu-oma 77

Ebvu-oma, Asafu deru nu  
 onye-ishi ebvu, bu Jiedutunu

- 1 Mu chikuru Chileke le mkpu  
 g'o yeru mu aka.  
 Mu chikuru Chileke  
 su g'o numa olu mu;  
 o numa olu mu.  
 2 Teke mu eje iphe-ehuka  
 be mu choru  
 Nnajiuphu.  
 Enyashi ophu be mu  
 chilikotaru aka imeli  
 epfu anu Chileke;  
 ophu ike abvuduru mu.  
 Temè ophu obu mu ekwedu  
 g'a duta iya aduta.  
 3 Mu nyataru gube Chileke bya  
 atsua ude.  
 Obu mu bya ebvuru shii  
 rikota oriri jasù ike

- bvü mu.  
 4 I meru ophu mgbenya  
 atuduru mu.  
 Iphe ono tsutabe mu l'ehu  
 k'ophu o kporu mu ofpu.  
 5 Mu bya egude egomunggo  
 bya elee enya le teke  
 ndiche; mbu apha,  
 dukpowaa enya enya.  
 6 Mu bya anyata egube ebvu,  
 mu shi anoduje agu  
 l'enyashi.  
 Mu bya ebvuru shii rikota  
 oriri mkporumkpuru.  
 A nonyaa; mu ja obu mu su:  
 7 "Nnajiuphu a-jikawaro anyi  
 jasü l'ojeje to?  
 ?To dukpoedu teke oo-nonyaa  
 l'o goshi l'anyi du iya-a l'obu?  
 8 ?O pfuru le n-yemobu iya  
 ono te erwubaedu  
 anyi aka jasü l'ojeje to?  
 ?O du g'o to byaedu  
 emebaru anyi iphe,  
 o kweru ukwe le ya  
 e-meru anyi to?  
 9 ?Chileke zohawaru  
 obu-imemini nkiya to?  
 ?O du g'o vüwaru ovuma  
 sü le ya taa phueduru  
 anyi obu-imemini?"  
 10 Tobudu iya bu; mu su:  
 "Waa iphe,  
 kachakpo mu atsü  
 l'ehu baa.  
 O le mu anyata teke  
 Okalibe-kakota-shii  
 ono shi egudeje  
 ekutara iya eme ike."  
 11 Mu a-nyata iphe-kpaakpaa,  
 Chipfu shi emeje;  
 mbu le mu a-nyatakota

- iphe, dọ biribiri, i shi emeje.  
 12 Mu e-bvuru shii ría ọriri l'iphe,  
 i mekotaru teke ono.  
 Mbụ Okalibe ọka-ngo,  
 i shi emeje teke ndiche  
 bẹ mu a-rivucha l'ọriri.  
 13 Gbẹ Chileke; ọzo ngu dọ nsọ!  
 ?Denu agwa, habe shii gẹ  
 Chileke anyi?  
 14 Ọo ngu bụ Chileke,  
 emeje ọhumalenya.  
 Iimeje gẹ ndiphe hụma g'ike  
 dọ-be ngu.  
 15 I gude ọkpẹhu ngu gbafuta  
 ndibe ngu;  
 mbụ gbafuta oshilọkpa  
 Jiékọpu yẹ Jiósẹfu.  
 16 Sụ-a; mini hụmaru gbẹ  
 Chileke;  
 mbụ l'enyimu,  
 asọ asoso hụmaru ngu;  
 ndzụ rwuta iya;  
 tẹme ogbumini nmahuchaa  
 pyaapyaapya.  
 17 Igwe dzeru mini;  
 akpaminigwe  
 raa gbagbagba;  
 tẹme ebemu-igwe nọdu alo  
 phaaphaa l'ekameka.  
 18 A nūmaru ọda egbigwe,  
 iitu l'echi oke pherephere.  
 Ebemu, iilo phaaphaa bụru  
 ìphóró, e gude ahuma  
 ọzo l'eliphe;  
 Alì l'ophu tsuhu ebvu;  
 nmahụ jijijijii.  
 19 I togboru gbororo l'echi  
 eze-enyimu.  
 I shijaru eze-ogbu-enyimu,  
 parụ ẹka ghata;  
 ọphu ọ bụdu l'a hụmaru  
 ẹka i zọru ọkpa.



20 I gbẹ l'ẹka Mosisu yẹ Erọnu  
dua ndibe ngu g'onye  
edu aturu.

## Ebvú-oma 78

Ẹvù, Asafu kwaru

- 1 Unubẹ ndu mu; unu numa  
iphe, mu ezi!  
Unu ngabẹ nchị numa opfu,  
shi mu l'ọnu!
- 2 Gẹ mu bya asaa ọnu nmaru  
ẹtu nù unu;  
gẹ mu bya avoshichaa opfu,  
e domiru edomi e -shi  
teke ndiche.
- 3 Iphe ono bu iphe,  
anyi numajehawaru;  
bya aburu iphe, anyi maru.  
O bu iphe, nna anyi oche phe  
shi akojehawaru anyi.
- 4 G'ike Chipfu habe shii;  
teme waa iphe,  
gbaru k'etu ẹpha; yẹ iphe,  
du biribiri,  
o mekotaru be anyi te  
edomiduru unwu phe edomi;  
Anyi e-pfucharu iya ogbo  
ophu dukwadu l'iphu.
- 5 O doberu unwu Jiékọpu  
omelali, ẹphe e-tsoje;  
bya atua ekemu dobe;  
o nguru anguru l'ali Izurelu;  
bya akaru ndiche anyi phe  
g'ẹphe zikwaa ya  
unwegirima phe.
- 6 K'ophu ogbo ophu abya nu  
a-maru iya;  
mbu ndu ophu e teke  
anwukpoda a nu anwunwu.  
Ephebedua egudekwa iya pho

- zia unwu nkepẹ.
- 7 Oo ya bu g'ephe akporu obu  
ye le Chileke.  
Epe ta azohaedu iphe,  
o meshiru.  
Epe edobedzua ekemu iya  
g'o ha.
- 8 Epe ta aduedu ge nna phe  
oche phe shi buru ogbo ejo  
okpoma; buru ogbo,  
kwefuru Chileke ike;  
mbu ogbo, adudu teke obu  
phe ngujeru anguru l'eka  
Chileke no;  
teme ophu o dudu teke epe  
pfushijeru ike l'iphu iya.
- 9 A makwaru-a l'unwoke  
Ifuremu gude apfu kwaa  
onwophe ngwogu;  
obenu l'ogu tsuru;  
epe ye okpa l'oso  
gbalachaa.
- 10 Ogbandzu epe le Chileke  
be epe mebyiru;  
ophu epe emeduru  
kunyabe iphe,  
o turu l'ekemu.
- 11 Epe zohaa iphe,  
Chileke meshiru;  
mbu iphe, du biribiri,  
o meshiru goshi phe.
- 12 O meshiru iphe,  
du biribiri l'iphu nna  
phe oche l'ali Ijiputu  
le mgbegu Zowanu.
- 13 Eze Enyimu be o keru  
ebolechiko dua phe dughata.  
O mee mini; o kpua  
oronmono g'igbulu.
- 14 Ipe, o gude dua phe l'eswe  
bu urwukpu;  
bya egude iphoro oku

- dua phẹ l'enyashi  
mbọku-mbọku.
- 15 Agbara-mkpuma bẹ ọ  
gbajaharu ẹbo l'echiẹgu;  
shi l'ẹka ono nọ phẹ mini,  
dọru nyimunyimu  
g'oke-ẹnyimu.
- 16 Ọ buru ẹka mkpuma gbaru  
ọru bẹ o meru;  
mini sọshihu sọaha  
gborogboro gẹ nggele.
- 17 Obenu l'ẹphe emeele iya-a  
iphe-ẹji.  
Ephe nọle-a l'echiẹgu ono  
ekwefuru  
Ọkalibe-kakọta-shii ike.
- 18 Ephe lekebekpọo ẹnya wata  
ahụ Chileke ama;  
mbụ kebekpọepho g'ọ  
nụ-dzujeru phẹ ọdu nri,  
agu phẹ nụ.
- 19 Ephe pfiaru Chileke ẹjo opfu  
sụ:  
“?Bụ gẹ Chileke adụ ike zua  
anyi l'echiẹgu-a?”
- 20 Teke o chiru iphe  
l'agbara-mkpuma  
bẹ mini shi iya sọshihu;  
nggele buru gborogboro.  
Ọle ọ bụ; ?bụ g'ọo-dufua ike  
nụ anyi nri?  
Tọo ?ọo-dufukwapho ike nụ  
anyi anụ?”
- 21 Chipfu -nụmae ya phọ;  
ẹhu ghua ya oke eghu.  
O woru onwu taphutaphu  
ọku kpọberu Jiékọpu;  
mbụ woru oke  
ẹhu-eghu iya doberu  
ndu Ízurelu.
- 22 Kẹle ẹphe te ekwetaduru  
lẹ Chileke duru iphe,

- ọ bu;  
 tẹme ọphu ẹphe  
 ekwetakwarupho  
 l'oo-du ike dzoo phe.
- 23 Obenu l'ọ sọru akpaminigwe  
 l'owa-a iphe, oo-me;  
 o mee ya;  
 tẹme ọ gụhashia ọzo  
 imigwe;
- 24 bya edzeeru ndu Ízurelu nri  
 ono, bu mana ge mini.  
 Ọ buru akpuru-iphe,  
 shi l'igwe be ọ nuru phe  
 egube ono.
- 25 Amadu ria nri unwu imigwe.  
 Chileke nu-dzukotaru phe nri,  
 suru phe eriri.
- 26 Pherephere, eshije l'uzo  
 enyanwu-awawa bu  
 yebedua tularu iya ọzo  
 imigwe; ọ wata ezizi.  
 Nokwapho g'o gude ike iya  
 nwuhaa ọphu eshije  
 l'uzo ndohali; ọ wata ezizi.
- 27 Anu, aata atata b'o dzeru  
 phe;  
 ọ nodu etsu  
 gbiigbiigbi g'udzu,  
 no l'ali.  
 Enu, epe l'eli be o nwuru nu  
 phe;  
 ọ ghakashihuru phe g'ẹja,  
 kuru l'aguga enyimu.
- 28 O mee; ẹphe phebatachaa  
 l'eka ẹphe doru.  
 Ulo-ekwa phe be o shi  
 anodujecha ephephe  
 mgburugburu.
- 29 Ẹphe ria nri jasụ ẹpho  
 jigharu phe ẹka;  
 kele ọ nuru phe iphe,  
 agụ phe nu.

- 30 Ọle ẹphe byaru erighe nri  
 ono, shi agụ phẹ nụ ono;  
 mbụ l'ẹphe kpụkwadu  
 iya l'ọnu;
- 31 Chileke watawaa phẹ  
 atukoshi oke ẹhu-eghu  
 iya.  
 Ọ tukoepho ndu kachaa  
 okporokpo l'echilabọ  
 phẹ gbushia;  
 mbụ l'ọ tukuru  
 unwokorobya Ízurelu  
 ono mebyishia.
- 32 O mechakpọkwa phẹ ẹgube  
 ono;  
 ẹphe nọdu  
 emekwaphọ iphe-ẹji.  
 O mechakpọoru phẹ  
 iphe-ọhumalenya ono;  
 ọphu ẹphe ekwekwaphọ  
 l'ọ duru iphe,  
 ọ bụ.
- 33 Noo g'ọ gude o mee ndzụ phẹ  
 chihu g'udzu ọnu;  
 bya egude keteketekpaa  
 mebyia ndzụ phẹ.
- 34 Teke ọ haeru phẹ phọ  
 gbushia;  
 ẹphe agbẹ teke ono  
 chọahaa ya;  
 mbụ ẹphe alwukorohu  
 dakọbe;  
 ghaaru iya iphu ọzo  
 lwafuta iya.
- 35 Ẹphe anyata lẹ Chileke shi  
 buru agbara-mkpuma phẹ;  
 l'ọ Chileke ono,  
 bụ Ọkalibe-kakọta-shii  
 ono bụ onye  
 gbafutaru phẹ nụ.
- 36 Ọle ẹphe gude ọnu phẹ aja  
 iya ewenu;

- mbụ l'ephe gude ire phẹ  
adzuru iya ụka.
- 37 Obu phẹ ta anọdu l'eka ọ nọ;  
ọphu ọ dudu teke ephe  
pfujeru pfushia ike  
l'ogbandzu ephe l'iya.
- 38 Ọle Chileke aphujele-a  
obu-imemini guaru  
phẹ nvụ l'ejo-iphe ono,  
ephe anọduje emegbabe ono;  
ọphu o mebyishiduru phẹ.
- Ugbo olemole bẹ ọ  
lọ-phuchawaru  
ẹhu-eghu iya azụ;  
ọphu ọ tukururu oke  
ẹhu-eghu iya ono g'ọ  
ha wua phẹ l'ishi.
- 39 Ọ nọdu anyatajẹ l'ephe bụ  
anụ-ẹhu;  
l'ephe bụ pherephere,  
ezi ezizi,  
ete eziphujehedu azụ  
m'o zighatawa.
- 40 Ugbo olemole bẹ ephe  
kwefuwaru iya ike  
teke ephe eje l'echiegu;  
mbụ kpatsu iya iwe l'alị,  
dabyiru mgbegere.
- 41 Tekenteke kpoo bẹ ephe shi  
anọduje ahụ Chileke ama.  
Ephe shi anọduje eme Onye  
dụ Nso kẹ ndu Ízurẹlu  
iphe ẹhu-eghu.
- 42 Ọphu ephe anyataeduru  
okpehu iya ono;  
mbụ okpehu ono,  
o gude gbafora phẹ l'eka  
ndu shi eme phẹ mkpawere ono;
- 43 bụ iya bụ mboku, o meru;  
a huma-dzuru iphe,  
dụ biribiri,  
o meru lẹ Ijiputu; mẹ iphe,

- dụ ebvu, o meshiru lẹ  
mgbegu Zowanu.
- 44 O meru nggele nggele phe;  
ọ ghoshia mee.  
O mee ophu mini,  
doru l'enyimu adudu  
k'angungu.
- 45 O chiru ijiji ye;  
ọ turu wowowo bya  
anua phe chipfuu;  
bya achiru mbara ye;  
o mebyishia ali phe.
- 46 Iphe, ephe kuru l'ali be ọ  
chiru inyarinya yee;  
ọ tapyashia;  
bya achiru igube yeru ndu  
ofhu miru amimi;  
ọ tafu iya.
- 47 Oshi sikamo phe be o gude  
akamini tapyashia;  
bya egude jiji uguru  
mebyishia akpuru  
vayinu phe.
- 48 Eswi phe be o gude ejo  
akamini ono tugbushichaa;  
bya egude ire egbigwe  
tugbushikota  
iphe-edobe phe g'o ha.
- 49 O tuko oke ehu-eghu  
iya g'o ha vuru byabe  
phe l'ishi.  
O chita unwu-ojozi-imigwe  
ye gephe je  
emeghe nkephe.
- 50 O toru ehu-eghu iya ono  
owere;  
ofhu ọ machiduru eka  
iya nafuta phe gephe  
ta anwuhu.  
O woru phe haaru ejo  
iphe-ememe g'o  
meghee nkephe.

- 51 Iphe, bukpo ndu bu okpara  
l'ali ijiputu be o  
gbukotaru egbugbu;  
mbu mebyishichaa nwa,  
vuru uzo kpoo  
onyemonye iphu  
l'ali Hamu.
- 52 Obenu le ndibe iya be o toru  
nwehu rwua g'onye erwu  
aturu rwufuta;  
bya echee phe g'eecheje  
aturu-a gude  
dughaa echiegu.
- 53 O dukpoeru phe pho chiriri  
werere; ge ndzu ba gu phe;  
obenu le ndu ohogu iya  
be o haru;  
eze-enyimu rigbushikota.
- 54 Todbudu iya bu;  
o dua phe durwua aka  
bu oke ali iya, du nsu;  
mbu durwua phe l'ubvu  
ono,  
o gude ekutara iya  
lwuta ono.
- 55 O chia ndu ohozo  
ikpabaka chifuchaa  
l'iphu phe;  
bya eworu ali phe keeru  
ndu izurelu g'o buru  
okiphe phe.  
O chiru okpa-ipfu izurelu ye;  
ephe buchishia ali  
phe ono.
- 56 O le ephe mechaeleru-a  
hwa Chileke ama;  
bya ekwefuru  
Okalibe-kakota-shii ike;  
mekota iphe, bukpo iphe,  
o suru gephe te emejeshi.
- 57 Ephe tsoo okpa nna phe oche;  
gbakutaru Chileke azu;



- teme ephe buru ndu  
 adudu onye gude ire  
 phe aka.  
 Onye daphuberu phe nu  
 du g'onye  
 daphuberu okpete.
- 58 Ephe gude aka ephe agwaje  
 iphe,  
 ephe dobegbaaru lekameka;  
 gude kpatsua Chileke iwe;  
 mbu kpatsua iya;  
 o koaharu ntekpe,  
 ephe pyishiru okophoo.
- 59 Ge Chileke humaru iya be ehu  
 ghushiru iya eghe ike.  
 O jikapho ndu Izurelu  
 jikanyia enya.
- 60 O no-buhu l'ulo-ekwa nkiya  
 ono, du le Shilo;  
 mbu ulo-ekwa ono,  
 bu yebedua gude aka  
 iya kpo be l'echilabo  
 unwu-eliphe.
- 61 O woru okpoko ogbandzu  
 iya haa; ndu ohogu iya  
 lwuta l'ogu;  
 mbu okpoko ogbandzu,  
 bu iya egoshije g'ike iya  
 habe shii;  
 bya aburu iphe,  
 egoshije g'o du-be biribiri  
 be o paru haa leka  
 ndu ohogu iya.
- 62 O haru ndibe iya; e gbushia  
 phe;  
 noo kele ndu ono,  
 bu okiphe iya ono be  
 kpatsuru iya iwe.
- 63 Nwada phe ta adudu onye  
 byaru phe aluta;  
 noo kele unwokorobyia  
 phe be oku tsugbushiberu.

- 64 Ndu uke Chileke phẹ bẹ  
 e gude mma gbushia;  
 ọphu ụnwanyi,  
 ji phẹ nwuhuru anọjeedu  
 l'ulo-maa ndu shi alu  
 phẹ nu.
- 65 A -nonyaa; Nnajiuphu  
 kwolihu g'onye shi  
 eku mgbenya;  
 mbu kwolihu g'onye shi  
 ngua mee;  
 o lota iya phube;
- 66 bya enwuphu ndu ohogu  
 iya azu;  
 mee phẹ iphe-iphere,  
 ichi iya te nwedu echihu  
 jasụ l'ojejeje.
- 67 Oshilokpa Jiófẹfu l'ophu bẹ  
 o jikakotaru;  
 mbu l'okpa-ipfu Ifuremu bẹ  
 o to hotaduru.
- 68 Obenu l'o gbẹchia hota  
 okpa-ipfu Jiuda;  
 bu iya bu ubvu Zayonu ono,  
 o yeru obu ono.
- 69 O bya eworu ulo iya,  
 du nsọ kpua; o ha g'oke ubvu;  
 mbu kpua ya; o du g'eliphe,  
 o turu okpa iya; o buru iphe,  
 a-no jasụ l'ojejeje.
- 70 O hotaru onye-ozu iya,  
 bu Dévidi;  
 bya edufuta iya l'eka o no  
 l'odu aturu.
- 71 O dufutaru iya l'eka ooche aturu  
 g'o bya eleta ndibe iya,  
 bu unwu Jiékpọ ẹnya;  
 mbu g'o kpọ-zijeru unwu  
 Ízurelu, bu okiphe iya ụzo.
- 72 Dévidi gudekpọephe obu,  
 guru ìphóró leta phẹ ẹnya;  
 bya egude okpobe

mmamiphe chíkòtá phẹ  
lẹ chiriri werere.

## Ebvú-oma 79

### Ebvú-oma, Asafu deru

- 1 Gùbẹ Chìlẹkẹ; hùmanu lẹ ndu  
òhòzò sọ-kputewaru  
alì onò,  
bù okíphe ngu onò.  
Èphẹ pharwùshìwaru eze-ùlò  
ngu onò, dù nsọ onò;  
bya emewaa Jierúsalemù;  
ọ búrú ikpòzú.
- 2 Odzu ndu ejeru ngu ozi  
bẹ èphẹ wòwaru  
tògbogbaarù ẹnu,  
èphẹ l'elì g'ò riá;  
mbù l'òdzu ndu dùrú ngu  
nsọ bẹ èphẹ wòwaru  
tùaru anù-ẹgbudù  
nanù nanù.
- 3 Jierúsalemù l'òphù gbá  
mgburugburu bẹ  
èphẹ gbashìrù  
mẹe nemadzù gẹ minì;  
òphù ọ dùèdù onyẹ  
nọkwadù nù, e-gburu  
ẹja tukobe ndu onò,  
wùshìrù ẹgube onò.
- 4 Ndu obutobu anyi phẹ mẹ  
ndu bupheru anyi  
mgburugburu  
tùkò ekweru anyi une bya  
achì anyi ọchì.
- 5 ?Bù teke ole bẹ ẹhu  
e-ghuberu ngu ẹghu  
gùbẹ Chìpfunù?  
?Èhu e-ghuwa ngu rọ ẹghu  
jasù l'òjẹjọjẹ tọ?  
?Bù teke ole bẹ okophoo

- ngu e-nwuberu  
phuruphuru g'oku  
kparu?
- 6 Wonuru ehu-eghu ngu  
tukoshi ndu ohozo ono,  
amadụ ngu nụ ono!  
Tukoshikwa iya pho aḷi-eze  
ono,  
ete ekujedu epha ngu ono!
- 7 Kele epe gbuwaru oshilokpa  
Jiékpọ pyaapya;  
bya emebyishiwa unuphu  
ibe phe.
- 8 Te emekwa g'anyi nwua  
onwu iphe-eji,  
nna anyi oche phe meru!  
Phuru anyi obu-imemini  
egwegwa;  
kele anyi dabyiwaru  
mgbegere.
- 9 Yeru anyi eka jiko Chileke;  
mbu gubedua,  
bu onye ndzota anyi;  
k'ophu ee-shi nno kwabe  
epha ngu ubvu.  
Guru anyi nvu l'iphe-eji anyi;  
nafuta anyi;  
g'epha ngu apfuru!
- 10 ?Denu g'o gude ndu ohozo  
je a-noduje aji-phe su:  
“?Denu eka Chileke  
phe no?”  
Nodunu l'iphu anyi mee ge  
ndu ohozo ono madzuru  
li gwataru ugwo ochi  
ndu ejeru ngu ozi ono,  
e gbushiru ono.
- 11 G'ude, ndu no l'oka mkporo  
atsi rwunaa ngu nchi!  
Gudenu okpehu ngu mee ge  
ndu e kperu mpfugbu  
nweru onwophe.

- 12 Pfūa obutobu anyi phē ugwo  
 iphe,  
 ẹphe meru ngu ugbo ẹsaa;  
 mbụ iphe-iphere,  
 ẹphe mekotaru kpua  
 gube Chipfu.
- 13 Oo ya bụ g'anyịbe ndibe ngu  
 etua ngu ẹpha jeye  
 l'ojejoje;  
 mbụ anyịbe aturu,  
 iiche echeche ono;  
 mbụ l'anyi e-tu ngu ẹpha;  
 e -shi l'ogbo  
 sweru ogbo.

## Ebvu-oma 80

Ebvu-oma, Asafu deru  
 nụ onye-ishi ebvu;  
 g'e gude olu ebvu, "Ojimbvu Ogbandzu"  
 gụa ya

- 1-2 Ngabenu anyi nchị l'olu;  
 gube onye eche Ízurelu  
 g'onye eche aturu;  
 bya aburu onye anọduje  
 erwu Jíósefu g'onye  
 erwu igwe aturu eje  
 lẹ nri.
- Gẹ gube onye ono,  
 sugaru l'echilabọ chierobu  
 ono chinaa g'anwụ  
 l'iphu ndu Ifuremu;  
 waa ndu Benjiaminu;  
 yẹe ndu Manáse!  
 Jiko rụkotanu ike ngu bya  
 adzọta anyi!
- 3 Dophunu anyi azụ l'onodu  
 anyi jiko Chileke!  
 G'iphu ngu gbua nwịinwii  
 l'ẹhu anyi;  
 k'ophu aa-dzọta anyi.

- 4 Gube Chipfu bu Chileke;  
 bya aburu Okalibe-Kakota-Ike;  
 ?ehu e-ghukpoo ngu eghu  
 ghuberu teke ole;  
 mbu ke g'i ti numaje epfufu,  
 ndibe ngu epfu anu ngu?
- 5 Nta-a be i mewaru phe;  
 enya-mini buru phe nri  
 eriri;  
 bya emee phe;  
 ephe nga enya-mini,  
 jiru ochi njaka-onu.
- 6 I mewaru; ndu obutobu anyi  
 phe nodu ekweru anyi  
 une;  
 teme ndu ohogu anyi nodu  
 achi anyi ntumatu.
- 7 Dophunu anyi azu l'onodu  
 anyi; jiko Chileke,  
 bu Okalibe-Kakota-Ike!  
 G'iphu ngu gbua nwiiinwii  
 l'ehu anyi;  
 k'ophu aa-dzota anyi.
- 8 Oo ngu shi l'ali Ijiputu gude  
 akpuru vayinu wolata;  
 bya atuko ndu ohozo  
 chifuchaa l'ali phe;  
 bya eworu iya ku.
- 9 Oo ngu gude eka ngu  
 gbuchaa eka i kpoberu  
 iya egbucha.  
 O bya agbaa ogbarabvu,  
 tukoru ali ono l'ophu  
 jedzuru.
- 10 O jaa ajaja jachikota ubvu  
 l'ophu;  
 mbu l'ekali iya haepho  
 ephekerephe  
 ephekerephe g'eze  
 oshi sida.
- 11 Epfukala iya jedzuru  
 oke-enyimu.

- O tuko ekameka kpofushia  
 jasụ l'enyimu  
 Yufurétisu.
- 12 ?Denu g'ọ nwuru ọ gbetchia  
 buru nta-a be i jeru  
 eworu mgbabu iya  
 phokashia;  
 k'ophu onyemonye,  
 aghata nu ejeje je awoo  
 akpuru iya g'ọ du iya?
- 13 Ezi-oswa shi l'oke oswa  
 wu-pfuta iya bya  
 atakwoshia ya;  
 teme unwu anu,  
 i meru dobe l'egbudu buru  
 iya be ephe gude  
 azu onwophe.
- 14 Lwaphutanu azu lwapfuta  
 anyi; jiko Chileke,  
 bu Okalibe-Kakota-Ike!  
 Gbenu l'imigwe lefu enya  
 humakpodapho iphe,  
 anwu nu.  
 Jiko letanu vayinu  
 ngu-a enya;
- 15 mbu ogbarabvu iya ono,  
 bu gubedua gude ekutara  
 ngu yee ya;  
 mbu nwa nwoke,  
 bu gubedua gude aka ngu  
 zu ya zu-tsee.
- 16 Ome vayinu ngu ono be  
 e gbubushiakwaru.  
 E gudeakwa oku tsupyashia  
 ya.  
 O buru mba, i gbanwuberu  
 iphu baaru ndibe ngu  
 meru iphe,  
 ephe wataru alaa l'iyi.
- 17 Wonuru aka tukobe nwoke ono,  
 no ngu l'ekutara ono;  
 mbu nwa nwoke ono,

- bụ gụbedua gude ẹka ngu zua  
ya zu-tsee ono.
- 18 Oo ya bụ g'anyi aghabuhuru  
ngu okotazu.  
Jiko phunwunaa anyi g'oku;  
g'anyi awata eku ẹpha  
ngu ozo.
- 19 Dophunu anyi azu l'onodu  
anyi;  
jiko Chipfu, bụ Chileke;  
bya aburu  
Ọkalibe-Kakota-Ike!  
G'iphu ngu gbua nwiiinwii  
l'ehu anyi;  
k'ophu aa-dzota anyi.

## Ebvu-oma 81

**Ebvu, Asafu deru nu  
onye-ishi ebvu;  
g'e gude ngwa ebvu,  
jita gwa ya**

- 1 Unu gwa ebvu ẹhu-utso nu  
Chileke;  
onye bụ iya bụ ike anyi!  
Unu gude ẹhu-utso gbọo ọgboo  
l'iphu Chileke ke  
Jiékoju!
- 2 Unu watanu agu ebvu;  
kuru nkwa ye iya!  
Unu akpọoru iya ogumogu;  
waa une ẹrengete!
- 3 Unu gbunaa opu m'onwa  
fupho k'ophúú!  
Unu gbukwaa ya pho m'onwa  
dzuẹpho edzudzu;  
a wata obo-iphe.
- 4 L'iphe ono bukwa omelali,  
a turu doberu ndu Ízurelu;  
mbu l'oo iphe,  
Chileke ke Jiékoju toru



- ọkpa sù g'e tsoje.  
 5 Ọo ekemu, o meru o shihu  
 ike;  
 bya asù gẹ Jíósefu  
 meje iya;  
 mbù teke ono,  
 o tsoru ndu Ijiputu ọgu  
 onoya.  
 Olu, mu anù te edokwaru  
 mu ẹnya.
- 6 Olu ono sùru: Ọo mbedua  
 pafuru phẹ oke ivu ono,  
 shi nọdu phẹ l'ukuvu ono;  
 mbù bya ezia phẹ nkata  
 ivu ono,  
 ẹphe shi vuru ono.
- 7 Teke unu eje iphe-ẹhuka bẹ  
 unu kuru mu oku;  
 mu nọdu l'urwukpu gude  
 egbigwe za unu ẹnu  
 bya adzọta unu.  
 Mu gude mini Meriba hua  
 unu ama.
- 8 Unubẹ ndibe mu;  
 unu ngabẹkpodapho;  
 gẹ mu lọo unu ẹka lẹ nchì!  
 Unubẹ ndu Ízurelu;  
 unu ngabẹkpodaru mu  
 phọ nchì!
- 9 G'ọ tọ dukwa iphe ọzo,  
 unu e-dobe agwa  
 agwagwa  
 l'echilabọ unu!  
 Tẹme ọphu ọ dukwa iphe ọzo,  
 unu a-bajẹru ẹja.
- 10 Noo kẹle ọo mbedua bụ  
 Chipfu;  
 bya aburu Chileke unu.  
 Ọo mbedua bụ onye  
 dufutaru unu l'alì Ijiputu;  
 mbù-a;  
 unu sakpọdapho ọnu

- unu gabala gẹ mu  
wụ-jia ya awụ-ji!
- 11 “Obenu ị ndibe mu te  
eyeduru mu onu;  
mbụ ị Ízurelu te  
ekwedu nọdu mu l'ẹka.
- 12 Tọbudu iya bụ;  
mu wonuru pẹ haaru  
ẹjo okpoma pẹ;  
g'ephe tsowaruro iphe,  
ephe ritaru l'obu pẹ.
- 13 Sụ-a; ọme ọo kẹ gẹ ndibe  
mu ngaberu mu nchi;  
ọme ọo kẹ gẹ ndu Ízurelu  
tsoo ọzo, mu toru pẹ;
- 14 emekpe ndu ohogu pẹ  
ta adukpoda iphe,  
o gege aburu mu.  
Mu gege ewoerupho ẹka byabe  
ndu achi pẹ ị njo;  
chia pẹ okpu-akpohu.
- 15 Ono gege eme gẹ ndu mube  
Chipfu dụ ashị woze  
onwophe alị l'iphu mu;  
odumeka mu ahụa pẹ  
ahùhù jasụ l'ojeje.
- 16 Obenu l'unubedua bẹ  
mu gege egude  
okpobe ereshi zua;  
bya egude manụ-ẹnwu,  
shi l'agbara-mkpuma  
nụ-jia unu ephe.”

## Ebvü-oma 82

### Ebvü-oma, Asafu deru

- 1 Chileke bataakwaru ị  
ndzukọ ndu-ikpe.  
Ọ nọ l'ẹka ono g'o kpee pẹ  
ikpe.
- 2 Sụ-a: “?Bụ teke ole bẹ unu

- e-kpeberu ikpe,  
apfuduru-oto?  
Mbü-a; ?bukpoo teke ole be  
unu a-gbaberu ndu  
ejo-iphe odzori?
- 3 Unu hanaaru ndu ukpa waa  
ndu enwedu nna enge!  
Unu kpenaaru ndu aakpa  
ehu waa ndu akpa nri  
ikpe, pfuru oto!
- 4 Unu gbafutanu ndu ukpa waa  
ndu adudu g'ò dü phe;  
shi nno nafuta phe l'eka  
ndu ejo-iphe!"
- 5 O to dudu iphe, ephe maru;  
teme ophu o dudu iphe,  
edoje phe enya.  
Ephe anoduje erwu dadishi  
l'ochii.  
Eka a turu okpa eliphe-a  
l'ophu tukoakwaru  
anga anganga.
- 6 Mu suru-a: "Mu makwaru-a  
l'unu no-chiru enya  
mube Chileke;  
mbu le g'unu ha bukota unwu  
Okalibe-kakota-shii;
- 7 Obenu l'unu e-mechaa nwuhu  
ge nemadzü mmanu.  
Unu e-mechaa daa ge  
ndu-ishi ozo adaje."
- 8 Gbalihunu gube Chileke;  
kpee ndiphe ikpe!  
Kele ohamoha bukota iphe,  
i nwe enwenwe.

## Ebvü-oma 83

### Ebvü-oma, Asafu deru

- 1 Gube Chileke; ta agbashinu  
nkuchi!

- Su-a; gube Chileke;  
 ba ñodushinu  
 nggujungguji!  
 Jiko ba adashinu kọkoroko!
- 2 ?I hụmawaru gẹ ndu ọhogu  
 ngu aphi temutemu;  
 waa gẹ ndu i du ashi  
 eseli ishi.
- 3 Epe gude ẹregede achi idzu  
 ndibe ngu; mbu achi iphe,  
 epe e-me ndu du ngu l'obu.
- 4 Epe ephu su: "Unu bya  
 g'anyi tuko oha ono  
 l'ophu lwa.  
 G'anyi mee g'epha Izurelu  
 chihukpoephe l'ophu  
 l'ophu."
- 5 Epe buru obu lanu;  
 idzu phe wa nanu.  
 Epe riwaru nte l'ephe e-me  
 ngu ejo-ipe.
- 6 Ndu onu-ulo Edomu;  
 yee ndu Ishimelu;  
 waa oshilokpa Hega;  
 waa ke Mowabu.
- 7 Waa ndu Gebalu;  
 yee ndu Amonu;  
 waa ndu Amaleku.  
 Ndu Filisitayinu yikwa iya  
 pho;  
 ndu Taya yiru iya.
- 8 Teme ndu Asiriya bya  
 ayikwaru iya pho.  
 Epe chikoberu onwophe  
 g'ephe buru agbaru-ike  
 ndibe Lotu.
- 9 Mena phe iphe,  
 i meru Midiyanu.  
 Mee phe g'i meru Sizera yee  
 Jiabinu lokpa enyimu  
 Kishonu;
- 10 mbu ndu ono,

- i meru ephe buru  
 mkpurupyata le  
 Enu-Doru; bya emee;  
 ephe reshihu kuru l'ali;  
 buwaruro ikpozu,  
 emekwa ali.
- 11 Mena ndu eze phe iphe,  
 i meru Orebu; waa iphe,  
 i meru Zeyebu.  
 Mekwaapho ndu-ishi phe  
 iphe,  
 i meru Zeba waa  
 Zalumuna.
- 12 Mbü ndu ono, suseru: “Unu  
 g'anyi lwua ali Chileke  
 l'ophu lwuta nworu.”
- 13 Jiko Chileke nkemu;  
 menaa phe g'ephe du  
 g'eswa ekpofu;  
 mbü g'ephe du g'eswa ereshi,  
 pherephere zikashiru.
- 14 G'o buru g'oku anoduje alwa  
 wowoowoo l'oswa-a;  
 ozoo g'oku etsuje ubvu-a
- 15 bu g'ii-nwuru  
 phuruphuru g'oke  
 pherephere chia  
 phe oso;  
 teme l'i gude oke  
 pherephere ngu ono mee  
 ge ndzu rwuta phe.
- 16 Mena g'iphere ji phe iphu;  
 k'ophu ndiphe a-wata acho  
 uzo,  
 ephe e-shi maru epha  
 gube Chipfu.
- 17 G'e meje phe iphe-iphere;  
 mejeru ndzu-agugu ye  
 phe l'iphu  
 mkpurumkpuru!  
 G'ephe gudekwa iphere  
 laa maa!

18 G'ephe eshi nno maru l'oo  
 gube onye ono,  
 epha ngu bu Chipfu ono  
 bu Okalibe-kakota-shii le  
 mgboko mgburugburu.

## Ebvu-oma 84

Ebvu-oma, e deru nu onye-ishi  
 ebvu g'unwu Kora gua;  
 g'e gude ngwa ebvu,  
 jita gua ya

- 1 Gube Chipfu,  
 bu Okalibe-Kakota-Ike;  
 Iphe, aka i bu amakwanu!
- 2 Oogushi obu mu ike;  
 mbu le meji atofuakwa  
 mu atofu aka oogu  
 mu anodu  
 l'eze-ulo Chipfu.  
 Obu mu; m'ogwehu mu l'ophu  
 ara araku Chileke ono,  
 dzu ndzu ono.
- 3 Lenu l'unwu ogbe nwechaaru  
 aka epha bugbaa  
 l'eze-ulo ngu ono.  
 Agbeta nwekwarupho aka  
 epha akpaje epfunu;  
 mbu aka epha anoduje  
 zushia unwu.  
 Eka ono bu le mgboru  
 oru-ngweja gube Chipfu,  
 bu Chileke mu;  
 bya aburu  
 Okalibe-Kakota-Ike;  
 bya abukwarupho  
 Eze mu.
- 4 Ehu-utso be a goru nu ndu bu  
 ebubu l'eze-ulo ngu;  
 noo kele epha anoduje  
 l'eka ono etu ngu epha

- mkpurumkpuru.
- 5 Ehu-utso be a goru nu ndu bu  
 ngu bu agbaru-ike phe;  
 mbu ndu bu iphe,  
 uche iya echije phe ehu  
 bu g'ephe e-me jerwua  
 ubvu Zayonu.
- 6 Qobujeru; ephe -nodu  
 awughata le nsuda Baka;  
 lo du g'eka mini aso  
 gborogboro;  
 teme lo dukwa phe pho  
 g'eka mini udzumini  
 dzeshiru ike;  
 tuko ekameka tukashia  
 okpuru okpuru.
- 7 Ephe eshije l'ike dasweru ike  
 gbiriri jasu teke ephe  
 a-tuko je apfuru l'iphu  
 Chileke l'ubvu Zayonu.
- 8 Gube Chipfu, bu Chileke,  
 bya aburu Okalibe-Kakota-Ike;  
 numanu epfufu,  
 mu epfu anu ngu!  
 Ngaberu mu nchi;  
 gube Chileke ke Jiekopu!
- 9 Lenaa enya huma onye ono,  
 egbobutaje anyi ono  
 gube Chileke!  
 Lenaa onye ono enya;  
 mbu onye ono,  
 i wuru manu l'ishi;  
 gude mee ya;  
 o buru eze ono!  
 Meeru iya eze-iphe-oma!
- 10 Anọ ujiku ophu l'eze-ulo  
 ngu kakwa ree eme  
 l'anọ unu apha labo  
 l'ukporo apha iri  
 l'eka ozo.  
 O kakwa mu ree ge mu buru  
 onye aguhajeru ndu abata

- l'eze-ulo Chileke uto;  
 eme le mu jeru atusaru  
 ehu l'ibe ndu ejo-iphe.
- 11 Kele Chipfu, bu Chileke du  
 g'enyawu;  
 bya aburu onye  
 egbobutaje anyi.  
 Chipfu emejeru ndiphe  
 eze-iphe-oma;  
 bya emeje g'a kwabe  
 nemadzu ubvu.
- O to dudu iphe, du ree,  
 o kejeru aka mbvu l'o to  
 ndu iya ndu uta adudu  
 le ndzu phe.
- 12 Gube Chipfu,  
 bu Okalibe-Kakota-Ike;  
 ehu-utso be a goru nu  
 onye dakoberu ngu nu.

## Ebvu-oma 85

Ebvu-oma, e deru nu  
 onye-ishi ebvu g'unwu Kora gua

- 1 Gube Chipfu; i goshiru l'ali  
 ngu du ngu l'obu.  
 O buru iphe ono meru g'o  
 gude i duphuta ndibe  
 Jiekopu azu l'ali phe;  
 mbu ndu e shi kpua le ndzu.
- 2 Ejo-iphe, ndibe ngu meshiru  
 be i guru phe nvu;  
 bya eworu iphe kpube l'iphe-eji,  
 ephe meshiru g'o ha.
- 3 I tukowaru oke ehu-eghu  
 ngu g'o ha gwobe;  
 bya apakotaru ehu-eghu ono,  
 meru;  
 enya nodu ata ngu  
 kpitikipiti ono paru haa.
- 4 Dophunu anyi azu l'onodu



- anyi; jiko Chileke,  
 bú onye ndzọta anyi.  
 Hanaa avuru anyi ovuma!
- 5 ?Iphe, anyi meru ngu  
 e-ghuwa ngu rọ eghu  
 jasú l'ojejeje tọo?  
 Mbú-a; ?ii-hawarọ ẹhu-eghu  
 ngu ono g'o shi l'ogbo  
 sweru ogbo tọo?
- 6 ?Tii kabẹkpodaa mee g'anyi  
 jakerehu ọzo;  
 shi nno mee g'ẹhu  
 kabẹkpoo tsọ ndibe  
 ngu uto?
- 7 Goshinu anyi l'i yeru anyi  
 obu jiko Chipfu!  
 Dzọnaa anyi l'onwongu!
- 8 Gẹ mu numaeshikwa  
 iphe, Chileke,  
 bú Chipfu epfu.  
 O kweru ukwe sù lẹ ya e-me  
 g'ẹhu dù ndibe iya guu;  
 mbú ndu duru iya nsọ.  
 O lẹ iphe, ephe a-kwa ẹnya bú  
 g'ephe ta laphubahe  
 azú l'eme eswe.
- 9 Iphe, doru ẹnya bú lẹ ndu  
 atsú Chipfu ebvu be  
 oobyaakwa adzọta;  
 k'ophu o-gbu-nwii  
 ya a-nodu l'ali anyi.
- 10 N-yemobu yee ire-lanu a-gba  
 onwophe ndzuta;  
 apfubekoto yee  
 ẹhu-guu anmaa  
 onwophe akpa.
- 11 Ire-lanu e-shi l'eliphe  
 mifutachaa;  
 teme apfubekoto agbe  
 l'imigwe lee ẹnya l'eliphe.
- 12 Chipfu a-buru iphe,  
 du ree be oo-nukota;

bya emee g'iphe,  
 anyi meberu l'alì anyi  
 mehu emehu.

- 13 Apfubekoto e-vutajeru  
 iya ụzo;  
 je atọoru iya gbororo,  
 ọo-nọdu eshi.

## Ebvu-oma 86

Epfufu, Dévidi  
 pfuru nụ Chileke

- 1 Ngabenu nchi; gube Chipfu;  
 zanu mu enu!  
 Kele mbedua bu onye ukpa;  
 bya aburu onye adudu  
 g'ọ du iya.
- 2 Letanu mu enya;  
 kele mu yeru ngu obu.  
 Oo ngu bu Chileke mu;  
 dzonaa mube onye-ozu ngu,  
 dakoberu ngu nu.
- 3 Phuru mu obu-imemini;  
 jiko Nnajiuphu;  
 kele mu eku ngu oku  
 mkpurumkpuru.
- 4 Menaa g'ehu tsoo mube  
 onye-ozu ngu utso;  
 kele oo gube Nnajiuphu be  
 obu mu l'ophu araku.
- 5 Gube Nnajiuphu bu onye oma;  
 bya aburu onye agujeru  
 nemadzu nvu.  
 Iphe, bukpuo ndu arakuje  
 ngu nu be iyeje obu  
 yegharu iya aka.
- 6 Numanu epfufu,  
 mu epfu anu ngu  
 jiko Chipfu!  
 Ngabenu nchi numa mkpu,  
 mu echiku ngu g'i meeru

- mu eze-iphe-oma!  
 7 Iphe -nɔdu atsɔ mu l'ehu bɛ  
 mu a-kpɔ-kuje ngu;  
 kele mu maru l'ji-nɔma olu  
 mu.
- 8 Agwa, nɔkota nɔ ta adudu  
 ɔphu aturu gube Nnajiuphu;  
 ɔphu ɔ dudu iphe, ephe eme,  
 duru ɔphu aatu eyeru  
 ɔphu gubedua eme.
- 9 Ohamoha ono,  
 i gude eka ngu mee ono  
 l'e-mechaa byakota bya  
 abaarɔ gube Nnajiuphu eja;  
 bya etua ngu epha.
- 10 Noo kele i parɔ eka;  
 teme i nɔdu emeje iphe,  
 du biribiri.  
 Oo ngu kpoloko kpeekpu bɛ  
 bu Chileke.
- 11 Jiko Chipfu; zinaa mu  
 ɔzo ngu;  
 k'ɔphu mu a-nɔdu  
 etso ɔzo ire-lanɔ ngu ono.  
 Menaa g'oriri mu ta agbashi  
 mu ɔzo ɔtu l'eka i nɔ;  
 k'ɔphu mu a-nɔdu  
 atsɔ epha ngu ebvu.
- 12 Mu gude obu mu g'ɔ ha  
 ekele ngu ekele;  
 gube Nnajiuphu,  
 bu Chileke mu.  
 Mu e-tu ngu epha jasɔ  
 l'ojejeje;
- 13 kele i yeru mu obu  
 yegharɔ mu iya eka.  
 Noo kele i nafutaru ndzu  
 mu l'ali-maa.
- 14 Oowaa Chileke! Ndu eku  
 onwophe wulihuakwaru  
 bya mu etso ɔgu.  
 Teme ndu ewebushi akurepho

dzukọbe g'ẹphe gbua mu;  
mbụ ndu ono,  
te eyeduru gụbe Chileke  
ọnu ono.

15 Obenu ị gụbe Nnajiuphu  
bụ Chileke,  
aphuje obu-imemini;  
bya aburu onye emeje  
eze-iphe-oma.

Èhu te eghujedu ngu egbu  
ẹgwegwa;  
tẹme ị nọdu eyeje obu  
yegharu iya ẹka;  
bya aburu onye apfushije  
ike l'iphe, i pfuru.

16 Ghanaaru mu iphu;  
meeru mu eze-iphe-oma!  
Wonuru ike ngu ye mube  
onye-ozu ike l'èhu!  
Dzọnaa mube nwa,  
nwanyị ono,  
ejeru ngu ozi ono nwuru!

17 Goshinu mu iphe-ọhubama,  
e-me gẹ mu maru l'ị  
bụ onye oma;  
k'ọphu ndu ọhogu mu  
a-huma iya; iphere egude phe;  
noo kele gube Chipfu  
gbaru mu mkpu bya  
adua mu obu.

## Ebvú-oma 87

### Ebvú-oma, unwu Kora guru

- 1 Chipfu tųwaru ọkpulo iya  
l'eli úbvú, dų nsọ.
- 2 O yeru Zayonu ẹnya;  
yeghata iya g'o yeberu iphe,  
bukpoo ẹka ozo,  
unwu Jiékpọ bu.
- 3 Gube eze mkpukpu ke

- Chileke; iphe,  
 dụ biribiri bẹ eepfukwa  
 akunyabe ngu:
- 4 “Ndu Réhabu; yẹe ndu  
 Bábilonu bẹ mu  
 guakwaru ye lẹ ndu  
 maru mu nụ.  
 Ndu Filisitayinu;  
 yẹe ndu Taya;  
 waa ndu Kushi bẹ mu  
 gukwarupho ye iya.  
 Ndu ono g'ẹphe ha bẹ  
 aa-tuko guru ye lẹ ndu  
 a nwuru lẹ Zayonu.”
- 5 Mbụ lẹ-a; ee-pfufe phota  
 Zayonu sụ:  
 “Onye ọwa-a; yẹe onye ọphuu  
 bẹ a nwukwaru l'ime iya.  
 Ọ buru Ọkalibe-kakota-shii  
 l'onwiya l'e-me iya g'ọ  
 nguru anguru.”
- 6 Chipfu e-de l'ekwo,  
 o deru epha ndiphe sụ:  
 “Onye ọwa-a bẹ a nwuru  
 lẹ Zayonu.”
- 7 Ndu agụ ebvu;  
 waa ndu ete iya etete  
 a-tuko gụa ebvu sụ:  
 “Oo lẹ Zayonu bẹ mini ndzụ  
 gbẹ asoshiru phe!”

## Ebvu-oma 88

Ebvu-oma; évù, Hemanu,  
 bụ oshilokpa Ẹzura  
 kwaru nụ onye-ishi ebvu  
 g'unwu Kora gụa; g'e  
 gude olu aphụ kwaa ya

- 1 Jiko Chipfu, bụ Chileke,  
 adzoje mu nụ;  
 mu nọwaa l'iphu ngu

- kwaa ẹkwa onwomu;  
kwakota iya eswe l'enyashi.
- 2 G'epfufu, mu epfu anu ngu  
rwunaa ẹka i no!  
Ngabenu nchi l'olu ẹkwa mu!
- 3 Kele ndzu mu l'ophu buwaa  
iphe-ẹhuka jiru iya;  
teme ndzu mu noduwaa  
ilu phakuu.
- 4 A guwaru mu ye le ndu  
aabyawaa ekpochi  
eja l'ilu.  
Mu duwaa ge nwoke,  
ike bvuru.
- 5 E wowaru mu gbadoru  
ndu maa.  
Mu duwaa g'onye e gburu  
togbo l'ime ilu;  
mbu ge ndu ono,  
ta aduedu g'ephe ha duru  
onye ophu i nyataru ono;  
mbu ndu ono,  
unu l'ephe bukafuwaru;  
ophu iiletabaedu phe  
enya ono.
- 6 I chiewaru mu l'ilu ophu  
bu iya kachaa omilomi;  
bya aburu iya kakota  
agba ochii.
- 7 Oke ẹhu-eghu ngu  
zupyabeshiru mu ike.  
I gudewaa akparamini nkengu  
byaru mu ye l'ime mini.
- 8 I natawaru mu ndu mu l'ephe  
shi eshi okpobe onya.  
I mewaa; ephe nodu ebujeru  
ubara yeru mu;  
teme i gubuwaru mu  
ye l'ime ulo k'ophu mu  
taa agbaladu.
- 9 Mu jewaru iphe-ẹhuka jasu  
enya gbahu mu ochii.

- Mboku-mboku be mu anoduje  
 eku gube Chipfu.  
 Lekwa aka mu ephenebo  
 ge mu chiliru ngu iya.
- 10 ?Iimeje iphe, du biribiri  
 gude egoshi maa to?  
 Ndu nwuhuru anwuhu;  
 ?ephe a-gbeshi tuahaa ngu  
 epha to?
- 11 ?Aanoduje l'ime ilu atu onu  
 g'i yeberu nemadzu obu?  
 To ?aanoduje l'eka eegwe  
 nemadzu arakabya pfua  
 g'i bu-be onye  
 apfushije ike l'iphe,  
 i pfuru?
- 12 To ?aanoduje l'eka gbahuru  
 tsukiribaa maru iphe,  
 du biribiri, iimeshi?  
 To ?aanoduje l'ali aka a  
 taa nyatajeedu onye laru  
 iya nu pfua g'apfubekoto  
 ngu habe shii?
- 13 Obenu le mu eku ngu g'i bya  
 agbaarū mu mkpu  
 gube Chipfu.  
 Utsu g'utsu be mu anoduje  
 ephu anu ngu.
- 14 ?Denu g'o gude gube Chipfu  
 jika mu?  
 ?O nwuru inwu-aha be  
 iiwoharu mu iphu  
 ngu ewoha?
- 15 Eshinu mu bu nwata be  
 iphe-ememe shi kpata mu ehu;  
 k'ophu bu le mu nowa  
 onwu ntse.  
 I mewaru mu jee iphe-ehuka  
 jasuru ike bvūwa mu;  
 ophu mu amakpoedu ge  
 mu e-me iya.
- 16 Oke ehu-eghu ngu kpowaru

mu kpofu;  
 ɽeme eye ebvu nkengu  
 mewaa mu; mu buru  
 ɽla-l'iswi.

17 Mboku-mboku be ɽphe  
 aso-pheje mu g'onye utso  
 gbaburu haa.

ɽphe woru mu guchia  
 kpurukudukuu.

18 ɽ natawaru mu ndu mu l'ɽphe  
 shi aswi ɽswi;  
 me ndu yeru mu obu.  
 Nta-a buwaa ɽchii bu onye  
 ɽbo mu.

## Ebvu-oma 89

Évù, Etanu, bu oshilokpa  
 ɽzura kwaru

1 Mu a-gu ebvu gude pfua  
 ge n-yemobu Chipfu habe  
 shii.

Mu a-gu iya jasɽ l'ojejeje.

Mu e-gude onu mu pfua  
 g'ogbo l'ogbo maru li  
 bu onye apfushije ike l'iphe,  
 i pfuru.

2 N-yemobu ngu a-du g'o du  
 jasɽ l'ojejeje.

Oo g'akpaminigwe nguru  
 anguru-a bu  
 g'apfushi ike l'iphe,  
 i pfuru angujeru.

3 ɽ suru l'onye ɽ hotaru be gu  
 l'iya gbawaru ndzu;  
 mbu l'i rifuwaru Dévidi,  
 bu onye-ozu ngu angɽ su:

4 “Awa ngu be mu e-me g'o  
 nguru anguru noo  
 ojejeje;  
 mee g'aba-eze ngu kpoo



- g'abara shi l'ogbo  
sweru oḡbo.”
- 5 Imigwe l'ophu atụ onu g'i  
dụ-be biribiri ḡbe Chipfu;  
tẹme o noḡdu egoshikwapḡo  
ndu duru ngu nsḡ l'i bụ  
onye apfushije ike  
l'iphe, i pfuru.
- 6 Kele-a; ?bụ onye no l'imigwe  
bụ onye aa-noḡdu atụ  
eyeru Chipfu?  
?Mbụ denu onye imigwe  
ophu aa-noḡdu atụ  
eyeru Chipfu?
- 7 Eka ndu dḡ nsḡ k'imigwe  
dzukoḡberu be aanḡdujekwa  
atsḡ Chileke ebvu.  
O kakḡta ndu no-pheru iya  
mgburugburu adḡ ebvu.
- 8 ḡbe Chipfu, bḡ Chileke,  
bḡ Okalibe-Kakḡta-Ike;  
?bḡ onye dḡ ḡe ngu?  
I parḡ eka ḡbe Chipfu;  
tẹme i noḡdu apfujeru  
pfushia ike l'iphemiphe,  
i pfuru gbaa  
mgburugburu.
- 9 Oo ngu anḡduje eleta oke  
akparamini eze-onyimu enya;  
tẹme o -buru l'akparamini  
sḡru ke kpukumu;  
l'i mee ya l'o daa gbẹe.
- 10 Rḡhabu be i chitaru tua l'alj.  
O dabyiru g'onye e gburu  
l'oḡu.  
I gude ike ngu chja ndu  
ohogu ngu;  
ephe gbaa nanḡ nanḡ.
- 11 Igwe l'ophu bḡ nkengu.  
Eliphe l'ophu bukwarupho  
nkengu.  
Oo ḡubedua tḡru okpa

- mgboko l'ophu;  
 yẹ iphemiphe,  
 nọ iya nọ.
- 12 Ndegu iya mẹ ndohali iya  
 bukota gubedua meru  
 phe dobe.
- Úbvú Tabọ; yẹ úbvú  
 Hamonu aguje ebvu  
 ehu-utso m'ephe numa  
 epha ngu.
- 13 Oshi-eka ngu bu iphe,  
 swetaru iya nọ bu  
 okpahu.
- Eka ngu shihuru ike;  
 ekutara ngu kangoo.
- 14 Aba-eze ngu bu apfubekoto  
 yẹ ikpe,  
 pfuru oto be e gude tua  
 okpa iya.
- I nodu akpajeru n-yemobu  
 ngu; yẹ apfushi ike l'iphe,  
 i pfuru vuru uzo l'iphemiphe,  
 iimekpoo ememe.
- 15 Ehu-utso be a goru nọ ndu  
 maru g'eetuje ngu epha;  
 mbu ndu bu iphóró,  
 shi l'eka gube Chipfu nọ  
 be ephe egudeje eje  
 ekameka, ephe eje.
- 16 Ephe egudeje epha ngu ete  
 eswa mkpurumkpuru.  
 Ephe nodu anoduje ekutse  
 ngu l'i bu  
 onye pfuberekoto.
- 17 Kele oo ngu bu ike,  
 du biribiri, ephe nweru.  
 O buru l'oo l'anyi du ngu  
 l'obu meru iphe,  
 iimeje g'ike anyi kangoo.
- 18 Mbu le-a; l'onye mgbobuta  
 anyi bukwa Chipfu be  
 nuru iya anyi;

- mbụ l'eze anyi bụkwa  
 Onye Nso kẹ ndu Ízurẹlu  
 bẹ o shi l'ẹka.
- 19 O nweru teke i gudeje  
 ọphulenyia zia ndibe  
 ngu ozi;  
 sụ l'i mewaru g'ọkpehu  
 kalẹru ojọgu lanu.
- I byaru l'echilabọ ndibe ngu  
 bya ahọta nwokorọbya  
 lanu;  
 mee g'ọ bụru onye  
 ndiphe a-nọdu ekutse.
- 20 I hụmawaru onye-ozu ngu,  
 bụ Dévidi.
- I woru manụ ngu,  
 dụ nsọ wụa ya l'ishi.
- 21 Sụ l'ọ ẹka ngu bẹ ii-gude  
 mee ya l'ọ nguru anguru;  
 mbụ l'ọ kwa oshi-ẹka  
 gube Chileke  
 a-nọduje eme g'ike ka  
 iya adudu.
- 22 O tọ dudu ndu ọhogu iya,  
 duru ndu ọphu a-dụ  
 ike ekebuta iya g'ọ turu  
 phe utu;  
 ọphu ndu ẹjo-iphe asudu  
 iya emekpa ẹhu.
- 23 Ndu achị iya lẹ njo bẹ ii-nọdu  
 l'iphu iya zopyashia;  
 l'i chitsushikọta ndu  
 ọ dụ ashị.
- 24 N-yemobu ngu waa apfushi  
 ike l'iphe,  
 i pfuru l'a-nọdu swiru iya.  
 O bụru ẹpha ngu bẹ  
 oo-gudeje mabẹ mpu  
 iya gugugu.
- 25 Alị-eze iya bẹ ii-me g'ọ jaa  
 àjàjà;  
 mbụ g'o shi l'eze-ẹnyimu

- ọọ jasụ l'enyimu  
 Yufurétisu.
- 26 Ọo-ọọdu arakuje ngu sụ:  
 “Ọo ngu bụ nna mu;  
 bya aburu Chileke mu;  
 bya aburu agbara-mkpuma,  
 l'adzoje mu nù.”
- 27 Gụbedua l'onwongu  
 emekwanaa ya l'ọ  
 bụru ọkpara ngu;  
 mbụ l'ọ bụru iya a-kachaa  
 shii l'iphe,  
 bụkpoo ndu eze,  
 ọọ l'eliphe l'ophu.
- 28 N-yemobu, i yeru iya l'a-buru  
 ojejeje.  
 Ọgbandzu gụ l'iya apfuru  
 pfushia ike.
- 29 Awa iya bẹ ii-me;  
 ẹphe anguru anguru  
 jasụ l'ojejeje.  
 Alị-eze iya bụ g'igwe  
 l'ophu ọọ-beru  
 bụ g'ọọ-ọọ-beru.
- 30 Ọ -buru l'unwu iya jikaru  
 eme ekemu ngu;  
 ọphu ẹphe etsodu  
 iphemiphe,  
 ị turu ọkpa iya sụ  
 g'e tsoje;
- 31 ẹphe -mebyia omelalị,  
 i doberu pẹ;  
 bya ajika eme iphe,  
 ị sụru g'ẹphe meje;
- 32 l'i gude mgboro bya echia  
 pẹ pyaapya gude  
 hùà pẹ ahùhù;  
 mbụ bya echia pẹ ẹchachi  
 gude hùà pẹ ahùhù  
 k'ẹjo-iphe, ẹphe eme.
- 33 Ọle ọ tọọ kposhikwanu g'i ti  
 yehe iya obu g'i yeru

- iya ya;  
 ọphu ọ dudu teke iibya aha  
 apfushi ike l'iphe,  
 i pfuru le k'ehu iya.
- 34 I tii mebyikwa ọgbandzu ngu  
 l'ehu iya.  
 Ọphu iigbanwekwa iphe,  
 i sawaru onu pfua.
- 35 Eshinu i bu onye du nsọ be  
 i riru angu mgbo lanu  
 sefu eka;  
 su l'i ti byadu adzuru  
 Dévidi uka;
- 36 su l'awa iya a-nọ jasụ  
 l'ojejoje.  
 Ọ buru g'enyanwu keru  
 ngu l'iphu bu g'alì-eze iya  
 e-keru damudamu;
- 37 mbu l'oo-keru jimujimu  
 jasụ l'ojejoje g'onwa,  
 bu iphe,  
 agba ekebe l'akpaminigwe;  
 l'e gude ire iya eka.
- 38 Obenu l'onye ono,  
 i wuru manu l'ishi ono be  
 i jikawaru;  
 bya avuaharu iya ovuma.
- 39 I jikawaru ọgbandzu,  
 gu l'onye-ozì ngu gbaru.  
 I wowaru okpu-eze iya woru  
 gwọo l'urwuku.
- 40 Igbulo iya l'ophu be i  
 tsukposhichawaru  
 etsukposhi.  
 I woru ulo-mgbobuta iya tsua  
 yogiri yogiri.
- 41 Iphe, bukpo ndu aghata  
 aghata gwee ya tutu-a.  
 Ndu obutobu iya nodu  
 ekweru iya une.
- 42 I tuliru ndu achi iya le njo  
 eka l'eli;

- bya emee ndu ohogu iya;  
 ephe noḍu ete eṣwa.
- 43 Atatiphu ogu-echi iya be  
 i woru ghachaa  
 igharaphu;  
 ophu iimejeedu g'o pfushia  
 ike l'iphu oḡu.
- 44 I mee; ophu o duedu  
 akpabiri;  
 bya eworu aba-eze iya  
 rwua le ntụ.
- 45 I meru iya o kahụ le  
 nwokoro;  
 bya eworu iphere yee ya  
 g'onye yeru  
 akpawuru uwe.
- 46 ?Oo-du egube owa-a jasụ  
 teke ole gube Chipfu?  
 ?Ii-domiwaro onwongu jasụ  
 l'ojejoje to?  
 ?Bu teke ole be ehu-eghu ngu  
 e-nwu phuruphuru  
 g'oku nwuberu?
- 47 Jiko nyatakwa ge ndzu mu  
 du-be mkpirikpu;  
 kele nemadzụ,  
 i meru buephō udzu  
 onu mmanu.
- 48 Le-a; ?denu nemadzụ,  
 a-noḍu ndzu g'o to  
 nwuhu anwuhu;  
 ozoo g'o dzoo onwiya g'o  
 to la maa?
- 49 Gube Nnajiuphu; ?bu awe be  
 i doberu eze n-yemobu  
 ngu ono,  
 i shi egoshije mu ono;  
 mbu n-yemobu ono,  
 i gude apfushije ike l'iphe,  
 i pfuru rifuru Dévidi  
 angu l'ii-nu iya ono?
- 50 Nnajiuphu; nyatanu g'a

- chì-bewaru onye-ozì  
 ngu òchì;  
 waa gè mu tabewarù  
 nshì l'ìphu,  
 ndìphe nò akwagò mu;  
 51 mbù iphu onò,  
 ndu òhogu gùbe Chipfu  
 anòduje akwagò  
 onye ì wùru manù  
 l'ìshì onò.  
 Èkameka, ò nò bẹ èphe  
 anòduje akwagò iya  
 iphu gude eme iya  
 iphe-ìphere.  
 52 G'ajaja bùru kẹ Chipfu jasù  
 l'òjejeje!  
 Nokwa g'ò dù;  
 bya abùru g'ò dù.

## Ebvú-oma 90

### Epfupfu, Mòsisu onye kẹ Chileke pfuru nù Chileke

- 1 Gùbe Chipfu; ò bùhawaa ngu  
 bù onye anyi bu ebubu  
 l'ime iya eshìkpòò  
 l'ògbo sweru ògbo.  
 2 Oke úbvù bya a-bùru iphe,  
 dù adùdu;  
 mbù l'ì byaru e-me elìphe  
 l'òphu;  
 yẹe mgboko gbaa  
 mgburugburu;  
 ì nòduhawaa;  
 tẹme i je a-nòdu jasù  
 l'òjejeje.  
 3 Nemadzù bẹ iizije g'ò laphu  
 azù l'alì.  
 Ìisuje iya: “Unu laphu  
 azù l'alì;  
 unubẹ unwu-elìphe!”

- 4 Kele unu-kuru-unu apha  
 l'enyu ngu d'uele ngu-a  
 g'ujiku lanu;  
 mbu l'o d'ujee ngu pho ge  
 nche enyashi lanu.
- 5 Nemadzu be igudeje  
 anwuhu kpofu g'onye  
 kpofuru eswa;  
 kele epe du  
 rwushirwushi  
 g'eswa.
- 6 L'utsu be onoduje asha  
 biribiru abya pulapula.  
 O -betashia l'uzenyashi  
 l'o nwulwashihuwa  
 kposhihu nku.
- 7 Oke ehu-eghu ngu  
 nmaswikotawaru anyi  
 g'oku;  
 teme ehu-eghu ngu mee;  
 meji g'babuhu daa anyi  
 l'ohu epho.
- 8 Ejo-iphe, anyi meshiru be i  
 kporu giriri l'iphu ngu.  
 I bya atuko iphe-eji,  
 anyi meru le mpya mee;  
 o dabyikotaru eba  
 l'atatiphu ngu.
- 9 Oke ehu-eghu ngu mewaru  
 ndzu anyi;  
 o nodu agbaje mkipirikpu.  
 O buru ats'u ude be anyi  
 egudeje tsugbua  
 nwapha olemole ophu  
 i haru anyi.
- 10 Iphe, anyi ano-bejeru bu  
 ukporo apha eto l'apha iri.  
 Teke o bu onye ike du l'o  
 no-rwua ukporo apha eno.  
 Ole o bu; iphe,  
 ejije iya nu  
 abukotajeerupho eje



- iphe-ehuka yee aphu;  
 ophu o dudu g'aano-bejeru  
 lo bvu;  
 ndzu anyi ephukashihu.
- 11 ?Bu onye maru g'ehu-eghu  
 ngu shihuberu ike?  
 ?Bu onye be o dokporu  
 enya;  
 mbu g'oke ehue-eghu  
 ngu habe shii;  
 k'ophu oo-nodu atsü  
 ngu ebvu?
- 12 Mena g'anyi maru lo to  
 dudu g'anyi a-no-beru  
 l'eliphe-a;  
 k'ophu oo-me g'anyi  
 maru iphe.
- 13 Lwanu azu jiko Chipfu.  
 ?Egube owa-a a-du jasü  
 teke ole?  
 Phunaaru anyibe ndu-ozu  
 ngu obu-imemini!
- 14 Ge n-yemobu ngu jijenü  
 anyi epho l'utsu;  
 k'ophu anyi a-noduje  
 agu ebvu ete eswa  
 mboku-mboku.
- 15 Mena g'ehu tsoo anyi utso  
 tso-rwua g'ehu shi  
 du-beru anyi eji;  
 mbu g'i mee;  
 ehue atsoo anyi utso g'apha,  
 anyi jeru iphe-ehuka ha.
- 16 G'anyibe ndu-ozu ngu  
 humanu iphe,  
 iimeshi.  
 G'awa anyi humakwapho  
 g'ike ngu du-be biribiri.
- 17 Gube Nnajiuphu, bu Chileke;  
 g'eze-iphe-oma nkengu  
 nodukwa swiru  
 anyi eswiru!

Mena g'iphemiphe,  
 anyi eme nguru anguru!  
 Ee! Jiko Chipfu;  
 mekwaa ya g'o  
 nguru anguru!

### Ebvu-oma 91

- 1 Onye nọ lẹ mkpula  
 Ọkalibe-kakota-shii  
 l'e-buru eburu lẹ mkpula  
 ibvu  
 Ọkalibe-kangokotaru-nu.
- 2 Gẹ mu e-pfu kẹ Chipfu bụ l'ọ  
 bụ iya bụ onye mu nọ  
 lẹ mkpula ezeru ndzụ;  
 bya aburu iya bụ  
 agbaru-ike mu.  
 Ọo ya bụ Chileke;  
 onye mu dakoberu.
- 3 Ọ kwa yẹbedua l'a-dzota ngu  
 g'i tị nmalahụ l'igbudu,  
 ndu achị nta ngu  
 gbaberu ngu;  
 bya adzotakwa ngu pho  
 l'ejo iphe-ememe,  
 tsoru pherephere eje.
- 4 Ọo ñkù iya bẹ oo-gude  
 kpuchia ngu.  
 Ọ buru lẹ mkpula ñkù  
 iya bẹ ii-gbaba je  
 edomia onwongu.  
 Ọ buru ike, oopfushije l'iphe,  
 o pfuru a-buru iphe,  
 e-gbobutajẹ ngu nụ;  
 bya aburu iphe,  
 i gude ezeru onwongu.
- 5 Iphe, anọduje eye ebvu  
 l'enyashi bẹ i tii  
 tsudu ebvu;  
 ophu iitsukwapho apfu,  
 ezi phuphuphu

- l'eswe ebvu.
- 6 Teme ejo iphe-ememe,  
 anọduje eze kojokojo  
 l'echi abali ta adudu  
 ọphu iitsu ebvu;  
 mbu je akpachaa le ndu  
 ọphu etsu nemadzu  
 pyaapya l'echi eswe.
- 7 Unu labo l'umadzu ukporo iri  
 l'a-da ngu le mgbureku;  
 teme ndu rwuru unubuku  
 adabyiru ngu  
 l'uzo ekutara;  
 ole o to dudu iphe,  
 bya eme ngu nu.
- 8 Oo enya be ii-gudeje huma  
 aphu, aanu ndu ejo-iphe;  
 obenu le gubedua be o  
 too jidu me mgbodzu.
- 9 O kwa gube Chipfu bu onye  
 mu no le mkpula  
 ezeru ndzu.  
 Eshi ọphu i no le mkpula  
 Okalibe-kakota-shii;
- 10 o to dudu iphe,  
 byaru eme ngu nu;  
 ọphu o dudu mgbuka,  
 bya eshita uzo ibe ngu;
- 11 kele oo-karu-a  
 unwu-ojozi-imigwe iya  
 g'ephe leta ngu enya;  
 chee ngu nche l'iphe,  
 bukpo uzo, iishikpo.
- 12 Ephe e-gude aka pata  
 ngu apata; a nonyaa;  
 i kpoo okpa le mkpuma.
- 13 Oduma; yee oghu be  
 ii-zopyabeje lokpa;  
 mbu l'oke oduma;  
 yee ejo-agwo be ii-gudeje  
 okpa zo-gbua.
- 14 Chipfu sukwaru: "Eshinu o

yeru mu obu bẹ mu  
 a-ṅṅuepho anafuta  
 iya;  
 mbu le mu a-ṅṅuepho  
 egbobutaje iya g'oto du iphe,  
 e-me iya nu;  
 kele o guberu epha  
 mu iphe.

- 15 Oo-ku mu oku;  
 mu aza iya enu.  
 O -ṅṅu eje iphe-ehuka;  
 mu anodu swiru  
 iya eswiru.  
 Mu anafuta iya bya akwabe  
 iya ubvu.
- 16 Mu e-gude ndzu ogologo  
 zu-jia ya epho;  
 goshi iya ge mu egudeje  
 adzo nemadzu.”

## Ebvu-oma 92

### Ebvu-oma eswe-atuta-unme

- 1 Oo iphe, du ree g'a jaje  
 Chipfu ajaja;  
 mbu g'e gudeje ebvu tua  
 gube  
 Okalibe-kakota-shii epha;
- 2 mbu g'a gbeshije l'utsu  
 je epfukasharu ndiphe  
 ke n-yemobu ngu ono.  
 Teke o rwuru lenyashi;  
 eeje epfuaru phe gi  
 bu-be onye apfushije ike l'iphe,  
 i pfuru.
- 3 Iphe, ee-gude aku iya le  
 nkwa bu une,  
 a kparu l'udo iri;  
 yee ogelenda,  
 aha gengugengu;
- 4 kele gube Chipfu gudewaa

- iphe, dū ree, iimeje mee  
 g'ehu tsoo mu utso.  
 Mu aguje ebvu ehu-utso me mu  
 hūmaepho iphe,  
 i gude eka  
 meshigbaa dobe.
- 5 Gube Chipfu; lewaro g'iphe,  
 iime habe shii.  
 Temē oriri ngu paa omilomi.
- 6 Obenu l'onye egomunggo  
 swehuru ta amadu  
 l'onoo g'o du;  
 ophu o dokwarupho  
 onye-eswe enya  
 egube ono;
- 7 mbu l'a makwaru-a le ndu  
 ejo-iphe akpo-fushi  
 g'eka eswa efushi;  
 teme le ndu iwashi be  
 iphemiphe, ephe eme  
 bukotaepho upete;  
 ole ee-mechakwanaa  
 mebyia phe jasū l'ojejoje.
- 8 Obenu le gube Chipfu paru  
 eka jasū le tuutuutuu  
 le mijimiimii.
- 9 Gube Chipfu; ndu ohogu ngu  
 e-mechakwaa buru  
 mkpurupyata;  
 mbu-a; ndu ejo-iphe gephe  
 hakotakpoo be  
 ee-mechakwaa  
 chika nanu nanu.
- 10 Obenu l'i meru;  
 okpahu mu du ge k'atsū.  
 I bya eworu manū,  
 eshi mkpo wua mu l'ishi.
- 11 Mu gudewaa enya mu hūma  
 le ndu ohogu mu phe  
 be e mekperu;  
 bya egude nchi mu nūma  
 le ndu ejo-iphe,

- wulihuru etso mu opfu  
 bẹ a vūwaru  
 l'ogbarabvu.
- 12 Ndu pfuberekoto a-ṅodu  
 aja ajaja gẹ mpfu.  
 Ephe a-ṅodu evu evuvu  
 g'oshi sida k'úbvú  
 úbvú Lébanṅonu,
- 13 e yeru l'ime ọlo  
 kẹ Chipfu.  
 Ephe a-ṅodu l'okpoku Chileke  
 anyi asọ pulapula.
- 14 Ephe -kahuchakpoo akahụ;  
 ephe amile-a mebyi.  
 Ephe aduete-a nwata nwata;  
 bya amaete-a rooro;
- 15 k'ophu ephe e-shi nno  
 goshi lẹ Chipfu bụ onye  
 pfuberekoto;  
 bya aburu  
 agbara-mkpuma nkemu;  
 teme ophu o dudu iphe,  
 apfuduru-oto,  
 oomeje.

### Ebvú-oma 93

- 1 Chipfu buakwaa eze!  
 Akpabiri bẹ o gbaphuru  
 g'onye gbaphuru ekwa;  
 bya agbaphukwapho  
 okpehu g'onye  
 gbaphuru ekwa.  
 Mgboko bẹ o meru;  
 o nguru anguru;  
 k'ophu bụ l'o to dudu  
 onye suru iya enwubata.
- 2 Aba-eze ngu nguru anguru  
 e shi l'edenwede.  
 Gubedua shiro l'ojeje  
 noduta.
- 3 Gube Chipfu;

eze-onyimu byaakwaru  
 utso;  
 mbu l'eze-onyimu be  
 aanuakwa ukporo iya  
 l'eka ooso ke gborogboro;  
 teme eze-onyimu nodu  
 atuwa oke akparamini  
 gude abya utso.

- 4 Obenu le Chipfu,  
 bu l'igwe paru eka;  
 k'ophu bu l'olu nkiya  
 daghataru mgbeka,  
 eze-onyimu anoduje echi.  
 Teme okpehu nkiya ka k'oke  
 akparamini  
 eze-onyimu shii.
- 5 Gube Chipfu; iphe,  
 i toru okpa iya su g'e tsoje  
 be i meru;  
 o pfuru pfushia ike.  
 Ulo ngu bu iphe, meru iya;  
 o du ubvu l'anya bu  
 l'o du nsu;  
 teme o buru g'oo-du iya  
 bu ono gbiriri  
 jasu le tuutuutuu  
 le mijimiimii.

### Ebvu-oma 94

- 1 Gube Chipfu, bu Chileke,  
 bu onye agwataje ugwo iphe;  
 jiko wanaa g'enyawu  
 g'a huma ngu!
- 2 Gbalihunu gube onye ekpeje  
 mgboko l'ophu ikpe!  
 Jiko pfunaa ndu eku onwophe  
 ugwo, gbaru phe nu!
- 3 Gube Chipfu; ?ndu ejo-iphe  
 a-gbokpo kwakoko-a,  
 ephe agbo-a jasu teke ole?
- 4 Ndu eme ejo-ememe

- anọduje etu onwophẹ  
 ophushugbu.  
 Ẹphe eṣfunukaje okporokpo  
 opfu,  
 onu phẹ asudu eṣfufu.
- 5 Ndibe gube Chipfu bẹ ẹphe  
 egweje uji; mbụ ndu ono,  
 bụ okiphe ngu ono bẹ ẹphe  
 akpapyashị ishi.
- 6 Ụnwanyi, ji phẹ nwuhuru;  
 yẹe ndu lwaru alwalwa  
 bẹ ẹphe aphuje aphupu.  
 Ẹphe eworu ndu enwedu  
 nna gbushia.
- 7 Ọobujeru; ẹphe -nọdu;  
 ẹphe asụ: “Chipfu ta adukwa  
 iphe, ọohumaje;  
 mbụ lẹ Chileke kẹ Jiékọpu  
 ta adukwa iphe,  
 ọokpa ishi iya.”
- 8 G'owa-a dokwaa unu ẹnya;  
 unubẹ ndu egomunggo  
 swehuru l'echilabo  
 unwu-eliphe; mbụ-a;  
 unubẹ ndu eme eswe;  
 ?bụ teke ole bẹ  
 unu a-makpọoru iphe?
- 9 ?Bụ onye ono, bụ iya  
 pṣuberu nemadzụ nchị  
 ta anudu iphe  
 lẹ nchị?  
 Tọo ?bụ onye ono,  
 moberu nemadzụ ẹnya  
 ta aphudu ọzo l'onwiya?
- 10 ?Buchia onye ono,  
 agbeje ahụ ndu amadu  
 iya nū ahùhù ono  
 te edobedu unu g'unu  
 a-du;  
 mbụ ?bụ yẹbedua ono,  
 anọduje ezi nemadzụ  
 mmamiphe gbẹchia ophu



- ọ madu iphe l'onwiya?  
 11 Chipfu makotaru iphe,  
 nemadzu anoduje ari.  
 O maru l'oriri phe bukota  
 iphe-mmanu.
- 12 Su-a; ehu-utso be a goru  
 nu onye gube Chipfu  
 ahuje ahuhu;  
 mbu onye igudeje ekemu  
 ngu ezi iphe.
- 13 Onye ono be iimeje ge  
 meji nmapfuru m'o  
 nodu eje iphe-ehuka;  
 jasu mboku,  
 ee-bu nsu ge ndu ejo-iphe  
 wulahu.
- 14 Noo kele Chipfu ta  
 abyakpoda aha ndibe  
 iya;  
 ophu o byakpoda ekwe ge  
 ndu bu okiphe iya laa l'iswi.
- 15 Noo kele ndu-ikpe a-wata  
 ekpe ikpe, pfuru oto.  
 O buerupho ndu obu phe guru  
 iphoro bu ndu a-du ike  
 tsokota ikpe ono.
- 16 ?Bu onye a-gbeshi pfu-doru  
 mu;  
 mekpeeru mu ndu  
 ejo-iphe?  
 ?Bu onye a-pfuru l'ekiya  
 nkemu lwu-kpeeru mu ndu  
 eme ejo-ememe?
- 17 O to bu le Chipfu gbaru  
 mu mkpu;  
 me mu anoduhawaro l'ali  
 o-laru-nodu-nggujungguji  
 teke du enya.
- 18 Teke mu chiru mkpu su  
 l'epurukutu echikotaakwa  
 mu be n-yemobu nkengu  
 wotaru mu ge mu ta ada.

- 19 Teke mu wataru ari oke oriri  
 be i duru mu obu mee;  
 ehuru tsoahaa mu utso.
- 20 ?Ii-kwe ge gu le ndu-ishi,  
 ete emedu iphe,  
 pfuru oto megba iphe;  
 mbu ndu egudeje ekemu  
 emekpa ndu ephe achi ehuru?
- 21 Ephe edzukobeje g'ephe  
 kpapayaa ndu  
 pfuberekoto ishi.  
 Ephe woru onye adudu iphe,  
 o meru kpee mpfugbu.
- 22 Obenu l'oo Chipfu bu onye  
 egbobutaje mu nu.  
 Oo Chileke mu bu oke  
 agbara-mkpuma ono,  
 mu agbabaje je  
 edomia onwomu ono.
- 23 Oo ya a-pfu phe ugwo iphe-eji,  
 ephe eme;  
 teme o buru iya e-mebyishi  
 phe k'ejo-iphe ono,  
 ephe eme ono.  
 Oo Chipfu, bu Chileke anyi  
 e-mebyishi phe.

### Ebvu-oma 95

- 1 Unu bya g'anyi gu ebvu  
 ehuru-utso gude jaa  
 Chipfu!  
 Unu g'anyi tu uzu ehuru-utso  
 gude kwabe iya ubvu;  
 mbu onye ono,  
 bu agbara-mkpuma,  
 adzoje anyi ono!
- 2 Unu g'anyi bya l'iphu iya bya  
 ekele iya ekele!  
 Anyi egude ebvu-oma tu  
 uzu ehuru-utso gude kwabe  
 iya ubvu!

- 3 Kele Chipfu bu Chileke,  
 parụ ẹka;  
 bya aburu onye eze,  
 parụ ẹka;  
 onye kakota agwa,  
 ndu mgboko l'ophu shii.
- 4 Eka omilomi ali jeberu  
 bu iya be o du l'eka.  
 Mkpakponu oke ubvu  
 buru iya nwe iya.
- 5 Eze Enyimu bu nkiya kele oo  
 ya meru iya;  
 teme o buru iya gude aka  
 iya meta ali-okponku dobe.
- 6 Unu bya g'anyi phozeta  
 baaru iya aja!  
 G'anyi gbua ikpere l'iphu  
 Chipfu ono, bu iya meru  
 anyi ono.
- 7 Kele oo ya bu Chileke anyi.  
 Anyi buru ndu ooche g'onye  
 eche aturu;  
 mbu anyi buru unwu  
 aturu, no iya l'eka.  
 Oo ya bu; teke unu numaru  
 olu iya ntanu owa;
- 8 Unu ta akpochikwa obu  
 unu ge ndiche unu  
 phe kpochiru iya  
 le Meriba.  
 Waa g'ephe kpochiru iya  
 le Masa l'echiegu;
- 9 mbu aka ono, ndiche unu  
 phe noru hua yeba  
 Chileke ama bya  
 adalekwaa ya pho adale;  
 l'eka ephe gudechaa  
 enya phe huma iphe,  
 ya meru.
- 10 Ukporo apha labo  
 mgburugburu be ogbo  
 ono mekotaru yeba

Chileke iphe-eghu.  
 Ya s̄uru l'egomunggo ph̄e  
 jephuhuwaru  
 l'eme iphe-̄ji;  
 ̄phu ēphe ekwedu  
 alwaphuta az̄u bya eshia ̄zo,  
 ya goshiru ph̄e.

- 11 Oo ya b̄u; mu gude ̄hu-eghu  
 buta anḡu ria s̄u:  
 “Ēphe ta abyad̄u abata l'̄eka  
 mu l'̄ephe a-n̄odu  
 t̄uta unme.”

### Ebvu-oma 96

- 1 Unu ḡua ebvu ̄ph̄úú n̄u  
 Chipfu!  
 G'̄unwu-eliphe l'ophu ḡunaa  
 ebvu n̄u Chipfu!
- 2 Unu ḡua ebvu n̄u Chipfu;  
 unu tua ya ēpha!  
 Unu raj̄e iya arara  
 mb̄oku-mb̄oku  
 l'̄odzoje nemad̄u!
- 3 Unu t̄aru ndu ̄hozo ̄nu g'̄o  
 d̄u-be biribiri!  
 Unu epfuaru ndiphe l'ophu iphe,  
 d̄u biribiri, oomeje!
- 4 Noo k̄ele Chipfu par̄u ̄eka;  
 bya ab̄uru onye ḡbaru  
 g'a jaj̄e iya ajaja.  
 G'a ts̄ujekwa iya ph̄o ebvu l'̄o  
 kak̄ota iphe, b̄u agwa  
 ndu mgboko l'ophu shii.
- 5 K̄ele agwa ndiphe l'ophu  
 b̄ukota iphe, e gude ̄eka mee;  
 obenu l̄e Chipfu b̄u iya  
 gude ̄eka iya mee igwe  
 l'onwiya.
- 6 Akpabiri ȳe ogbunw̄iinwii  
 b̄e n̄o iya l'ataphu;  
 t̄eme ̄kp̄ehu waa

- ọdu-biribiri t̀kọep̄ho  
 ̀lọ iya, d̀ n̄sọ sweta.
- 7 Unubẹ ipfu l'ipfu,  
 d̀ lẹ mgboko-a;  
 unu kwabẹ Chipfu ùbv̀!
- Unu pfua g'ọ d̀-*be* biribiri;  
 yẹ g'ọkpehu iya habe shii!
- 8 Unu kwabẹ Chipfu ùbv̀,  
 gbaru iya ǹ!
- Unu bya an̄ Chileke iphe  
 l'ọkpoku iya!
- 9 Unu yee ad̀ n̄sọ g'onye yeru  
 uwe baar̀ Chipfu ẹja!
- Unubẹ ndiphe l'ophu;  
 unu tsuje iya ebvu!
- 10 Unu kar̀ ọhamoha lẹ Chipfu  
 buakwaa eze;  
 tẹme l'eliphe l'ophu bẹ e  
 mewaru g'ọ nguru anguru;  
 k'ophu b̀ l'ọ tọ dudu iphe,  
 suru iya enwubata.
- Ọ buru Chipfu ono e-kpe  
 unwu-eliphe  
 mgburugburu ikpe,  
 pfuru ọto.
- 11 G'imigwe l'ophu tee ẹswa;  
 ẹhu atsọ ndiphe l'ophu  
 ọtso!
- G'eze-ẹnyimu yẹ iphemiphe,  
 nọ iya l'ime t̀kokwa  
 t̀a oke akparamini!
- 12 G'egu l'ophu m̀kpoo  
 iphemiphe, nọ iya  
 ǹ t̀ko gbọo ọgboo!
- Noo teke iphe, b̀ oshi,  
 d̀ l'oswa a-g̀ ebvu  
 ẹhu-ọtso l'iphu Chipfu.
- 13 Ẹphe a-n̄du l'iphu Chipfu  
 g̀a ebvu  
 kẹle ọobyawaa ekpe  
 unwu-eliphe ikpe.
- Oo-gude apfubekoto iya kpee

mgboko l'ophu ikpe;  
 bya egude ire-lanu  
 kpee ndiphe ikpe.

### Ebvu-oma 97

- 1 Chipfu buakwaa eze; g'ehu  
 tsoo ndiphe l'ophu utso!  
 G'iphe, bukpoo ohamoha,  
 bukube eze-enyimu  
 tekwa eswa!
- 2 Urwukpu me ochii no-pheru  
 iya mgburugburu.  
 O buru apfubekoto yee  
 ikpe, pfuru oto be e gude  
 tua okpa aba-eze iya.
- 3 Oku evujeru uzo je atuko  
 ndu ohogu iya,  
 no-pheru iya mgburugburu  
 kepyashia.
- 4 Ebemu, oolo phaaphaa buru  
 iphoro, e gude ahuma  
 uzo l'eliphe.  
 Ndiphe l'ophu -huma iya;  
 ephe anmahu jijijiji.
- 5 Ubvu l'ophu azashihuje  
 g'unwu m'ephe nodu  
 l'iphu Chipfu;  
 mbu m'ephe nodu  
 l'iphu Nnajiuphu ophu  
 nwe mgboko l'ophu.
- 6 Akpaminigwe l'ophu atu  
 onu lo bu onye  
 pfuberu-eka-oto;  
 teme ndiphe l'ophu nodu  
 ahumaje go du-be  
 biribiri.
- 7 Iphe, bukota ndu abaru iphe,  
 a pyiru apyipyi aja;  
 mbu ndu gude nshi  
 eku onwophe be e  
 mekotaru iphe-iphere.

- Unubẹ nshi l'ophu;  
 unu bya abaarụ  
 Chileke ẹja!
- 8 Ndu bu ẹ Zayonu nùmaru  
 iya; ẹphe teahaa ẹswa.  
 Ndu Jiuda bẹ ẹhu atso uto  
 ẹ gẹ gube Chipfu egudeje  
 ekpe ikpe.
- 9 Kẹle gube Chipfu bu  
 Ọkalibe-kakota-shii  
 ẹ mgboko mgburugburu.  
 I kangokotaru agwa,  
 no ẹ mgboko-a l'ophu.
- 10 Gẹ ndu yeru Chipfu obu  
 kpokwa ẹjo iphe-ashi;  
 kẹle o kwa ndu duru iya  
 nsọ bẹ ooletajẹ ẹnya.  
 O buru phe bẹ onafutaje  
 l'eka ndu ẹjo-iphe.
- 11 Ìphóró bẹ e meru g'ọ duru  
 ndu pfuberekoto.  
 Ndu obu guru ìphóró bẹ e  
 meru g'ẹhu-uto ji ẹhu.
- 12 Unu nodu l'eka Chipfu  
 tee ẹswa; unubẹ ndu  
 pfuberekoto!  
 Unu tua ya ẹpha;  
 l'ẹpha iya dụ nsọ.

## Ebvú-oma 98

### Ebvú-oma

- 1 Unu gụa ebvu òphúú nù  
 Chipfu;  
 kẹle o meru iphe, dụ biribiri.  
 Oo ẹkutara iya;  
 waa oshi-eka iya ono,  
 dụ nsọ ono bẹ o gude  
 lwụ-kpee okpobe  
 alwụ-kpe.
- 2 Chipfu mewaru g'a maru

l'odzofutaje;  
 bya emewaa g'ohamoha  
 maru l'ọ bụ onye  
 pfuberekoto.

3 Ọ nyatawaru n-yemobu,  
 o yeru ọnu-ulo Ízurelu;  
 yee ire-lanu,  
 oomeru phe.

Je akpaa l'eka igwe beru  
 ali beru be a  
 huma-dzuwaru ge  
 Chileke anyi egudeje  
 adzo nemadzu.

4 Unu tua uzu ehu-utso gude  
 kwabe Chipfu ubvu;  
 unube unwu-eliphe  
 l'ophu!

Unu gua ebvu-oma gushia  
 ya ike gude jaa Chipfu!

5 Unu gude une gua  
 ebvu-oma gude tua  
 Chipfu epha.

Unu egudekwapho une;  
 yee ebvu-ekwekwe  
 jaa ya ajaja.

6 Unu gburu opu ye iya;  
 phua upyi ye iya.  
 Unu tua uzu ehu-utso gude  
 kwabe Chipfu, bu  
 eze ubvu.

7 G'oke enyimu yee iphemiphe,  
 no iya l'ime tukokwa tua  
 oke akparamini.

Mgboko l'ophu atua uzu;  
 yee iphemiphe,  
 bu l'ime iya.

8 G'enyimu enyimu,  
 nogbaa nu tuko  
 kua eka.

Ubvú ubvú anokobe  
 gua ebvu l'ehu atso  
 phe utso.



9 G'ephe tuko nodu l'iphu  
 Chipfu gua ebvu;  
 kele oobyawaa ekpe  
 unwu-eliphe ikpe.  
 Ndu mgboko l'ophu be  
 oo-kpe ikpe,  
 pfuru oto;  
 teme lo hakwarupho  
 ndiphe l'ophu enge,  
 pfuru nhamunha.

### Ebvu-oma 99

- 1 Chipfu buakwaa Eze.  
 Ge ndiphe nmahukwa  
 pyaapyaapya.  
 Aba-eze iya no lechilabo  
 chierobu.  
 Ge mgboko l'ophu nmaa  
 yigayiga.
- 2 Chipfu pakwaru aka;  
 mbu onye ono,  
 bu le Zayonu.  
 E woliru iya eli;  
 o kakota ohamoha shii.
- 3 G'ephe jaa epha ngu,  
 bu Okalibe ajaja;  
 mbu epha ngu ono du no;  
 ndiphe nodu atsu iya ebvu.
- 4 Eze obu paru aka.  
 Iphe, aduje iya ree bu ikpe,  
 pfuru oto.  
 Eme iphe enya-nhamunha  
 be i meru dobe;  
 o nguru anguru.  
 Lehu unwu Jiekopu be  
 i meru iphe, pfuru oto;  
 waa umere,  
 pfuru nhamunha.
- 5 Unu kutsee Chipfu,  
 bu Chileke anyi.  
 Unu bya ephozeta le mgboru

- ọkpa iya baarú iya eja.  
 O dú nsọ.  
 6 Mósísu yẹ Eronu shi yírú  
 lẹ ndu bú uke kẹ Chileke.  
 Sámẹlu shi yírú lẹ ndu  
 shi akpọ-kuje ẹpha iya.  
 Ndu ono shi ekuje ẹpha  
 Chipfu; l'ọ za phẹ ẹnu.  
 7 O shi anọduje l'urwukpu,  
 kpuru oronmono  
 pfuru opfu nọ phẹ.  
 Ẹphe shi edobeje ekemu iya  
 bya eme omelali,  
 ọ toru phẹ ọkpa iya.  
 8 Gúbe Chipfu, bú Chileke  
 anyi;  
 i shi azajẹ phẹ ẹnu.  
 A makwarú-a l'i shi ahùje  
 ndu Ízurelu ahùhù  
 m'ẹphe shiswee ọzo ngu;  
 obenu l'i shi búru phẹ  
 Chileke,  
 agújeru onye meru  
 iphe-ẹji nvú.  
 9 Unu kutsee Chipfu,  
 bú Chileke anyi.  
 Unu baarú iya eja l'úbvú iya,  
 dú nsọ; kẹle Chipfu,  
 bú Chileke anyi  
 dúkwa nsọ.

## Ebvú-oma 100

**Ebvú-oma, e gude  
ekele Chipfu ekele**

- 1 Unu tọa ọzu ẹhu-ọtso gude  
 kwabẹ Chipfu ùbvù;  
 unubẹ unwu-eliphe l'ophu.  
 2 Unu gude ẹhu-ọtso jeru  
 Chipfu ozi.  
 Unu gude ebvú ẹhu-ọtso gude

- bya l'iphu iya.  
 3 Unu makwaru lẹ Chipfu  
 bu Chileke.  
 Oo ya meru anyi;  
 teme anyi buru nkiya.  
 Anyi bu ndibe iya;  
 bya aburu aturu,  
 ooche echeche.  
 4 Unu gude ebvu-ekele bahu  
 ibe iya.  
 Unu egude ebvu-ajaja  
 jerwua l'okpoku iya.  
 Kele iya ekele tua  
 ya epha.  
 5 Kele Chipfu bu onye oma;  
 teme n-yemobu nkiya  
 nodu anoje jasụ  
 l'ojejoje.  
 Oopfushije ike l'iphe,  
 o pfuru; e -shi l'ogbo  
 sweru ogbo.

## Ebvü-oma 101

### Ebvü-oma, Dévidi deru

- 1 Mu a-gu ebvu guku  
 n-yemobu ngu;  
 yee ikpe ngu, pfuru oto.  
 Mu a-gu ebvu gude tua gube  
 Chipfu epha.  
 2 Ndzụ mu be mu a-to nwehu  
 mee g'o to du eka uta  
 a-du iya.  
 ?Bukpoo teke ole be  
 ii-kpafuta mu?  
 Mu e-gude obu, adudu eka  
 uta du iya buru l'ibe mu.  
 3 O to dudu ejo-iphe,  
 mu bya ekwe g'o shisweta  
 mu iphu.  
 Umere ndu te etsodu okpobe

opfu ono du mu ashi;  
 ophu mu ahadu ge mu  
 l'ephe rakuru.

4 Ndu uzo phe gberu nggo be  
 mu a-chifuje l'eka mu no;  
 ophu o dudu iphe,  
 anyi l'ejo-iphe jigba.

5 Ndu anoduje evu nwibe  
 phe nvu-azu be mu  
 e-me g'ephe buru  
 ola-l'iswi.

Ndu etu onwophe  
 ophushugbu;  
 waa ndu eku-onwonye  
 du l'obu be mu ta  
 atagbukwa le nshi.

6 Ndu apfushije ike l'iphe,  
 ephe pfuru le mkpukpu-a  
 be mu a-nodu eleta enya;  
 k'ophu anyi l'ephe  
 a-tuko buru jasuru;  
 mbu l'onye uta  
 adudu l'iphe,  
 oome e-mechaa ejeru  
 mu ozi.

7 O to dudu ndu erede  
 m'onye lanu,  
 mu bya ekwe g'o buru  
 l'ibe mu;  
 ophu o dukwapho ndu  
 atu kporoko m'onye lanu,  
 mu bya ekwe go pfuru  
 pfushia ike  
 l'iphu mu.

8 Utsu mboku-mboku be mu  
 e-meje g'iphe,  
 bu ndu ejo-iphe,  
 no l'ali-a dobe onu doo.

Mu a-tuko ndu eme iphe-eji  
 bufu le mkpukpu  
 ke Chipfu.

## Ebvu-oma 102

Epfupfu, onye eje iphe-ehuka  
epfu anụ Chileke

Opfu, o pfuru teke ike abvụ  
iya abvubvu; gụru aphụ,  
nọ iya l'obu nụ Chipfu

- 1 Numanu epfupfu, mu epfu  
anụ ngu jiko Chipfu!  
Gẹ mkpu, mu echi rwunaa  
ngu nchị!
- 2 Ta agbakutakwaru mu azụ  
nta-a, mu eje iphe-ehuka-a!  
Ngabenu mu nchị!  
Zanụ mu enu egwegwa  
nta-a,  
mu eku ngu oku-a!
- 3 Kele ndzụ mu l'ophu  
phukahwaru  
g'enwuru-oku.  
Okpu mu nọdu enwu  
phuruphuru g'icheku-oku.
- 4 Obu mu bẹ e gburu  
pyaapya;  
ọ nwua lwaa g'eswa;  
k'ophu o meru mu;  
mu zohaa eri nri.
- 5 Mu tsuwaru oke ude  
gbiriri jasụ mu wufu  
koru g'eda akpọ;  
bya aburu okpu wushiru.
- 6 Mu dụ gẹ mgbashi-ujiku,  
kwaru l'echiegu;  
gẹ mgbashi-ujiku,  
beru l'eka e meru  
umerekete.
- 7 Mu zẹ nwuru enya.  
Mu duwaa gẹ nwenu,  
beru nkinyi iya l'eli  
mkpotsu-ulo.
- 8 Ndu ohogu mu anoduje

- ekweru mu une mkp̄urumkpuru.  
 Teme ndu achì mu lẹ njo  
 gudewaa epha mu  
 ephu iphu.
- 9 Oo ntụ bẹ mu erije l'ọ  
 buru mu nri.  
 Mu nọdu ewojeru ẹnya-mini  
 gwakọbe l'iphe,  
 mu angụ angungu.
- 10 O buru iphe, kparụ iya nū  
 bụ l'ẹhu eghushi ngu  
 eghu ike;  
 kele i woliwaru mu bya  
 eworu tuphaa etupha.
- 11 Nwujiku ole, mu a-nọ  
 l'eliphe-a dụwaa  
 g'ononyo ụzenyashi.  
 Mu anọdujeepho anwụ  
 lwaalwaa g'ẹswa.
- 12 Obenu lẹ gube Chipfu  
 sūru gẹdemu l'aba-eze  
 ngu ojejoje;  
 ophu a byadu azọha  
 epha ngu azọha;  
 e -shi l'ogbo sweru ogbo.
- 13 Ịi-gbalihu-a phuru  
 Zayonu obu-imemini;  
 kele o rwuwaru teke  
 ii-meru iya eze-iphe-oma;  
 mbụ mẹ teke ono,  
 a hotakpooru ahota  
 dobe ono rwuepho;
- 14 kele mkpuma iya dụ ndu  
 ejeru ngu ozi mkpa.  
 Oobujeru; o -kpua udzu tūuu;  
 imemini iya adushia phe ike.
- 15 Ohamoha a-tsu epha gube  
 Chipfu ebvu.  
 Ndu eze, nokota lẹ mgboko  
 l'ophu a-kwabẹ  
 o-gbu-nwiiinwii ngu ụbvù;
- 16 kele Chipfu e-gude ẹka iya

- kpukwaa Zayonu;  
 bya egude o-gbu-nwĩinwii  
 ya lufuta.
- 17 Oo-ngabẹ nchị l'epfufu,  
 ndu adudu g'ọ dọ phẹ  
 epfu anụ iya;  
 ọphu oohudu arwọrwo,  
 ẹphe arwọ iya l'ali.
- 18 G'e dee ọwa-a l'ẹkwo  
 doberu ọgbo ọphu  
 aa-nwụ l'iphu;  
 k'ọphu ndu ono,  
 e teke atsutakpodaanu  
 ime phẹ ono e-tu  
 Chipfu ẹpha.
- 19 Lẹ Chipfu gbẹkwa l'eze-ulo  
 iya l'ephekerephe  
 ẹka ọonoje;  
 mbụ l'ọ gbẹ l'imigwe gbua  
 igo l'eliphe;
- 20 gẹ ya numa ude,  
 ndu mkpọro atsu;  
 shi nno mee gẹ ndu e  
 kperu mpfugbu nweru  
 onwophe.
- 21 Oo ya bụ g'aa-kọo kẹ Chipfu  
 lẹ Zayonu;  
 tua ya ẹpha lẹ Jierúsalem;
- 22 mẹ ọhamoha waa  
 ali-eze ndiphe l'ophu  
 dzukọbeephe g'ẹphe baarụ  
 Chipfu ẹja.
- 23 Lẹ mu byakwa ejejaha ụzo  
 ndzụ mu ẹbo;  
 ọ tụtowa ike,  
 shi dọ mu nụ nashichaa  
 mu;  
 bya egbubọta ndzụ mu.
- 24 Oo ya bụ; mu sụ: Te kutashinu  
 mu; jiko Chileke mu;  
 l'ẹbe adụ gẹ mu  
 nọ-bewaru lẹ mgboko;

- lẹ gùbedua bẹ apha  
 nkengu a-nọkwa  
 shi l'ogbo sweru ogbo.  
 25 Eshikpoo lẹ mbu bu ngu  
 turu okpa eliphe l'ophu.  
 Teme o buru ngu gude  
 eka ngu mee igwe.  
 26 Iphemiphe ono e-mechaa  
 lakota l'iyi;  
 obenu lẹ gùbedua  
 l'a-du g'i du;  
 mbu-a; l'iphemiphe ono  
 e-mechakwaa kashihu  
 g'uwe.  
 Oo g'aagbanweje uwe-a  
 bu g'ii-mechaa gbanwee  
 phe; nkephe abvu.  
 27 Obenu lẹ gùbedua  
 buepho onye i bu be i bu;  
 ophu apha nkengu  
 abvudu abvubu.  
 28 Unwu, ndu ejeru ngu ozi  
 nwutaru  
 l'e-buru kwaseru;  
 l'e mekwapho g'awa phe  
 nguru anguru  
 l'iphu ngu.

## Ebvu-oma 103

### Ebvu, Dévidi deru

- 1 Gube obu mu; tua Chipfu  
 epha.  
 Iphe, bukpo iphe, du mu  
 lime ehu; tua onye ono,  
 epha iya du nsọ ono epha.  
 2 Obu mu; jiko tua Chipfu  
 epha;  
 ophu o dukwa urwu,  
 eeritaje iya l'eka me nanu,  
 ii-zoha azoha



- 3 Oogujeru mu nvu l'iphe-eji,  
 mu meru g'ò ha;  
 teme o ñodu emeje ge  
 mu ka mma l'iphe,  
 bukpuo iphe,  
 eme mu nu.
- 4 Oogbafutaje ndzu mu  
 g'ò to la l'ilu;  
 bya ekpube mu n-yemobu;  
 waa obu-imemini g'okpu-eze.
- 5 Oogudeje iphe, du ree zu-jia  
 mu epho;  
 teme o ñodu emeje ge  
 mu lwa azu le nwepa  
 g'ugo.
- 6 Chipfu emeje iphe, pfuru oto;  
 teme o ñodu ekpeje ndu e  
 eme ewere ikpe,  
 pfuru nhamunha.
- 7 O meru ge Mosisu maru  
 uzo iya;  
 bya emee ge ndu Izurelu  
 maru iphemiphe, oome.
- 8 Chipfu bu onye aphuje  
 obu-imemini;  
 bya aburu onye emeje  
 eze-iphe-oma.  
 Ehu te eghujedu iya eghu  
 egwegwa;  
 teme o ñodu eyeje obu  
 yegharu iya eka.
- 9 O too bajedu mba tekenteke;  
 ophu ovujedu ovuma  
 jaswaruroya.
- 10 O too lejedu g'iphe-eji  
 anyi gbaru eme anyi;  
 ophu opfujedu anyi  
 ugwo ejo-iphe,  
 anyi emegbabe.
- 11 Kele oo g'igwe no-be ali  
 ephekerephe bu g'ò habe;  
 mbu eye obu,

- o yeru ndu atsù  
iya ebvu.
- 12 Ọ buru g'ùzo  
ẹnyanwu-awawa dọ-be  
ẹnya l'ùzo ẹnyanwu-adada;  
bù g'ẹka o wofuru emeswe,  
anyi mesweru iya je  
edobe habe ẹnya l'ẹka  
anyi nọ.
- 13 Ọ buru gẹ nna aphujeru nwa  
iya obu-imemini-a;  
bukwapho gẹ Chipfu  
aphujeru ndu atsù iya ebvu  
obu-imemini.
- 14 Kele ọo ya maru g'e gude  
mee anyi.  
Ọonyataje l'ọo urwuku mmanu  
be anyi bu.
- 15 La -bya le nemadzu be eswe  
ndzu iya du g'eswa.  
Ọonoduje aba yoyoyo g'okoko,  
no l'egu.
- 16 Pherephere -ziepho kpua ya  
nwanshi l'o phukashihu.  
Eka o shi nodu ta  
anyatabedu iya ozo.
- 17 Obenu le-a; e -shi le gbururu  
jeye le gbururu be  
n-yemobu ke Chipfu aduje  
lehu ndu atsù iya ebvu;  
teme l'o wokwarupho  
apfubekoto nkiya doberu unwu  
nwanwanwanwa  
ndu ono;
- 18 mbu lehu ndu ophu  
edobeje ogbandzu iya;  
bya anyataje dobe ekemu,  
o turu doberu phe.
- 19 Chipfu mewaru g'aba-eze  
iya nguru anguru l'imigwe;  
teme abubu,  
o bu eze dzuru oha l'ophu.

- 20 Unubẹ ụnwu-ojozi-imigwe  
 ke Chipfu; unu tua ya ẹpha;  
 mbụ unubẹ ndu ike dụ,  
 bya aburu ndu eme  
 opfu iya.
- 21 Unu tua Chipfu ẹpha;  
 unubẹ ụnwu imigwe l'ophu;  
 mbụ unubẹ ndu-ozí iya,  
 l'eme iphe, bụ uche iya.
- 22 Unu tua Chipfu ẹpha;  
 unubẹ iphe,  
 o meru ememe dobe l'ẹka  
 ọ bụ eze.  
 Gbẹbe obu mu; tua Chipfu ẹpha.

### Ebvú-oma 104

- 1 Gbẹbe obu mu; tua Chipfu  
 ẹpha.  
 Gbẹbe Chipfu, bụ Chileke mu;  
 ị parụ ẹka apaa.  
 Ị gbaphuru adu-úbvú yẹ  
 adu-akpabiri g'onye  
 gbaphuru ẹkwa.
- 2 Ịphóró bẹ i yeru g'onye  
 yeru uwe.  
 Imigwe l'ophu bụ gbẹbedua  
 gude ẹka ngu phushi  
 iya g'onye phushiru  
 ụlo-ẹkwa;
- 3 bya eworu uko ụlo ngu  
 gbaa l'eli akpaminigwe.  
 I meru urwukpu;  
 ọ bụru ụgbo-inya ngu.  
 Ị nọdu atukojeru pherephere  
 lẹ ñkù ephe.
- 4 I meru pherephere;  
 ọ bụru onye-ozí ngu;  
 bya emee  
 onwu-phuruphuru-ọku;  
 ọ bụru onye iizije ozi.
- 5 Ọo ngu turu ọkpa eliphe

- l'ophu;  
 k'ophu bú l'a ta abyadu  
 enwubata iya enwubata  
 jasú l'ojejeje.
- 6 I woru eze-enyimu kpua  
 ya g'onye kpuru uwe;  
 k'ophu mini ha l'eli  
 kakota úbvú l'ophu  
 l'eli.
- 7 Obenu l'ọo mba bẹ ị baru  
 eze-enyimu ono;  
 o keta ọso gbaa mgbalanu;  
 mbu l'ọo numaerupho ọrà,  
 ị gbẹ l'imigwe raa;  
 ọ gbalachaa.
- 8 Ọ nọdu asọ gborogboro awù  
 oke-úbvú awúwù asọ  
 ala l'o-bua-ozee ọkpa úbvú.  
 Ọ sọkwaseru ọzo,  
 ị tọru iya ọkpa iya.
- 9 Ị kpawaru iya oke ẹka ọ tọ  
 sọghatajedu;  
 k'ophu ọ tọ byadu  
 erimigbuba mgboko ọzo.
- 10 O mewaru gẹ mini shije  
 l'ogba gbaa dẹredere  
 kwaseru ọkpa-úbvú.  
 Ootsojeru mgbaka  
 úbvú epyophe.
- 11 Ọ buru iya echebeje unwu  
 anu, bu l'egbudu mini  
 g'ephe ha.  
 Nkapfu-igara-oswa nọdu  
 angu iya mini.
- 12 Enu, ephe l'eli nọdu anọduje  
 l'aguga nggele ono  
 akpa efunne.  
 Ephe nọdu anọduje  
 ebephe l'ekali-oshi ono  
 agu ebvu.
- 13 Ọ nọdu agbeje l'eka o bu  
 agba mini l'úbvú.

- Mgboko l'ophu bẹ iphe,  
oome jikpọru epho.
- 14 Eswa bẹ o meru;  
ọ nọdu erwushije k'ophu  
iphe-edobe a-tajẹ nri;  
bya emee iphe-akọko  
dobe gẹ nemadzu  
gudeje kọo opfu kọbe  
iphe l'ali;
- 15 gude kuta mẹe,  
aanguje g'obu tsọ ọtso;  
bya emeta manu,  
aanyije g'iphu maa mma;  
waa nri,  
eerije gẹ ndzu du.
- 16 Oshi Chipfu bẹ ọogbaje  
mini ree;  
mbu oshi sida ophu du  
l'ubvu ubvu Lebanonu,  
bu oshi ophu o yeru  
l'onwiya.
- 17 O buru l'eli eka ono bẹ enu  
akpaje epfune.  
Eze-oku-eswi-uda woru  
ephekerephe oshi payinu  
mee unuphu ibe iya.
- 18 Oke-ubvu oke-ubvu bu  
ndu bu iya nu bu  
eghu-oswa.  
Ogba buru eka nchi-ogba  
anoduje ezeru ndzu.
- 19 O meru onwa g'e gudeje gu  
apha.  
Enyanwu nodu amajeru teke  
ya a-riba.
- 20 Oobujeru; teke i meru;  
ochii wata agbagba  
lo buru iya bu le  
nchi ejihu.  
Iphe, bukpo anu,  
no l'oswa eshi l'eka epe  
no wufukota jeshia acho

- iphe, ephe e-ri.
- 21 Oduma asuaha ekiri acho  
nri, oo-ri; mbu nri,  
shi l'eka Chileke.
- 22 Teke enyanwu waerupho;  
ephe ezita onwophe ezita;  
je domia l'ogba phe.
- 23 Nemadzū agbeshi teke onoya  
jeshia l'egu.  
Ooje anodu l'egu jee ozi  
jasu l'uzenyashi.
- 24 Gube Chipfu; ozi, iijekota  
bukwa aguta aguta.  
Iphemiphe ono bukotarū  
mmamiphe nkengu be i  
gude mekota iya;  
mbu le mgboko l'ophu  
be iphe,  
jiru iya nu bukota iphe,  
i gude aka mee.
- 25 Eze-enyimu ha shii bya adu  
osa.  
O buru l'ime iya be  
aguta aguta anu bu;  
mbu iphe, no ndzu;  
ndu ophu ha shii;  
me ndu ophu  
ha nwanshii.
- 26 O buru l'eli iya be aanoduje  
angaphe ugbo-mini.  
Teme ejo-oke-agiyi ono,  
bu ngu gude aka ngu  
mee ya ono nodu ebvu  
mini l'ime iya.
- 27 Iphemiphe ono bu ngu be  
ephe tuko ele enya l'eka  
g'i nuje phe nri  
l'orwuberu iya.
- 28 Teke i nuru phe iya;  
ephe achikobe iya  
l'onwophe.  
Teke i saru aka; iphe,

- dụ ree enwushihu;  
 ẹphe egude iya  
 rijia ẹpho.
- 29 Teke i domiru pẹ iphu ngu;  
 ndzụ-agugu erwuta pẹ.  
 Teke ị nataru pẹ unme,  
 ẹphe atu;  
 ẹphe anwuhu buru  
 ẹja ali.
- 30 Teke i kuru Unme ngu ye pẹ  
 l'ehu; ẹphe aburu iphe,  
 e meru k'òphúú.  
 Ị nọdu emeje iphu mgboko  
 l'ophu g'ọ dụ òphúú òphúú.
- 31 G'o-gbu-nwịnwii Chipfu  
 dukwa g'ọ dụ jasụ  
 l'ojejoje.  
 G'ozì, Chipfu gude ẹka iya  
 jee mekwa g'ẹhu tsọ  
 ya uto;
- 32 mbụ onye abujeru;  
 o -lee eliphe l'ophu ẹnya;  
 l'ọ nmahụ pyaapyaapya.  
 Teke ọ byaru ẹka l'eli úbvú;  
 úbvú ọbu akpuhu  
 tọtututu.
- 33 Mu a-nọduje agụ ebvu  
 anụ Chipfu lẹ ndzụ  
 mu l'ophu.  
 Mu a-gụje ebvu gude  
 etu Chileke mu ẹpha  
 jasụ gẹ mu a-nọ-beru.
- 34 Jiko gẹ kẹ nkiya-a,  
 mu ari-a tsokwaa ya uto;  
 noo kẹle iphe,  
 Chipfu anọduje eme  
 emeje g'ẹhu tsọ mu uto.
- 35 Jiko gẹ ndu iphe-ẹji chihu  
 l'eliphe l'ophu;  
 ọphu ndu ẹjo-iphe  
 aduhe adudu ophu.  
 Gube obu mu;

jiko tua Chipfu epha.  
G'ajaja buru ke Chipfu.

### Ebvu-oma 105

- 1 Unu kele Chipfu ekele;  
unu kua epha iya!  
Unu mee g'ohamoha  
madzuru iphe, o meru!
- 2 Unu guku iya l'ebvu!  
Unu gwa ebvu gude tua  
ya epha!  
Unu pfukashikwapho iphe,  
bukpoo iphe, du biribiri,  
oonoduje eme!
- 3 Unu gude epha iya ono,  
du nso tua onwunu epha!  
G'obu ndu achọ Chipfu  
teje eswa!
- 4 Unu wojeru enya dabe  
le Chipfu me l'okpehu  
iya!  
Mbu unu choje iphu  
iya mkpurumkpuru!
- 5 Unu nyatakwa iphe,  
du biribiri, o mekotaru;  
waa iphe-ohumalenya,  
o meshigbaaru;  
waa ikpe, o kperu;
- 6 unube oshilokpa Ebirihamu,  
bu onye-ozu iya;  
unube unwu Jiekoju,  
bu ndu o gude eka iya hota.
- 7 O kwa iya bu Chipfu;  
bya aburu Chileke anyi.  
Ikpe iya tukoru mgboko  
voo pfurupfuru.
- 8 Ogbandzu iya be onyataje  
jasu le tuutuutuu  
le mijimiimii.  
Ukwe-iphe, o kweru be eshije  
l'ogbo sweru ogbo.



- 9 Ọgbandzu ono,  
 ọ́yẹ́ Ẹ́birihamu gbaru ono;  
 mbụ́ angụ́ ono,  
 o riburu Áyizaku ono;
- 10 ẹ́ ọ́ meru; ọ́ bụ́ru ekemu  
 l'ẹ́hu Jíékọ́pu.  
 Ndu Ízuru ẹ́ ọ́ meru iya;  
 ọ́ bụ́ru ọ́gbandzu,  
 a-ọ́ ọ́jejeje;
- 11 sụ́ phẹ́: “Ọ́o unu ẹ́ mu  
 a-nụ́ alí Kénanu  
 g'ọ́ bụ́ru okiphe,  
 unu ketarụ́.”
- 12 Teke ono ẹ́ ẹ́phe shi  
 habe nwahabe;  
 mbụ́ teke ẹ́phe shi  
 ha nwa chíaka-chíaka;  
 bụ́ru ndu lwarụ́  
 alwalwa l'alí ono.
- 13 Ẹ́phe shi etsojeru  
 ọ́hamoha aghaphe.  
 Ẹ́phe -shi l'alí-eze ọ́wa-a;  
 ẹ́phe alufu l'alí-eze  
 ọ́phuu.
- 14 Ọ́phu ọ́ dudu onye o kweru  
 g'o mee phẹ́ ewere.  
 Ọ́ nodu egudeje opfu ẹ́hu  
 phẹ́ baarụ́ ndu eze mba;
- 15 sụ́ phẹ́: “Unu te edenyikwa  
 ndibe mu,  
 mu hofutaru ẹ́ka!  
 Unu ba adukwa iphe,  
 unu e-me ndu epfuchiru  
 mu nù!”
- 16 O meru; ọ́kpa-nri bya l'eliphe;  
 shi nno woru nri,  
 ẹ́phe nweru enweru  
 mebyishichaa.
- 17 O ye nwoke lanụ́ g'o vuru  
 phẹ́ ụ́zo;  
 mbụ́ Jíósefu, onye ono,  
 e reru; ọ́ bụ́ru ohu ono.

- 18 Ẹphe t̄a ya mkp̄oro l'okpa;  
 huswash̄ia ya okpa;  
 bya eworu  
 agadagba-ígwè  
 ye iya l'olu;
- 19 gbiriri jas̄u mbok̄u,  
 o pfuru opfu;  
 ọ v̄a g'o pfuru iya;  
 mb̄u jas̄u opfu,  
 Chipfu pfuru mee g'a  
 maru l'ọ b̄u onye ire-lan̄u.
- 20 Noo ya b̄u; eze zia s̄u g'e je  
 ewehaa ya.  
 Onye b̄u ishi ọha woru iya  
 wehaa;  
 o nweru onwiya.
- 21 O woru iya mee onye-ishi  
 unuphu ibe iya l'ophu;  
 mb̄u onye elek̄ota  
 iphemiphe,  
 o nweru enweru;
- 22 s̄u iya g'ọ h̄ùje ndu-ishi  
 ah̄ùh̄ù teke d̄u iya ree;  
 l'o zije ndu b̄u ọgerenya  
 l'al̄i-eze iya mmamiphe.
- 23 Ọo ya b̄u; ndu Ịzur̄el̄u  
 lanaa Ijiputu.  
 Ndibe Jiék̄opu jen̄u  
 ab̄uru ndu lwar̄u alwalwa  
 l'al̄i Hamu.
- 24 Chipfu bya emee ndibe iya;  
 ẹphe n̄odu az̄u az̄uz̄u  
 shii.  
 O m̄e p̄h̄e; ẹphe paa igwerigwe;  
 shi nno kapyab̄e ndu  
 ọhogu p̄h̄e.
- 25 O woru obu ndu ọhogu p̄h̄e  
 ono ghaphua.  
 Ndibe Chipfu ono bya ad̄u  
 ndu ono ash̄i.  
 Ẹphe wata ach̄iru ndu-oz̄i  
 iya ono ẹjo idzu.

- 26 O bya ahota Mosisu,  
 bu onye-ozu iya;  
 bya ahota Eronu bya  
 eworu phe zia;
- 27 ephe je emeshia  
 iphe-ohumalenya  
 nkiya l'echilabo phe;  
 bya egoshi phe iphe,  
 du biribiri ke Chipfu  
 l'ali Hamu.
- 28 O ziru ochii ozi;  
 o je emee ali ono;  
 o gbahu tsukiriba;  
 noo kele ndu Ijiputu  
 kwefuru opfu Chileke ike.
- 29 O bya emee; mini,  
 no l'ali phe ghokota  
 mee.  
 Ema, du iya nu toko  
 nwushihukota.
- 30 Mbara toko ali phe  
 mgburugburu jikota  
 pyimu kwochaa  
 nkwo tankwo;  
 bahuchaa le mkpuru  
 aka ndu-ishi ali phe  
 akwaje akwakwa.
- 31 O bua opfu be o pfuru;  
 ijiji tsuaha gbiigbiigbi;  
 teme mkporumkpu  
 tukoeppo ali aka  
 ono sweta.
- 32 Igwe haa edze mini  
 wata atu akamini;  
 bya atuhaha egbigwe  
 gbaagbaa l'ali phe l'ophu;
- 33 bya atupyashia vayinu phe  
 me oshi figu phe;  
 bya atuko oshi,  
 no l'ali phe l'ophu  
 zijashikota.
- 34 O gbeshikwa ozo bya epfua

- opfu; igube wata etsutsu;  
mbụ ogu, etsu gbiigbiigbi  
bụru agụta agụta.
- 35 Ẹphe tuko iphe, dzụ ndzụ,  
ẹkwo dụ tapyashikota  
l'ali phe l'ophu; mbụ tuko  
iphe,  
ẹphe meberu l'ali g'ọ ha  
tapyashia.
- 36 Ọ gbẹ teke ono bya atuko  
ndu bụ ọkpara  
l'ali phe gbushia;  
mbụ tuko nwa,  
vuru ụzo kpọo phe iphu  
mee umerekete.
- 37 Ọ bya edufuta ndu Ízurelu;  
kporu mkpọla-ododo  
yee mkpọla-ọchaa kpojia  
phe ẹka;  
ophu ọ dudu unwu  
Ízurelu ono g'ọ ka mma  
l'ọo onye lanụ,  
mkpọ kpọru l'ọkpa.
- 38 Ẹhu tsoo Ijiputu ntumatu  
g'ẹphe tugbuerupho;  
kele ẹphe shi atsụwa  
ndu Ízurelu ebvu  
shingushingu.
- 39 Ọ bya aphushiaru phe  
urwukpu gude kpuchia phe;  
bya akpọberu phe ọku  
g'ẹphe gude hụma  
ìphóró l'enyashi.
- 40 Ẹphe sụru g'a nụ phe nri;  
Chipfu bya achiru ọkwà  
nụ phe;  
bya egude nri,  
shi l'igwe zụ-jia phe epho.
- 41 Oke mkpuma bẹ ọ tūharu  
ụzo; mini shi iya soshihu;  
mbụ asọ gẹ nggele  
l'echiegu ono;

- 42 noo kele ọ nyataru  
ukwe-iphe, du nsọ,  
o kweru nu onye-ozu iya,  
bu Ebirhamu.
- 43 O dufuta ndibe iya;  
ehu ndu atso phe.  
Epe ndu atụ uzu ehu-utso  
gude eje afuta;  
mbu ndu ono, ọ hotaru ono.
- 44 O woru ali ndu ohozo woru  
nu phe.  
O buru eka ndu ozo riru aphu  
iya be epe wotaru;  
ọ buru okiphe phe;
- 45 k'ophu epe a-wata eme  
omelali iya;  
dobeahaa ekemu,  
shi iya l'eka.  
G'ajaja buru ke Chipfu.

### Ebvú-oma 106

- 1 G'ajaja buru ke Chipfu.  
Unu kele Chipfu ekele;  
kele ọ bu onye oma.  
N-yemobu nkiya anoje  
jasu l'ojeje.
- 2 ?Bu onye a-du ike tu a onu  
g'iphe,  
Chipfu eme habe shii?  
Too; ?denu onye a-du  
ike tugbabe Chipfu epha iphe,  
oomeebe?
- 3 Ehu-utso be a goru nu ndu  
anoduje eme iphe,  
du nhamunha;  
mbu ndu ono,  
anoduje eme iphe,  
pfuru oto tekenteke.
- 4 Nyatakwa mu jiko Chipfu;  
teke ii-wata egoshi le  
ndibe ngu du ngu l'obu!

- Byakwa agbaarụ mu mkpu  
 m'ị byatashia phe adzota!
- 5 K'ophu mu a-huma o-du-ree,  
 i doberu ndu i hotaru;  
 tsokwaru pho oha ono,  
 bu nkengu ono tee eswa;  
 mbu tsoru ndu ono,  
 bu okiphe ngu ono tua  
 ngu epha.
- 6 Anyi meakwaru iphe-eji ge nna  
 anyi oche phe meru.  
 Anyi mekwaru ejo-iphe;  
 mbu l'anyi mewaru iphe,  
 apfuduru-oto.
- 7 Teke nna anyi oche  
 phe shi nodu le Ijiputu  
 be iphe, du biribiri,  
 i shi emeje te eshidu  
 edoje phe enya.
- Ophu o dudu ikpoto  
 iphe-oma ngu, duru ophu  
 ephe nyataru.  
 Ephe kwefuru ngu ike  
 l'aguga Eze-enyimu  
 Uswe-uswe ono.
- 8 O le o gudeele-a gepha iya  
 apfuru dzoo phe;  
 k'ophu aa-maru l'epha  
 iya paru eka apaa.
- 9 O baru Eze-enyimu  
 Uswe-uswe mba; mini,  
 no iya nu tashihu.  
 O dua phe ghaa echi  
 ogbu-mini g'onye agha  
 echiegu.
- 10 O dzotaru phe l'eka ndu  
 ohogu phe;  
 gbafuta phe l'eka ndu ephe  
 du ashi.
- 11 Mini rikota ndu achi phe  
 le njo;  
 ophu o dudu g'o ka mma

- l'oo onye lanu, waru nu.  
 12 Noo teke ephe kwetaru l'iphe,  
 o kweru ukwe ememe be oomeje;  
 bya agwa ebvu gude tua  
 ya epha.
- 13 Ophu o dudu g'ọ no-beru;  
 ephe zohaa iphe ono,  
 o meru ono;  
 teme ophu ephe angabejeedu  
 g'ọ chi-koshi phe idzu.
- 14 Ephe rwua l'echiegu ono;  
 ephe wata eme iphe,  
 agu phe nu;  
 mbu o buru l'ali ono,  
 dabyiru mgbegere ono  
 be ephe huru Chileke ama.
- 15 Oo ya bu; o nunu phe iphe,  
 ephe suru g'a nu phe.  
 O nuchanaa phe iya;  
 bya evuru ejo iphe-ememe  
 byabe phe l'ishi.
- 16 Ephe rwua l'eka ephe  
 kpoberu ulo-ekwa  
 phe gephe butota.  
 O duru ndu wataru ejiru  
 Mosisu yee Eronu ijiyenya;  
 mbu umadzu labo ono,  
 Chipfu hotaru dobe iche  
 ono.
- 17 Noo ya; ali ghekahu ebo  
 lwee Detanu;  
 bya atuko Abiramu yee ndu  
 ephe l'iya swi lia le ndzu.
- 18 Teme oku nwulihu ke  
 phoophoophoo bya  
 etsufu ndu etsoje phe nu.  
 Oku ono tukoeppo ndu  
 ejo-iphe ono tsufu.
- 19 Ephe rwukwaa l'ubvu  
 Horebu;  
 ephe je eworu agwa dobe;  
 mbu gude mkpola-ododo

- wüa nweswi dobe  
baahaaru iya eja.
- 20 Ephe gude odu-biribiri  
phe ono, bu Chileke  
gude je agbanweta iphe,  
a kpuru; o du g'eswi,  
ata eswa.
- 21 Ephe zohaa Chileke ono,  
dzoru phe nu ono;  
mbu onye ono,  
meru iphe,  
paru aka l'ali Ijiputu;
- 22 bya emee iphe,  
du biribiri l'ali Hamu;  
bya emekwapho iphe,  
du ebvu l'aguga  
Eze-enyimu Uswe-uswe  
ono.
- 23 Oo ya bu; o su le ya  
e-mebyishi phe;  
obenu le Mosisu,  
bu onye o hotaru jeru  
apfu-chia uwara,  
o shi abya;  
g'o to gude oke ehueghu  
iya mebyishikota  
g'ephe ha.
- 24 E mechaa; ephe woru eguru  
ali ono nmaa phulaphula;  
ophu ephe ekwetaduru l'iphe,  
Chileke kweru ukwe  
ememe be oo-dukwadu  
ike mee.
- 25 Ephe nodugbaa l'ime ulo-ekwa  
phe wata agu aphu;  
ophu ephe ekweedu eme iphe,  
Chipfu suru g'ephe mee.
- 26 Oo ya bu; o chilia aka eli  
riaru phe agu su le ya  
e-me g'ephe daa popoo  
l'echiegu;
- 27 teme ya erwuta unwu



- nwanwa phẹ jeye ndu  
 ohogu phẹ l'ẹka.  
 Ẹphe achikashia phẹ;  
 ẹphe agbaa nanu nanu  
 dzuru eliphe l'ophu.
- 28 Ẹphe gbẹshi je eworu  
 onwophe ọọ l'ẹka  
 Balu-Peyo;  
 bya awata eri iphe,  
 e gburu l'agwa,  
 ta adzudu ndu.
- 29 Ẹphe menaa; Chipfu vuhaha  
 ovuma l'ejo-ememe,  
 ẹphe no megbabe.  
 Mgbu-onwu dabanu  
 l'echilabo phẹ.
- 30 Ọle Finehasu gbeshiru bya  
 egboo ọgu ono su g'ono  
 ta nwukwa;  
 shi nno gboo mgbu-onwu  
 ono.
- 31 A gvaru iya ono l'apfubekoto,  
 e-shi l'ehu iya sweru  
 oshilokpa iya jasu l'ojejoje.
- 32 Ẹphe rwukwaa l'aguga  
 mini Meriba;  
 ẹphe kpatsu Chipfu iwe.  
 Mosisu shi phẹ l'ẹka meta  
 kpua onwiya.
- 33 Ọo kele ẹphe kwefuru  
 Unme Chileke ike meru iphe,  
 Mosisu gude pfua iphe,  
 o togo pfudu.
- 34 Ọphu ẹphe alwuebeduru  
 ndu ono,  
 ẹphe jepfuru l'alị ono;  
 ge Chipfu turu phẹ  
 ekemu su g'ẹphe lwua phẹ.
- 35 Ọ buchiaru iphe,  
 ẹphe meru bu l'ẹphe  
 jeru eworu onwophe  
 tukobe le ndu ono.

- Ephe ghaa eghirigha  
wata eme omelali phe.
- 36 Ephe wata abaru agwa  
phe eja.  
Iphe ono mechaa buru  
onyà nmata phe.
- 37 Ephe gude nwa phe nwoke;  
me ke nwanyi gude wata  
agwa ejo obvu.
- 38 Ephe wata egbushi unwu  
phe, adudu iphe, ephe meru;  
gude agwa obvu  
ndu Kènanu.  
Ephe gude mee unwu  
phe ono merwushia ali  
ono;
- 39 bya eshikwapho nno  
merwushia onwophe;  
mbu shi nno buru ndu  
agba ukpara.
- 40 Noo g'o gude Chipfu  
vuahaaru ndibe iya  
ovuma;  
mbu kpo-yiaharu ndu ono,  
bu okiphe iya ono ukuvu.
- 41 O chiru phe ye l'eka  
ndu ohozo.  
Ndu ephe du ashi buru eze  
chiahaa phe.
- 42 Ndu ohogu phe kpaahaa  
phe ehu.  
Ndibe Chileke bya anodu  
phe l'eka.
- 43 O dzotakpooru phe  
teke du igwerigwe;  
ole eka uche adujee phe  
pho bu l'eme iphe,  
a suru g'ephe te emeshi.  
Ephe shi nno nodu l'iphe-eji  
phe yifu.
- 44 Ole oobujeru;  
iphe-ehuka -byapfuta phe;

- ẹphe -raku Chileke;  
 l'ò rwua Chileke l'ẹhu  
 ẹgwegwa; l'ò numa  
 olu phe.
- 45 L'ò gude opfu ẹhu phe  
 nyata ọgbandzu iya.  
 O gude ke l'ò yeru phe  
 obu selaa ẹka azu.
- 46 O mee g'iphe,  
 bukpuo ndu kpuru  
 phe le ndzu phuru phe  
 obu-imemini.
- 47 Dzonaa anyi; jiko Chipfu,  
 bu Chileke anyi.  
 Shinu l'ohamoha ono  
 rwukobe anyi ozo;  
 k'ophu anyi e-tu ngu epha;  
 gube onye ono,  
 epha ngu du nso ono gude  
 ajaja,  
 anyi a-ja ngu baa aba.
- 48 G'ajaja buru ke Chipfu,  
 bu Chileke ke ndu  
 Izurelu gbururu jeye  
 le gbururu.  
 G'on'yemonye sukwa:  
 "Nokwa g'o du!"  
 G'ajaja buru ke Chipfu!

### Ebvu-oma 107

- 1 Unu keke Chipfu ekele;  
 kele o bu onye oma.  
 N-yemobu nkiya anoje jasu  
 l'ojejeje.
- 2 Ge ndu Chipfu gbafutaru  
 keke iya ekele l'o bu  
 onye oma;  
 mbu ndu o gbataru l'eka  
 ndu achi phe le njo;
- 3 ndu ono, o shi l'ohamoha  
 rwuko;

- mbụ ndu o jeru l'uzo  
 ẹnyanwu-awawa;  
 bya ejee l'uzo ẹnyanwu-arịba;  
 je uzo isheli bya ejee ndohali  
 je erwukoo.
- 4 Ọ duru ndu ophu bu  
 l'echiegu be ephe tsoru  
 aghaphe;  
 mbụ l'ali, dabyiru mgbegere,  
 adudu iphe, du iya nu;  
 ophu ephe amadu uzo,  
 ephe e-shi jerwua mkpukpu,  
 ephe e-je ebupyabe.
- 5 Egu-nri guru phe;  
 egu-mini gua phe.  
 Ephe nodu l'eka ono joo ehu  
 wufu.
- 6 Tɔbudu iya bu;  
 ephe raku Chipfu g'ephe no  
 l'iphe-ehuka ono.  
 O bya anafuta phe l'iphe-ehuka,  
 ephe eje obu.
- 7 Ọ bya edua phe shia uzo,  
 pfuru oto;  
 durwua phe mkpukpu,  
 ephe e-buru.
- 8 G'ephe kele Chipfu ekele l'o  
 yenukaru phe obu;  
 waa loomeru unwu-eliphe iphe,  
 du biribiri.
- 9 Kele onye mini agu be  
 oochejije iya ephe;  
 l'o gude iphe, du ree zu-jia  
 onye egu agu ephe.
- 10 Ọ duru ndu ophu shi nodu  
 l'eka agba ochii bya  
 adu tsukiribaa;  
 mbu buru ndu no mkporo  
 eje iphe-ehuka l'eka e gude  
 iphe-igwe tugbabe phe okpa;
- 11 kele ephe kwefuru ike l'ephe  
 te emedu opfu Chileke;

- mbu jika l'ephe le  
 Okalibe-kakota-shii  
 ta achidu idzu lanu.
- 12 Tobudu iya bu;  
 o paru phe haa;  
 ephe jeaha ozi mkponwehu.  
 Ephe jee ya jasu ephe  
 nodu aphohuje daa;  
 ophu o dudu onye gbaru  
 phe mkpu.
- 13 Noo ya; ephe raku Chipfu  
 g'ephe no l'iphe-ehuka ono.  
 O bya adzoo phe l'iphe-ehuka,  
 ephe eje obu.
- 14 O bya edufuta phe l'eka  
 agba ochii,  
 gbahuru ke tsukiribaa,  
 bu eka ephe shi nodu;  
 bya agbabushia egbirigba,  
 e shi gude tugbabe  
 phe okpa.
- 15 G'ephe kele Chipfu ekele l'o  
 yenukaru phe obu;  
 waa loomeru unwu-eliphe  
 iphe, du biribiri;
- 16 Kele onyakashije oguzo,  
 a kparu l'onwirubvu;  
 bya egbubushije mgborigwe,  
 e gude gbachishia uzo.
- 17 O nweru ndu ophu wataru  
 eme eswe.  
 O buru iphe, kparu iya nu  
 bu l'ephe kwefuru  
 Chileke ike;  
 teme e mekpaa phe eh;  
 opfu l'ephe bu ndu  
 meru ejo-iphe.
- 18 Ehu phe nafuchaa phe nri.  
 Ephe nodu anwuhu phakuu.
- 19 Tobudu iya bu;  
 ephe raku Chipfu g'ephe  
 no l'iphe-ehuka ono;

- O bya adzoo phe l'iphe-ehuka  
 ono,  
 byapfutaru phe nu ono.  
 20 O buru opfu onu be o pfuru;  
 o mee; ehudukota  
 phe ike;  
 shi nno dzota phe l'ilu.  
 21 G'ephe kele Chipfu ekele  
 lo yenukaru phe obu;  
 waa loomeru phe iphe,  
 du biribiri.  
 22 G'ephe gweru ngweja-ekele  
 nu iya.  
 Ephe agua ebvu ehutu gude  
 mee ga maru g'iphe,  
 oome gbaru.  
 23 O duru ndu ophu gude  
 ugbo-mini tsoru  
 eze-enyimu agba ngho.  
 24 Ndu k'ono humaru ozi,  
 Chipfu jeru; ozi,  
 du biribiri,  
 o jeru lechi ogbu-mini;  
 25 kele o bu-a opfu be o pfuru  
 l'onu;  
 oke pherephere wata ezizi.  
 O shi nno mee;  
 oke akparamini ono  
 wata atushi ike.  
 26 Ugbo-mini phe nodu  
 awulihuje ephekerephe  
 ephekerephe.  
 Lo byakwa atsubakpoo  
 omilomi omilomi.  
 Oke iphe-ehuka, ephe eje ono  
 mee;  
 obu phe zashihu azashihu.  
 27 Ephe nodu anga anganga;  
 akpo garigari ge ndu  
 ngushiru mee ike.  
 Mmamiphe phe l'ophu buru  
 phe ola-l'iswi.

- 28 Tɔ̀budu iya bụ; ẹ̀phe raku  
 Chipfu g'ẹ̀phe nọ  
 l'iphe-ẹ̀huka ono.  
 O bya anafuta pẹ l'iphe-ẹ̀huka,  
 ẹ̀phe eje ọbu.
- 29 Ẹ̀nyimu, aphụ oke  
 gborogboro bẹ o meru;  
 ọ phuahaa nwa swiswiswi;  
 bya abaarụ oke  
 akparamini mba;  
 ọ daa nyonyoronyo.
- 30 Ẹ̀hu tsoahaa pẹ uto g'ọ  
 daru nyonyoronyo ono.  
 O dua pẹ gbiriri jasụ ẹ̀phe  
 jerwua ọdu ugbo-mini  
 ẹ̀ka ẹ̀phe eje.
- 31 G'ẹ̀phe kele Chipfu ekele l'o  
 yenukaru pẹ obu;  
 waa l'oomeru pẹ iphe,  
 dụ biribiri.
- 32 G'ẹ̀phe kutsee ya l'ẹ̀ka e  
 dzukoberu edzukobe;  
 tua ya ẹ̀pha l'ẹ̀ka ndu  
 bụ ọgerenya ọru  
 achị idzu.
- 33 Ẹ̀nyimu bẹ ọ mişiru mini;  
 ọ bụru echięu.  
 O bya emee nggele, aso asoso;  
 ọ bụru alị, mini tahuru.
- 34 O meru alị, bụ ọsu;  
 ọ bụru jakpọro jakpọro  
 alị únú;  
 kele ndu shi buru l'ẹ̀ka  
 ono menukaru ejo-iphe.
- 35 Echięu bẹ o meru;  
 ọ bụru okpuru,  
 mini jiru ejiji;  
 bya emee alị,  
 shi dụ kpọkoro kpọkoro  
 kpọkoro;  
 ọ bụru ishi nggele.
- 36 O bụru ẹ̀ka dụ ẹ̀gube ono

- bẹ o dutaru ndu ẹgu  
 agu je edobe g'ephe buru.  
 Ephe je eburu l'eka ono  
 buru mkpukpu ẹka phe.
- 37 Ephe woru opfu kọo;  
 bya agbaa opfu-vayinu  
 l'eka ono.  
 Ephe jeshia ya akpata;  
 ọ mịchaa mebyi  
 migharu iya ẹka.
- 38 O keberu phe l'oma;  
 ephe wata aka shii  
 mebyi akaka;  
 ọphu o kwedu g'iphe-edobe  
 phe wata alwa alị alị.
- 39 E mechaa; Chipfu gude  
 mkpamehu; waa iphe-ẹhuka;  
 yee aphu lo-zeta phe.  
 Ephe wata alwa alị alị.
- 40 Mbụ onye ono, ewodaje  
 ndu a maru ephe phe alị;  
 woru phe mee;  
 ephe ghapheahaa l'alị,  
 dabiyiru iphoro, adudu  
 gbororo, du iya nu.
- 41 O bekwanu le ndu adudu g'ọ  
 du phe be o setaru l'eka  
 sefuta l'iphe-ẹhuka,  
 ephe eje.  
 O bya emee; ndibe phe wata  
 azushi g'aturu.
- 42 Ndu obu phe guru iphoro  
 abujeru;  
 ephe -huma iphe ono;  
 ephe eworu eswa tee;  
 obenu le ndu eme iphe,  
 apfuduru-oto g'ephe  
 ha abujeru;  
 ephe -huma iya;  
 lo kpoo phe onu opfu.
- 43 Ge ndu maru iphe wokwaru  
 iphe-a je asu-mia l'ime



obu phe.  
 Ephe arja ge n-yemobu  
 Chipfu habe shii!

## Ebvu-oma 108

Ebvu-oma, Dévidi deru

- 1 Obu shihukwaru mu ike  
 Chileke;  
 k'ophu bu le mu e-gude  
 obu mu g'o ha agu ebvu  
 etu ngu epha.  
 Obu mu; tehu nwuru enya.
- 2 Unu tehu nwuru enya;  
 unube ogelenda ye une;  
 kele mbedua e-gudekwa  
 ebvu kutee geregere  
 nchi-abohu le mgbenya.
- 3 Mu a-nodu l'echilabo  
 ndiphe kele ngu ekele  
 gube Chipfu.  
 Mu anodukwapho l'echilabo  
 oha l'ophu gua ebvu  
 gude tua ngu epha.
- 4 Noo kele n-yemobu ngu  
 paru eka.  
 O tukoru imigwe l'ophu  
 kakota ephekerephe.  
 Teme ire-lanu nkengu  
 dzuru akpaminigwe.
- 5 Goshinu ndiphe gi paberu  
 eka;  
 mbu li noghataru  
 akpaminigwe anoghata;  
 ge ndiphe l'ophu ahuma  
 gi du-be biribiri.
- 6 Gudenu okpehu ngu dzoo  
 anyi; zanu anyi enu;  
 k'ophu ee-shi nno dzoo  
 ndu i yeru obu.
- 7 Chileke nowaa l'ulo iya,

- du nsọ pfua opfu sụ:  
 “Mu e-gude agbọ ọgboo  
 kee alị ndu Shẹkemu.  
 Teme mu eworu nsụda  
 Sukotu bushia.
- 8 Giladu bụ nkemu;  
 Manáşẹ bụkwarupho  
 nkemu.  
 Ifuremu bụ okpu,  
 mu kpu l'ishi.  
 Jiuda bụkwanuru  
 mgboro-eze,  
 mu apajẹ l'ẹka.
- 9 Mówabu bụ ochi,  
 mu akwoje ọkpa.  
 Ọ bụkwanuru lẹ Edomu bẹ  
 mu eyeshije akpọkpa  
 mu dobe.  
 Ndu Filisitayinu bẹ mu  
 gbọwaru ọgboo kpua.”
- 10 ?Bụ onye e-du mu chiriri  
 werere duba lẹ mkpukpu ono,  
 a kpuru kpushia ike ono?  
 Mbụ-a; ?bụ onye e-duru mu  
 duba lẹ Edomu?
- 11 Ọ kwa gụbedua Chileke bụ  
 onye ọbu.  
 Obenu l'ì gbẹ jìka anyi;  
 ọphu i tii tsojeeduru ndu  
 ojogu anyi eje ọgu.
- 12 Yeru anyi ẹka jiko g'anyi  
 mekpee ndu ọhogu anyi;  
 kele eye ẹka k'unwu-eliphe,  
 bụ iphe-iphoro.
- 13 Obenu l'anyi -nọduwaa  
 Chileke l'ẹka bẹ anyi  
 e-mekpe phẹ gẹ mkparawa.  
 Ọ bụru iya e-hu ndu ọhogu  
 anyi agbagba-nchì  
 l'alì.

## Ebvu-oma 109

Ebvu-oma, Dévidi deru nu  
onye-ishi ebvu

- 1 Gùbe Chileke, mu etu epha;  
ba ñodushinu nggujungguji;
- 2 kele ndu ejo-iphe me  
ndu eregede sawaru onu  
epfuru mu ejo opfu;  
bya adzushi uka ekpu mu.
- 3 Epe gudewaa opfu  
ndumashi gbaa mu  
mgburugburu.  
Epe ñodu abya mu l'iphu;  
ebe adu iphe, mu meru phe.
- 4 Mu -gbè emekoshi phe  
k'onyà;  
epe agbe ebo mu ibo;  
obenu le mbedua  
anodujeepho l'epfu anu  
Chileke epfushi iya ike.
- 5 Epe egudeje ejo-iphe pfua  
mu ugwo iphe-oma,  
mu meru phe.  
Obu, mu yeru phe bu  
ndumashi be epe egudeje  
sata mu iya.
- 6 Yenu onye ejo nemadzu g'o je  
akwachia ya uzo.  
Zinaa onye a-ñodu ebo iya  
ibo g'o je apfuru iya l'iphu  
gbaa ya ekebe.
- 7 E -kpee ya ikpe; g'ikpe  
obu nmakwa iya.  
Ge Chileke gukwaru epfupfu,  
oopfu anu iya ye l'iphe-eji,  
o meru.
- 8 G'eswe ndzu iya gbakwaa  
mkpirikpu.  
G'onye ozo no-chikwa  
enya iya leje ozi,  
o shi eje.

- 9 G'ò tọgbokwa ụnwegirima  
ibe iya nwamaa.  
L'ọ haa nyee ya l'ulo-maa.
- 10 G'ụnwegirima ibe iya  
wushikwaru ghaphee  
rwo arwo!  
G'a chifukwa phe g'ephe  
te ebukponu le mkpokpo  
unuphu ibe phe obu!
- 11 Ge ndu o ji ugwo tukokwa  
iphe,  
o nweru enweru natachaa.  
Ge ndu a madu aka ephe  
shi tukokwa akanya,  
o seru esese gweta.
- 12 G'ò to dukwa onye e-mejeru  
iya iphe-oma;  
ophu o dukwa onye a-phujeru  
unwegirima ono,  
o toboru nwamaa ono  
obu-imemini.
- 13 G'awa iya chihukwa.  
G'epha phe ta aduhekwa l'ogbo  
ophu abya nu.
- 14 Ge Chipfu ta adukwa  
teke oo-zoha ejo-iphe,  
nna iya oche phe mekotaru;  
ophu o hufukwa iphe-eji,  
ne iya meru ehufu ophu.
- 15 G'iphe-eji phe ono tukoekwapho  
kwaa l'iphu Chipfu;  
k'ophu oo-me g'ephe chihu  
l'eliphe;  
g'a ta nyatabahe phe!
- 16 Kele o to rijeduru ke g'o  
meeru nemadzu iphe-oma.  
O buchianu iphe, ooshibeje  
ite iya bu goome dulaa  
ndu ukpa maa;  
waa ndu adudu g'ò du phe;  
waa ndu obu phe tsuru  
gworigwori.

- 17 Eshinu iphe, aduje iya ree  
 bu atụ ọnu;  
 g'ọ bukwaru onye a  
 tūru ọnu.  
 Sụ-a; eshinu ago ọnu-oma  
 aduje iya eji;  
 g'ọnu-oma nọdukwa iya  
 ụzenya ụzenya.
- 18 Eshinu o yeru onwiya atụ  
 ọnu g'onye yeru uwe;  
 g'atụ ọnu ono sọdakwa  
 iya l'ẹpho gẹ mini.  
 L'o mibachaa ya l'ọkpụ  
 gẹ manụ.
- 19 G'a phukwaa ya ya g'onye a  
 phuru ukpo.  
 L'e kee ya ya g'onye keru  
 akpọ l'upfu jasụ l'ojejeje.
- 20 G'iphe ono, mu gushiru ono  
 bukwaru ụgwọ,  
 Chipfu a-pfu ndu ono,  
 anọduje ebo mu ibo ono;  
 mbụ ndu ono,  
 anọduje epfuru mu  
 ejo-opfu ono.
- 21 Obenu gube Chipfu,  
 bu Nnajiuphu mu;  
 menaarụ mu ree g'ẹpha  
 ngu apfuru.  
 Gudenu n-yemobu ngu ono,  
 dunukaru ree ono nafuta mu;
- 22 kele mu bu onye ukpa  
 bya aburu onye adudu  
 g'ọ du iya;  
 teme e mewaa mu iphe,  
 rwuru mu le meji.
- 23 Mu esewa gerere g'ononyo  
 ụzenyashi;  
 teme a nmakofuwa mu  
 g'onye nmakofuru igube.
- 24 Ikpere mu ta aduedu ophu  
 shihuru ike l'eka mu

- aswì ẹ̀gu;  
 ẹ̀me mu j̄owaa ẹ̀hu  
 b̄uru ọ̀kp̄u.
- 25 Nta-a b̄e ndu an̄ọduje ebo  
 mu ibo ekweru mu une.  
 Ẹ̀phe -h̄uma mu;  
 ẹ̀phe egude ekwe l'ishi s̄u  
 mu h̄e.
- 26 Yen̄uru mu ẹ̀ka jiko Chipfu,  
 b̄u Chileke mu.  
 Eshinu ì b̄u onye n-yemobu;  
 dz̄onaa mu.
- 27 Mena ya g'ẹ̀phe shi nno  
 maru l'o shi ngu l'ẹ̀ka;  
 mb̄u g'ẹ̀phe maru l'ọ̀  
 ḡube Chipfu meru iya  
 l'onwongu.
- 28 Ẹ̀phe a-n̄ọdu ephu mu iphu;  
 obenu ẹ̀ ḡubedua a-n̄ọdu  
 aḡoru mu ọ̀nu-oma.  
 Ọ̀ -b̄uru l'ẹ̀phe byaru mu  
 etso ọ̀gu;  
 l'e mee ph̄e iphe-iph̄ere;  
 obenu ẹ̀ m̄ube onye-ozì  
 ngu b̄uepho  
 ẹ̀swa b̄e mu  
 a-n̄ọdu ete.
- 29 Ndu an̄ọduje ebo mu ibo b̄e  
 ee-ye iphere g'onye  
 yeru uwe.  
 L'a ph̄ua ph̄e iphere g'onye  
 ph̄uru ukpo.
- 30 Ọ̀nu mu b̄e mu e-gude  
 jaa Chipfu  
 ọ̀kpobe ajaja.  
 Mu an̄ọdu l'edzudzu-ọ̀ha  
 tua ya ẹ̀pha;
- 31 k̄e ọ̀p̄fuj̄eru l'ẹ̀kutara  
 onye ad̄udu g'ọ̀ d̄u iya;  
 g'ọ̀ dz̄ota ndzu iya l'ẹ̀ka  
 ndu ekpe iya mp̄fuḡbu.

## Ebvu-oma 110

### Ebvu-oma, Dévidi deru

- 1 Chipfu sùru Nnajiuphu mu:  
 “Nòdu mu l'èkutara;  
 jasù teke mu e-me g'ì zòpyabe  
 ndu-òhogu ngu l'òkpa.”
- 2 Chipfu a-gbè lè Zayonu nù  
 ngu mgboro-eze,  
 egoshi g'ike ngu  
 habe shii.  
 Ọo-sù ngu: “Buru onye eze  
 ndu ọhogu ngu!”
- 3 Ndu ojogu ngu bẹ ọo-nòdu  
 ehe ihee eje ọgu l'eswe  
 ọgu.  
 Ọo g'iji nchi-abọhu anọduje  
 akwa-a bụ g'unwokoroby  
 ngu a-wụ-pfuta ngu l'úbvú,  
 dụ nsọ ono.
- 4 Chipfu ribuwaru angù;  
 ọphu ọogba-nweędu iphe,  
 o pfuru.  
 Ọ sùru: “Ìi-buru onye uke  
 Chileke jasù lè  
 tuutuutuu lè mịimiimii;  
 bụ iya bụ gè  
 Melikizedeku bụ.”
- 5 Nnajiuphu nọ l'èkutara  
 gùbe Chipfu.  
 Ndu eze bẹ oo-gwe  
 pyakapyaka mbọku,  
 ẹhu e-ghu iya eghe.
- 6 Oo-kpe ọhamoha ikpe;  
 woru ndu nwuhuru  
 anwuhu  
 kùkobe l'ikpo l'ikpo;  
 bya atuko ndu eze  
 mgboko l'ọphu  
 gwee arakabya.
- 7 Ọo lè nggele, nọ l'aguga  
 gbororo bẹ

o-o-nguta mini.  
 Oo ya bu l'o mee ya  
 g'o ngakerehu.

### Ebvu-oma 111

- 1 G'ajaja buru ke Chipfu.  
 Mu e-gude obu mu g'o ha  
 kele Chipfu ekele.  
 Mu e-kele iya l'eka ndu obu  
 phe guru iphoro  
 no l'idzu;  
 kele iya l'eka ephe  
 no ndzuko.
- 2 Iphemiphe, Chipfu eme  
 paru eka.  
 Iphe, bukpo ndu o du ree  
 ejeje ari iya oriri.
- 3 Iphe, Chipfu emeje du  
 ubvu bya adu akpabiri;  
 teme apfubekoto iya nodu  
 anoje jasu l'ojejoje.
- 4 O mewaru g'a nyata iphe,  
 du biribiri,  
 oomeje.  
 Chipfu eme eze-iphe-oma  
 teme o nodu aphu  
 obu-imemini.
- 5 Ndu atsü iya ebvu be  
 onoduje anu nri.  
 Ogbandzu iya be onyataje  
 jasu le tuutuutuu le  
 mijimiimii.
- 6 Ndibe iya be o goshiwaru ike,  
 du l'ozi, ooje;  
 kele o nataru ndu ohozo  
 ali phe woru nu phe.
- 7 Iphe, o gude eka iya eme  
 bu ire-lanu bya aburu iphe,  
 pfuru oto.  
 Ekemu, o turu pfushiru ike.
- 8 Ekemu ono a-kporu g'abara



- jasu l'ojeje;  
 teme e gude obu,  
 guru iphoro;  
 waa ire-lanu eme iya.
- 9 Ndu nkiya be o gbafutaru;  
 bya atua ekemu su  
 g'ogbandzu iya dukwa  
 ojejeje.
- Epha iya du nso bya adu ebvu.
- 10 Atsu Chipfu ebvu bu  
 egbube ishi mmamiphe.  
 Iphe, bukpo ndu etso ekemu  
 iya be iphe edoje enya ree.  
 G'e tua ya epha jasu l'ojejeje.

### Ebvú-oma 112

- 1 G'ajaja buru ke Chipfu.  
 Ehu-utso be a goru nu onye  
 atsu Chipfu ebvu;  
 onye ekemu iya atsoshije  
 utso ike.
- 2 Unwu iya a-buru ndu ike du  
 l'eliphe.  
 Oshilokpa ndu obu phe guru  
 iphoro be a-buru ndu  
 a goru onu-oma nu.
- 3 Iphe-enweru yee eku a-tuko  
 ibe iya sweta;  
 teme apfubekoto iya je  
 a-nodu jasu l'ojejeje.
- 4 Mbukponu l'eka agba ochii  
 be iphoro awaje  
 g'enyanwu l'ehu onye  
 obu iya guru iphoro;  
 mbu onye emeje eze-iphe-oma;  
 bya aburu onye obu-imemini;  
 bya abukwarupho onye  
 pfuberekoto l'iphu Chileke.
- 5 O buepho k'oma a-nodu  
 etso onye emeje iphe-oma  
 bya ejieje ugwo mia ya enya;

- onye iphemiphe,  
oome be oomeje k'ophu  
aa-haru iya enge.
- 6 Mbü le-a; a ta abyakwa  
enwubata iya enwubata.  
Onye pfuberekoto be  
aa-noduepho anyataje  
jasu l'ojejoje.
- 7 Oo-nodu anu ejo nzi;  
ole nzi ono ta abyadu eme  
ge ndzu gu ya.  
Obu e-shihuje iya ike;  
kele onye o dakoberu  
bu Chipfu.
- 8 Obu a-kpo iya abara;  
ophu ndzu abyadu agu iya;  
jasu l'o gude enya iya  
huma l'e mekperu ndu  
ohogu iya.
- 9 Osaje obu iya asasa nu ndu  
adudu g'o du phe iphe.  
Apfubekoto nkiya a-no jasu  
l'ojejoje.  
Aa-tuli iya aka eli gude  
kwabe iya ubvu.
- 10 Onye ejo-iphe -huma iya;  
ehu awata iya eghu eghu.  
L'o gude ehu-eghu taa  
kpoockpookpo jasu l'o  
joo ehu wufu.  
Iphe, agu onye ejo-iphe ono  
ta abyakwa erwu  
iya aka.

### Ebvü-oma 113

- 1 G'ajaja buru ke Chipfu.  
Unube ndu ejeru Chipfu ozi;  
unu jaa Chipfu ajaja.
- 2 G'e tua Chipfu epha shita  
nta-a jasu l'ojejoje.
- 3 O gbaru g'e shi l'eka enyanwu

- awaję jaa Chipfu ajaja jasụ  
l'ęka ọoribaje.
- 4 Chipfu parụ ęka;  
ọ kakọta ọhamoha shii.  
O-gbu-nwjinwii ya  
nọ-ngokọta imigwe l'ophu.
- 5 ?Bụ onye bę aatụ eyeru  
Chipfu, bụ Chileke anyi;  
mbụ onye nọ l'aba-eze  
iya l'imigwe?
- 6 Onye ewozeje onwiya alị  
g'ọ hụma iphe,  
nọ l'imigwe waa iphe nọ  
l'eliphe.
- 7 Ookulije onye ụkpa  
l'urwuku ęka ọ gwọru.  
Ọ nọdu ekulije onye adudu  
g'ọ dụ iya l'ikpọzu ęka  
ọ dabyiru.
- 8 L'ọ bya eworu phez dobe;  
yęe ndu-ishi aharu  
ęnya nhamunha;  
mbụ ndu-ishi ndu alị iya.
- 9 Nwanyị, ata atsudu ime bę  
ookwabeje ụbvù l'ibe ji iya;  
mbụ mee ya l'ọ bụru nwanyị,  
ęhu dụ guu, nwushiru  
unwu gę gunu.  
G'ajaja bụru kę Chipfu.

### Ebvu-oma 114

- 1 Teke ndu Ízurelu shi lę  
Ijiputu futa;  
mbụ teke oshilokpa  
Jiékpọ shi l'ęka ndu  
opfu phez eswe uswe lę  
nchị futa;
- 2 bę Jiuda byaru bya aburu  
onye duru Chileke nsọ.  
Ndu Ízurelu bya aburu ndu o  
nwe enwenwe.

- 3 Eze Ẹnyimu hūma iya bya  
eye ọkpa l'ọso;  
tẹme ẹnyimu Jiódanu  
dakọbe lashia azu.
- 4 Oke úbvú nọdu apfugba ke  
shooshoo g'ebili.  
Úbvú nọdu apfu ke  
karagidingu karagidingu  
ge nwaturu.
- 5 Sụ-a; gube Eze Ẹnyimu;  
?i gbaru gunu?  
Gube Jiódanu;  
?bu ole bu k'ala azu?
- 6 Unube oke úbvú;  
?bu gunu be unu gude  
apfugba ke shooshoo g'ebili?  
Unube úbvú;  
?buhunu ole be unu gude  
apfu ke karagidingu  
karagidingu ge nwaturu?
- 7 Eliphe l'ophu nmakwaa jijijiii  
l'iphu Nnajiuphu;  
mbu l'iphu Chileke  
ke Jiékọpu.
- 8 Onye gbazeru mkpuma;  
o buru okpuru;  
bya eworu alị,  
du epfu epfu mee;  
o buru ishi nggele.

### Ebvu-oma 115

- 1 O to bukwa anyi be  
aa-kwabẹ úbvù jiko  
Chipfu;  
o to bukwa anyi.  
O kwa epha ngu kpoloko be  
gbaru g'a kwabẹ iya úbvù.  
Noo kele i yenukaru anyi obu;  
tẹme i nọdu apfushije ike  
l'iphe, i pfuru.
- 2 ?Denu g'o gude ndu ohozo

- nõdu asuje anyi:  
 “?Denu Chileke unu?”
- 3 Chileke anyi nõnu l'imigwe.  
 O buru iphe, du iya ree  
 be oomeje.
- 4 Obenu l'agwa phe bu  
 mkpola-ododo yee  
 mkpola-ochaa; bu iphe,  
 nemadzu gude aka mee.
- 5 Ephe nweru onu;  
 ophu ephe epfudu opfu.  
 Ephe nweru enya;  
 ophu ephe aphudu  
 iya uzo.
- 6 Ephe nweru nchi;  
 ophu ephe anudu  
 iya iphe.  
 Ephe nweru imi;  
 ophu ephe egudedu iya  
 akpo ishishi iphe.
- 7 Ephe nweru aka;  
 ophu ephe egudedu iya  
 ewota iphe.  
 Ephe nweru okpa;  
 ophu ephe ejedu ije;  
 teme ophu ephe egudedu  
 ekpiri phe epfufuta opfu.
- 8 Ndu agwo phe nu;  
 mekpoo ndu dakoberu  
 phe nu a-du g'agwa ono du.
- 9 Su-a; unube ndibe Izurelu;  
 unu dakobe Chipfu;  
 kele oo ya eyejeru unu  
 aka bya aburu iya  
 egbobutaje unu.
- 10 Unube ndibe Erõnu;  
 unu dakobe Chipfu;  
 kele oo ya eyejeru unu aka  
 bya aburu iya egbobutaje  
 unu.
- 11 Unube ndu atsü Chipfu ebvu;  
 unu dakobe Chipfu;

- kẹle ọọ ya eyejeru unu  
 ẹka bya aburu iya  
 egbobutaje unu.
- 12 Chipfu anyataje anyi;  
 ọo-gọru ọnu-oma nọ anyi.  
 Ọo-gọru ọnu-oma nọ ndibe  
 Ízurelu;  
 bya agọru ọnu-oma nọ  
 ndibe Erọnu.
- 13 Ọo-gọru ọnu-oma nọ ndu atsu  
 yẹbe Chipfu ebvu;  
 ndu upfu mẹ ndu nta.
- 14 Gẹ Chipfu mekwaa g'unu  
 jaa àjàjà ka l'otu;  
 unubẹdua l'onwunu  
 mẹkpoo ẹnwegirima  
 ibe unu.
- 15 Gẹ Chipfu gọkwaru ọnu-oma  
 nọ unu;  
 mbu onye ono, bu iya  
 meru igwe bya emee  
 eliphe l'ophu ono.
- 16 Imigwe l'ophu bukota  
 kẹ Chipfu;  
 obenu l'eliphe bẹ o  
 wowaru nọ ndiphe.
- 17 Ọ tọ bukwa ndu nwuhuru  
 anwuhu ajaje Chipfu  
 ajaja;  
 mbu ndu lawaru ali  
 ọ-laru-nodu-nggujungguji.
- 18 Ọ kwa anyibedua a-nodu etu  
 Chipfu epha.  
 Anyi a-nodu etu iya epha nta-a;  
 etu iya ya jasọ l'ojejoje.  
 G'ajaja buru kẹ Chipfu.

### Ebvu-oma 116

- 1 Mu yeru Chipfu obu;  
 kẹle ọ nọmawaru olu mu.  
 Ọ nọmaru mkpu, mu chikuru

- iya sù g'o meeru mu  
eze-iphe-oma.
- 2 Eshinu ọ ngabẹru mu nchì  
bẹ mu a-nọdujeepo  
araku iya jasù gẹ mu  
a-nọ-beru.
- 3 Anwùhu shiwa a chie mu  
ẹgbirigba l'olu.  
Ẹkpa oyi alì-maa nọdu anwù  
mu kẹ kpalaa.  
Iphe-ẹhuka;  
waa aphù shiẹpho  
nọ-pee mu mgburugburu.
- 4 Tọbodu iya bụ;  
mu bya araku Chipfu  
sù iya:  
“Gùbe Chipfu; dzọnaa mu!”
- 5 Chipfu bụkwa onye emeje  
eze-iphe-oma; bya aburu  
onye pfulerekoto;  
mbù lẹ Chileke anyi bụkwa  
onye aphuje obu-imemini.
- 6 Ndu amazidu iphe bẹ bụkwa  
Chipfu anọduje eleta  
phẹ ẹnya.  
Teke mu shi nọdu l'oke mkpa  
bù iya dzọru mu.
- 7 Obu mu; jiko kabẹkwa  
dzutabaa ike ọzo;  
kẹle Chipfu nwubenukaru  
ngu ẹnya.
- 8 Ọo gùbe Chipfu nafutaru ndzù  
mu gẹ mu ta anwùhu.  
Tẹme ọ buri ngu hucharu  
mu ẹnya-mini;  
bya egbobuta mu gẹ mu te  
vukota iphe daa iko;
- 9 k'ophu mu a-nọdu ejephe  
g'ọ dù mu l'iphu Chipfu  
l'alì ndu dzù ndzù.
- 10 Mu woru onwomu ye  
Chileke l'ẹka.

Ono mee mu; mu sụ:

“Iphe-ẹhuka kpaakwaru  
mu ẹhu shii.”

11 Teme mu pfubulihukwapho  
sụ:

“Ndiphe l'ophu bukotakwa  
ndu ntuphu-ire.”

12 ?Denukpoo ge mu e-shi pfa  
Chipfu ugwo iphe-oma,  
o mekotaru mu g'o ha?

13 Mu a-pali okoro goshiru l'i bu  
o-dzo-nwa gude  
kutse Chipfu.

14 Iphe, mu rifuru angu  
emeru Chipfu be mu  
e-meru iya l'iphu ndu  
bu nkiya.

15 Anwuhu ndu duru Chipfu  
nsọ; be o guberu iphe.

16 Gube Chipfu; mu bukwa  
onye-ozu ngu okpobe abubu.

Mu bukwa onye-ozu ngu;  
bya aburu nwa, nwanji ono,  
ejeru ngu ozi ono nwuru.

I mewaru ge mu nweru  
onwomu le mkporo ono,  
e shi ta mu ono.

17 Mu e-gweru ngu  
ngweja-ekele;  
teme mu abyakwapho  
araku epha gube Chipfu.

18 Iphe, mu rifuru angu  
emeru Chipfu be mu  
e-mekotaru iya l'iphu iphe,  
bu ndu nkiya.

19 O buru eka mu a-nodu  
mee ya bu l'okpoku  
eze-ulo Chipfu  
l'echilabo  
unube ndu Jierusalemu.  
G'ajaja buru ke Chipfu.



**Ebvu-oma 117**

- 1 Unu jaa Chipfu ajaja unube  
 ohamoha.  
 Unu tua ya epha unube  
 ndiphe l'ophu;
- 2 kele o yeru anyi obu  
 yegharu iya eka;  
 teme Chipfu nodu  
 apfushije ike l'iphe,  
 o pfuru jasu le tuutuutuu  
 le mijimiimii.  
 G'ajaja buru ke Chipfu.

**Ebvu-oma 118**

- 1 Unu kele Chipfu ekele lo  
 bu onye oma;  
 kele n-yemobu iya anoje  
 jasu l'ojejoje.
- 2 Ge ndu Izurelu tuko su:  
 "N-yemobu iya anoje jasu  
 l'ojejoje."
- 3 Ge ndibe Eronu tukokwapho  
 su:  
 "N-yemobu iya anoje  
 jasu l'ojejoje."
- 4 Ge ndu atsü Chipfu ebvu  
 sukwapo:  
 "N-yemobu iya anoje jasü  
 l'ojejoje."
- 5 Teke mu eje iphe-ehuka be mu  
 rakuru Chipfu.  
 O zaa mu enu bya emee mu;  
 mu nweru onwomu.
- 6 Chipfu no-kubewa mu;  
 ophu ndzu agudu mu.  
 ?Bukwanu gunu be nemadzu  
 mmanu suru mu emebata?
- 7 Chipfu no-kube mu;  
 oo yebedua bu onye  
 n-yemeka mu.  
 Mu e-mechaa gude enya mu

- huma l'e mekperu ndu  
mu du ashị.
- 8 Anodu l'ime Chipfu ezeru  
ndzu kakwa ree eme  
l'adakobe nemadzu.
- 9 Anodu l'ime Chipfu ezeru  
ndzu kakwa ree eme  
l'adakobe ndu-ishi.
- 10 Iphe, bu ohamoha kepheru  
mu mgburugburu etso  
mu ogu;  
ole mu gude epha Chipfu  
lwu-kpekota phe  
g'ephe ha.
- 11 Ephe no mu ibe k'ebo ebo;  
ole mu gude epha Chipfu  
lwu-kpekota phe  
g'ephe ha.
- 12 Ephe ripyaberu mu g'enwu;  
ole ephe meekwarupho  
kpuru-kpuru-kpuru  
l'ali nwushihukota  
g'ekperema okponku,  
oku tsupyashiru.  
O buru epha Chipfu be mu  
gude lwu-kpekota phe  
g'ephe ha.
- 13 E nwuru mu daphuu nwuphu  
azu; mu bya ada iko;  
obenu le Chipfu yeru mu eka.
- 14 Oo Chipfu bu ike mu;  
bya aburu onye mu  
agu-ku lebvu.  
Oo ya bu onye adzoje mu nu.
- 15 Olu ehu-utso yee agbo ogboo  
be ada wowoowoo  
l'eka ndu pfuberekoto  
no.  
Ephe tuko epfu su: "Chipfu  
gudeakwa ekutara iya  
mee iphe paru eka.
- 16 O kwa ekutara Chipfu be o

- paliru imeli.  
 O gude ẹkutara iya ono mee  
 iphe, parụ ẹka.”
- 17 Mu ta anwùhudu;  
 mu a-dzuru ndzu pfukashia  
 iphe,  
 Chipfu meru mu g'a  
 numa-dzuru.
- 18 Chipfu hùwaru mu ahùhù  
 hùshia mu ike;  
 ọle o to kwedu g'ọnwu  
 gbua mu.
- 19 Kpọhanaaru mu ọguzo  
 apfubekoto;  
 ge mu shi iya bahụ je etua  
 Chipfu ẹpha.
- 20 Ọwa-a bụ ọguzo ke Chipfu.  
 Ọ bụ ẹka ndu pfuberekoto  
 eshije abahụ.
- 21 Mu e-kele ngu ekele l'ì  
 zarụ mu ẹnu.  
 Nta-a be ì buwaa onye adzoje  
 mu nù.
- 22 Mkpuma, ndu akpù  
 ọlo jìkaru; mechaarù  
 bya aburu mkpuma,  
 gude ọlo.
- 23 Ono buru iphe, Chipfu meru.  
 Ọ dọ anyi biribiri l'ẹnya.
- 24 Ntanù-a bụ mbọku,  
 Chipfu meru.  
 G'ẹhu tsoo anyi ọtso;  
 anyi etekwaphọ ẹswa  
 ntanù ono!
- 25 Jiko Chipfu; dzotanu anyi!  
 Mekwaa g'iphemiphe,  
 anyi eme bukotaru anyi  
 upete; gube Chipfu!
- 26 Ọnu-oma be a goru nù onye  
 ono,  
 bụ Chipfu ziru iya g'ọ  
 bya ono.

Anyi gbẹ l'ulo Chipfu agoru  
ngu onu-oma.

27 O kwa Chipfu bu Chileke.

O meakwaru g'iphoro,  
shi iya l'eka nwuaru anyi.

Unu tua anu, unu gude abya  
egweru Chipfu ngweja eri;  
kputa bya le mgboru mpu,  
a nmaberu  
loru-ngweja iya.

28 Oo ngu bu Chileke mu;

o buru ngu be mu  
a-nodu ekele ekele.

Oo ngu bu Chileke mu;

oo ya bu l'oo ngu be  
mu a-nodu ekutse.

29 Jiko unu kele Chipfu ekele

l'o bu onye oma.

Temе n-yemobu iya nodu  
anoje jasu l'ojejoje.

### Ebvu-oma 119

1 Ehu-utso be a goru nu ndu te

emejedu iphe, aa-ta

phẹ uta;

ndu etsoepho ekemu,

Chipfu turu.

2 Ehu-utso be a goru nu ndu etso

iphe, o turu l'ekemu;

bya egude obu phẹ g'o ha

achọ iya achoshi

iya ike.

3 Ndu adukpooda iphe,

apfuduru-oto,

ephe emeje;

buepho uzo, o toru be

ephe eshije.

4 I kawaru anyi iphe,

i suru g'e meje

merwua l'ishi.

5 O du mu g'a su l'umere

- mu nguru anguru;  
 gẹ mu tsoje iphe ono,  
 ị ịtoru ọkpa iya ono;
- 6 k'ophu ọ tọ dudu iphe,  
 iphere iya bya eme mu;  
 noo kele mu dabẹru  
 ẹnya l'iphemiphe,  
 ị sụru g'e meje.
- 7 Mu e-gude obu, gụru iphóró  
 jaa ngu ajaja;  
 eshi ọphu mu anwụ ikpe  
 ngu ono, p̄furu ọto  
 ono.
- 8 Mu e-tso iphe, ị ịtoru ọkpa iya  
 sụ g'e tsoje.  
 Jiko ba jìkakwa mu  
 phuruphuru  
 gberegedege.
- 9 ?Denukpoo gẹ nwokorọbya  
 e-me dobe ụzo iya g'ọ  
 dubebe ree?  
 G'oo-me iya bụ g'o meje iphe,  
 e deru l'opfu ngu.
- 10 Mu gude obu mu g'ọ ha achọ  
 ngu.  
 B'ekwekwa gẹ mu phua ụzo  
 l'etso iphe, ị sụru g'e  
 meje.
- 11 Opfu ngu bẹ mu domiwaru  
 l'ime obu mu.  
 Ọo ya bụ g'ọ tọ dukwanu  
 teke mu e-me ngu  
 iphe-eji.
- 12 G'ajaja bụru nkengu gube  
 Chipfu.  
 Jiko zinaa mu gẹ mu e-me  
 tsoje iphe, ị ịtoru ọkpa  
 iya sụ g'e tsoje.
- 13 Ọo ogbogboromonu mu-a  
 bẹ mu gudewaa gushikota  
 iphe, bụkotakpoo ikpe,  
 i kperu l'ọnu ngu.

- 14 Ehu anọduje atso mu uto me  
mu nọdu eme iphe,  
i turu l'ekemu;  
egube ono, ehu atsoje onye  
kparu eku kpashia ya  
ike ono.
- 15 Mu anọduje nggujungguji ari  
iphe, i karu g'e meje ariri.  
Mu adabekwapho enya l'uzo,  
i toru g'e shije.
- 16 Iphe, i toru okpa su g'e tsoje  
aduje mu ree ememe;  
ophu mu abyadu  
agbakutaru opfu ngu  
ono azu.
- 17 Menaaru mube onye-ozu ngu  
iphe, du ree;  
k'ophu mu e-shi nno nọdu  
ndzu meje opfu ngu.
- 18 Mena g'e mu saa enya;  
huma iphe, du biribiri,  
dugbaa l'ekemu ngu.
- 19 Mu bukwa onye lwaru  
alwalwa l'eliphe-a.  
Jiko ba adukwa iphemiphe,  
i suru g'e meje ophu  
ii-domiru mu edomi.
- 20 Obu awahawa mu awahu;  
eka mu achọ ikpe ngu  
achoshi iya ike  
tekenteke.
- 21 Ndu etu onwophe epha;  
bya aburu ndu a turu  
onu be iibajeru mba;  
mbu ndu ono, ahaje iphe,  
i suru g'e meje eme iphe  
ozo ono.
- 22 Mena g'e te kweru mu  
une; ophu a nma mu  
phulaphula;  
kele iphe, i turu l'ekemu be  
mu emekotaepho.

- 23 A makwaru-a le ndu-ishi  
 anokobeje achiru mu  
 ejo idzu; obenu l'iphe,  
 mube onye-ozu ngu  
 anoduje aru bu ge mu  
 e-me tsoje iphe,  
 i toru okpa iya su g'e tsoje.
- 24 Oo eme iphe, i toru  
 lekemu bu iphe,  
 aduje mu ree.  
 O buru iya anoduje akpo-ziru  
 mu uzo iphe, mu e-me.
- 25 E wozekporu mu pho woru  
 mu dee adee l'urwuku.  
 Mephunu ndzu mu azu g'o  
 buru k'ophuu, bu iya bu iphe  
 ono, opfu nkengu pfuru ono.
- 26 Mu doru ngu guzo mu gbaru;  
 i ngaberu mu nchi.  
 Zinaa mu iphe, i toru okpa  
 iya su g'e tsoje.
- 27 Mena g'iphe, i karu  
 g'e meje doo mu enya.  
 Oo ya bu ge mu ato  
 nwehu ria k'iphe, du biribiri,  
 iimeshi.
- 28 Mu guwaru aphu jasu ike  
 buebe mu ree.  
 Jiko mena g'ike du mu,  
 bu iya bu iphe,  
 opfu ngu pfuru.
- 29 Phufu mu ge mu ta anodu  
 l'uzo eregede.  
 Menaaru mu eze-iphe-oma;  
 zia mu ekemu ngu.
- 30 Mu hatawaru eme ire-lanu.  
 O buru ikpe ngu g'o ha be  
 mu wowaru dobe onwomu  
 l'uzo iphu.
- 31 Iphe, mu gudeshe ike ememe  
 bu iphe,  
 gube Chipfu toru lekemu.

- B'ekwekwa g'e mee mu  
iphe-iphere.
- 32 Ụzo, mu anọduje agba etso  
bụ eme iphe, ị sụru g'e meje;  
kele i mewaru g'ẹhu-utso ji  
mu obu ejiji.
- 33 Jiko Chipfu; zinaa mu gẹ  
mu e-shije etso iphe,  
ị tọru okpa iya sụ g'e tsoje.  
Ọo ya bụ gẹ mu emekwanaa  
ya jasụ l'ikpazụ iya.
- 34 Menaa g'iphe doje mu ọnya;  
k'ophu mu a-duje ike dobe  
ekemu ngu ono;  
bya egude obu mu g'ọ ha  
emekotaje iya ememe.
- 35 Goshi mu ụzo, mu e-shije  
eme iphe, ị sụru g'e meje;  
kele ọ bue ya phọ bụ iphe,  
atsoje mu utso ememe.
- 36 Gọ-zinaa obu mu g'ọ gha  
iphu l'eme iphe, ị turu  
l'ekemu.  
G'ọ tọ gha iphu l'eri ndu ọzo  
urwu.
- 37 Menaa gẹ mu te eworu ọnya  
dabẹ l'iphe-mmanụ.  
Mephunu ndzụ mu azụ g'ọ  
buru k'ophúú, bụ iya bụ iphe,  
opfu ngu pfuru.
- 38 Menaarụ mu iphe,  
i kweru ukwe l'ii-meru mube  
onye-ozu ngu;  
k'ophu aa-wata ngu atsụ ebvu.
- 39 Wofunuru mu iphe-iphere ono,  
mu atsụ ebvu ono;  
kele ekemu ngu dụ ree.
- 40 Iphe, ị karụ g'e meje  
agushikpoo mu  
ike ememe.  
Jiko gudenụ kele ị bụ onye  
pfuberekoto dobe



- mu ndzụ.
- 41 Goshinu mu n-yemobu ngu  
ono jiko Chipfu.  
Dzotanu mu; noo kele ọo iphe,  
i kweru ukwe l'ii-meru mu.
- 42 Ọo ya bụ gẹ mu amaru iphe,  
mu a-sarụ yeru ndu ekweru  
mu une;  
kele mu kpọru obu ye  
l'opfu ngu.
- 43 Ta anafukwa mu ire-lanụ,  
dụ mu l'onu;  
kele mu chiru ụpfu kwẹe  
l'ikpe, i kperu.
- 44 Ọo iphe, ekemu ngu pfuru bẹ  
mu e-meje  
jasụ ẹ tuutuutu ẹ  
mijimiimii.
- 45 Mu e-nwekpọru onwomu  
tsoru aghaphe;  
kele mu tükochawaru iphe,  
ị karụ g'e meje maẹberu.
- 46 Mu a-pfuru l'iphu ndu eze  
pfua k'iphe, ị turu l'ekemu.  
Ọphu iphere abyadụ adụ mu.
- 47 Iphe, aduje mu ree bụ  
eme iphe, ị sụru g'e meje;  
noo kele mu yeru iya obu.
- 48 Mu amachije ẹka mu labọ gẹ  
mu nata iphe, ị sụru g'e meje,  
bụ iya bụ iphe ono,  
mu yeru obu ono;  
tẹme mu nọdu anọduje  
nggujungguji arị k'iphe ono,  
ị tọru ọkpa iya sụ g'e tsoje  
ono.
- 49 Nyatakwa opfu, i pfuru yeru  
mụbe onye-ozu ngu;  
noo kele i mewaru;  
mu leahaa ẹnya iphe.
- 50 Iphe, aduje mu obu mẹ mu  
nọdu eje iphe-ẹhuka bụ ẹ-a:

L'ukwe-iphe, i kweru mu  
emeje gẹ ndzụ mu bụru  
k'òphúú.

51 Ndu eku onwophe bẹ achije  
mu ọchi kpọkiriuchaa  
akpọkirihi;  
ọle o too mejedu mu gẹ mu  
haa eme iphe,  
ekemu ngu pfuru.

52 Gụbe Chipfu; ọobujeru;  
mu -nyata ikpe ngu ono,  
shirọ teke ndiche ono  
l'ọ dụa mu obu.

53 Ehu-eghu azuje mu pfuurii;  
ọ bụru ndu ẹjo-iphe  
akpaje iya;  
mbụ ndu ono,  
jịkaru edobe ekemu  
ngu ono.

54 Iphe, ị tọru ọkpa iya sụ g'e  
tsoje abujeru ishi ébvú mu  
l'iphe, bụkpoo ụlo,  
mu zẹkporu l'uzo ije mu-a.

55 L'enyashi bẹ mu anyataje  
ẹpha gụbe Chipfu;  
l'o mee mu gẹ mu dobe  
ekemu ngu.

56 Iphe, mu aghaje iphu ememe  
teke bụkpoo teke mu nọ  
bụ eme iphe,  
ị karu g'e meje.

57 Ọo ngu bụ okiphe nkemu  
gụbe Chipfu.  
Mu kwewaru ngu ukwe ẹ  
mu a-nọdu eme opfu ngu.

58 Mu gudewaa obu mu g'ọ ha  
ele ngu ẹnya l'ẹka.

Menaaru mu eze-iphe-oma,  
bụ iphe,  
i kweru mu ukwe iya.

59 Mu lewaru ụzo mu ẹnya  
uswe lee ya ogologo;

- bya eshiwaa iya futa bya  
awata eme iphe,  
i turu l'ekemu.
- 60 Mu e-me egwegwa;  
mu ta akpodu upfu  
eme iphe, i suru g'e meje.
- 61 O -betachakpo ndu  
ejo-iphe kee mu egbu;  
mu ta abyadu azoha  
ekemu ngu.
- 62 Qobujeru; a -nonyaa l'echi  
abali;  
mu agbalihu kele ngu  
ekele k'ikpe ngu ono,  
pfuru oto ono.
- 63 Iphe, bukpo ndu atsū ngu  
ebvu be mu l'ephe  
eshikota onya;  
mbu ndu ono, tukoru iphe,  
i karu g'e meje go ha  
emekota ono.
- 64 Eliphe l'ophu be n-yemobu  
gube Chipfu jiru ke  
pyimu pyimu.  
Jiko zinaa mu iphe ono,  
i toru okpa iya su g'e  
tsoje ono.
- 65 Jiko Chipfu; menaru mube  
onye-ozu ngu iphe-oma;  
eshinu o bu iphe,  
i kweru ukwe iya.
- 66 Zinaa mu mmamiphe;  
yee ekpe ikpe,  
du nhamunha;  
kele mu kwewaru eme  
iphe, i suru g'e meje.
- 67 A byaru awata mu anu  
chippfu;  
mu shiswehawaro uzo;  
obenu le nta-a be mu  
kwewaru eme opfu  
ngu.

- 68 Ì bú onye oma; teme ì nõdu  
emejekwapho iphe,  
du ree.  
Zinaa mu etso iphe,  
ì toru okpa iya sù g'e tsoje.
- 69 A makwaru-a le ndu eku  
onwophe anoduje  
adzushi uka ekpu mu;  
obenu le mu gudeepho obu  
mu g'o ha emekota  
iphe, ì karu g'e meje.
- 70 Ndu ono be imemini  
nemadzu ta adujedu.  
Obenu le mbedua bu eme  
iphe, ekemu ngu  
pfuru aduje mu ree.
- 71 Chiipfuu ono, a nuru mu ono  
dukwa-a ree;  
k'ophu mu a-nwuta etso iphe,  
ì toru okpa iya.
- 72 Ekemu, shi ngu lonu be mu  
kakwa agube iphe eme  
l'unubuku mkpola-ododo  
waa mkpola-ochaa.
- 73 Oo eka ngu be i gude kpua  
mu; bya emee mu;  
mu nguru anguru.  
Jiko menaa ge mu maru iphe  
k'ophu mu a-nwu eme  
iphe, ì suru g'e meje.
- 74 Ge ndu atsù ngu ebvu  
tekwa e swa m'ephe  
huma mu;  
noo kele iphe,  
mu daru ngaberu bu  
opfu nkengu.
- 75 Gube Chipfu; mu makwaru-a  
likpe ngu pfuru oto;  
teme li pfu-shiru ike l'iphe,  
i pfuru nua mu chiipfuu.
- 76 Ge n-yemobu ngu bunuru  
iphe, a-noduje adu mube

- onye-ozu ngu obu;  
 eshi ophu o bu iphe,  
 i kweru mu ukwe iya.
- 77 Phunaaru mu obu-imemini  
 k'ophu mu a-ndu ndu;  
 kele iphe,  
 aduje mu ree bu ekemu  
 nkengu.
- 78 G'e menuru iphere kpu  
 ndu eku onwophe;  
 kele ephe mesweru mu;  
 l'ebe o du iphe,  
 mu meru phe.  
 Obenu le mbedua  
 anodujeepho ari iphe,  
 i karu g'e meje l'oriri.
- 79 Ge ndu ats'u ngu ebvu  
 byapfutajekwa mu;  
 mbu ndu iphe,  
 i turu l'ekemu doru enya.
- 80 Ge mu tukokwa iphe,  
 i toru okpa iya su g'e  
 tsoje tsokota; go to dukwa  
 aka uta a-du mu l'ehu;  
 ophu e shi nno mee  
 mu iphe-iphere.
- 81 Meji atofuakwa mu atofu aka  
 oogu mu g'a dzota mu;  
 obenu l'aka obu mu du  
 bu l'opfu ngu.
- 82 Enya anyiwa mu erwa;  
 aka mu ele enya teke  
 ii-me iphe,  
 i kweru ukwe iya.  
 Mu asuje: “?Bukpohunaa teke  
 ole be ii-du mu obu?”
- 83 A makwaru-a le mu du g'akpo,  
 a miberu l'enwuru-oku;  
 mbu akpo, eeyeje me.
- Obenu le mu ta azohajedu iphe,  
 i toru okpa iya su g'e tsoje.
- 84 ?Bu teke ole be mube

- onye-ozì ngu a-taberu  
nshì?
- Kọ́oru mu teke ii-bebe hụa  
ndu akpa mu ẹhu ahụhù.  
85 Ndu eku onwophe ebvujeru  
mu nsụ gẹ mu daba.  
Ono bụru iphe, ị tūru ekemu  
sụ g'e te emejeshi.
- 86 Iphemiphe, ị sūru g'e meje bẹ  
pfukotaru nhamunha.  
Yenuru mu ẹka;  
kẹle ndiphe akpa mu ẹhu  
l'ẹbe adu iphe,  
mu meru phe.
- 87 O bufua nwanshii;  
m'ẹphe ehufu mu gẹ mu  
ta nọduhe l'eliphe-a;  
obenu lẹ mu ta  
agwọbeduru eme iphe,  
ị karu g'e meje.
- 88 Eshinu i yeru mu obu;  
kwachinaa ndzụ mu g'ọ tọ  
du iphe, e-me iya nụ;  
k'ọphu mu e-meje iphe,  
i gude onu ngu tūa l'ekemu  
sụ g'e meje.
- 89 Opfu gube Chipfu a-nọ jasụ  
l'ojejoje.  
O keru kẹ jingujingu  
l'akpaminigwe.
- 90 Ipfushije ike l'iphe, i pfuru;  
e -shi l'ogbo sweru ogbo.  
I meru eliphe dobe;  
ọ kpọru g'abara.
- 91 Ikpe, i kperu g'ọ hakpọo  
kpọerupho g'abara  
byasụ ntanụ-a;  
kẹle iphemiphe ejeru  
ngu ozi.
- 92 O tọ bụ l'ekemu ngu shiepho  
eshinu bụru iphe,  
aduje mu ree;

- me mu alakwa l'iyi le teke  
ono,  
mu shi eje iphe-ehuka ono.
- 93 Mbù le mu ta abyadu azoha  
eme iphe, i karu g'e meje;  
kele oo ya be i gude  
mephu ndzu mu azu;  
o buru k'ophuu.
- 94 Dzoana mu; kele mu bu nkengu;  
teme mu bya atukowa iphe,  
i karu g'e meje go ha  
maeberu.
- 95 Ndu ejo-iphe kwageberu  
akwagebe g'ephe  
mebyishia mu;  
ole mu a-tukoephe iphe,  
i turu l'ekemu kwakobe l'ime  
obu mu ari iya oriri.
- 96 Iphe, a suru lo dube ree  
be mu ahumajeeppo lo  
duru aka o phoduru;  
obenu l'iphe,  
i suru g'e meje dube ree.
- 97 Ekemu ngu be mu yekwaru  
obu yegharu iya aka.  
Oo ya be mu anoduje ari l'oriri  
l'ime obu mu  
mkpurumkpuru.
- 98 Eme iphe, i suru g'e meje  
mewaru;  
mu ka ndu ohogu mu amaru  
iphe;  
kele onoduje swiru mu  
mkpurumkpuru.
- 99 Enya kakwa mu erwu ali  
e -me le ndu ezi mu iphe;  
kele mu anoduje ari k'iphe,  
i turu l'ekemu l'oriri.
- 100 Mu ka ndu bu ogerenya  
amaru iphe;  
kele mu emeje iphe,  
i karu g'e meje.

- 101 Ọkpa mu labo be mu  
 meerupho ophu  
 ooshiswetajedu uto,  
 bu ejo uto;  
 k'ophu mu e-meje opfu ngu.
- 102 Mu ta ahajekwaru ikpe,  
 i kperu;  
 kele oo gubedua lonwongu  
 ziru mu iphe.
- 103 Egube g'iphe, i pfuru  
 atso-bekwanu mu utso!  
 O kakwa mu utso;  
 e -me le manu-enu.
- 104 Urwu, mu eritaje l'eme iphe,  
 i karu g'e meje be  
 bu nkwamenya.  
 O buru iya meru g'o gude  
 iphe, bukpo uto ughoshi  
 dukota mu ashi.
- 105 Opfu ngu bu oroku,  
 mu egudeje huma aka mu  
 a-zobe okpa;  
 bya aburu iphoro,  
 du l'uto mu eshi.
- 106 Mu gudewaa obu mu pfua  
 ya hoo haa;  
 bya eriru angu ye iya;  
 le mu a-noduepho eme iphe,  
 ikpe ngu ono,  
 pfuru oto ono pfuru.
- 107 Mu jenukawaru iphe-ehuka.  
 Gube Chipfu;  
 mephunu ndzu mu azu  
 g'o buru k'ophuu,  
 bu iya bu iphe,  
 opfu ngu pfuru.
- 108 Jiko Chipfu; natanu ajaja  
 owa-a, mu gude obu mu  
 aja ngu-a.  
 Zikwaa mu pho g'ikpe  
 ngu gbaru.
- 109 A makwaru-a le mu achijeru



- ndzu mu l'eka tekenteke;  
obenu le mu ta abyakwa  
azoha ekemu ngu.
- 110 Ndu ejo-iphe gbabewaru  
mu onya;  
ole o too medu mu ge mu  
haa eme iphe, i karu g'e meje.
- 111 Iphe, i toru l'ekemu bu  
okiphe mu jasu le  
tuutuutuu le mimiimii.  
O buru iya emeje g'ehu  
tso mu utso l'ime obu mu.
- 112 Eka mu phoberu bu l'etso  
iphe, i toru okpa iya su  
g'e tsoje  
jasukpoephe ge mu  
a-no-beru.
- 113 Ndu anoduje abo obu ebo  
be du mu ashi;  
obenu l'ekemu nkengu be  
mu yekwanuru obu.
- 114 Oo ngu bu eka mu edomije  
onwomu;  
bya aburu onye mu no  
l'eka iya ezeru ndzu.  
Eka mu chiru upfu yee  
bu l'opfu ngu.
- 115 Unu pakwaru mu haa;  
unube ndu eme ejo-iphe;  
k'ophu mu a-nodu emeje  
iphe,  
Chileke mu suru g'e meje.
- 116 Bunuru agbarike mu;  
lo bu iphe, i kweru ukwe iya;  
ge mu anodu ndzu.  
B'ekwekwa g'iphe ono,  
mu ele enya iya ono mebyia  
mu iphu.
- 117 Gudeshinaa mu ike;  
k'ophu aa-dzota mu.  
Mu a-nodujeephe akwabe iphe,  
i toru okpa su g'e tsoje

ono ùbvù.

118 Ndu harù etso okpa iphe,  
 ì tọru tsoahaa iphe ọzo bẹ  
 ìjìkaje ajìka ophu;  
 kele ẹregede,  
 ẹphe agba bụ kẹ mmanù.

119 Iphe, bụkpoo ndu ẹjo-iphe,  
 nọ l'eliphe bẹ iikpoje  
 g'e kporu ntụ.  
 Noo g'o gude mu yee obu l'eme  
 iphe, ì tọru l'ekemu.

120 Ogwehu mu aphukota jiiijiii  
 ẹka mu atsù ngu ebvu;  
 bya atsukwapho ikpe  
 ngu ebvu.

121 Mu mewaru iphe,  
 pfulu ọto bya aburu iphe,  
 dù nhamunha.  
 Jiko ba pakwarù mu haarù  
 ndu eme mu ewere.

122 Jiko kwenaa onye-ozì  
 ngu ukwe l'ì-nọdu-a  
 eleta iya ẹnya.  
 Te ekwekwa gẹ ndu eku  
 onwophe mee mu ewere.

123 Ẹnya anyiwa mu ẹrwa ẹka  
 mu ele ẹnya g'ì bya  
 adzọta mu;  
 bụ iya bụ iphe,  
 gube onye pfulberekoto  
 kweru mu ukwe iya.

124 Menaarù mube  
 onye-ozì ngu iphe, dù ree;  
 eshinu i yeru mu obu.  
 Zinaa mu iphe,  
 ì tọru okpa iya sù  
 g'e tsoje.

125 Mbẹdua bụ onye-ozì ngu;  
 jiko menaa g'iphe doje  
 mu ẹnya;  
 k'ophu iphe,  
 ì tọru l'ekemu e-do

- mu ɛnya.
- 126 Gube Chipfu;  
mekwaa ire nta-a;  
kele ekemu,  
i turu be e tee tsohedu.
- 127 Oo l'ole mu yeru iphe,  
i suru g'e meje obu;  
yeghata iya ge mu  
yeru okpobe mkpola-ododo;
- 128 teme mu kweta l'iphe,  
i karu g'e meje be  
pfuchaaru oto;  
meru g'o gude uto  
ughoshi dukota mu ashi.
- 129 Iphe, i turu l'ekemu  
du biribiri.  
Noo g'o gude mu nodu  
etso iya l'o rwuberu iya.
- 130 Eka opfu ngu bataru  
be iphoro etsojeru iya;  
teme o nodu emeje  
ge ndu amazidu iphe  
maru iphe.
- 131 Mu saru onu wata atu  
hehehe;  
eka egu eme iphe,  
i suru g'e meje agu mu.
- 132 Ghanaaru mu iphu;  
jiko meeru mu eze-ipe-oma;  
g'iimejeru iphe,  
bukpoo ndu yeru epha  
ngu obu.
- 133 Menaa ge mu haje okpa  
g'i suru g'a haje iya.  
Te kwekwa g'iphe-eji,  
kapyabe mu ɛnya.
- 134 Gbafuta mu l'eka ndu eme  
mu ewere;  
k'ophu mu a-nodu emeje  
iphe, i karu g'e meje.
- 135 Menaa g'iphu ngu gbua  
nwijnwii l'ehu mube

- onye-ozì ngu.  
 Zinaa mu iphe, ì tọ̀ru ọ̀kpa  
 iya sù g'e tsoje.
- 136 Ẹ̀nya-mini asọ mu  
 gborogboro l'ẹ̀nya;  
 kẹ̀le e tee etsodu  
 ekemu ngu.
- 137 Ị̀ bụ onye p̄f̄uberekoto ḡube  
 Chipfu;  
 tẹ̀me ikpe ngu p̄f̄uru nhamunha.
- 138 Iphe, ì t̄shiru l'ekemu dobe  
 p̄f̄ukotaru nhamunha;  
 tẹ̀me ẹ̀phe b̄ukotaru  
 ire-lanụ.
- 139 Obu, mu yeru ngu rimiwaru  
 mu ishi;  
 kẹ̀le ndu ọ̀hogu mu ta  
 aḡubeduru op̄fu ngu iphe.
- 140 Iphe, i kweshiru ukwe  
 ememe bẹ a t̄owaru  
 nwehu dalek̄ota adale.  
 M̄ube onye-ozì ngu bya eyee  
 p̄he obu nt̄umatu.
- 141 A maru-a lẹ mu b̄u  
 iphe-mmanụ;  
 tẹ̀me ọ̀phu ọ̀ d̄udu iphe,  
 a ḡuberu mu;  
 obenu lẹ mu ta z̄ohaduru  
 eme iphe, ì karu g'e meje.
- 142 Ap̄f̄ubekoto nkengu  
 a-d̄uwaro jeye l'ojejoje;  
 tẹ̀me ekemu ngu b̄uru  
 ire-lanụ.
- 143 Ejo iphe-ẹ̀huka;  
 waa aph̄u s̄o-kputeru mu;  
 obenu lẹ mu yel̄eru-a iphe,  
 ì s̄uru g'e meje obu.
- 144 Iphe, ì t̄uru l'ekemu dobe  
 d̄u nhamunha jas̄u  
 lẹ tuutuutu lẹ m̄iimiimii.  
 Mena ḡe mu nweru  
 egomunggo k'ọ̀phu mu

- a-nọdu ndzụ.  
 145 Mu gude obu mu g'ọ ha  
 kua ngu oku;  
 zanụ mu ọnu jiko Chipfu;  
 k'ọphu mu a-nọdu etso iphe,  
 ị tọru ọkpa iya sụ g'e tsoje.
- 146 Oo ngu bẹ mu kuru oku;  
 dzọnaa mu;  
 k'ọphu mu a-nọdu eme iphe,  
 ị tųru l'ekemu.
- 147 Mu gbeshiru tẹme nchi  
 bọhu wata echi mkpu  
 g'e yeru mu ẹka;  
 ẹka ọnya mu dụ bụ  
 l'opfu ngu.
- 148 Ọnya adujee mu phọ sasarasa  
 jasụ nchi abọhu;  
 k'ọphu mu a-tọ nwehu rịa  
 ọriri l'ukwe-iphe,  
 i kweshiru.
- 149 Numanu olu mu;  
 k'ọphu yẹ n-yemobu  
 ngu a-dagba.  
 Mephunu ndzụ mu azụ  
 g'ọ bụru k'ọphúú;  
 jiko Chipfu, bụ iya bụ iphe,  
 i kperu l'ikpe.
- 150 Ndu anọduje achiru mu  
 ẹjo idzu nọakwa mu ntse;  
 obenu l'ekemu ngu nọ  
 phẹ ụzenya.
- 151 Gube Chipfu nọakwapho  
 ntse; tẹme iphe,  
 ị sụru g'e meje tųkoru  
 bụkotaru ire-lanụ.
- 152 Teke dųhakpowaro ọnya  
 bẹ mu shi l'iphe,  
 ị tųru l'ekemu  
 nwuta l'ị tọru ọkpa iya  
 dobe g'ọ nọ jasụ l'ojejeje.
- 153 Lenaa ọnya l'iphe-ẹhuka,  
 mu eje; dzọo mu;

- kele mu ta zohajeduru  
 ekemu ngu.
- 154 Hanaaru mu enge;  
 gbafuta mu;  
 Mephunu ndzu mu azu g'ọ  
 buru k'ọphuu, bu iya bu iphe,  
 i kweru ukwe iya.
- 155 Ndzota no ndu ejo-iphe  
 uzanya;  
 kele ephe te esejedu  
 g'ephe e-me maru iphe,  
 i toru okpa iya su g'e tsoje.
- 156 Aphu obu-imemini ke gube  
 Chipfu paru aka.  
 Mephunu ndzu mu azu g'ọ  
 buru k'ọphuu, bu iya bu iphe,  
 i kperu l'ikpe.
- 157 Ndu achu mu le njo pakwaru  
 igwerigwe;  
 ole iphe ono ta akposhiduru  
 mu eme iphe, i turu l'ekemu.
- 158 Ndu e gudedu ire phe aka  
 be agbarwuje mu ephe  
 me mu huma phe;  
 kele ephe te emejedu iphe,  
 opfu ngu pfuru.
- 159 Humawaro ge mu  
 yeberu obu l'eme iphe,  
 i karu g'e meje.  
 Gudenu kele i yeru mu obu  
 kwachia ndzu mu  
 jiko Chipfu.
- 160 Opfu ngu l'ophu bukota  
 okpobe opfu;  
 teme ikpe, pfuru oto ono,  
 iikpeje ono bukotaru iphe,  
 a-no jasu l'ojejeje.
- 161 Ndu-ishi anoduje akpa  
 mu ehul'ebe adu iphe,  
 mu meru phe;  
 obenu l'iphe, mu aphujeru  
 kpaakpaakpaa

- kpoloko bu opfu ngu.  
 162 Ukwe-iphe, i kweru mu  
 emeje g'ehu tsoo mu utso;  
 g'onye kwataru iphe,  
 ha shii l'okwata.
- 163 Ughoshi du mu ashi;  
 teme mu nodu anoduje  
 akpo-yiru iya ukuvu;  
 obenu le mu yekwanuru  
 ekemu ngu obu.
- 164 Ugbo esaa le mboku be mu  
 etuje ngu epha k'ikpe ono,  
 iikpeje nhamunha ono.
- 165 Ndu yeru enya lekemu ngu  
 be ehu dukpoo guu  
 dushia ya ike;  
 ophu o dudu iphe,  
 byaru aburu opfu du phe  
 l'okpa.
- 166 Mu no kwaberu gube Chipfu  
 g'i bya adzota mu;  
 teme mu nodu emeeppo  
 iphe, i suru g'e meje.
- 167 Mu emeje iphe, i turu lekemu;  
 kele mu yeru iya obu  
 shingushingu.
- 168 Mu anoduje eme iphe,  
 i karu g'e meje bya  
 emekwapho iphe,  
 i turu lekemu;  
 kele iphemiphe,  
 mu eme be i makotaru.
- 169 Ge mkpu, mu echi rwunaa  
 ngu nchi jiko Chipfu.  
 Menaa g'iphe doje mu enya,  
 bu iya bu iphe,  
 opfu ngu pfuru.
- 170 Jiko g'arworwo, mu arwo  
 rwunaa eka i no.  
 Nafutanu mu, bu iya bu iphe,  
 i kweru ukwe iya.
- 171 G'ogbogboromonu mu

- bunuru etu ngu epha  
 eji iya pyimu;  
 kele i ziru mu iphe,  
 i toru okpa iya su g'e tsoje.
- 172 Mu e-gude onu mu gua opfu  
 nkengu l'ebvu; kele iphemiphe,  
 i suru g'e meje pfuru  
 nhamunha.
- 173 Jiko machinaa eka ngu  
 kwagebe g'i yeru mu eka;  
 kele iphe, mu hataru bu  
 eme iphe, i karu g'e meje.
- 174 Iphe, agu mu nu bu g'i dzota  
 mu jiko Chipfu.  
 Ekemu ngu aduje mu ree ememe.
- 175 Hanaa mu ge mu nodu ndzu  
 tuje ngu epha.  
 Jiko g'ikpe, iikpeje  
 gudeshinaa ndzu mu.
- 176 Mu kpaphuhuwaru g'aturu,  
 tuphahuru etuphahu.  
 Jiko chonaa mube  
 onye-ozu ngu;  
 kele mu ta zohajeduru  
 iphe, i suru g'e meje.

## Ebvu-oma 120

### Ebvu, aaguje me a -nodu eje Jierusalemu

- 1 Mu rakuru Chipfu teke mu  
 eje iphe-ehuka;  
 o numa olu mu.
- 2 Dzotanu mu jiko Chipfu  
 l'eka ndu ntuphu-ire;  
 me l'eka ndu eregede.
- 3 Unube ndu eregede;  
 ?bu gunu be unu ari  
 l'oo-me unu?  
 Mbú ?bukpoo gunu be unu  
 ari l'oo iphe,



- oo-gude byapfuta unu?  
 4 Oo-zi ndu ojoḡu;  
 ephe egude apfu,  
 tūpyiru zinguzingu bya  
 ahūa unu ahūhū.  
 Ephe emee unu; unu adabyiru  
 l'eka ono ata pfupfupfu  
 g'icheku oku.  
 5 Nshio mube onye jeru  
 ahata ali Mesheku buru;  
 mbu mube onye bu  
 l'ulo-ekwa ndu Keda.  
 6 Mu le ndu nchi-adu-doo  
 du ashī shiwaa ūzenya  
 butaru;  
 7 obenu le mbedua,  
 bu onye anoduje eme ge  
 nchi du doo-a abujeru;  
 mu -nodu epfuru phe  
 opfu belebele;  
 ephe akpaa vūlavula  
 g'ephe bya etsoo  
 mu oḡu.

## Ebvu-oma 121

Ebvu, aaguje me a -nodu  
 eje Jierusalemu

- 1 Mu paliru enya lee l'eli ubvu  
 ubvu ono su:  
 “?Bu awe be n-yemeka mu  
 eshije?”  
 2 N-yemeka mu eshije l'eka  
 Chipfu;  
 onye meru igwe mee  
 mgboko.  
 3 Onye ono, eche ngu nche  
 ono be mgbenya ta abyadu  
 ezinwuta enya;  
 teme ophu o kwedu g'okpa  
 chiswafu ngu.

- 4 Mbù lẹ-a; onye ono,  
eche ndu Ízurelu nche ono  
bẹ mgbenya ta abyadu  
ezinwuta enya;  
ophu o buro k'ẹje iya  
ekuru ekuru.
- 5 Oo Chipfu eche ngu nche;  
bya aburu iya bu mkpu,  
a turu doberu ngu;  
teme o buro iya anoduje ngu  
l'ekutara egbobuta ngu.
- 6 Anwù, echi l'eswe ta adudu  
iphe, oo-me ngu;  
ophu o buro k'onwa,  
echi l'enyasi.
- 7 Oo Chipfu ephufuje ngu  
l'eka ejo-iphe nokota.  
Oo yebedua anoduje eche  
ndzu ngu nche.
- 8 Oo Chipfu l'eduje ngu ije  
l'ejeje me l'alwalwa;  
shita nta-a jasù l'ojejoje.

## Ebvú-oma 122

Ebvú, aaguje me a -nodu  
eje Jierúsalemú; onye  
deru iya nu bu Dévidi

- 1 Ehu tsoru mu utso teke epe  
suru mu:  
“G'anyi je l'eze-ulo Chipfu!”
- 2 Anyi zobeakwaru okpa  
lonu-abata gube Jierúsalemú.
- 3 Jierúsalemú bu eze mkpukpu,  
a kpuru; o nokobe l'eka lanu  
ama ntumatu.
- 4 Oo eka ono be bu eka  
okpa-ipfu anoduje awu ala;  
mbu okpa-ipfu ke Chipfu;  
awu eje etu Chipfu epha;  
bu iya bu iphe,

- ì t̄uru l'ekemu doberu  
 ndu Ízurelu.
- 5 Oo l'eka ono b̄e aba-eze,  
 a n̄o ekpe ikpe n̄o;  
 mb̄u aba-eze,  
 shi l'ulo Dévidi.
- 6 P̄furu n̄u Chileke ḡe n̄chì  
 d̄u doo l̄e Jierúsalem̄u:  
 “G'iphemiphe, b̄ukwaru ndu  
 yeru ngu obu k'oma k'oma.
- 7 Ḡe n̄chì d̄ukwa ndu igbul̄o  
 ngu n̄o-pheru  
 mgburugburu doo.  
 G'ehu-guu b̄ukwaru k̄e ndu  
 bu l'ime ulo-mgbobuta  
 ngu.”
- 8 Mu gude iswi ehu unwune mu;  
 yee ònyà mu p̄he asu:  
 “Ḡe n̄chì d̄ukwa doo l'ime  
 ḡube Jierúsalem̄u!”
- 9 Mu gude iswi ehu eze-ulo  
 Chipfu, b̄u Chileke anyi  
 ach̄o g'iphemiphe b̄ukotaru  
 k'oma k'oma l̄e  
 Jierúsalem̄u.

## Ebvú-oma 123

Ebvú, aaguje m̄e a -n̄odu  
 eje Jierúsalem̄u

- 1 Mu paliru enya mu lee l'eka ì n̄o;  
 mb̄u l'eka ì n̄o ḡube onye ono,  
 s̄ugaru l'aba-eze ngu  
 l'imigwe ono.
- 2 Oo egube ono nwoke,  
 b̄u ohu an̄oduje ele nnaj̄iuphu  
 iya enya l'eka-a;  
 bya aburu egube ono nwanyì,  
 b̄u ohu an̄oduje ele nwanyì,  
 nwe iya n̄u enya l'eka-a;  
 b̄ukwapho g'anyìbedua

a-nodu ele Chipfu,  
 bu Chileke anyi enya l'eka  
 gbiriri jasụ teke ọo-phuru  
 anyi obu-imemini.

<sup>3</sup> Meeruro anyi eze-iphe-oma  
 jiko Chipfu.

Jiko meeruro anyi eze-iphe-oma;  
 l'ike bvwaru anyi anuma  
 eka ndu ozo epfu l'o to  
 nwedu iphe, anyi bu.

<sup>4</sup> Mbụ ike bvwaru anyi  
 anuma ochi,  
 ndu eku onwophe achị anyi;  
 waa anuma eka ndu etu  
 onwophe epha epfu  
 l'o to nwedu iphe,  
 anyi bu.

## Ebvu-oma 124

**Ebvụ, aagụje mę a -nodu  
 eje Jierúsalemụ; onye  
 deru iya nụ bu Dévidi**

<sup>1</sup> Ọ tọ bu ị Chipfu nọ-kube  
 anyi ...

Ngwa; g'unubę ndu Ízurelu  
 tuko pfua sụ:

<sup>2</sup> Ọ tọ bu ị Chipfu nọ-kube  
 anyi;

teke ndiphe tsoru anyi ogu;

<sup>3</sup> mbụ teke ono, ehu-eghu  
 phe shi nwuhu phuruphuru  
 g'oku l'ehu anyi ono;  
 m'ephe elwekwaa anyi ị ndzụ;

<sup>4</sup> mbụ-a; ephe gege erikwa  
 anyi túbukungu g'utso;  
 buru ochioku mini sọta  
 anyi tųgbua;

<sup>5</sup> buru ukporo-mini  
 kpota anyi;  
 anyi eje aburu ọla-l'iswi.

- 6 G'ajaja b̄uru k̄e Chipfu,  
 b̄u onye ono, te ekwedu  
 g'ephe gude eze  
 takashia anyi atakash̄i ono.
- 7 Anah̄u, anyi nah̄uru ph̄e  
 d̄uwaa g'enu, nah̄uru  
 onye agba onyà-enu.  
 Onyá obu b̄e a gbajishuru;  
 anyi shi nno nah̄u  
 gbala.
- 8 N-yem̄eka anyi eshije  
 l'eka Chipfu;  
 onye meru igwe mee  
 mgboko.

## Ebvu-oma 125

### Ebvu, aaḡuje m̄e a -n̄odu eje Jierúsalem̄u

- 1 Ndu dakoberu Chipfu d̄u  
 g'úbvú Zayonu, e tee  
 nwubatadu enwubata;  
 bya ab̄uru úbvú,  
 a-n̄waro jas̄u l'ojejoje.
- 2 Oo g'úbvú n̄o-pheru  
 Jierúsalem̄u  
 mgburugburu-a;  
 b̄u ḡe Chipfu a-n̄o-pheje  
 ndibe iya mgburugburu  
 shita nta-a jas̄u l̄e  
 tuutuutuu l̄e m̄imiimii.
- 3 Ndu ejo-iphe taa bukwaru  
 ishi ndu pf̄uberekoto;  
 odumeka b̄e ndu ono  
 pf̄uberekoto ono  
 e-yekwa ̄eka l'eme  
 ejo-iphe.
- 4 Jiko Chipfu; menaar̄u ndu  
 oma ree;  
 mb̄u ndu obu ph̄e  
 guru ìphóró.

5 Ọle iphe, bukpo ndu  
 eshi ọzo,  
 apfuduru nhamunha  
 be Chipfu a-tuko epe  
 le ndu eme ejo-ipe  
 l'ali-a wofukota.  
 G'ehu-guu bukwaru ke  
 ndu Izurelu.

## Ebvu-oma 126

Ebvu, aaguje me a -nodu  
 eje Jierusalemu

- 1 Teke Chipfu duphutaru ndu  
 ono, a kpuru le ndzu  
 ono azu le Zayonu be o  
 du anyi g'o bu le nrwọ  
 be anyi arwo iya.
- 2 Onu-ochi kojachaa anyi  
 asha ekoja.  
 Ire pfuru anyi oto l'agu  
 ebvu ehu-utso.  
 Ndu ohozo wata epfu su:  
 "Chipfu meakwaru phe iphe,  
 paru eka."
- 3 Chipfu meakwaru anyi iphe,  
 paru eka.  
 O buru iya meru g'o gude  
 ehu nodu atso anyi  
 ntumatu.
- 4 Jiko Chipfu; diphunu anyi  
 azu l'onodu anyi ono;  
 egube ono, i meru;  
 nggele soahaa gborogboro  
 l'echiegu ndohali ono;
- 5 k'ophu ndu gude  
 enya-mini kua iphe l'ali  
 e-gude ebvu ehu-utso  
 kpata iya akpata;
- 6 mbu l'onye ono,  
 gude enya-mini aku

iphe l'alì bẹ a-gùru ebvu  
 ẹhu-ùtso lwa;  
 vuru wọpfula-wọpfula iphe,  
 o metaru l'opfu iya.

## Ebvü-oma 127

Ebvü, aagùje mẹ a -nọdu  
 eje Jierúsalemü; onye deru  
 iya nù bụ Sólomọnu

- 1 Ọ -bùdu lẹ Chipfu kpuru ọlo  
 l'onwiya bẹ ndu akpọ iya  
 nù akpukwa kẹ mmanu.
- Ọ -bùdu lẹ Chipfu cheru  
 mkpukpu nche l'onwiya  
 bẹ ndu nche pfukwaru  
 nche kẹ mmanu.
- 2 Ọ tukuru buru kẹ mmanu  
 bẹ iitehuje lẹ nchi-abọhu;  
 laa l'ọlo l'echi abalì;  
 ẹka iise akanya nri, ii-ri;  
 kẹle ndu Chipfu yeru  
 obu azejekwaduro lẹ  
 mgbenya;  
 l'o wotawaru phe iphe,  
 ẹphe e-ri.
- 3 Ụnwegirima bụ okiphe,  
 shi l'ẹka Chipfu.  
 Atsụ ime buru  
 obunggo,  
 shi l'ẹka Chipfu.
- 4 Ụnwegirima, a nwuru  
 l'okorọbya bẹ dọ g'apfụ,  
 nọ l'ẹka onye ojọgu.
- 5 Ẹhu-ùtso bẹ a gọru nù onye  
 chì iya chì-jia ẹkpa iya.  
 Iphere ta abyadụ eme iya  
 m'ẹphe lẹ ndu ọhogu iya  
 nọdu aba mba  
 l'ọnu-abata mkpukpu.

## Ebvu-oma 128

Ebvu, aaguje me a -nođu eje Jierúsalemú

- 1 Ehu-utso be a goru nu iphe,  
bukpoo ndu atsu Chipfu ebvu;  
mbu ndu bu uzo iya be  
ephe etso.
- 2 Onye ono a-nođu ndzu  
ria iphe, o setaru l'akanya;  
teme ehu-utso waa k'oma  
a-buru nkiya.
- 3 Nyee ngu a-nođu l'ibe  
ngu dūepho ge vayinu,  
amishi amimi ike;  
teme unwu ngu adu  
g'ekali-oshi olivu  
no-pee teburu ngu  
mgburugburu.
- 4 Noo g'onye a goru onu-oma  
nu a-du bu ono;  
mbu onye atsu  
Chipfu ebvu.
- 5 Ge Chipfu shikwa le  
Zayonu goru onu-oma  
nu ngu.  
Teme li nođukwapho  
huma g'uba Jierúsalemú  
a-du-be shii jasú  
g'ii-no-beru l'eliphe-a.
- 6 Ii-nođukwapho ndzu  
huma unwu  
nwanwanwaranwa ngu.  
G'ehu-guu bukwaru  
ke ndu ízurelu.

## Ebvu-oma 129

Ebvu, aaguje me a -nođu  
eje Jierúsalemú

- 1 Ephe mewaru mu ewere  
megharu mu iya eka



- e -shi teke mu bu nwata ...  
 Ngwa; g'unube ndu Ízurelu  
 tuko pfua su:
- 2 Ephe mewaru mu ewere  
 megharu mu iya aka  
 e -shi teke mu bu nwata;  
 obenu l'ephe te  
 emekpeduru mu.
- 3 Ephe gudewaa echachi  
 chia mu kpachacha.  
 Ónyá, ephe chibashiru  
 mu l'okpurukpu  
 dabyichaerupho du  
 g'eka a waru oswawara.
- 4 Obenu le Chipfu bu onye  
 pfuberekoto.  
 O gbeshiru bya atoo mu  
 l'egbu, ndu ejo-iphe shi  
 kee mu;  
 mu nweru onwomu.
- 5 G'iphe, bukpo ndu Zayonu  
 du ashí bukwaru ndu  
 e-gude iphere laphu azu.
- 6 G'ephe dukwa g'eswa,  
 furu l'eli eswulo, abujeru:  
 O -bya asuru evuvu;  
 anwu ewowaru iya chigbua.
- 7 Eswa ono ahatabeje nwanshii  
 k'ophu bu l'onye jeru iya  
 egbuta abujeru;  
 o -gbua nta gbua imo;  
 o too gbutadu eswa,  
 jiru iya obochi-eka;  
 ophu o buro k'asuru  
 upfu eswa.
- 8 G'iphe, bukpo ndu  
 aghata aghata ghajekwa  
 phe iswi ekele.  
 G'o to dukwa onye a-su  
 phe g'onu-oma ke  
 Chipfu buru nkephe;  
 ozoo l'ephe gude

ɛpha Chipfu agoru  
phe onu-oma.

## Ebvu-oma 130

Ebvu, aaguje me a -noɖu  
eje Jierúsalem

- 1 Mu no l'echi ogbumini  
k'iphe-ɛhuka araku  
gube Chipfu;
- 2 Jiko Nnajiuphu; numanu olu  
mu.  
Ngabenuru mu nchi le mkpu,  
mu echi g'i meeru mu  
eze-iphe-oma.
- 3 Ome gube Chipfu edobeje  
iphe-ɛji, onyemonye eme;  
?bu onye gege adu ike  
pfuru l'atatiphu gube  
Nnajiuphu?
- 4 Obenu le gubedua aguje nvu.  
O buru iphe ono meru go  
gude a noɖu atsɔ  
ngu ebvu.
- 5 Mu no kwaberu Chipfu;  
teme obu mu noɖu  
elekwapho ɛnya iya.  
O buru l'opfu iya be mu  
daru ngaberu.
- 6 Obu mu no ele ɛnya  
Nnajiuphu leghata  
g'onye-nche anɔɖuje  
ele ge nchi bohu-kebe;  
mbu l'obu mu ka ele  
ɛnya Chipfu eme le ge  
ndu nche anɔɖuje  
eleberu ɛnya nchi-abohu.
- 7 Jiko Ízurelu; g'ɛnya unu  
duro l'eka Chipfu no;  
kele Chipfu bu onye  
eyeje obu yegharu iya eka;

- teme o nodu agbafutaje  
 nemadzu l'iphe-eji iya g'o ha.  
 8 O buru yebedua l'onwiya  
 a-gbafutakota ndu Izurelu  
 l'iphe-eji, ephe meshiru.

## Ebvu-oma 131

**Ebvu, aaguje me a -nodu  
 eje Jierusalemu; onye  
 deru iya nu bu Dévidi**

- 1 Mu te egudedu obu mu eku  
 onwomu; jiko Chipfu;  
 ophu mu aradu enya k'etsetse.  
 Mu ta ayojedu oshi l'iphe,  
 paru eka;  
 ophu mu ejejedu ekobe eka  
 l'iphe, mu asudu.  
 2 Iphe, mu mechiaru bu le  
 mu toru nwehu woru  
 obu mu dobekpoepo  
 nwadoo.  
 Oo ge nwata, a mifuru onu  
 l'era anoduje nwapyaa  
 le mgboru ne iya;  
 bukpoepo g'obu mu  
 no l'ime mu.  
 3 Jiko unube ndu Izurelu;  
 g'enya unu dunu l'eka  
 Chipfu no;  
 shita nta-a jasule  
 tuutuutuu le mijimiimii.

## Ebvu-oma 132

**Ebvu, aaguje me a -nodu  
 eje Jierusalemu**

- 1 Gube Chipfu; nyatanu Dévidi  
 yee iphe-ehuka, o no jegbabe.  
 2 O guru enwa; ria nte l'iphu

Chipfu; mbu ria angu  
l'iphu Okalibe ke Jiekopu  
su:

- 3 “Mu te eyedu ishi l'ulo mu;  
ophu mu abyadu abahu  
eka mu azeje aze.
- 4 Mu ta abyadu ekwe ge  
mgbenya shisweta mu  
enya;  
mbu le mu ta abyadu  
ekwe ge mgbenya mia  
mu eka lenya;
- 5 jasu mu ahuma eka mu  
a-chotaru Chipfu g'o buru;  
mbu eka Okalibe ke  
Jiekopu e-buru.”
- 6 Anyi numaru lo no le Ifurata.  
Anyi tugbua je ahuma  
iya l'oma egu  
Kiryatu-Jarimu.
- 7 Unu g'anyi jenu l'ulo-ekwa  
Chileke.  
Unu g'anyi jenu apfukube  
iya baaru iya eja.
- 8 Gbalihunu jiko Chipfu;  
bya lokpoku ngu;  
gu lokpoko ogbandzu  
ngu ono, egoshi ike  
ngu ono.
- 9 Ge ndu-uke ngu yena  
apfubekoto g'uwe.  
Ndu duru ngu nso agua  
ebvu ehutu.
- 10 Gudenu iswi ehú Dévidi,  
bu onye-ozí ngu nyata  
onye ono, i wuru  
manu l'ishi gude mee ya;  
o buru eze ono.
- 11 Chipfu riburu Dévidi angu;  
mbu angu, keru jingujingu,  
o to byadu emebyi  
emebyi.

- Ọ sùru iya: “Ọo onye lanu  
 le ndu bu oshilokpa  
 ngu be mu e-me g’o nodu  
 l’aba-eze ngu.
- 12 Ọ -buru l’unwu ngu doberu  
 ogbandzu mu l’ephe;  
 bya eme iphe,  
 mu turu lekemu;  
 oo ya bu; unwu phe  
 anowaro l’aba-eze ngu  
 jasụ l’ojejeje.”
- 13 Chipfu gudewaa aka iya  
 hota Zayonu;  
 kele aka ono du iya ree  
 k’eburu; noo kele o sùru:
- 14 “Ọo aka-a be mu e-me okpoku  
 mu jasụ le tuutuutuu  
 le mijimiimii;  
 teme o buru aka-a be  
 mu e-dobe aba-eze mu sugaru;  
 noo kele oo g’o du mu  
 ree bu ono.
- 15 Mu a-goru onu-oma nu iya  
 g’o nweru iphe nweru  
 k’etsutsu iya.  
 Ndibe iya ndu ophu daru  
 ukpa be mu a-nodu  
 azu-ji epho.
- 16 Ndu uke Chileke nkiya be  
 mu adzota okpobe adzota;  
 mbu le ndu duru Chipfu  
 nsọ a-noduepho agu  
 ebvu ehu-utso.
- 17 Ọ buru aka ono be mu  
 a-gbe mee g’onye ike du  
 shi l’onu-ulo Dévidi futa;  
 teme mu anwuru oku  
 ye l’oroku onye mu  
 wuru manụ l’ishi gude  
 mee ya; o buru eze.
- 18 Mu e-me g’iphere du  
 ndu ohogu iya okpobe

adudu;  
 obenu lẹ yẹbedua bẹ  
 mu e-kpube okpu-eze,  
 a-nọdu eke paapaapa.”

## Ebvu-oma 133

Ebvu, aaguje mẹ a -nọdu  
 eje Jierúsalemu; onye  
 deru iya nọ bụ Dévidi

- <sup>1</sup> Lewarọ g'ọ dọ-be ree bya adu  
 ùbvù l'ẹnya;  
 kẹ g'unwunna bukọbe  
 tųgba buru nanu.
- <sup>2</sup> Ọ dọephọ g'ọkpobe manu,  
 eshi mkpọ, a wuru  
 Erọnu l'ishi;  
 o shi iya l'ishi sọfuta iya  
 l'ẹj-aga;  
 gbaa ya gorogoro sọfuta  
 l'igburonu uwe iya.
- <sup>3</sup> Ọ dọkwaphọ g'ẹka iji,  
 shi l'úbvú Hamonu  
 akwa l'eli úbvú Zayonu.  
 Ọo l'echilabọ ndu dọ nno  
 bẹ Chipfu agojeru onu-oma  
 nkiya nọ;  
 mbu onu-oma ophu bu  
 ndzọ ojejeje.

## Ebvu-oma 134

Ebvu, aaguje mẹ a -nọdu  
 eje Jierúsalemu

- <sup>1</sup> Unu jaa Chipfu ajaja unube  
 ndu-ozì Chipfu g'unu ha;  
 unube ndu anọduje  
 ejeru Chipfu ozi l'ulo  
 nkiya l'enyashi.
- <sup>2</sup> Unu palia ẹka unu imeli l'ulo,

- dü nsö ke Chipfu;  
 kele iya ekele!  
 3 Ge Chipfu, bü onye meru  
 igwe mee mgboko gbë  
 lë Zayonu görü onu-oma  
 nü ngu.

### Ebvü-oma 135

- 1 Unu jaa Chipfu ajaja.  
 Unu tua Chipfu epha.  
 Unu tua ya epha; unubë ndu  
 ejeru Chipfu ozi;  
 2 mbü unubë ndu eje ozi  
 l'eze-ulo Chipfu;  
 më l'oma-unuphu Chileke  
 anyi.  
 3 Unu tua Chipfu epha kele  
 Chipfu dü ree.  
 Unu gä ebvü gude tua ya  
 epha; kele öo iphe,  
 gbaru nü bü ono;  
 4 kele Chipfu hotawaru  
 Jiéköpu g'ö buru nkiya;  
 mbü l'ö hatawaru  
 Ízurelu g'ö buru ndu o nwe  
 enwenwe gëdegede kpö.  
 5 Ö doru mü enya lë Chipfu  
 parü ëka;  
 mbü lë Nnajiuphu anyi  
 tüköru agwa l'öphu  
 kaköta shii.  
 6 Öo iphe, dü Chipfu ree bë  
 oomeje l'imigwe më  
 l'eliphe l'öphu.  
 Ö bukwarupho iphe,  
 dü iya ree bë oomeje  
 l'ime eze-enyimu më  
 l'ime ogbumini,  
 dü iya nü.  
 7 Igwe -nödu erwu  
 erwurwu bë oomeje

g'o shi l'eka igwe  
beru alì beru wata  
erwurwu.

Ọ ñọdu emeje g'egbigwe  
daa m'ọ ñọdu edze mini;  
tẹme ọ ñọdu emeje gẹ  
phẹphẹre shi lẹ  
mkpuru ẹka ọ tų-chiru  
iya wata ezizi.

<sup>8</sup> Iphe, bukpoọ ọkpara,  
nọ lẹ Ijiputu bẹ o  
chigbushiru;  
mbụ iphe, bụ ọkpara  
lẹ nemadzụ yẹle  
iphe-edobe.

<sup>9</sup> Iphe-ohumalenya iya;  
waa iphe, dų biribiri  
bẹ o mekotaru unubẹ  
ndu Ijiputu.

Ono bųru iphe, o gude  
hųa Fero yẹe  
ndu-ozi iya ahųhų.

<sup>10</sup> Ọhamoha,  
dų igwerigwe bẹ o  
chitsushiru;  
bya egbushikwaphọ ndu  
eze, ọkpehu dų.

<sup>11</sup> O gburu Sihonu,  
bụ eze ndu Amọru;  
bya egbua Ọgu,  
bụ eze ndu Beshanu;  
bya egbushikwaphọ eze  
ndu Kėnanu g'ẹphe  
hakọta.

<sup>12</sup> O woru alì phẹ washịaru  
ndu nkiya, bụ Ízurelu;  
g'ọ bųru okiphe phẹ.

<sup>13</sup> Ẹpha gųbe Chipfu anoje  
ojejeje.  
Ọphu a byadu azọha ngu  
azọha;  
e -shi l'ogbo sweru ogbo;



- 14 kele Chipfu a-harú ndibe  
iya enge;  
shi nno d̄a ndu ejeru iya  
ozi obu.
- 15 Agwa ndu ohozo bugbaa  
mkp̄la-ododo ȳe  
mkp̄la-ōchaa,  
b̄u iphe, nemadz̄u gude  
ēka mee.
- 16 Ephe nweru ōnu;  
ōphu ephe epfudu opfu.  
Ephe nweru ēnya;  
ōphu ephe aph̄udu  
iya uzo.
- 17 Ephe nweru nchi;  
ōphu ephe an̄udu iya iphe;  
t̄eme ōphu ō d̄udu unme ndz̄u,  
nō ph̄e l'ime.
- 18 Ndu agwō ph̄e n̄u a-d̄uepho  
g'ephe d̄u;  
mekpoo ndu dakoberu  
ph̄e n̄u.
- 19 Unub̄e ndibe Ízurelu;  
unu tua Chipfu ēpha.  
Unub̄e ndibe Er̄onu;  
unu tua Chipfu ēpha.
- 20 Unub̄e ndibe Lívayi;  
unu tua Chipfu ēpha.  
Unub̄e ndu ats̄u Chipfu ebvu;  
unu tua Chipfu ēpha.
- 21 G'a gb̄ekwa l̄e Zaȳonu  
tua Chipfu ēpha;  
mb̄u onye ono,  
bu l̄e Jierúsalemu ono.  
Unu jaa Chipfu ajaja.

### Ebvú-oma 136

- 1 Unu kele Chipfu ekele;  
kele ō b̄u onye oma.  
N-yemobu iya anoje jas̄u  
l'ojejoje.

- 2 Unu kele Chipfu ophu kakota  
agwa l'ophu shii.  
N-yemobu iya anoje jasu  
l'ojeje.
- 3 Unu kele Nnajiuphu ndu bu  
nnajiuphu l'ophu.  
N-yemobu iya anoje jasu  
l'ojeje.
- 4 Kele onye bu yebedua  
kpoloko emeje  
iphe-ohumalenya,  
paru aka.  
N-yemobu iya anoje jasu  
l'ojeje.
- 5 Onye bu mmamiphe iya be o  
gude mee eligwe.  
N-yemobu iya anoje jasu  
l'ojeje.
- 6 Mbụ onye woru mgboko-a  
l'ophu phushi l'eli mini.  
N-yemobu iya anoje jasu  
l'ojeje.
- 7 O buru iya meshiru eze  
iphe-a, emeje g'iphoro du-a,  
dugbaa biribiri-a.  
N-yemobu iya anoje jasu  
l'ojeje.
- 8 O meru enyanwu g'o chije  
leswe.  
N-yemobu iya anoje jasu  
l'ojeje.
- 9 O mee onwa; waa kpokpode  
g'ephe chije lenyashi.  
N-yemobu iya anoje jasu  
l'ojeje.
- 10 Unu kele onye chigbushiru  
ndu shi buru okpara  
le Ijiputu.  
N-yemobu iya anoje jasu  
l'ojeje.
- 11 Onye dufutaru unwu  
izurelu l'echilabo phe.

- N-yemobu iya anoje jasụ  
l'ojejeje.
- 12 Ọ buru l'ike ọkpụ iya bẹ o  
gude dufuta pẹ.  
N-yemobu iya anoje jasụ  
l'ojejeje.
- 13 Unu kele onye bụ iya  
kekaharụ Eze-onyimu  
Uswe-uswe ẹbo.  
N-yemobu iya anoje jasụ  
l'ojejeje.
- 14 Onye duru ndu Ízurelu  
ghabua ya ẹbo.  
N-yemobu iya anoje jasụ  
l'ojejeje.
- 15 O kpota Fero yẹe ndu ojogu  
iya l'ophu kporu ye lẹ  
Eze-onyimu  
Uswe-uswe ono.  
N-yemobu iya anoje jasụ  
l'ojejeje.
- 16 Unu kele onye bụ iya  
duru ndibe iya ije  
l'echiegu.  
N-yemobu iya anoje jasụ  
l'ojejeje.
- 17 Onye chigbushiru ndu  
eze, ọkpehu dughaa.  
N-yemobu iya anoje jasụ  
l'ojejeje.
- 18 Onye gbushikwarupho  
ndu eze, a maru ẹpha pẹ.  
N-yemobu iya anoje jasụ  
l'ojejeje.
- 19 O gburu Sihonu,  
bụ eze ndu Amoru.  
N-yemobu iya anoje jasụ  
l'ojejeje.
- 20 Ọ bya egbua Ogu,  
bụ eze ndu Beshanu.  
N-yemobu iya anoje jasụ  
l'ojejeje.

- 21 O woru alì phẹ nù onye  
 ọzo g'ọ bụru okiphe iya.  
 N-yemobu iya anoje jasụ  
 l'ojejoje.
- 22 Ọo onye-ozì iya, bụ Ízurẹlu  
 bẹ ọ nuru iya.  
 N-yemobu iya anoje jasụ  
 l'ojejoje.
- 23 Ọo ya nyataru anyibe ndu  
 adudu iphe, anyi bụ.  
 N-yemobu iya anoje jasụ  
 l'ojejoje.
- 24 Ọ bya anafuta anyi l'eka  
 ndu achi anyi lẹ njo.  
 N-yemobu iya anoje jasụ  
 l'ojejoje.
- 25 Ọ bya abukwaru iya pho  
 azukota iphemiphe,  
 no ndzu.  
 N-yemobu iya anoje jasụ  
 l'ojejoje.
- 26 Unu kele Chileke  
 k'imigwe ekele.  
 N-yemobu iya anoje jasụ  
 l'ojejoje.

### Ebvú-oma 137

- 1 Anyi rwuru l'aguga enyimu  
 Babilonu.  
 Anyi noshia anọ kwaa  
 ekwa;  
 ẹka anyi nyataru Zayonu.
- 2 Anyi woru une anyi kobe  
 l'ekali-oshi wilo l'eka ono;
- 3 kele anyi rwuru ẹka ono;  
 ndu kpuru anyi lẹ ndzu  
 su g'anyi gutaru phẹ  
 ebvu.
- Ndu ono, eme anyi omeliwe  
 ono su g'anyi metaru  
 phẹ emereme.

- Èphe sùru anyi: “Unu chónaa  
ebvu ndu Zayónu  
nanù gùaru anyi!”
- 4 Òlè ?dènu g'anyi e-shi pata  
ebvu, e gude ekutse  
Chipfu je agùaha l'ali  
ndu òhozo?
- 5 Ò -bùru lè mu zòharu  
gùbe Jierúsalemù;  
g'èka-ùtara mu zòhakwa  
iphe, ò maru ememe.
- 6 G'ire nyakùkwaru mu l'akpo;  
m'ò bùru lè mu ta  
anyataduru ngu;  
mbù m'ò bùkpodaa gùbe  
Jierúsalemù bè mu meru  
mkpùkpù, emeje g'èhu  
kachaa mu atso ùtso.
- 7 Gùbe Chipfu; nyatakwa iphe,  
ndu Edòmu meru mbòku,  
Jierúsalemù daru!  
Èphe tùkoru tùshia ùzu sù:  
“Unu tsukpòshia ya.  
Unu tsukpòshia ya tsurwua  
èka a tùru òkpa iya.”
- 8 Gùbe nwada Bábilónu;  
iphe, swiru ngu nù bùkwa  
òla-l'iswi.  
Èhu-ùtso bè a gòru nù onye  
a-pfù ngu ùgwo iphe,  
i meru anyi-a;
- 9 mbù onye a-nata ngu ùnwu,  
ì nwùru k'òphúú kùà  
pyaapyaa lè mkpuma.

## Ebvú-oma 138

### Ebvú, Dévidi deru

- 1 Gùbe Chipfu; mu e-gude obu  
mu g'ò ha jaa ngu ajaja.  
Mu a-nòdu l'iphe agwa gùà

- ebvu gude tua ngu epha.  
 2 Mu a-gha iphu l'uzo  
 eze-ulo ngu, du nsọ baaru  
 ngu eja.  
 Mu e-tu ngu epha kele i bu  
 onye n-yemobu;  
 bya aburu onye apfushije  
 ike l'iphe, i pfuru;  
 kele i meru epha ngu yee  
 opfu ngu;  
 ephe kakota iphemiphe l'eli.  
 3 Mu rakuru ngu; i za mu enu.  
 I meru okpehu nu mu;  
 bya emee mu; mu nyaaha ndu.  
 4 Iphe, bukpo eze  
 unwu-eliphe l'opfu a-ja ngu  
 ajaja gube Chipfu;  
 m'ephe numa opfu,  
 shi ngu l'onu.  
 5 Ephe e-gude uzo ke Chipfu  
 ono gu l'ebvu;  
 kele o-gbu-nwijnwii ke  
 Chipfu paru eka.  
 6 A makwaru-a le Chipfu no  
 l'ephekerephe;  
 obenu l'enya iya adujeele-a  
 l'eka ndu lwazeru nu no;  
 mbu le ndu eku onwophe  
 be ogbeje uzanya maru.  
 7 O to dudu m'obeta  
 mu je aghajaa echilabo  
 iphe-ehuka;  
 l'i kpuchiye mu-a;  
 o to dudu iphe, eme mu nu.  
 Imachije eka nwuphu ndu  
 gude ehu-eghu achi mu le  
 njo azu.  
 O buru ekutara ngu ono be  
 iigudeje dzoo mu.  
 8 Iphe, bukpo iphe,  
 Chipfu kweru ukwe le ya  
 e-me be oo-mekotaru mu.

Gube Chipfu; n-yemobu  
 ngu anoje jasụ l'ojejoje.  
 Jiko be buhakwa ozi ono,  
 i gude l'eka eje ono.

## Ebvu-oma 139

Ebvu-oma, Dévidi deru  
 nụ onye-ishi ebvu

- 1 Gube Chipfu; ị vọchawaru  
 mu obu.  
 Nta-a be ị mawaru ge mu gbaru.
- 2 Ị maru teke mu nọ anọ;  
 maru teke mu gbeshiru  
 agbeshi.  
 Ịinoduje ụzenya maru iphe,  
 mu ari lobu mu.
- 3 Ịmajeru teke mu agbeshi eje  
 iphe;  
 waa teke mu ze azee.  
 Iphe, bu ụzo mu l'ophu  
 dokotaru ngu enya.
- 4 Ọobujeru; opfu -bya eshi mu  
 l'onu futa;  
 l'ị makotawaru iphe,  
 mu abya epfupfu gube Chipfu.
- 5 Ị nọ-pheru mu mgburugburu  
 iphu l'azu.  
 I wowaru eka ngu byabe mu  
 l'ishi.
- 6 Amama ono, ị maru mu egube  
 ono dukwa mu oke biribiri;  
 bya apaa mu ephekerephe  
 k'ophu uche mu te erwudu iya.
- 7 ?Bụ awe be mu a-nọdu,  
 bu eka Unme nkengu anọdu?  
 ?Bụ awe be mu a-gbaru laa,  
 bu eka ị ti humaduru mu?
- 8 Mu -pheru lashia l'imigwe  
 be ị nowaa l'eka ono.  
 Teke mu jeru je agbaa

- iphe-azẹẹ l'ali-maa zẹẹ  
 bẹ ị nọkwa iya phọ.
- 9 Mu -chịta ñkù nchi-abọhu  
 kpube onwomu;  
 gude iya phee pherwua  
 ẹka ẹnyimụ sọ-beru gbụru;
- 10 mbụkponu l'ẹka ono bẹ  
 ịi-nọduelekwa-a edu mu;  
 tẹme ẹkutara ngu egudele  
 mu-a gudeshia mu ike.
- 11 Teke mu sụru lẹ mu maru-a  
 l'ọchii e-domi mu-a;  
 l'iphóró a-bụru-a ẹnyasi  
 nọ-pee mu mgburugburu;
- 12 l'ị bya egoshi l'ọchii ono  
 ta abụdu ọchii l'ẹka ị nọ.  
 Ẽnyashi ono taa bụkpodaru  
 ngu nụ ọchii.  
 Ẽnyashi ono a-nọduele-a  
 echi swachaswacha  
 g'echi-eswe;  
 kele gbụbedua bẹ ọchii  
 dulele-a g'iphóró.
- 13 Kele iphemiphe, nọ mu l'ime  
 ẹhu bụ ngu meru iya;  
 tẹme ọ bụru ngu dzezfuru  
 mu nanụ teke mu nọ l'ephó  
 ne mu.
- 14 Iphe, mu ekele ngu ekele  
 iya bụ l'i meru mu l'uzo,  
 dụ ebvú bya adụ biribiri.  
 Iphe, doru mu ẹnya  
 rengurengu bụ l'ozí,  
 iijeje dụ biribiri.
- 15 Ọkpu ọkpu, nọ mu l'ẹhu g'ọ  
 ha ta adụdu ọphu e domiru  
 ngu edomi teke ono,  
 eeme mu l'ọchii ono.  
 Teke mu nọ l'ime epho;  
 e mengashia mu dzezfua mu;  
 mu bụru nanụ-a;
- 16 bẹ i gudehawaa ẹnya



- ngu hūma ogwe mu ophu  
 adukpoda a g'e mewaru iya.  
 Ujiku ole, a tuburu lẹ mu  
 a-nọ l'eliphe-a bẹ e  
 dekotahawaru l'ekwo ngu;  
 tẹme mu bebe nọo g'ọ ka  
 mma l'ọo ujiku ono nanu.
- 17 Egube g'oriri, iiriru mu  
 du-bekwanu mu mkpa;  
 gube Chileke.  
 A -chikobe iya bẹ o pakwaru  
 eka apaa.
- 18 O -buru gẹ mu wata iya  
 agugu bẹ o kakwa eja,  
 nọ l'ali l'otu.  
 Mu -shikpo lẹ mgbenya tehu;  
 mu -tehushia mu lẹ ngu  
 anodukwa g'anyi nọ.
- 19 Gube Chileke;  
 o du mu g'a su l'i tukoru  
 ndu ejo-iphe gbushia.  
 Unu paru mu haa;  
 unube ndu ono,  
 egbu ochi anoduje agu  
 g'onye mini agu ono.
- 20 Ndu ono anoduje achiru  
 gube Chileke ejo idzu;  
 tẹme ephe nodu achi ngu  
 lẹ njo;  
 bya eku ngu oku-eswe.
- 21 Iphe, bu ndu kporu gube  
 Chipfu ashị bẹ mu  
 kpokwarupho ashị;  
 tẹme iphe, bukpo ndu  
 kwolihuru etso ngu opfu  
 bẹ mu anoduje  
 akpo-yiru ukuvu.
- 22 Ephe du mu ashị mebyi  
 adudu;  
 mbu lẹ mu agukobeje  
 phe lẹ ndu ohogu mu.
- 23 Vochanaa okpoma mu jiko

Chileke;  
 maru iphe, dū mu l'obu.  
 Hūnaa mu ama maru g'oriri  
 mu gbaru.  
 24 Lēnaa mu ɛnya maru;  
 ?o dūru ɛka ɔzo  
 kpoŋwehuru mu?  
 O -būru l'o dūru;  
 jiko duphutanu mu azu  
 l'uzo ndzu ojejeje.

## Ebvu-oma 140

Ebvu-oma, Dévidi deru  
 nu onye-ishi ebvu

- 1 Nafutanu mu l'eka ndu  
 ejo-iphe jiko Chipfu.  
 Letanu mu ɛnya ge mu  
 ta adaba l'eka ndu emeje  
 nemadzu mkpawere.
- 2 Ndu buɛpho ejo-iphe be ɛphe  
 anɔduje achi idzu iya  
 l'ime obu phe;  
 bya abuerupho ogo be ɛphe  
 anɔduje akpali  
 mboku-mboku.
- 3 Ire phe be ɛphe emeje  
 l'ootsu nko g'ire ejo agwo.  
 Opfu, eshije phe lonu nodu  
 egbu egbugbu g'eru ogiji.
- 4 Gudeshinaa mu jiko Chipfu;  
 ge mu ta adaba l'eka  
 ndu ejo-iphe.  
 Phufunu mu l'eka ndu emeje  
 nemadzu mkpawere;  
 mbu ndu achu uzo,  
 ɛphe e-shi chikota mu okpa!
- 5 Ndu eku onwophe  
 gbabewaru mu onya.  
 ɛphe gebecharu ugbu  
 phe kwaberu mu;

- bya atua igbudu dokaa l'iphe,  
 bukpoo ọzo, mu eshi eshishi.
- 6 Gube Chipfu; iphe,  
 mu epfuje bu l'oo ngu  
 bu Chileke mu.  
 Jiko Chipfu; numanu mkpu  
 ono, mu echi su g'i  
 menaru mu eze-iphe-oma ono.
- 7 Gube Chipfu, bu Nnajiuphu  
 anyi;  
 gube onye ike du;  
 bya aburu onye adzoje  
 mu nu;  
 gube onye egbobutaje  
 ishi mu me a -nodu alwu ogu;
- 8 be mekwaru ndu ejo-iphe  
 iphe ono, agu phe nu ono;  
 jiko Chipfu.  
 Bekwekwa g'izdu, ephe achi  
 jee g'ephe achi iya.  
 Odumeka be ephe a-watakwa  
 eku onwophe.
- 9 G'iphe, e-rikpute ndu ono,  
 kepheru mu  
 mgburugburu ono  
 ishi bukwaru iphe-ehuka,  
 ephe gude ire phe  
 kpataru onwophe.
- 10 G'icheku-oku, ata pfpufufu  
 bukwaru iphe, aa-zube  
 phe l'ishi.  
 G'a pakwaru phe chie echie  
 l'oku, enwu  
 phoophoophoo;  
 mbu l'ime nsu,  
 ephe ta abyadu afutaba afuta.
- 11 Ge ndu njo-opfu ta  
 angukwaru anguru l'ali-a.  
 G'ejo-iphe chikwa nta ndu  
 mkpawere ono.
- 12 Mu maru-a le Chipfu ahajeru  
 onye ukpa enge;

tẹme ọ nọdu emeje g'ikpe  
 kalẹru onye adudu g'ọ  
 du iya.

- 13 Gẹ mu gbukwaa ya tororo;  
 ndu pfuberekoto e-kelekwa  
 ngu ekele;  
 tẹme ọ buru l'iphu ngu be  
 ndu obu phe guru iphoro  
 e-buru eburu.

## Ebvu-oma 141

### Ebvu-oma, Dévidi deru

- 1 Gube Chipfu; mu araku ngu.  
 Gbanaaru mu mkpu  
 egwegwa.  
 Numanu olu mu me mu  
 raku ngu.
- 2 G'epfupfu, mu epfu anu ngu  
 shikwa ngu mkpo  
 g'unwu-isensu.  
 G'eka, mu chiliru imeli epfu  
 anu ngu dukwa ngu ganu,  
 e gburu wotaru ngu  
 l'uzenyashi.
- 3 Yenu ndu nche g'ephe chee  
 onu mu nche;  
 jiko Chipfu.  
 Jiko chenu ogbogboromonu  
 mu nche.
- 4 Te ekwekwa g'obu mu  
 ghaaru eme ejo-iphe iphu;  
 mbu ge mu tsoru ndu  
 ejo-iphe wata eme  
 ejo-ememe;  
 ophu mu etsokwaru phe  
 ria iphe,  
 ephe kwakoberu mu shi  
 nno rirwu onwomu.
- 5 G'onye pfuberekoto chia  
 mu ro iphe.

- Ọo-du mu ọọ g'ọ bụ iphe-oma  
 bẹ o meru mu.  
 G'ọ baaru mu ọọ mba.  
 Ono a-gbero du mu g'ọ bụ manu,  
 eshi mkpo bẹ ọowu  
 mu l'ishi.  
 Ishi mu bẹ ọo-gbenu  
 atsọ ntumatu.  
 Obenu ọọ mu anọdujeepfo epfu  
 anu ngu sụ g'i mee g'ejo  
 idzu ndu ejo-iphe ta vu.  
 6 Ndu-ishi phe bẹ ee-nwufu  
 ọọ mkpakponu eka  
 ephe degeru.  
 Ọo ya bụ ge ndu ejo-iphe  
 amaru l'iphe,  
 mu pfuru bẹ  
 mu pfuru  
 nhamunha.  
 7 Ephe asu: "Ọo g'aakoje okoro  
 gbubashia ali-a;  
 bụ g'a tukashiru okpu anyi  
 nanu nanu l'onu ilu."  
 8 Obenu ọọ mbedua bụ l'eka  
 i no bẹ mu daberu enya  
 gube Chipfu,  
 bụ Nnajiuphu anyi.  
 Ọo l'ime ngu bẹ mu gbabarụ  
 je anodu ezeru ndu.  
 Jiko te enwukwaru mu  
 haaru onwu.  
 9 Mena ge mu ta adalahu l'onya,  
 ephe gbaberu mu;  
 mbu l'igbudu,  
 ndu ejo-iphe turu  
 doberu mu.  
 10 Ge ndu ejo-iphe dalahukwa  
 l'ugbu, ephe geberu.  
 Ge mbedua ghata phe g'ọ to  
 du iphe, e-me mu nu.

## Ebvu-oma 142

Évù, Dévidi kwarù teke o  
 nọ l'ogba epfu anọ Chileke

- 1 Mu chiru mkpu chishia ya  
 ike chiku Chipfu.  
 Iphe, mu chidoru mkpu ono  
 bu g'o meeru mu  
 eze-iphe-oma.
- 2 Mu woru iphe, atsụ mu  
 l'ehu woru dooru iya;  
 mbụ lẹ mu woru iphe-ehuka,  
 mu eje g'ọ ha dokotaru iya.
- 3 Teke ike abvukpowa mu  
 abvubvu bu gubedua  
 aboru mu uto.  
 L'uzo, mu eshikpoo eshishi  
 be ndiphe gbakaerupho  
 onya ge mu nmalahu.
- 4 Lenaa enya l'ekutara mu;  
 huma lo to dudu onye  
 akpa mu ishi.  
 Mu te nwedu aka bu:  
 mu -gbabata iya;  
 mu anodu iya zee ndzu;  
 noo kele o to dudu onye  
 akpa ndzu mu ishi.
- 5 O buru gube Chipfu be  
 mu chikuru le mkpu.  
 Mu suru-a: "Oo l'ime ngu  
 be mu anoduje ezeru ndzu;  
 teme o buru ngu bu  
 okiphe nkemu l'ali ndu  
 no ndzu."
- 6 Ngabenu nchi numa mkpu,  
 mu echi;  
 kele o duru iphe,  
 atsushikpo mu l'ehu ike.  
 Jiko nafutanu mu l'eka  
 ndu achi mu le njo;  
 kele ephe ka mu okpehu.
- 7 Gbafutanu mu le mkporo-a,

mu nõ-a;  
 k'ophu mu e-kele ngu  
 ekele iya.  
 Oo ya bụ ọe ndu pfuberekoto  
 anọ-pee mu mgburugburu;  
 noo kele i nwubenukaru  
 mu ọnya.

## Ebvü-oma 143

Ebvü-oma, Dévidi deru

- 1 Gube Chipfu;  
 numanu epfufu, mu epfu  
 anu ngu.  
 Ngabenu nchi numa mkpu,  
 mu echi su g'i meeru  
 mu eze-iphe-oma.  
 Eshinu i bu onye pfuberekoto  
 bya aburu onye apfushije  
 ike l'iphe, i pfuru;  
 jiko zanu mu enu!
- 2 Jiko te ekpeshinu mube  
 onye-ozu ngu ikpe;  
 kele o to dudu nemazu,  
 dzu ndzu, pfuberekoto  
 l'iphu ngu.
- 3 Onye ohogu mu chiru  
 mu gude;  
 bya echita mu tu l'ali;  
 bya emee mu;  
 mu nodu l'eka gbakotaru  
 ochii g'akahu maa,  
 nwuhuru le ndiche.
- 4 Noo g'o gude ike wata  
 mu abvubvu.  
 Obu wata mu aku photophoto.
- 5 Mu nyata g'o shi aduje  
 teke ndiche.  
 Mu bya anodu nggujungguji  
 rihaha iphe, bukpo iphe,  
 i mekotaru anyi;

bya elerwebaa ɛnya ree  
l'iphemiphe,  
i gude ɛka ngu mee.

6 Mu chiliaru ngu ɛka mu labo  
imeli.

Egu ngu guahaa obu mu  
g'egu-mini anoduje agu  
ali-okponku-a.

7 Zanu mu ɛnu ɛgwegwa jiko  
Chipfu;  
kele ike abvuwaa mu l'ele  
ɛnya ngu.

Be domikwaru mu iphu  
ngu edomi;  
odumeka be mu a-dukwa  
ge ndu e liru l'ilu.

8 O -rwutashia echele ge  
mu numanu opfu,  
a-nodu akoru mu ke  
n-yemobu ngu;  
kele oo ngu be mu dakoberu.

Jiko goshinu mu uzo,  
mu e-shije;  
kele oo l'eka i no be obu  
mu no.

9 Nafutanu mu l'eka ndu ohogu  
mu phe jiko Chipfu;  
kele oo l'ime ngu be mu  
domiru onwomu.

10 Zia mu iphe, bu uche ngu  
ge mu meje;  
kele oo ngu bu Chileke mu.

Jiko ge Unme nkengu,  
bu okpobe Unme ono  
dunaa mu shia uzo,  
pfuru nhamunha.

11 Kebenu ndzu mu l'oma jiko  
Chipfu; g'epha ngu apfuru.

Gudenu apfubekoto  
nkengu nafuta mu  
l'iphe-ehuka-a, mu eje-a.

12 Gudenu kele i yeru mu obu;



mee g'õnu buru ndu ọhogu  
 mu kpurukudukuu.  
 Lì tuko ndu achi mu le njo  
 g'ephe ha mee g'ephe  
 buru mkpurupyata;  
 noo kele mu bu  
 onye ejeru ngu ozi.

## Ebvu-oma 144

Ebvu, Dévidi deru

- 1 G'e tua Chipfu,  
 bu agbara-mkpuma  
 mu epha.  
 Oo yebedua ezi mu  
 g'eka shihu mu ike l'ogu;  
 mbu l'oo yebedua  
 ezi mkpushi-eka mu  
 g'aalwuje ọgu.
- 2 Chileke yeru mu obu;  
 teme o buru onye mu  
 agbabaje l'ime iya je  
 edomia ndzu mu.  
 O bu onye egbobutaje mu nu;  
 bya abukwarupho onye  
 adzoje mu nu;  
 teme o nodu emeje  
 unwu-eliphe g'ephe  
 nodu mu le mkpula.
- 3 Gube Chipfu; ?bu gunu be  
 nemadzu bu ke g'i  
 rivuje iya?  
 ?Bu gunu be unwu-eliphe  
 bu ke g'i letaje phe enya?
- 4 Nemadzu dūepho g'udzu  
 onu.  
 Eswe ndzu iya aduje g'ibvu  
 oshi, abujeru;  
 o -kpoo upfu nwanshi  
 l'a huma-buhu iya.
- 5 Chijanaa igwe tarara

jiko Chipfu.

Shi l'eka ono nyizeta bya  
apfuru l'eli úbvú;  
g'úbvú awata akpu  
tututuutu.

6 Tɔnaa egbigwe gude chikashia  
ndu ohogu mu achikashi.

Gbaa phe apfu ngu gude  
mebyishia phe.

7 Gbenu l'ephekerephe eka ono,  
i no ono machia eka  
dzota mu.

Nafuta mu l'echi  
asogaso-enyimu;  
mbu l'eka ndu shi ohozo.

8 Ndu bu iphe,  
jiru phe onu pyimu bu  
adzú úka;  
teme ekutara phe buru iphe,  
ephe egudeje iya eme  
bu ughoshi.

9 Mu a-gu ebvu ophúú nu  
ngu gube Chileke.

O buru ogelenda,  
a kparu l'udo iri be mu  
a-kú gude guaru ngu  
ebvu obu;

10 mbu gube onye emeje g'eze  
lwua ugu lwu-kpee;  
bya aburu onye anafutaje  
onye-ozí iya,  
bu Dévidi g'e te gude  
ogu-echi nmagbua ya.

11 Jiko dzonaa mu!  
Nafutanu mu l'eka ndu  
ohozo;  
mbu ndu bu iphe,  
ejije phe onu pyimu bu  
adzú úka;  
teme ekutara phe buru iphe,  
ephe egudeje iya eme  
bu ughoshi.

- 12 Mee g'ünwu nwa nwoke,  
 anyi nwuru dụ g'iphe,  
 a kuru akuku teke ephe  
 bu nwata.  
 G'ephe dụ g'iphe,  
 a kuru akuku,  
 e letaru enya mee g'o vu  
 okpobe evuvu.  
 Teme l'i mee g'ünwu anyi  
 nwanyi dụ g'igbulo,  
 a kpuru; o nodu ama mma;  
 e gude iya mee unuphu  
 ibe eze;  
 o nodu ama ntumatu.
- 13 Li mekwapho ge nri,  
 dulaje iche iche ji oba  
 anyi ejji.  
 Teme l'i mekwapho g'aturu  
 anyi zushia azuzu ike;  
 k'ophu oogudeje unubuku  
 aturu ka shii apha  
 g'apha l'egu adobeje iya.
- 14 Eswi anyi eshijekwapho  
 ike vuje oke ivu.  
 Etsukposhi igbulo mkpukpu  
 anyi ta aduhedu.  
 Ophu o duedu ndu  
 akpukwadu anyi le ndzu;  
 ophu o dukwa iphe,  
 e-me k'ophu aa-ra ejo  
 ekwa tsoru uzo ndu anyi.
- 15 Ehu-utso be a goru nu ndu  
 o du nno l'ibe phe.  
 Ehu-utso be a goru nu ndu  
 Chileke phe bu Chipfu.

## Ebvü-oma 145

### Ebvü-ekele, Dévidi deru

- 1 Mu a-nodu ekutse gube  
 Chileke mu, bu eze.

- Mu a-nodu etu ngu epha jasu  
l'ojejoje.
- 2 Mu a-nodu etu ngu epha  
mboku-mboku.  
Mu a-ja ngu ajaja jasu  
le tuutuutuu le  
mjimiimii.
- 3 Chipfu paru eka;  
o buru iya be o gbaru  
g'a kachaa etu epha.  
G'o habe shii ta adudu onye  
suru iya amaerberu.
- 4 Ogbo, nonu a-nodu atujeru  
ogbo,  
etso phe nu onu iphemiphe,  
iimekota.
- Ephe a-kojeru phe iphe,  
du biribiri, iimeje.
- 5 Ephe a-nodu atu onu  
g'iigbube nwjinwii  
waa g'akwabẹ ubvu ngu  
habe shii.  
Mbẹdua a-nodu nggujungguji  
ria g'iphe,  
iime du-be biribiri.
- 6 Ephe a-nodu atu onu g'ike  
du-be l'ozu, du biribiri, iije.  
Mbẹdua atukwapho onu iphe,  
paru eka iimekota.
- 7 G'ephe ha a-tuko pfukashia  
g'i du-be ree.  
Ephe abya egude ehu-utso gua  
apfubekoto ngu l'ebvu.
- 8 Chipfu bu onye emeje  
eze-iphe-oma bya aburu  
onye aphuje obu-imemini.  
Ehu te eghujedu iya eghu  
egwegwa;  
teme o nodu eyeje obu  
yegharu iya eka.
- 9 Chipfu nwuberu onyemonye  
enya.

- Iphemiphe, o mekpõru ememe  
 bẹ ọophujeru obu-imemini.
- 10 Iphemiphe, i meru ememe  
 a-nọdu aja ngu ajaja  
 gube Chipfu.  
 Ndu duru ngu nsọ a-nọdu etu  
 ngu epha.
- 11 Epe a-tu onu g'eka i bu eze  
 du-be biribiri;  
 bya atua onu g'okpehu ngu  
 habe shii;
- 12 k'ophu onyemonye  
 a-makotaru iphe,  
 paru eka iimeje;  
 bya amakwarupho g'eka,  
 i bu eze du-be akpabiri.
- 13 Ii-buru eze jasụ lojejoje;  
 bya achia; e -shi l'ogbo  
 sweru ogbo.  
 Chipfu bu onye apfushije ike  
 l'iphemiphe, o kweru  
 ukwe iya;  
 teme o yekota iphemiphe,  
 o meru ememe obu.
- 14 Iphe, bukpo ndu abya  
 ada iko be Chipfu abujeru  
 agbarike phe;  
 bya apalije ndu e wozeru ali.
- 15 G'ephe ha atukoje ele ngu  
 enya l'eka;  
 teme i nodu anujekwanu  
 phe nri l'orwuberu iya.
- 16 Iisaje obochi-eka ngu  
 gude mee g'epho ji  
 iphemiphe, no ndzu.
- 17 Chipfu pfuberekoto  
 l'iphemiphe, oome;  
 teme o yee iphemiphe,  
 o meru ememe obu.
- 18 Chipfu anoduje ndu rakuru  
 iya nu ntse;  
 mbu ndu gude ire-lanu

raku iya.

- 19 Ndu atsụ iya ebvu bẹ  
oomejeru iphe, agụ phẹ nụ;  
tẹme ọ nọdu anụmaje mkpu,  
ẹphe echi je adzota phẹ.
- 20 Onyemonye yeru Chipfu  
obu bẹ ọonoduje eche nche;  
obenu lẹ ndu ẹjo-iphe bẹ  
oo-mebyishikota.
- 21 Ọnu mu bẹ mu e-gude etu  
Chipfu ẹpha.  
G'iphemiphe, o meru dobe  
lẹ mgboko kelejekwa  
iya ekele jasụ lẹ tuutuutuu  
lẹ mijimiimii.

### Ebvu-oma 146

- 1 Unu jaa Chipfu ajaja.  
Obu mu; jiko jaa Chipfu ajaja.
- 2 Mu a-nọdu aja Chipfu ajaja  
jasụ gẹ mu a-nọ-beru.  
Mu a-nọdu agụ ebvu gude  
etu Chileke mu ẹpha  
jasuru asuru.
- 3 Ba kpọkwaru obu yeru  
ndu-ishi;  
mbụ nemadzụ mmanụ,  
ta adudu ike adzota  
ndzụ nemadzụ.
- 4 Ndu abujeru; unme,  
nọ phẹ l'ime -phefuwa;  
ẹphe alaphu azụ je  
aburu ẹja.  
Ọ buru mbọku ono gẹdegede  
bẹ iphe,  
ẹphe chiru idzu ememe  
abvukotaje.
- 5 Ẹhu-utso bẹ a gọru nụ onye bụ  
Chileke kẹ Jiékọpu bẹ  
eyejeru iya ẹka;  
mbụ onye bụ ẹka obu iya

- aduje bu le Chipfu,  
 bu Chileke iya;
- 6 mbu Chileke ono,  
 bu onye meru igwe mee ali;  
 bya emee eze-onyimu;  
 waa iphemiphe, no iya nu;  
 bya aburu onye apfushije  
 ike l'ire-lanu jasu l'ojejoje.
- 7 Ndu eeme ewere be  
 oohajeru enge;  
 teme o nodu anuje ndu  
 egu agu nri.  
 Chipfu emeje ge ndu a  
 turu mkporo nweru  
 onwophe.
- 8 Chipfu emeje ge ndu  
 atsü ishi wata aphu uzo.  
 Ookulije ndu e wozeru ali;  
 teme o nodu eyeje ndu  
 pfuberekoto obu.
- 9 Chipfu anoduje eche ndu  
 lwaru alwalwa nche.  
 O buru iya egudeje ndzu  
 ndu enwedu nna ye  
 unwanyi, ji phe anodedu;  
 obenu l'uzo ndu ejo-iphe  
 be oogbuchije.
- 10 Chipfu a-buru eze jasu l'ojejoje;  
 mbu le Chileke ke gube  
 Zayonu a-buru eze;  
 e -shi l'ogbo sweru ogbo.  
 Unu jaa Chipfu ajaja.

### Ebvü-oma 147

- 1 Unu jaa Chipfu ajaja.  
 Agü ebvü gude ekele Chileke  
 anyi ekele du ree.  
 Aja Chipfu ajaja bu iphe  
 ehu-utso; bya aburu iphe,  
 rwuberu iya nu.
- 2 Oo Chipfu gude aka iya

akpú Jierúsalemú.

Nta-a bẹ o rwutawaru ndu  
Ízurelu, a kpuru lẹ ndzú  
gude alwaphuta azú.

3 Ọ bú onye emeje gẹ ndu obu  
phẹ tsuru gwogiri-gwogiri  
nọdu ndzú;  
tẹme ọ nọdu asachajẹ phẹ  
ọnyá ẹka e mekarú  
phẹ iphe.

4 Ọo ya guru kpokpode ọgu  
maru ole, ọ gbaru g'ọ dọ;  
bya agukota phẹ ẹpha  
l'ehu l'ehu.

5 Chipfu k'anyi parú ẹka;  
tẹme ike iya bọru ike,  
nyiberu anyibe.  
Nkwamenya nkiya ta adọdu  
onye sọru atọ ọnu g'ọ  
habe shii.

6 Ọo Chipfu gude ndzú ndu  
wozeru onwophe alí;  
obenu lẹ ndu ẹjo-iphe bẹ  
oochitajẹ tọ l'alí.

7 Unu gúnna ebvú gude kele  
Chipfu ekele.  
Unu gudenú une kọaru  
Chileke anyi nkwa.

8 Ọo ya gude urwukpu  
kwechia akpaminigwe  
l'ophu.  
Ọ nọdu edzejeru eliphe mini;  
bya emeje g'ẹswa rwushia  
l'eli úbvú.

9 Ọo ya anú iphe-edobe nri;  
bya abọru iya anúje unwu  
okpoko-ọhà nri m'ẹphe  
raa ọrà iya.

10 Ọ tọ bọdu ike, dọ l'inya emeje  
g'ehu tsọo ya útso;  
ọphu ọ bọdu apata-ọkpa  
nemadzú emeje g'ehu



- tsọo ya uto.
- 11 Ndu emeje g'ehu tsọo Chipfu  
 uto bu ndu atsụ iya ebvu;  
 mbu ndu bu ẹka ẹnya  
 phe aduje bu le n-yemobu  
 Chileke.
- 12 Gube Jierusalemu;  
 janaa Chipfu ajaja.  
 Tuna Chileke ngu epha  
 gube Zayonu.
- 13 Kele oo ya emeje g'okpokuu  
 onu-abata ngu shihu ike;  
 teme o nodu agojeru onu-oma  
 nu ndu no ngu l'ime.
- 14 Oomeje ge nchi du doo  
 loke ali ngu l'ophu;  
 teme o nodu egudeje  
 okpobe ereshi azu-ji  
 ngu epho.
- 15 Oo iphe, o suru g'o mee  
 l'eliphe emeje.  
 Opfu ngu abujeru; epfuzeta,  
 iipfuzeta iya lo tuko  
 mgboko l'ophu ngadzuru.
- 16 O bu onye ewojeru  
 aka-mini-sunoo phushi  
 g'onye phushiru ukpo;  
 bya eworu ijimini  
 phekaa l'o dzuru ekameka  
 g'onye phuru ntụ.
- 17 Ookpotaje akamini jia g'onye  
 jiru eja.  
 ?Bu onye a-du ike nodu g'oyi  
 akamini ono tsua ya?
- 18 Olobule-a opfu-onu be  
 oopfuje;  
 akamini ono adazehu.  
 Oomeje ge pherephere  
 wata ezizi.  
 Pherephere ono -ziahaepho;  
 akamini ono adazehu wata  
 aso asoso.

- 19 Opfu iya bẹ o kpuhawaru  
 goshi Jiékọpu;  
 mbụ l'ikpe, o kperu;  
 yẹ iphe, ọ toru ọkpa iya  
 su g'e tsoje bẹ o  
 kpuhawaru goshi Ízurelu.
- 20 Ọ tọ dudu ọhozo, o mejewaru  
 ẹgube ono.  
 Ndu k'ono ta amadu ikpe,  
 o kpewaru dobe.  
 Unu jaa Chipfu ajaja.

### Ebvu-oma 148

- 1 Unu jaa Chipfu ajaja.  
 Unu shi l'imigwe jaa Chipfu  
 ajaja.  
 Unu nọdu l'ẹka kachaa  
 ephekerephe jaa ya  
 ajaja.
- 2 Unubẹ unwu ojozi iya l'ophu;  
 unu jaa ya ajaja.  
 G'iphe, bukpo ojogu imigwe  
 l'ophu jaa ya ajaja.
- 3 Unu jaa ya ajaja;  
 unubẹ ẹnyanwu yẹ ọnwa.  
 Unu jaa ya ajaja;  
 unubẹ kpokpode,  
 egbu nwjinwii.
- 4 Unu jaa ya ajaja;  
 unubẹ akpaminigwe;  
 mekpoo unubẹ mini,  
 nogharu akpaminigwe  
 anogha.
- 5 Unu tuko g'unu ha jaa Chipfu  
 ajaja;  
 kele ọo ya suru g'unu du;  
 unu du.
- 6 Ọ buru iya suru unu l'owa-a  
 ẹka unu a-nodugbaa  
 baa.  
 Ọ buru ẹka ọ suru g'unu

- noḍu be unu noḡbaa.  
 Unu je a-noḍu iya jasul l'ojejoje.  
 Iphe ono, o toru okpa iya  
 ono ta abyadu echihu  
 echihu.
- 7 Unu noḍunu l'eliphe jaa  
 Chipfu ajaja;  
 unube iphe, dugbaa biribiri,  
 o meshiru dobe leze-enyimu;  
 waa ophu noḡbaa le  
 mini-ime-ali.
- 8 Unu jakwapho Chipfu ajaja;  
 unube egbigwe;  
 me aka-mini-sunoo;  
 mekpoo urwukpu;  
 waa oke pherephere,  
 emeje iphe, o pfuru.
- 9 Unube oke ubvu me iphe,  
 bu ubvu nshii; waa oshi-omi;  
 mekpoo oshi sida;  
 unu jakwaa ya pho ajaja.
- 10 Ganu-egbudu; me iphe-edobe;  
 waa unwehu; mekpoo enu,  
 ephe l'eli tukokwapho  
 jaa ya ajaja.
- 11 Unube ndu eze, no l'eliphe;  
 me unube iphe, bu ohamoha;  
 waa unube ndu-ishi;  
 me iphe,  
 bu ndu eze mgboko l'ophu;
- 12 me unube unwokorobya;  
 waa unube unwumgboko;  
 teme waa unube ndu bu  
 ogerenya me unwegirima;  
 unu jajekwa iya  
 pho ajaja.
- 13 Unu toko g'unu ha jaa Chipfu  
 ajaja;  
 kele oo epha iya kpoloko  
 bu epha, kakota l'eli.  
 Odu-biribiri iya dagharu  
 mgboko l'ophu bya

adaghaa imigwe.

14 O meru g'onye ike du futaru  
ndu nkiya.

O buru onye ono be ndu  
duru iya nsò,  
bu ndu Ízurelu anòduje  
aja ajaja ono;  
mbu ndu ono,  
du iya l'obu ono.

Unu jaa Chipfu ajaja.

### Ebvu-oma 149

1 Unu jaa Chipfu ajaja.

Unu guà ebvu òphúú nù  
Chipfu.

Unu guà ebvu gude jaa ya  
ajaja l'eka ndu duru  
iya nsò dzukoberu.

2 Ge ndu Ízurelu tee eswa  
l'eka onye meru phe nu.  
G'onye eze ndu Zayonu mee  
g'ehu tsoo phe utso.

3 G'ephe tuko gude ete ebvu  
jaa epha iya ajaja.  
Teme ephe egude nkwa yee  
une gude guà ebvu  
nu iya;

4 noo kele Chipfu be ndibe  
iya du l'obu.  
Ndu wozeru onwophe ali  
be ookpubeje ndzota  
g'okpu-eze.

5 Ge ndu duru Chileke nsò teje  
eswa l'egube úbvú owa-a,  
a kwaberu phe-a.

Teme ephe agukwapho ebvu  
ehu-utso m'ephe ze azee  
l'iphe-azee phe.

6 G'aja Chileke ajaja buru iphe,  
ephe a-kpuru l'onu.

Teme ephe atsua ogu-echi,

- atsù akpatiphu labò l'èka;  
 7 gude iya je agwata ndu  
 òhozo ụgwò iphe,  
 ẹphe meru phe;  
 bya egude iya nua  
 unwu-eliphe aphu.
- 8 Teme ẹphe egudekwa iya  
 phò tua ndu eze  
 phe ẹgbirigba;  
 mbu tua ndu nweru  
 enya mkpọro.
- 9 Oo ya bu g'ẹphe eshi nno  
 meeḅekota iphe,  
 onye-ikpe deru l'ekwo  
 su g'ẹphe mee ndu ohogu  
 phe ono.
- Owa-a bu iphe, o gude kwabe  
 ndu duru iya nsò  
 ono ùbvù.
- Unu jaa Chipfu ajaja.

### Ebvú-oma 150

- 1 Unu jaa Chipfu ajaja.  
 Unu nòdu l'ulo Chileke,  
 du nsò jaa ya ajaja.  
 Unu nòdu l'imigwe,  
 o gude okpehu iya mee  
 jaa ya ajaja.
- 2 Unu jaa ya ajaja k'iphe,  
 parù ẹka o meshigbaru.  
 Unu jaa ya ajaja;  
 kele apa ẹka nkiya  
 nyiberu anyibe.
- 3 Unu gbua opu gude jaa  
 ya ajaja.  
 Unu akpoo une yee ogelenda  
 gude jaa ya ajaja.
- 4 Unu kua nkwa tee ebvu  
 gude jaa ya ajaja.  
 Unu kua ogelenda phua upyi  
 gude jaa ya ajaja.

- <sup>5</sup> Unu k̄a eze ogena,  
ada dunguu-dunguu  
gude jaa ya ajaja.  
Unu egude ogena,  
ada gengugengu gude  
jaa ya ajaja.
- <sup>6</sup> G'iphemiphe, b̄kpoo iphe,  
at̄ unme t̄ko jaa  
Chipfu ajaja.  
Unu jaa Chipfu ajaja.